


Tũpa Ñehengagüer



New Testament in Guarayu (BL:gyr:Guarayu)

Tũpa Ñehengagüer

New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
c27c2d97-c359-59f5-b367-83efb2e33739

Contents

SAN MATEO	1
SAN MARCOS	41
SAN LUCAS	65
SAN JUAN	107
LOS HECHOS	137
ROMANOS	174
1 CORINTIOS	190
2 CORINTIOS	207
GALATAS	217
EFESIOS	223
FILIPENSES	228
COLOSENSES	232
1 TESALONICENSES	236
2 TESALONICENSES	240
1 TIMOTEO	242
2 TIMOTEO	247
TITO	250
FILEMÓN	252
HEBREOS	253
SANTIAGO	265
1 SAN PEDRO	269
2 SAN PEDRO	274
1 SAN JUAN	277
2 SAN JUAN	281
3 SAN JUAN	282
SAN JUDAS	283
APOCALIPSIS	285

MATEO REMBICUACHIA JESUS RECOUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴ Aram rahir Aminadab, Aminadab rahir Naasón, Naasón rahir evocoyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoyase Salomón, Urías rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶ Jacob rahir José, María mer, María evocoyase Jesús sí secói. Ahe imembri Tüpa Rembiporavo Poropísirosar.

¹⁷ Evocoyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota raviter Poropísirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyesu yuvirecoiêhi viteseve rumo, Espíritu Santo pīratasa pipe imembi. ¹⁹ Evocoyase José, imevi, ahe ava seco catupri vahe, “Tapoiño ayase ava icuaêhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰ Aipo opihañemoñeta reseve oque. Iquerve rumo, Tüpa rembiguai oyemboyecua chupe aipo ehi: “José, David suindar, eresiquiyei rene María rese nde menda água. Esepia, Espíritu Santo sui ou imembirã. ²¹ María virecose omembri, pemondora sererguã Jesús. Esepia, ahe oipísirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehúsar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(‘Tüpa yande rese ité secói’ oya aipo ehi).

²⁴ Omahese José, Tüpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndoyapo vitei eté rumo mbahe oyesu yuvireco. Yipindar imembira rane ité, ahese José omondo Jesús sererguã.

2

Ava yasitata rese oyembohe vahe ari sêsa cotindar yuviraso pītani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sêsa coti sui Jerusalén ve. ² Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sêsa coti sui imboeteli água—ehi yuvireco chupe.

³ Aipo ihese, mborerecuar Herodes oyembosiquiye tēi, ava Jerusalén pendar avei êgüe ehi pāve yuvireco. ⁴ Iyavei cūrteimi opa omonuha uca pahi rerecuareta, Moisés porocuaita rese oporombohe vahe avei. Ipore oporandu chupe:

—¿Que vo aipo ohara Poropísirosar?—ehi.

⁵ Ahe omboyevi yuvireco chupe:

—Ahe ohara Judea rupi Belén ve—ehi—. Esepia, Tüpa ñehe mombehúsar Miqueas rembicuachiagüer pipe aipo ehi:

⁶ ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepia, pe sui osēra mborerecuar che recua iguar Israel yocuai āgua' ehi —ehi yuvireco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe 'toicua eme ava yuvireco' oyapave oporandu: "¿Mbahe yasi pipe ité vo pesepia ramo aipo yasitata?" ehi.

⁸ Oyeupe mombehu pare, omondopa Belén ve aipo ehi chupe:

—Peso evocoiyase, peseca pītani. Acoi peyosuse, co rupi avei peyeví cheu icua uca āgua. Che avei evocoiyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oi pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe riru pipe yuvireco oicuvāhe vaherā oporerrecosa sepirusu vahe oro, itaisi, ambuae mbahe siacua vahe mirra serer vahe avei. ¹² Yuviroyevise güecuave yuviraso, ndoyuviroyeví iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae peri rupi iyeví āgua.

Jesús pītani seroñemisa Egipto ve

¹³ Aipo ava yepēpi pare, José upe oyemboyecua Tūpa rembiguai iquerve, aipo ehi chupe: "Eñarapuha, eroñemi pītani ichi reseve eraso Egipto ve. Aheve erepītara acoi che amombehu voi nde yeví āgua. Esepia, mborerecuar Herodes osecara pītani yuca āgua oico" ehi chupe.

¹⁴ Ahe pītu pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyasa Tūpa ñehe mombehusar remimombehüer: "Egipto sui anose che Rahir" ehi vahe.

Herodes oyuca uca chñivahe eta

¹⁶ Mborerecuar Herodes rumo oñemoiró iteanga yasitata rese oyembohe vahe ombopa tēisa rese. Sese, "Toyuviraso sundao tecua Belén ve, toyucapa chñivahe cuimbahemi yuvireco opacatu ñuvirío araviter ovireco vahe, chñivahemi catu vahe avei, ahe tecua ivirindar pipe avei no" ehi. Esepia, omoñetase yasitata rese oyembohe vahe yuvireco, oicua ahe araviter opa cūrítei. ¹⁷ Ēgüe ehi yaviye Tūpa ñehe mombehusar Jeremías remimombehüer aipo ehi vahe:

¹⁸ "Oyeendu ava Ramá ve.

Ahe Raquel oyaseho ité omembireta manose; ndoyembovíha catui eté ipipe" ehi.

¹⁹ Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰ "Eñarapuha, eroyeví pītani ichi reseve Israel recuave. Esepia, opa omano pītani yuca potasar yuvireco" ehi.

²¹ Aipo oyeupe hese, oñarapuha, viroyeví pītani ichi reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi tēi iquerve Tūpa, "Peso Galilea ivi rese" ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehusar remimombehüer: " 'Nazaret pendar' ehira serecosa" ehi vahe.

3

Juan Oporoāpiramo vahe ivi iporupirēhisa rupi secoi

¹ Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuāhisave ² aipo ehi: "¡Pemoasi pe angaipa; peyeví Tūpa upe! Esepia, co Tūpa mborerecuasa cōimi secoi yandeu" ehi.

³ Co Juan rese niha oñehe yipive Tūpa ñehe mombehusar Isaiás aipo ehi güembicuachiagüer pipe:

"Oyeendu ñehesa ava yemboerecuāhisave:

'Pemoingatu yande Yar raperā; pemohivi tupri avei' ehi aracahe.

⁴ Juan turucuar ahese camello ragüer apopri, sumbicuasa mbahe pirer, sembihu evocoiyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu ⁶ oangaipagüer mombehu āgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca āgua, Juan aipo ehi ahe ava upe: "¡Pe mboi mboetasa tēi peico! ¿Ava vo, 'Pesēra Tūpa ñemoirosa ou vaherā sui' ehi tupri tēi pēu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira 'ore Abraham suindar oroico' pe hesa rese tēi pe ñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi.

10 Hacha niha imoingatusa voi eté opacatu ivira ndihai vahe sapo rupi yasia água. Ichui yasia pare imondosa tatave. ¹¹ Che i pipe tēi opoāpiramo Tūpa upe pe yevi água. Oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secōi che sui. Sese cheu ndiyai eté ahe ipitaquisā yora água ichui. ¹² Ahe oipehara mbahe rāhi ihigüer sui. Sāhi evocoiyase oyapocatura, ihigüer rumo omondora tata apirēhi vahesave” ehi.

Jesús āpiramosa

¹³ Ipare Jesús oso Galilea sui iai Jordán ve Juan recosave ‘tache āpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che āpiramora eve viña, ¿nde rumo ereyu che nde āpiramo água? —ehi.

¹⁵—Ēgüe tehiño aipo. Iyacatu yayapora Tūpa porocuita —ehi Juan upe.

Evocoiyase Juan, “Aviye” ehi chupe. ¹⁶ Oāpiramo pare, osē ive sui. Ahe pipeve voi iva oyemboi tupri, aheseve avei osepia Tūpa Espiritu ogüeyise ou iharive apicasu nungar.

¹⁷ Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoāhasa

¹ Ipare Tūpa Espiritu viraso Jesús ava yemboerecuaēhisave ‘tosecoāha Carugar’ ohesa pipe.

² Aheve cuarenta ari, cuarenta pītu ndocarui. Sese ndasiepoi eté oico. ³ Evocoiyase oyemboya Carugar sese secoāha água, aipo ehi chupe:

—Tūpa Rahir ité nde recose, co ita sui eyapo pan cūrítei —ehi.

⁴ Jesús rumo omboyeví chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ēgüe ehi rumo opacatu Tūpa Ñhengagüer reroya pipe ava yuvirecovera yepi’ ehi —ehiño chupe.

⁵ Ichui Carugar viraso Jesús Jerusalén maranehi pipendar tūparo torre apiterve. ⁶ Aheve aipo ehi chupe:

—Tūpa Rahir ité nde recose, eviapi cohava sui. Esepia niha, icuachiapri pipe:

‘Tūpa oyocuaira güembigui eta nde rāro água.

Ahe nde mopuhara yuvireco que ñepeí ita nde momara rāgüer sui’ ehi —ehi Carugar chupe.

⁷ Evocoiyase omboyeví Carugar upe:

—Icuachiapri pipe rumo aipo ehi avei no: ‘Nderesecoāhai chira nde Yar Tūpa’ ehi —ehi chupe.

⁸ Ipare Carugar viraso iri ivitri ivate vahe apiterve secoāha água. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Carugar chupe.

¹⁰ Aipo oyeupe hese:

—Eyepépi che sui cūrítei, Carugar —ehi—. Esepia, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Carugar upe.

¹¹ Ahese Carugar oyepepi ichui. Ipare Tūpa rembiguai yuvirogüeyi Jesús rese hañeco água yuvireco.

Jesús omboipi oporombohe Galilea rupi

¹² Jesús oyanduse Juan roquendasa, oso Galilea ivi rese Nazaret ve. ¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei. ¹⁴ Na ehi yaviye Tūpa ñeha mombehisar Isaías rembicuachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar,

para guasu ivirindar, iai Jordán rovaindar iyavei Galilea pipendar ndahei vahe judío,

¹⁶ ahe aviye pītumimbisave yuvirecoi vahe,

osepia ramo vahe tesapesa yuvireco; iyavei mano rāgüer pipe yuvirecoi vahe upe avei aviye oyecua ramo vahe tesapesa” ehi.

¹⁷ Ahe ari suive Jesús omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secōi” ehi.

Jesús, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesús osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoiyase:
—Pe pira recasar peico. Perio che rupi. Na peye aveira ava reca água cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesús osepia ambuae mbia Santiago tivri Juan reseve, ahe oguapi yuvinoi carite pipe oyesupa Zebedeo piri; omoingatu opira mbohasa yuvinoi. ²² “Perio che rupi” he ramoseve, opaño oporaviquisa sui opoi yuvireco, oseyaño oyesupa, yuviraso supi.

Jesús ombohe ava rehii

²³ Jesús evocoiyase oguata opacatu Galilea ivi rupi, judío tũparo yacatu rupi oporombohe oico. Aheve ñehesa aviye vahe omombehu Tũpa mborerecuasa resendar. Oporombogüera avei opacatu-catu tẽi mbaherasisa ava vireco vahe sui. ²⁴ Oyepotase rumo serãcua opacatu Siria ivi rupindar upe, ahese güeru opacatu iparaisu vahe yuvireco chupe: imbaheasi vahe, caruguar vireco vahe, que nañaca põrai vahe iyavei ndoguatai vahe. Ahe opa tupri ombogüera.

²⁵ Ēgüe ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

5

Jesús oporombohe ivitri ve

¹ Ñepeí arí pipe, ava rehii repiase, Jesús oyeupi ivitri rese. Aheve oguapi oĩ. Ahese semimbohe oyemboya yuvireco sese. ² Ichui omboipi imbohe aipo ehi:

³ “Sorivete catura acoi ava oicuae mbahe ipane vahe Tũpa rese ité güeco tupri água. Esepia niha, chupe nara ité Tũpa mborerecuasa.

⁴ “Sorivete catura acoi ava oyaseho vahe oviharẽhisa pipe. Esepia niha, Tũpa omboura viharetasa chupe coiye.

⁵ “Sorivete catura ndaseco asiimi vahe. Esepia, ahe chupe imondosara co ivi imahera curi.

⁶ “Sorivete catura ava oipota vahe teco catuprisa Tũpa suindar. Esepia, chupe ité ahe imondosara.

⁷ “Sorivete catura acoi ava oporoparaisuereco vahe. Esepia, ahe Tũpa oiparaisuerecora.

⁸ “Sorivete catura acoi ava ipihañemoñeta tupri vahe. Esepia niha, ahe osepia Tũpa yuvireco curi.

⁹ “Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tũpa.

¹⁰ “Sorivete catura acoi ava seco catupri rese imombaraisupri. Esepia, ahe chupe nara Tũpa mborerecuasa.

¹¹ “Perorivete catura pe acoi ava ñehẽ-ñehẽ tẽise pẽu, iyavei pe mombaraisuse, acoi oyapo-yapo tẽise güemira-mira tẽi pipe mbahe pe rese che recocuer sui tẽi yuvireco. ¹² Pe rumo peyembovifañora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tũpa ñehẽ mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

¹³ “Co ivi pipe pe aviye yucrí peico opacatu ava upe. Yucrí rumo nasehe irise, ndayaicatui imohe iri água, ndiporusai chietera; imombopasara ava pirunga água yuvireco.

¹⁴ “Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatui ñomi água. ¹⁵ Iyavei ndayamoendĩ chira tataendĩ mbahevri tẽi. Iyacatu rumo yasupĩ ivate sendave opacatu oi pipendar ava resape água.

¹⁶ Pe Ēgüe peye aveira pemboyecua ava eta upe pe recocuer aviye vahe. Ipĩpe sui tomoetei yande Ru Tũpa iva pendar yuvireco” ehi ava rehii upe.

Jesús oporombohe Moisés porocuita rese

¹⁷ “Aní chira, ‘Co mbia revo oporombohe Tũpa ñehẽ mombehusar rembicuachia mboyeroyaẽhi água iyavei Moisés porocuita cuachiapri mboyeroyaẽhi água avei no’ peye tẽi cheu. Ēgüe ehi rumo che ayu imboaviye água. ¹⁸ Supi eté co iva, ivi avei yandeu oime vitemiseve, ndipoi chietera que ñepeí yepẽ Moisés porocuita, que ambuae Tũpa ñehẽ mombehusar rembicuachiagüer ocañi tẽi vaherã; ñepeí-pe porocuita imombehupri imboaviesañõ itera. ¹⁹ Sese acoi ava ndoviroyai vahe que ñepeí mborocuitamira viña, ombohe avei ava seroyaẽhi água, ahe evocoiyase ivi coti catu vahe aveira Tũpa mborerecuasave yuvirecoi. Acoi viroya vahe rumo Tũpa porocuita yuvireco iyavei oporombohe vahe yuvireco sese, ahe evocoiyase Tũpa osecomboivate catura omborerecuasave curi.

²⁰ Iyavei amombehu pëu: acoi pe reco ïvi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuaita rese oporombohe vahe recocuer sui avei, ahesè ndapeiquei chietera Tüpa mborerecuasave” ehi.

Jesús oporombohe ñemoiroëhi ägua rese

²¹ “Pe peicua acoi pe ramoí aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirã’ ehi. ²² Che rumo aipo ahe pëu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ègüe ere tēi vahe eico’ ehi vahe ambuae ava upe, ahe serasosara porandu ägua mborerecuar ivate catu vahe rovai. Acoi ava rumo oñehe marase seroïrosave ambuae ava upe, ahe iyacatu imondosa ité tata guasuve.

²³ “Sese Tüpa upe pe porerecosa reropovëhesave tüparo pipe pemahenduhase ava pe amotarëhimbar rese, ²⁴ peseya rane pe porerecosa aheve; peyevi rane pe amotarëhimbar upe pëu ñero ägua rese. Acoi peñerose oyeupe, ahesè voi peyevi, tapeicuavëhe pe porerecosa Tüpa upe.

²⁵ “Iyavei peyemotarëhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarëhimbar mborerecuar upe pe reraso ägua. Ichui aviyeteramo ahe pe roquenda ucara. ²⁶ Supi eté aipo ahe pëu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaëhi ägua rese

²⁷ “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe. ²⁸ Che rumo aipo ahe pëu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

²⁹ “Iyavei inungar que pe resa pe acato cotindar oipota rai ucasa mbahe pëu pe mboangaipa ägua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰ Iyavei inungar que pe po pe acato cotindar pe mboangaipa ucasa, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiëhi ägua rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pëu: ava oposito güembireco sui, cuña ndoyaviise mbahe, ahesè ombopihañemoñeta tiëtera güembireco mboaguasa uca ägua. Iyavei cuimbahe omendase cuña omenda vahecuer rese, oyeamboaguasa tēi avei sese” ehi.

Jesús oporombohe Vu Tüpa rer poru tēiëhi ägua rese

³³ “Iyavei peicua acoi aipo ehi vahe pe ramoí upe aracahe: ‘Pemboaviye itera pemoin-gatu tuprise Tüpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pëu. Esepia, ahe niha Tüpa renda; ³⁵ ivi rer pipe tēi avei ndapeñehei chira. Esepia, ahe Tüpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe äca rer pipe avei ndapeñehei chira. Esepia, ndapeicatui chira que ñepeí pe ha momorochi ägua, imou ägua avei. ³⁷ Sese niha peñehese, ñepeí reseve, ‘Aviye’ peyera; anise, ‘Aní’ peye voirra. Esepia, aipo ndehi vahe mbahe tēi” ehi.

Jesús oporombohe yande amotarëhisar upe mbahe tēi mboyeviëhi ägua

³⁸ “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãí ichui, sãí avei senosesara’ ehi vahe. ³⁹ Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarëhisar pe rovapetese yuvireco, ambuae coti pe rova avei pemoporëhiñora chupe. ⁴⁰ Porandusave pe rerasose pe camisa rorecua ägua yuvireco pe sui, pe sacco avei pemondoñora chupe. ⁴¹ Ñepeí legua rupi evosii co mbahe rese cheu’ ehise que ava pëu, pe rumo perasoñora ñuvirío legua rupi chupe. ⁴² Iyavei oporanduse que pe mbahe rese yuvireco pëu, pemondoño avei chupe. Aní chira perecatëhi sese” ehi.

Pesaisu pe amotarëhimbar

⁴³ “Iyavei pesendu ñehesa yipindar: ‘Pesepia potai rene pe amotarëhimbar, pe mboripar güeraño pesaisu’ ehi vahe. ⁴⁴ Che rumo aipo ahe pëu: Pesaisu catu pe amotarëhimbar iyavei peyeroqui pe momara potasar rese. ⁴⁵ Evocoi nungar apo pipe pe Ru Tüpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise, ndapeipsisii chietera porerecosa evocoi nungar sui. Esepia niha,

ava guarepochi rerocuasar ndipihai vahe guaisupar tēi osaisu yuvireco yepi. ⁴⁷ Ndahei yande mboripar upe güeraño yayapora ‘avirave’. Esepia, ava ndoicuai vahe avei Tüpa oyapo ‘avirave’ omboripar upe yuvireco yepi. ⁴⁸ Sese pe recocuer perecora pe Ru Tüpa iva pendar seco catupri vahe nungar” ehi.

6

Jesús oporombohe mbahe aviye vahe apo água rese

¹ “Tüpa upe mbahe peyapo potase, ‘Tache repia ava yuvireco’ ndapeyei chira. Esepia, ěgüe peyese, ndapeipisii chietera pe Ru Tüpa iva pendar porerecosa. ² Evocoyase iparaisu vahe rese peporerecose, ‘Tamombehupa ava upe vichico’ ndapeyei chira inungar ava Tüpa reroyasar angahu tēi yuvireco yepi. Tüparove iyavei ocar rupi mimbí omoñehe yuvireco ‘Co ava aviye ité yuvirecoi, tehi angahu yuvireco yandeu’ oya tēi. Supi eté aipo ahe pēu: ěgüe ehi vahe rumo opa voi oipisí porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peperereco catu ava pe repiañhisa pipe; pe Ru Tüpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi” ehi.

Jesús oporombohe yerure água rese

⁵ “Acoi peyerurese, peicoi rene acoi ava ‘tosepia che yeruresa yuvireco’ ehi vahe nungar. Esepia, ahe opüha-püha catu tüparo pipe oyerogui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: ěgüe ehi vahe opa voi eté co ivi pipeve tēi oipisí porerecosa yuvireco. ⁶ Iyacatu rumo pe, peyeroqui potase, peiquerá pe rēta pipe peyeoquendara pe ae pe yeroqui água pe Ru Tüpa upe. Evocoyase pe Ru Tüpa oicua vahe mbahe pe rembiapo, iporererecora pe rese.

⁷ “Iyavei peyeroquise, ndapemboyevi-yevii chira pe ñehe pe poranduse mbahe rese Tüpa upe inungar ava Tüpa ndoicuai vahe. Ahe omboyevi-yevi oyeruresa ‘Tüpa revo co rupi yande mboyeroya voira’ ohesave yuvireco viña. ⁸ Aní chira inungar tēi peico. Esepia, pe Ru Tüpa oicua pe porandu renondeve mbahe ipane vahe pēu. ⁹ Sese aipo peyera peyeroqui: ‘Ore Ru Tüpa, ivave ereico vahe, imboeteipri nde rer tasecoi.

¹⁰ Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹ Embou ore rembihu ari yacatundar oreu co ari pipe.

¹² Iyavei ndeñero ore angaipa rese oreu inungar ore oreñero ore amotarēhimbar upe.

¹³ Ore mboangaipa ucái rene eve; eipeha mbahe naporai vahe ore sui’ peyera.

¹⁴ “Esepia, pe amotarēhimbar upe peñerose, pe Ru iva pendar avei iñerora pēu;

¹⁵ ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

¹⁶ “Acoi peyecuacuse, ndapemboyecuai chira pe viharēhisa, inungar acoi Tüpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyeacuacua vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: ěgüe ehi vahe opa voi oipisí porerecosa ava güepia pipe tēi yuvireco. ¹⁷ Pe rumo peyecuacuse, peñeaca monodoro tuprira, peyvai tupri aveira. ¹⁸ Evocoyase, ‘Co oyeacuacua vahe’ ndehi chira ava yuvireco pēu. Pe Ru Tüpa, ndayasepia vahe, güeraño oicuara pe yecuacusa. Ahe evocoyase iporererecora pe rese curi” ehi.

Mbahe porañeté vahe oime ivave

¹⁹ “Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoí omboaso ati-ati imocañipa, iyavei sãve-sãve tēi opochi ati-ati opocatusave, imonda vahe avei evocoyase imondaño sese pēu. ²⁰ Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi água. ²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²² “Iyavei yande resa inungar tataendi yande retecuer upe. Evocoyase yande resa aviye, opacatu yande retecuer upe osesape; ²³ acoi imarase rumo, opacatu yande retecuer pítumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pítumimbi nungar opacatu yande recocuer upe” ehi.

Guarepochi pota raisa; Tüpa mboyeroyañhisa

²⁴ “Iyavei ndipoi chietera que ava ñuvirio güerecuar omboyeroya vahe. Esepia, ñepeí oy-amotarēhira imboyeroya potañhisa pipe, ambuae evocoyase osaisu catura imboyeroyasa pipe. ěgüe peye avei, ndapeicatui Tüpa mboyeroya guarepochi pota raisa pipe” ehi.

Tūpa osāro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarā rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶ Pesepia vīrai eta oveve vahe: namahetii vahe, nomonuhai avei, ndoyapocatu avei mbahe yuvireco. Pe Ru Tūpa iva pendar itē niha omoime mbahe itohu. ¡Pe rumo ivate catu vahe itē peico vīrai sui! ²⁷ Ndipoi que ñepepe pe pāhu pendar oicatu vahe opihañemoñetasa pipe tēi güecocuer mopucu iri āgua.

²⁸ “Ndahei chira pe turucuarā rese tēi peyemomahenduha guasu ai. Pemahecua ru mbahe potri caha pipendar rese: ndoporaviqūi etē iyavei ndoipiai oturucuarā. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰ Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe rumo omondo catura turucuar pēu, pe ava nimbahe rechoya tuprii vahe! ³¹ Sese, ‘¿Mbahe pīha yahura, yaihura?’ Iyavei, ¿mbahe pīha yamondera?’ ndapeyei chira pe yemomahenduha guasu aisa pipe. ³² Ava Tūpa reroyasarēhi aipo nungar reseño tēi ipihañemoñeta yuvireco yepi. Pe Ru Tūpa iva pendar rumo oicua itē pēu mbahe ipane vahe. ³³ Pemahenduha rane Tūpa rese pe recocuer tupri pipe ipovrive mbahe pe yapo āgua semimbotar rupi, ahese omboura opacatu co mbahe ipane vahe pēu. ³⁴ Peyemomahenduha guasa ai eme mbahe peyapo vahe rē rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoinngatu vahe rē yepi.

7*Aní, “Oyavi mbahe” peye voi ambuae upe*

¹ “Ndiyai, ‘Oyavi itē mbahe’ peye voñño tēi ambuae ava upe; evocoiyase Tūpa, ‘Oyavi mbahe’ ndehi chira pēu. ² Esepia, inungar pe ambuae ava upe peico, ēgüe ehi aveira niha Tūpa pēu. ³ ¡Mahera ambuae ava rembiavimi rese tēi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pēu, ‘Che toropitívii mbahe nde rembiavi rese’ peye vahe rē chupe. Esepia, ¡pe peyavi guasu catu mbahe ichui! ⁵ ¡Pe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

⁷ “Peoporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgüe peyera pe yeroquisa pipe Tūpa upe, ahese imbousara pe porandusa pēu. ⁸ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyoerquisa pipe omota vahe oquenda Tūpa upe, chupe imboisara.

⁹ “Ndipoi etē revo que ñepepe pe pāhu pendar omondo vahe rē ita tēi guahir upe pan rese oyeupe poranduse. ¹⁰ Que pira rese oyeupe poranduse revo, ndomondoi chiveira mboi tēi chupe. ¹¹ Yepe ava ndaseco pōrai vahe peico viña, pe rahir upe rumo pemondoño itē mbahe aviye vahe. ¡Tahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹² “Acoi mbahe peipota vahe ambuae ava oyapo vahe rē pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³ “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; ¹⁴ teco apirēhisave oso vahe rumo oquendipi, peri reseve icāhimi. Supi guata āgua yavai etē; moviromi tēi ava oseca yuvireco” ehi.

Ivira aviye vahe icuasa iha rese

¹⁵ “Coie yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶ Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sächí ati vahe sui. ¹⁷ Evocoiyase ivira aviye vahe, iha aviye avei; ivira naporai vahe, iha naporai avei no. ¹⁸ Esepia, ivira aviye vahe ndovirecoi oha naporai vahe, iyavei ivira naporai vahe

ndovirecoi oha aviye vahe. ¹⁹ Sese opacatu ivira iha naporai vahe yasiasa yepi. Ichui imondosapa tatave. ²⁰ Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹ “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘¡Aní, ndopocuai! ¡Pe mbahe tēi peico vahe, peyepēpi che sui!’ aheñora aipo nungar upe” ehi.

Ñuvirío oi apopri

²⁴ “Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha ita harive güetarã. ²⁵ Yepe ahe oi upe oyepota tēi ivitu ai, amarusu reseve, ichui oyeapo tēi avei iai chupe, oi rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriéhisa pipe omopuha vahe ivi cuhi harive tēi güetarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuaita rese oporombohe vahe nungar; ahe rumo oporombohe güeco pīratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cūrítei! —ehi.

Aipo ihe ramoseve, ocuera voi eté.

⁴ —Nde cuerasa eromobehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavēhe nde porerecosa nde cuera agüer resendar Moisés porocuaita rupi. Ipipe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ēgüe ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cūrítei evocoyase asora imbogüera —ehi.

⁸ —Aní, che Yar, ndiyai eté che rēta pipe nde reique āgua; iyacatu niha cohapeve ereñeño tēi icuera āgua. Evocoyase nde ñehe pipe tēi che remimboacua ocuerara.

⁹ Esepia, che niha serecua vahe avei no, areco avei sundao che voya. Ahe chupe, “Eso peve” aheve, cūrítei oso; ambuae upe, “Erio ave” aheve, ou voi avei cheu; che remimboacua upe, “Ahe mbahe eyapo” aheve, che reroya avei —ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiyē. ¹² Judío eta rumo, oyeupe ñehesa reroyaēhi pipe setá pītumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco —ehi oñehe.

¹³ Evocoyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco āgua.

Jesús ombogüera setá ava imbaheasi vahe

¹⁶ Ipare pĩtu ramose setá carugar vireco vahe ogüeru yuvireco chupe. Jesús rumo ñepeí reseve oñehe pipe tēi omombopa carugar ava rehii sui, iyavei opacatu imbaheasi vahe ombogüera avei no. ¹⁷ Ēgüe ehi omboaviye Tũpa ñehe mombehusar Isaías rembicuachi-agüer aipo ehi vahe aracahe: “Ahe ae virocua opacatu yande mbaheasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ägua” ehi. ¹⁹ Ahese Moisés porocuaita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasar rupi —ehi.

²⁰ Jesús rumo aipo ehi imboyei chupe:

—Yavaira rumo ndeu. Esepia, virai vireco guaiti, iyavei aguara vireco oquesa; che rumo, Ava Riquehir, ndarecoi que che rēta ité che pituhu ägua yepi —ehi.

²¹ Ipare ñepeí ivoya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūrítei voi eyu che rupi —ehi—. Ēgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opũha ipa pipe; i ohitu vahe ndiguayii eté, seni-seni carite oyopi. ²⁵ Evocoyase semimbohe yuviraso voi imomahe:

—¡Ore Yar, yande rerasar mo co carite ipive! ¡Yande písiro eve! —ehi yuvireco chupe.

²⁶ Evocoyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷ —¿Mara ehi rutei pĩha co? —ehi tēi semimbohe yuvireco chupe—. ¿Mara ehi vahe pĩha co ava secoi?

Esepia niha, ivitu, para guasu avei omboyeroya yuvireco no —ehi.

Jesús omboyepepipa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirio ava carugar vireco vahe yugüeru sovañchi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe perí rupi yuvireco yepi. ²⁹ Jesús repia ramoseve rumo, oñehe pĩrata yuvireco chupe aipo ehi:

—¡Jesús, Tũpa Rahir, eyepipi ore sui! Esepia niha, ndoyepota vitei arí nde ore mombaraisu ägua oreu —ehi tēi yuvireco.

³⁰ Namombriimi cuchi rehii yuvirecoi ichui. ³¹ Carugar evocoyase aipo ehi yuvireco chupe:

—Ore mombopaño tēi eve evocoi cuchi rese —ehi.

³² —Aviye, peso —ehi carugaretar upe.

Aipo hese, carugar opa yuvirase ava sui, yuviroique cuchi rehii aviterve. Ipare rumo cuchi ndayaracua iri yuvireco; iivi socuer rupi yuviraso yuviraso, opa ipa pipe ocañi tēi yuvireco.

³³ Yuviraso evocoyase cuchi rārosar tecuave yuviraso opacatu mbahe güembiepia mombehu ava upe yuvireco. ³⁴ Ichui opacatu ava tecua pendar yuvirase ati Jesús upe, “¡Eso cohava sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuaese co ava yuvirecoi vahe oyese yeroya, aipo ehi imbaheasi vahe upe:

—Che rahir, eyemopoase, che ñero nde angaipar rese ndeu —ehi.

³ “¡Co mbia oyemboivate ai tēi vahe, Tũpa ñehe nungar pipe tēi oñehe!” ehi Moisés porocuaita rese oporombohe vahe yuvireco chupe. ⁴ Jesús rumo oicua ipihañemoñetasar, sese aipo ehi chupe:

—¡Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipar rese che ñero ndeu’ hesa pĩha, anise, ‘Epũha, eguata’ hesa tie? ⁶ Tapeicua ru che, Ava Riquehir, areco mborerecuasa co ivi pipe ava angaipar upe che ñero ägua —ehi.

Evocoiyase aipo ehi imbaheasi vahe upe:

—Epūha, esupi nde rupa seraso nde rētave —ehi.

⁷ Ahese opūha voi, oso güētave. ⁸ “¡Too! ¿Mara ehi rutei vo?” ehi ava rehi yuvireco imboeteisave. “Esepia, ahe niha ombou opiratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuar guasu upe guarepochi rerocuasa mesave che rēise. Ipape aipo ehi cheu:

—Erio che rupi —ehi.

Evocoiyase apūha, aso voi supi.

¹⁰ Ahe ari pipeve Jesús güemimbohe reseve yuviroique che rētave. Ambocaru setá ambuae ava guarepochi Roma pendar mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohasar ocaru evocoi nungar ava angaipa viyar pāhuvē tēi? —ehi seroñrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavēhepri tēi’ ehi. Esepia, ndayui ava seco catupri vahe reca, ěgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipape Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—¡Ndiyai eté ichohopri mendasave ndoyembovihal yuvireco imer oicovese ipāhuvē! Oimera rumo ari imer reraso āgua ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoiyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pিরer cuacua vahe pipe. ěgüe ehise, mbahe pিরer opura viña, ocañi tēira, uva ricuer avei evocoiyase ocañi tēi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoiyase opūha yuvirasos güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepia, ahe aipo ehi opiha pipe: “Yepe que iturucuar popi resemi tēi apocora, acuerara rumo” ehi.

²² Jesús evocoiyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepia omimbi vahe iyemoingatupase omano vahe ti āgua, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohave sui. Co cuñatai nomanoi; oque tēi ou —ehi.

Ahe ava rumo opucaeate atiño seroyaēhisave yuvireco. ²⁵ Ichui opa ava omose, ahese oique oi pipe oipopisi cuñatai. Evocoiyase ahe oñarapuha voi. ²⁶ Co sembiapo evocoiyase oyandupa voi opacatu tecua rupi yuvireco.

Jesús ombogüera ñuvirio ava ndasesapisoi vahe

²⁷ Acoi osēse evocoi oi sui Jesús, ahese ñuvirio ndasesapisoi vahe osaquicue moña, osapucai yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipape,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³² Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco. ³³ Ichui omosese carugar, iñhengatu cute. Sepiase opacatu ava, —¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Carugar rerecuar pīratasa pipe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborecuasa resendar iyavei oporombogüera opacatu-catu tēi mbaherasisa sui avei no. ³⁶ Osepiase ava rehi, oiparaisuereco yuvireco. Esepia, ahe oñemosañño tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoyase aipo ehi güemimbohe upe:

—Supi eté mbahe miti imonuhapirā setá iteanga; sese oporaviqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

10

Jesús oiporavo doce tupri apóstol

¹ Evocoyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepepi āgua iyavei iporombogüera āgua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipīndar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborecuasa mombehu āgua

⁵⁻⁶ Ipare oyocuai güemimbohe imondo aipo ehi chupe: “Pesora yipīndar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mborecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepepi serecosar sui. Esepia niha, peipisi pīratasa ndasepi vahe. Sese peyapoño evocoi mbahe guarepochi pisiēhisa pipe.

⁹⁻¹⁰ “Ava oporaviqui pipe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru, iyavei ambuae pe turucuar, pe pītaqui; peyendar güerañño tupri perasora. Pe pococa avei ndaperasoi chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pī ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. ¹⁵ Evocoyase supi eté ari cañi oyeopotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaetē tuprira peyese mboi nungar; iyavei inungar apicasu seco tupri vahe peicora. ¹⁷ Iyavei peicua catu peamotarēhimbar sui. Esepia, mborecuar rovai pe rerasora iyavei pe nupara otūparo pipe yuvireco, ¹⁸ ichui pe reraso aveira mborecuareta ivate catu vahe rovai yuvireco che recocuer sui tēi, ēgüe peyera peñeche che recocuer rese chupe iyavei ava ndahei vahe judío upe avei. ¹⁹ Acoi pe rerasose mborecuar upe yuvireco, ‘¿Mbahe pīha amombehura chupe?’ ndapeyei chira; acoi

peñehe potase rumo, Tūpa omondora pe ñehe āgua pēu. ²⁰ Esepia, ndahei chira peyesui tēi peñehe, pe Ru Tūpa Espiritu pemoñehe ucara.

²¹ “Ipare rumo ava viviri omondora amotarēhisar upe ‘toyuca yuvireco’ oya. Ēgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. ²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipisiroprī yuvirecoira curi. ²³ Iyavei acoi pe mañeco tēise ñepeu tecuave yuvireco, ahese peyepēñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye vîteiseve pe guatasa judío recua rupi.

²⁴ “Ñepeu yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. Ēgüe ehi aveira mbiguai güerecuar upe. Acoi oi yar upe: ‘Carugar rerecuar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pñha siquiyesara?

²⁶ “Sese ndapesiquiyei chira ava pe amotarēhimbar sui. Esepia, yaposa vahe imombepirēhi cūrteu, icuasaño itera curi; iyavei mbahe ñomipri, icuasaño aveira no. ²⁷ Acoi che amombehu vahe pītumimbisave pēu, pemombehu ari pipe coye, iyavei acoi amombehu vahe pēuñomi, perosapucau pe rēta harive imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepia, ndoicatu niha ava hā mocañi āgua yuvireco. Tūpa sui rumo pesiquiye catura. Esepia, ahe oicatu yande retecuer, yande hā reseve imocañi āgua tata guasu pipe” ehi.

²⁹ “Yamondo niha ñuvirío vīraimi repirā ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepeu vīraimi” ehi. ³⁰⁻³¹ “Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepeu-pe pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarēhisa

³⁴ “Mbahe tupri ai revo güeru co ivi pipe’ ndapeyēi chira cheu. Ēgüe ehi rumo che yusa omoime ucara yeamotarēhisa. ³⁵⁻³⁶ Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷ “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui. ³⁸ Iyavei acoi noñemosai vahe mbahe rasicuer upe, inungar-ra curusu rese ovosi vahe ité viña che rupi oguata pipe, ahe chupe ndiyai eté che voya seco āgua. ³⁹ Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porrecosa resendar ñehesa

⁴⁰ “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹ Acoi ava oipisi tupri vahe ambuae ava Tūpa ñehe mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri. ⁴² Iyavei acoi omondo vahe que chñhi i sōhisa vahe que ñepeu seco mbegüemi catu vahe toihi che reroyasar seco rese, ahe oipisi aveira Tūpa suindar porrecosa” ehi.

11

Juan Oporoāpiramo vahe ovoya omondo Jesús recocuer cua uca āgua

¹ Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

² Ahese Juan Oporoāpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³ imboporandu āgua: “¿Nde ité vo Tūpa Rembiporavo aipo sārombri ereico? anise, ¿oime tie ambuae orosāro vaheerā?” ehi yuvireco chupe.

⁴ Ipare omboyevi chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵ ‘Ndasesapisoi vahe osareco tupri cūrteu yuvireco, ipāri-pāri vahe

oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa písirosa resendar ñehesa' peyera chupe. ⁶ ¡Oviharetera acoi ava oyeroyañu vahe che rese!" ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: "¿Pesepiase Juan recocuer ava porëhisave capihíata ivitu ombova-mbova vahe nungar pñiha? ⁸ Anise, ¿pesepia tie iturucuar porañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rëtave yepi. ⁹ Evocoiyase pesepiase, ¿'Ava' peye vo pe chupe? ¿Tüpa ñehe mombehusar ité pñiha? Taa, ahe ité. Evocoi niha ivate catu vahe Tüpa ñehe mombehusar sui. ¹⁰ Ahe chupe ité Tüpa icuachiapri aracahendar pipe aipo ehi: 'Che amondora nde renondeva che ñehe mombehusar nde raperã moingatu ägua' ehi. ¹¹ Supi eté ndipoi que ñepeí ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tüpa mborerecuasave rumo ava seco mbegüemi catu vahe ivate catu ichui.

¹² "Juan yusa suive tupri Tüpa povri pendar oiporara mbahe tñi yuvireco. Osãha-sãha ava opíratasa pipe imocañi ägua. ¹³ Opacatu Tüpa ñehe mombehusar rembicuachía pipe, Moisés porocuaíta icuachiapri pipe avei imombehusa Juan yusa rupive co Tüpa mborerecuasa resendar. ¹⁴ Yepe yavaira seroya ägua pñu viña, Juan rumo, Tüpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaña sese" ehi.

¹⁶ "¿Mbahe rese pñiha amboyoyara ava recocuer cūrteindar? Esepia, co ava inungar acoi chíhivahe iguayí tñi vahe ocar rupi. Ipape oñehe pucu-pucu omboripar upe yuvireco aipo ehi: ¹⁷ 'Oromoñehe tñi mimbí pñu, ndapepivoi eté rumo iyavei orosapucaí tñi sapucaisa viharëhisa resendar pñu, pe rumo ndapeyasehoi eté' ehi. ¹⁸ Esepia, ose Juan Oporoãpiramo vahe, ahe ndohui tembihu sepírusu ai vahe iyavei ndoihui uva ricuer ipírata vahe, sese, 'Co mbia caruguar víreco vahe oyese' peye tupri tñi chupe. ¹⁹ Coiye che ayu, Ava Riquehir, acaru, aihu tupri avei. Ipape, 'Co icaru guasu ai vahe secoi, iihu guasu ai vahe avei' peye cheu; 'Ava angaipa viyar mboripar tñi iyavei guarepochi rerecosar mboripar tñi' peye avei cheu. Acoi ava supi eté víreco vahe Tüpa mbahecuasa, ahe icuasara sembiapo rese yepi" ehi.

Tecua ndiporeroyai vahe

²⁰ Ahese Jesús oñehe pírata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuerai Tüpa upe nara yuvireco. Evocoiyase aipo ehi chupe: ²¹ "¡Peparaisu, ava tecua Corazín pendar! ¡Pe avei peparaisu tecua Betsaida pendar! Esepia, acoi poromondiisa pe pãhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharëhisa resendar, tanimbu avei omondora oãca rese oangaipa mboasisa pipe yuvireco viña no. ²² Pe rumo peipísira ivate catu vahe Tüpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco ägua viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrteí oime vitera ahe tecua viña. ²⁴ Sese, pe peipísira ivate catu Tüpa ñemoirosa ava Sodoma iguar sui ari cañi pipe coiye" ehi.

Peyu cheu mbituhusa reca

²⁵ Iyavei ahe ari pipe Jesús oyerure: "Che Ru, aviye ndeu. Nde niha iva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecuva vai vahe sui; eremboyecua rumo ava seco mbegüemi vahe upe. ²⁶ Ëgüe ere niha mbahe nde remimbotar apo, che Ru" ehi.

²⁷ "Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tupri. ²⁸ Peyu cheu opacatu icuerai vahe. Che amondora pe pituhu ägua. ²⁹⁻³⁰ Peico che povrive, peymbohe avei che sui. Esepia, che ndache reco asíi, iyavei che povrive pe recosa ndayavaimi eté. Ahese ramo oimera mbituhusa pñu" ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoiyase trigo rãñi oipoho-pohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³ Ahe rumo omboyeveí ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu água ondugüer reseve. Ahe chupe acói ndipotasai ihu água yuvireco viña. Judío pahi yuvirecoi vahe upeño ité niha ipotasa ihu água yepi. ⁵ ¿Ndapeyeroqui vo Moisés porocuita resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶ Cūrítei cohawe oime ava ivate catu vahe tūparo sui. ⁷ Evocoiyase pe ndapesenducuai eté Tūpa Ñhengagüer aipo ehi vahe: ‘Che aipota peporoparaisuereco, aní chira peropovēhepa porerecosa mbahe mimba tēi cheu’ ehi vahe. Pesenducuae viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña. ⁸ Esepia, Ava Riquehír mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oi que judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yañehengapo angahu Jesús” ehi yuvireco viña. Sese,

—¿Iyaño pīha mbituhusa ari pipe ava imbogüerasa yepi’ —ehi yuvireco chupe.

¹¹ Evocoiyase Jesús aipo ehi imboyeveí:

—¿Ava vo pe pāhu pendar acói mbituhusa ari pipe oviapise seimba ovesa ivicuarve ndosoi chira senose viña? ¹² ¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³ Ahese aipo ehi aipo mbia upe:

—Eichoho nde yiva —ehi.

Evocoiyase oichohose oyiva, ocuera tupri voi inungar ambuae iyiva. ¹⁴ Evocoiyase fariseo opa yuvinose yuviraso oyemoingatu Jesús yuca água yuvireco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuae fariseo pihañemoñetasa, osē oso, ava rehii avei yuviraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi.

¹⁷ Ēgüe ehi yaviyepa Tūpa ñehhe mombehusar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espíritu chupe.

Ahe omombehu aveira mbahe ihívi vahe opacatu ava ivi pipendar upe.

¹⁹ Noiñehopepi-epii chira ava, nasase-sasei tēi chiaveira; iyavei ndosendui chietera ava ñehhe ocar rupi.

²⁰ Iyavei nomopei chietera que ñepeí patavíimi oyeapa vahe; nombogüei chiaveira tataendi sātachiñomi tēi vahe.

Ēgüe ehira mbahe ihívi vahe pipe opacatu secopipa.

²¹ Evocoiyase opacatu tecua pendar ava ndahei vahe judío oyeroyara yuvireco sese’ ehi Isaías aracahe.

“Jesús vireco carugar pīratasa oyese” ehi tēi ava yuvireco

²² Ichui ava ndasesapisoí vahe, noñehi vahe carugar rerecosar viraso Jesús upe yuvireco. Evocoiyase Jesús ombogüera. Ahese osareco, oñehi avei. ²³ Evocoiyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

²⁴ Osenduse rumo fariseo, “Co mbia carugar rerecuar Beelzebú pīratasa pipe tēi omboyepepi carugar ava sui” ehi yuvireco.

²⁵ Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco. ²⁶ Ēgüe ehi avei carugar. Esepia, serecuar omboyepepise opovri pendar, ovavara oyeupe yuvireco viña. Evocoiyase ahe oyemocañi tēira yuvireco. ²⁷ Iyavei pe, ‘Beelzebú pīratasa pipe sui tēi omboyepepi carugar ava sui’ peye tēi cheu. Evocoiyase, ¿ava pīratasa pipe vo pe voya eta omboyepepi carugar ava sui yuvireco? Tūpa pīratasa pipese, che avei evocoiyase ayapo evocoi nungar ipīratasa pipe. Pe voya ae omboyeuara pe ñehhe pe rembiavi yuvireco pēu. ²⁸ Che rumo Tūpa Espíritu pīratasa pipe amboyepepi carugar ava sui. Sese cūrítei peseppa ité Tūpa mborerecuasa.

²⁹ “Iyavei no, que ava oi que potase ambuae ava ipirata etepri vahe rētave imbahe rerocua āgua ichui viña, yipindar opa rane itera oñapichi-piichi. Ipape voi opara virocua imbahe ichui.

³⁰ “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

³¹ “Sese ava upe oimera ñeroisa opacatu angaipa rese iyavei ñehe mara-mara tēi vahe upe avei. Co catu acoi ñehe-ñehe tēi vahe Tūpa Espiritu upe, ahe chupe ndipoi chietera ñeroisa. ³² Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espiritu amotarēhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³ “Emoatiro tupri ivira, ahe iha aviye; nderemoatiro tupriise ivira, ahe evocoyase virecora oha naporai vahe. Esepia, ivira icuasa iha rese. ³⁴ Evocoyase pe, mboi nungar tēi peico vahe, pe recocuer naporaise, ndapeicatu chira mbahe aviye vahe rese pe ñehe āgua! Esepia, pe piha pipe sui tēi osē pe ñehe āgua. ³⁵ Iyavei acoi ava aviye vahe oñehe tupri opihañemoñeta catuprisa pipe; acoi ava recocuer naporai vahe rumo, opihañemoñeta raisa pipe tēi oñehe. ³⁶ Sese ari cañi pipe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe aviye vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua āgua —ehi yuvireco.

³⁹ Jesús rumo omboyeve ñehe:

—Pe ava ndaseco pōrai vahe, ndiporeroyai vahe, peporandu tēi poromondiisa tecocuer cua āgua rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás secoi mbosapi ari pira guasu aviterve aracahe, ēgüe ehi aveira Ava Riquehir mbosapi ari ivivive tura omano vahe pāhuve. ⁴¹ Evocoyase ari cañi pipe ava tecua Nínive pendar porandusave omombehura ava cūrteindar cañipa āgua. Esepia, Nínive pendar niha omboasise oangaipa, oyeve Tūpa upe yuvireco Jonás omombehuse Tūpa Ñehengagüer chupe. Cūrteitei rumo oime Jonás sui aviye catu vahe pe pāhuve. ⁴² Iyavei ari cañi pipe cuña mborerecuar guasu irohí coti secua vahe porandusave, omombehura cūrteindar ava cañipa āgua. Esepia, ahe ou amombri sui Salomón mbahecuasa rendu āgua. Cūrteitei rumo oime ivate catu vahe Salomón sui —ehi fariseo eta upe.

Carugar oyeve iri ava güeco agüerve

⁴³ “Iyavei carugar osēse ava sui, oguata tēi ivi ipiru vahe rupi opituhu āgua reca. Ipape rumo ndoyosuse, ipihañemoñeta, ⁴⁴ ‘Ayeve irira che reco agüerve vicho’ ehi. Aheve oyeveise, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso sietecarugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Eñgüe ehi aveira ava cūrteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe vitesave ava upe, ahesa ichi, tivireta reseve ocarve yuvino hai. Ahe oñehe pota yuvireco chupe. ⁴⁷ Evocoyase mbia omombehu Jesús upe:

—Nde si, nde rivireta reseve co ocarve yuvino hai. Ahe oñehe pota yuvireco ndeu —ehi.

⁴⁸ Ahe rumo,

—¿Ava pīha che si; ava pīha che riviri? —ehi ahe mbia upe.

⁴⁹ Evocoyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru ivi pendar remimbotar oyapo vahe, ahe che riviri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, uguapi ipa popive oi. ² Aheve ava oñemonuha atise yuvireco, oha carite pipe uguapi oi, evocoyase opacatu ava opita ipa popi rupi yuvireco. ³ Ahesa omboyoya-yoya oporombohesa setá mbahe rese aipo ehi:

“Ñepei mbia osē omaheti oico. ⁴ Ahe otiapi-apiise mbahe rāhii oso, moviro oiti peri rupi. Virai ogüeyise rumo sese, opaño yuvirohu. ⁵ Iyavei moviro oiti ivi nayanaí vahesave ita pāhuve. Sese cūrteimi sori; ⁶ ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve. Ahe yu rumo sori poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setá iha imonuhasa; ñepei ihi sui osē cien iha, ambuae sui osē sesenta, ambuae sui treinta. ⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pīha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu āgua chupe: “¿Mahera vo eremboyoyasa mbahe rese nde porombohesa ava upe yepi?” ehi. ¹¹ Jesús aipo ehi: “Pēu rumo Tūpa oicua uca ité mbahe ndicuasai vahe omborecuasa resendar; ambuae ava upe rumo ndoicua ucaí eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocusañora ichui. ¹³ Sese añehese chupe, amboyoyasa aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. ¹⁴ Na ehi yaviye Tūpa Ñehengagüer Isaías remimombehu: ‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya āgua, ndayapisai eté sendu potaēhisave; ndoyemboesapisoi avei sepia potaēhisave.

Esepia, ndosenducua potai opiha pipe yuvireco cheu oyevi potaēhisave ombogüera āgua’ ehi

Isaías aracahe.

¹⁶ “Pe rumo perorivete ité sepiacuase, pesenducuae avei no. ¹⁷ Supi eté setá Tūpa ñehe mombehusar iyavei ava seco catupri vahe aracahendar osepia pota tēi mbahe pe rembiepia, ahe rumo ndosepiái eté yuvireco; iyavei osendu pota tēi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese. ¹⁹ Acoi osendu tēi vahe Tūpa Ñehengagüer imborerecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo carugar ou chupe. Ahe ipiha pipe osendu vahe Tūpa Ñehengagüer opa tupriño omocañi ichui. ²⁰ Iyavei acoi mbahe rāhii seitipri ita pāhuve, ahe inungar ava recocuer yipiño osendu vahe, oipisi vahe avei vorivetesá pipe Tūpa Ñehengagüer. ²¹ Ipare rumo inungar co mbahe miti ndovirecoi vahe guapo ovirácuā āgua, ēgüe ehi avei evocoi nungar ava oimese mbahe-mbahe tēi Tūpa Ñehengagüer sui chupe, cūrteimi seroyaēhisave oyepipi ichui. ²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemofeta catu saísusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Ñehengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itísa vahe mbahe rāhii ivi aviye vahe rese, ahe inungar ava osenducua vahe Tūpa Ñehengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepei-peí sāhii sui osē que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhii oñoti vahe rese. ²⁵ Opacatu ava queseve rumo oyepota yamotarēhisar, caha tēi rāhii oñoti trigo pāhuve oso. ²⁶ Acoi trigo iha potase, supive avei sori caha. ²⁷ Evocoiyase oporaviqui vahe yuviraso, omombehu iyar upe aipo ehi yuvireco: ‘Ore rerecuar, ¿ndahe vo acoi mbahe rāhii aviye vahe ereñoti nde ivi pipe? ¿Que sui ru caha sori ipāhuve?’ ehi yuvireco chupe. ²⁸ Iyar rumo aipo ehi chupe: ‘Oime revo que che amotarēhisar’ ehi. Evocoiyase oporaviqui vahe oporandu yuvireco chupe: ‘¿Ndiyai pīha caha tēi orosapohopara ichui viña?’ ehi. ²⁹ Ahe rumo aipo ehi chupe: ‘Ani, aviyeteramo caha rupive pesapoño tiētera trigo’ ehi. ³⁰ ‘Evocoiyase peseya, tocuacuaño oyoya yuvireco. Yaviyese voi mbahe miti, ahese che ayocuíra oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza

rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo āgua yepi” ehi oporombohe.

Jesús oiporu oporombohe āgua mbahe rese mboyoyasa yepi

³⁴ Jesús omombehu opacatu evocoi nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer aviye āgua:

“Che añehese, amboyoyara che porombohesa ambuae mbahe rese. Iyavei amobehura Tūpa ivi apo suive mbahe niporēhii vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oi que oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya. ³⁷ Evocoiyase omboyevi chupe: “Acoi ava mbahe rāhii aviye vahe oñoti vahe, ahe che, Ava Riquehír. ³⁸ Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava carugar suindar yuvirecoi vahe. ³⁹ Acoi yamotarēhimbar, oñoti vahe caha, ahe niha Carugar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai íva pendar yuvireco. ⁴⁰ Iyavei inungar acoi caha tēi imonuhapri sapi āgua, ēgüe ehi aveira ari cañi pipe coiye. ⁴¹ Evocoiyase che, Ava Riquehír; che rembiguai íva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua āgua che povri ve yuvirecoi vahe pāhu sui. ⁴² Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. ⁴³ Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toypisacaño sese” ehi.

Mbahe repirusu ñomimbri sui yembohesa

⁴⁴ “Evocoiyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua āgua mbahe sepirusu vahe pota raisa pipe” ehi.

Mbohír sepirusu catu vahe sui yembohesa

⁴⁵ “Iyavei Tūpa mborerecuasa inungar ava mbahe rerocusar oseca vahe mbohír icatupri vahe yepi. ⁴⁶ Ahe oyosuse mbohír sepi catu vahe, oso opacatu ombahe mondo co sepi catu vahe rerocua āgua.

Pira mbohasa sui yembohesa

⁴⁷ “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira. ⁴⁸ Acoi savapipose pira mbohasa, vinose ivi ātasave yuvireco. Aheve oiporavo pira aviye vahe oñofapa ombahe riruve yuvinoi, naporai vahe rumo opaño omombo yuvireco. ⁴⁹ Ēgüe ehi aveira ari cañi pipe: ahese Tūpa rembiguai íva pendar yuvinosera opacatu ava ndaseco pōrai vahe mboyepipi āgua ava seco catupri vahe sui. ⁵⁰ Evocoiyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoiyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoiyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

⁵³ Oñehe pare, Jesús osē ichui ⁵⁴ oyepota güecuave oso. Aheve ombohe ava judío tūparo pipe oico. Evocoiyase ahe pendar ava oyepihamondii tēi:

—¿Que pīha co ava oyembohe catu ombahecuā āgua? iyavei, ¿mara ehi pīha co mbahe poromondiisa apo? —ehi yuvireco—. ⁵⁵ ¿Ndahei vo acoi carpintero rahír tēi? Ichi niha

acoi María, iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pãhuve. Evocoiyase, ¿que pãha oyembohera viña? —ehi tẽi yuvireco chupe.

⁵⁷ Ipipe sui ndoviroyai yuvireco. Ahe rumo aipo ehi chupe:

—Tũpa ñehe mombehisar niha omboetei opacatu rupi yuvireco yepi. Secua pipendar, sãta pipendar ae rumo nomboetei yuvireco —ehi.

⁵⁸ Evocoiyase, ahe ava viroyaẽhisa rese, moviro tẽi oyapo mbahe poromondiisa ipãhuve.

14

Juan Oporoãpiramo vahe mano agüer

¹ Ahe ari rupi Herodes, mborerecuar guasu Galilea pendar, oyandu Jesús rerãcua. ² Evocoiyase aipo ehi opitiviisar upe: “Juan Oporoãpiramo vahe revo ocuerayevi. Sese oyapo poromondiisa ipãrata vahe” ehi.

³ Esepia niha, yipendar Herodes Juan oipisi, oñapichi carena pipe soquenda ãgua vivri Felipe rembireco Herodias sui tẽi, ⁴ “Ndiyai etẽ nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tũpa ñehe mombehisar secõi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodias membri osẽ opivoi ava rehii rembiepiave. Herodes upe evocoiyase aviye ai etẽ. ⁷ Sese ahe oyemoingatu ñepe reseve que mbahe oyeupe oporanduse imondo ãgua chupe. ⁸ Evocoiyase ahe cuñatai oyeupe osi remimombehu rupi, aipo ehi Herodes upe: —Embou Juan Oporoãpiramo vahe ãca poratu pipe cheu —ehi.

⁹ Aipo ñehesa nombovihai etẽ Herodes; ndiya iri rumo, “Ani” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan ãca hasia ãgua soquendasave. ¹¹ Ipare viraso poratu pipe cuñatai upe yuvireco. Evocoiyase ahe omondo osi upe.

¹² Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porẽhisave carite pipe. Ava rehii rumo oyanduse, yuvinose voi güecua sui, ivi rupi yuviraso osupiti secosave yuvireco. ¹⁴ Evocoiyase osẽse carite pipe sui, osepia ava rehii. Ahese oiparaisuerco ava eta. Sese opa ombogüera imbaheasi vahe serasopri. ¹⁵ Evocoiyase caharuse semimbohe oyemboya yuvireco sese aipo ehi:

—Caharũ itẽ moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocuva mbahe güemihura yuvireco? —ehi yuvireco chupe.

¹⁶ —Ani, ndiyai yuviraso. Pe pemondora mbahe semihura yuvireco —ehiño chupe.

¹⁷ —Poyandepomi tẽi rumo pan orovireco iyavei ñuviriomi tẽi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehii upe: “Peguapi capihi harive” ehi. Evocoiyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco. ²⁰ Evocoiyase opacatu ava ocaru vahe ihitaropa tẽi yuvireco. Ipare semimbohe omboapipopa doce tupri iruova sembihu rumbirer yuvireco. ²¹ Ahe cuimbahe ocaru vahe retacuer cinco mil. Cuña rumo iyavei chihivahe ndipapasai yuvireco.

Jesús oguata i hari rupi

²² Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³ “Aviye” ohe pare ava upe, oyeupi oso ahe ae ivitri rese oyeroqui ãgua. Pituse chupe, opitaño aheve. ²⁴ Aheseve carite oso pucuse ipa popi sui, ivitu ipãrata vahe osovaichi yuvireco. Sese ohitu vahe nambegüe-mbegüei ocua sese. ²⁵ Cõhe potase, oguata i hari rupi oso güemimbohe coti. ²⁶ Semimbohe i hari rupi iguatase, oyembosiquiye yuvireco ichui. Sese,

—iNdahei vo evocoi hãgüer secõi! —ehi yuvireco chupe.

²⁷ Güemimbohe upe rumo aipo ehi:

—iPeyemoviracuaño, che tẽi! ¡Pesiquire eme che sui! —ehi.

²⁸ —Che Yar —ehi Pedro—. Nde itẽ ereicose, taguata i hari rupi vicho nde piri —ehi.

²⁹ —Erio ru —ehi chupe.

Evocoiyase Pedro ogüeyi carite pipe sui, oguata i hari rupi. Osora ipiri viña. ³⁰ Ivitu pãrata repiase rumo, osiquiye ichui. Oso senise rumo ipive,

—iChe Yar! ¡che pisiromi eve! —ehi.

³¹ Ahese cūrteimi voi oipisi Pedro po rese, aipo ehi chupe:

—¡Chíhi tēi ereyeroya che rese! ¡Mahera ndereyeroya tuprii che rese! —ehi.

³² Oyuvirohase rumo carite pipe, opituhu voi ivitu. ³³ Evocoyase carite pipe yuvirecoi vahe oñenopiha sovai,

—¡Supi eté catu nde Tūpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴ Osasase ipa, oyepota Genesaret ivi rese yuviraso. ³⁵ Opatatu ahe pendar ava oicuaase Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, ³⁶ aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuaita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramoí aracahendar aracuasa rupi yuvireco? ¿Mahera vo yande porocuaita mboaviyeñhisa pipe ndoyepoi ocaru ñgua yuvireco yepi? —ehi.

³ Jesús omboyevi aipo ehi chupe:

—Pe no, ¡mahera ndapemboyeroyai Tūpa porocuaita pe ramoí aracahendar aracuasa rupi tēi pe guata ñgua! ⁴ Esepia, Tūpa aipo ehi: “Pemboyeroyara iyavei peipitiviira pe ru, pe si avei no. Acoi ñhehe mara vahe oyesupa upe, ahe tomanoño” ehi aracahe. ⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo ñgua pēu. Esepia, che opacatu mbahe areco vahe imondopri Tūpa upe’ ehise, ⁶ ahese ndiyai eté ipitivi ñgua chupe” peye. Ëgüe peye pe aracua raisa pipe pemocañi Tūpa porocuaita peyesui. ⁷ ¡Pe Tūpa reroyasar angahu tēi peico vahe! Supi tupri ité Tūpa ñhehe mombehusar Isaías rembicuachía aracahendar omombehu pe recouer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepia, iporombohesa ava porocuaita tēi’

ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñhehe: ¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñhehe renduse yuvireco? —ehi.

¹³ Ahe rumo aipo ehi chupe:

—Opatatu mbahe miti ndahei vahe che Ru ¡va pendar remiti, opara sapohosa curi —ehi—. ¹⁴ Ëgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eromombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osē setecuer sui? ¹⁸ Ava pihañemoñetasa sui osē vahe rumo iyuru rupi, ahe ava omboangaipa. ¹⁹ Esepia, ava pihañemoñetasa sui osē pihañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa. ²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiñhisa nungar —ehi.

Cuña ndahei vahe judía viroya Jesús

²¹ Ichui osē Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraisuerecomi eve! ¡Che membrí vireco carugar oyese! —ehi pucu-pucu ou chupe.

²³ Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepepi co cuña yande sui. Esepia, sãse pucu-pucu ou yande raquicuei —ehi yuvireco chupe.

²⁴ Evocoiyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tẽi vahe nungar yuvireco —ehi.

²⁵ Ahe cuña rumo ofenopiha sovai, aipo ehi chupe:

—¡Che Yar, che pítiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherã —ehi.

²⁷ —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ãgüe tehi eté nde remimbotar rupi —ehi.

Aipo ihe ramoseve, ocuera voi eté imembrí.

Jesús setá ombogüera ava imbaheasi vahe

²⁹ Ichui Jesús osé oso ipa Galilea ivíi. Ipare oyeupi ivitri rese oguapi oĩ. ³⁰ Aheve setá ava oyepota, güeru atí imbaheasi vahe yuvireco chupe: ndipindugüei vahe, ndasesapisoi vahe, ipãri-pãri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe ofehe; ipãri-pãri vahe ocuera tupri; ndoguatai vahe oguata avei iyavei ndasesapisoi vahe osareco yuvireco. Sepiase ava rehii oyepihamondii aipo ehi: “Imboeteipri Israel Tüpa tasecoi” ehi yuvireco.

Jesús oyopoi cuatro mil cuimbahe

³² Evocoiyase Jesús ofehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sêtave sie porêhi reseve amondo. Aviyeteramo oviroviapi-api tiêtera tieporêhi peri rupi yuvireco viña —ehi.

³³ Evocoiyase semimbohe aipo ehi yuvireco chupe:

—¿Que sui pïha orosecara tembihu ava rehii upe nara cohava ava porêhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tẽi pirami —ehi semimbohe yuvireco chupe.

³⁵ Evocoiyase, “Peguapi ivi harive” ehi ava rehii upe. ³⁶ Aheve oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoiyase omondopa ava rehii upe yuvireco. ³⁷ Opatatu ava ocaru vahe ihãtaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chíhivahe retacuer rumo ndicuasai. ³⁹ Ipare Jesús, “Aviye” ehi ava upe, aheve oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoãha ãgua yuvireco viña. “Emoporêhi Tüpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pĩrá iteanga’; ³ iyavei añihivei: ‘Co pipe ari naporai chira. Esepia, iva rese pĩra vai anga, pĩtu guasu-guasú avei’ peye. Pe niha peicua mbahe iva resendar tẽi oyecua vahe mombehu; ndapeicuai rumo mara oyapave co poromondiisa cüriteindar ava upe imombehu. ⁴ Co ava ndaseco pĩrai vahe oyepipi vahe Tüpa sui oporandu poromondiisa rese ‘¿Tüpa suindar ité pĩha?’ oyapave. Che rumo namboyecuai chira ambuae poromondiisa chupe; acoi poromondiisa Tüpa oyapo Jonás upe güeraño tupri asevara chupe” ehi.

Ichui oseypaña ava rehii oso.

Fariseo iyavei saduceo porombohessa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco.

⁶ Evocoiyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi-ehi tẽi oyeupe yuvireco.

⁸ Ahe rumo oicua güemimbohe pihañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! ⁹ ¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase?

¹⁰ ¿Ndapeyemahenduha vītei avei vo acoi amboyaho vahe siete pan ava cuatro mil vahe upe, iyavei mbovi iruova pemboapīpo sumbirer? ¹¹ ¡Too, mara peye rutei pe aipo senducuaēhi! Ndahei mo pan rese ité añēhe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñēhe, Jesús rumo oñēhe fariseo iyavei saduceo eta prombohesa rese tēi.

Pedro oicua uca Jesús Tūpa Rembiporavo secose

¹³ Oyeptase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava oñēhe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoāpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñēhe mombehusar mboetasa” ehi yuvireco ndeu —ehi.

¹⁵ —Pe no, ¿‘Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tūparoguā. Ñepe yepe manosa ndosecoreroyi chietera opīratasa pipe. ¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ēgüe ehi aveira ivave; iyavei, “Ani” erese que mbahe uve co ivi pipe, ēgüe ehi aveira ivave —ehi.

²⁰ Ipare Jesús aipo ehi güemimbohe upe: “‘Co Tūpa Rembiporavo Poropīsīrosar’ peye eme ava upe cheu” ehi.

Jesús omombehu omano āgua

²¹ Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecuar, pahī rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. ²² Pedro rumo viraso co cotimi chupe oñhengata āgua:

—¡Tūpa ndoipotai eté evocoi nungar nde reco āgua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esiri che sui, Carugar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñetaico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungarra curusu rese ovosiira viña, toyemoingatu voi che recocuer rese oparaisu āgua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora. ²⁶ Esepia, ¿aviye ai angahu pīha ava upe opacatu mbahe co ivi pipendar pisi āgua, ahe ae tēi omocañise güecocuer yuvireco viña? ¿Mbovi pīha omondora ava güecocuer repirā viña? ²⁷ Esepia che, Ava Riquehir, ayevira che Ru reco pīratasa pipe che rembiguai iva pendar reseve curi. Che evocoyase aicua ñepepei-pei ava rembiapo agüer rupi chupe. ²⁸ Supi eté oimera amove cohava ava nomano vītei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ² Aheve, avieteramo tēi oñecuñaro güemimbohe rovai. Evocoyase sendi sova inungar ari, iturucuar morochi, sendi avei. ³ Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴ Ahese Pedro aipo ehi chupe:

—Che Yar, javiye ai eté cohava yaico! Ereipotase, ayapora mbosapi teyupami: ñepepei ndeu nara, ambuae Moisés upe, ambuae evocoyase Elías upe nara —ehi.

⁵ Avieteramo tēi iva quiha rese osesapé ogüeyi ou oyopipa tupri ité. Ipāhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñēhe rese” ehi vahe.

⁶ Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyéi rene —ehi.

⁸ Evocoyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapi güemimbohe upe:

—Ndapembbehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoyase omboyeve güemimbohe upe aipo ehi:

—Elías rane ité niha oura opacatu mbahe moingatu ñgua curi. ¹² Ahe rumo ou ité cuese. Ndoicui rumo ava yuvireco. Amove rumo opacatu güemimbotar tēi oyapo yuvireco sese. Ēgüe ahe aveira niha cheparaisura ahe ava povrive vichico —ehi.

¹³ Evocoyase semimbohe osenducua ramo iñehe yuvireco. Ēgüe ehi Jesús oñehe Juan Oporoāpiramo vahe rese.

Jesús ombogüera chñihivahe carugar rerecosar

¹⁴ Viroyepota Jesús güemimbohe ava rehüsave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereparaisuerecomi tēira che rahir cheu viña. Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri vitei eté che rese! ¡Co coti tēi vite pe pihañemoñetasa! ¡Mbovi ruti vo aico vitera pe pāhuve che ñemosasa pipe! Peru evocoi chihivahe cheu —ehi.

¹⁸ Ahese oñehe pñra carugar upe chñihivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera pñra ndoromose catui eté carugar ichui? —ehi yuvireco.

²⁰ —Esepia, ndapeyeroya tupri Tūpa rese. Supi eté sese pe yeroyasa, yepe ndoyavii chira mostaza rāñi tahimi vahe viña, aipo peyera co ivitri upe: ‘Esiri, eso coi coti’ peyera. Evocoyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano ñgua

²² Jesús oguata viteseve Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarñimbar povrive. ²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi recuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoyase oiqueste Pedro oi pipe, aheve Jesús rane oñehe chupe aipo ehi:

—¿Mara ehi nde pihañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pñra, ambuae ava sui tie? —ehi.

²⁶ Pedro evocoyase omboyeve chupe:

—Ambuae ava sui —ehi.

—¡Taa! —ehi—. Evocoyase mborerecuar povri pendar nombopai chira yuvireco —ehi—. ²⁷ Guarepochi rerecuasar moñemoñeñi ñgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepei guarepochi. Ahe eraso chupe. Ipipe iyacatura imboepi ñgua yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu ñgua chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoyase Jesús: “Erio” ehi ñepei chñihivahemi upe, omondo güemimbohe pāhuve imoha, ³ aipo ehi:

—Supi eté, acoi ndapeñecuñarose iyavei ndapeicoise chñihivahemi nungar, ahese ndapeiquei chira Tūpa mborerecuasa pipe. ⁴ Acoi oñemomini vahe rumo inungar co

chihivahemi, evocoi nungar seco ivate catura Tūpa mborerecuasave. ⁵ Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo āgua. ⁷ Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroātoisa yepi, jahe imboangaipa ucasar rumo iparaisu itera!”

⁸ “Sese inungar pe po, anise que pe pi avei pemboangaipa uca vahe, peyasía, pemombora amombri peyesui viña. Esepía, aviye catu peiquera tecove apirēhisave ñepeí pe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹ Iyavei pe resa pe mboangaipa ucase, penose, pemombo amombri peyesui. Esepía niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰ “Peroiroi rene que ñepeí chihivahemi che reroyasar. Esepía, ivave sembuguai che Ru pirindar ité yuvirecoi yepi” ehi. ¹¹ “Che niha, Ava Riquehir, ayu ava ocañi tēi vahe písirio āgua.

¹² “¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepeí ichui viña, evocoiyase oseya ranera noventa y nueve tēi vahe ovesa ivitri rese. Oyevira ocañi vahe reca oso. ¹³ Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴ Ēgüe ehi avei che Ru ivave seci vahe, ndoipotai eté que ñepeí ava che reroyasar chihivahemi nungar cañi āgua” ehi.

Porombohesa yande ñero āgua rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe. Nde ñehe viroyase, ahese peñero oyeupe cute. ¹⁶ Nande reroyaise rumo, ahese ereñehera ñepeí, anise ñuvirío ava upe nde pitivií āgua rese. Ahe avei tosendu pe ñehe. Ahese oimera que ñuvirío, anise mbosapi sendusar. ¹⁷ Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoiyase Tūpa ndoicuai vahe nungar pereco iyavei inungar mbahe-mbahe tēi aposar, Ēgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; Ēgüe ehi aveira ivave. Iyavei co ivi pipe, ‘Aní’ peyese que mbahe upe, Ēgüe ehi aveira ivave.

¹⁹ “Iyavei co amombehu potami avei pēu: Acoi ñuvirío co ivi pipe pe pihañemoñetasa oyoya tuprise que mbahe rese peporandu āgua pe yeruresa pipe, evocoiyase che Ru íva pendar omondora pe porandusa pēu. ²⁰ Esepía, acoi ava ñuvirío, que mbosapi oñemonuhase che rer pipe yuvireco, aheve che aico ipāhuve” ehi.

²¹ Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tēi chevi oyapose? ¿Siete yupagüer rupi pīha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tūpa mborerecuasa inungar mborerecuar guasu omoingatu pota vahe güembuguai revesa chupe. ²⁴ Evocoiyase ombopi imoingatu āgua, ahese ipitiviisar güeru ireve ati catu vahe guarepochi rese chupe. ²⁵ Ahe rumo ndovirecoi imboepi āgua. Sese co mborerecuar oyocuai opitiviisar aipo ehi: ‘Timondopasa co che rembuguai sembireco reseve, tahir iyavei opacatu mbahe vireco vahe reseve írevesa mboepipa āgua cheu’ ehi. ²⁶ Evocoiyase sembuguai oñenopiha sovai aipo ehi chupe: ‘¡Too! Che rerecuar, eñemosañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi írevesa sui.

²⁸ “Aheseve voi rumo sembuguai osēse, osepía ambuae ondugüer oyeupe ndaseta tuprií vahe ireve. Ahe chupe aipo ehi iyesho pisi: ‘¡Emboepipa acoi nde revesa cheu!’ ehi. ²⁹ ‘¡Aní!’ ehi oñenopiha oso sovai, ‘Eñemosañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepíase rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepía, ereyembaraisu catumi ereporandu cheu. ³³ ¡Ndiyai vo nde avei ereparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu āgua ‘tomboepipa rane ité orevesa cheu’ oyapave.

³⁵ “Índó, evocoiyase Ēgüe ehi aveira che Ru íva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi āgua

¹ Ipare Jesús osē Galilea sui, oso Judea ivi rupi ari sēsa coti iai Jordán rovai. ² Ava rehii yuviraso saquicuei. Aheve setā imbaheasi vahe ombogüera.

³ Evocoiyase oyemboya fariseo Jesús rese yuvireco; secoāhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevī fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepepīra oyesupa sui güembireco rese itē yuvirecoi āgua. Evocoiyase ñuvirio yuvirecoira ñepeī ava nungar’ ehi. ⁶ Sese ndahe iri ñuvirio, ñepeī vahe itē yuvirecoira. Evocoiyase ava Tūpa omomenda vahe oyese, ndiyai ava tēi omboyepēpi yuvireco oyesui —ehi.

⁷ Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omodo vaheṛā güembireco upe cuachiar poisa resendar opoi āgua ichui? —ehi.

⁸ —Pe poreroyaēhisa pipe niha Moisés ēgüe ehi pēu. Yipisuive itē rumo Tūpa ndoipotai oyesui opoi āgua yuvireco. ⁹ Esepia, acoi opoi vahe güembireco mbahe ndoyaviī vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ēgüe ehise cuimbahe güembireco rese, evocoiyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe semiaporā, ahe güeraño osenducua yuvireco —ehi güemimbohe upe—. ¹² Esepia, oime pīhañemoñetasava mendaēhi āgua: amove ohasa suive ndatahii vahe, ambuae nombaoi ucai ava yuvireco, ambuae evocoiyase nimendasei. Esepia, ahe oporaviqui pota Tūpa mborerecuasa reseño itē. Acoi oicatu vahe co ñehesa reroya āgua, toviroyaño —ehi.

Jesús osovasa chīhivahe

¹³ Ipare ahe pendar güeru moviro chīhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chīhivahe?” ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroquera che Ru povrive —ehi.

¹⁵ Ipare omodo opo chīhivahe harive osovasa. Ichui osē oso.

Mbia chīhivahe imbahe eta vahe omoñeta Jesús

¹⁶ Mbia chīhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷ —¡Mahera ereporandu cheu mbahe aviye vahe rese! —ehi—. Ñepeño itē aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevī chupe:

—Ndereporoyucai chira, nandeaguasai chira, nandemondai chira, nanderemirai chiveira ambuae ava rese, ¹⁹ nandemboyeroyara nde ru, nde si avei, eresaisura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰ —Co rumo mborocuaita opacatu amboaviye itē yepi. ¿Mbahe vo evocoiyase ipane vite che ayapo vaheṛā? —ehi.

²¹ —Ereipotase mbahe tupri pipe nde reco āgua, emondopa rane nde mbahe; ahe sepri evocoiyase eremondora ava iparaisu vahe upe. Ichui ererectora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, mbahe yar itē seci.

²³ Evocoiyase aipo ehi güemimbohe upe:

—Supi etē yavai eteanga imbahe eta vahe upe oi que vaheṛā che Ru mborerecuasave.

²⁴ Aipo ahe iri: Yavai rai camello upe yucuar rupi seique āgua; ava imbahe eta vahe upe rumo yavai catu che Ru mborerecuasave seique āgua —ehi.

²⁵ Aipo ñehesa renduse, semimbohe oyepihamondii aipo ehi:

—¡Ava angahu pīha evocoiyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Tūpa upe rumo mbahe opacatú ndayavaimi etē —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata água. ¿Mbahe evocoiyase oimera oreu? —ehi.

²⁸ —Oime itera niha mbahe pëu. Esepia, acoi ari oyeptase opacatu mbahe recuñaro água, ahese che, Ava Riquehir, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuere rese peporandura curi. ²⁹ Acoi opacatu ava oseya vahe güeta, anise que viquehir, anise viviri, güeindri, que vu, anise osi, guahir, que oivi avei che raisusa pipe, ahe oipisira omahera cien yupagüer rupi mbahe oseya vahe iyavei virecora tecovesa apirëhi vahe. ³⁰ Seta vai rumo cüritei yipindar vahe, ipa taira yuvirecoi; setá aveira cüritei ipa tã vahe, yipindar yuvirecoira curi —ehi.

20

Yembohesa oporaviqui vahe resendar

¹ “Tüpa mborerecuasa inungar acoi ava ivi yar osë añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ² Oyosuse ava, ahese omoingatu oyeupe oporaviqui vahe rä upe ñepe ari mboraviqui repri imboepi água. Ahese opa omondo ocove imboporaviqui. ³ Ipare osë, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴ aipo ehi chupe: ‘Peso, tapeporaviqui che uva tive. Amboepi tupri niha pëu’ ehi. Ahe evocoiyase yuviraso oporaviqui água icove. ⁵ Ipare oso iri mbiter ari rupi oyeupe oporaviqui vahe reca, ãgüe ehi tupri avei caharuse, las tres rupi. ⁶ Ipa osë iri las cinco pipe, aheve avei osepia ambuae ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohí tã ari momba cohave pehã?’ ⁷ ‘¿Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoiyase, ‘Peso, pe avei peporaviqui tive’ ehi. ⁸ “Pitu ramose, cove yar aipo ehi oporaviqui vahe rese yangarecuar upe: ‘Eñehépa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. ⁹ Evocoiyase las cinco pipe yuviroique vahe oporaviqui, ahe rane tenonde yugüeru. Oyacatu ñepe-pei ñepe ari rupindar oipisi guarepochi yuvireco. ¹⁰ Ipare tenonde catu yuviroique vahe oporaviqui, ahe chupe ipa tã imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepe ari rupindar yuvireco. ¹¹ Guarepochi pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa tã vahe, ñepe horami tã oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañe tã oroporaviqui ari momba sacucuer upe orico’ ehi. ¹³ Cove yar rumo aipo ehi ñepe ipãhu pendar upe: ‘Mbori, ndahei mbahe tã ayapo ndeu. Esepia, amboepi guarepochi ñepe ari resendar ndeu acoi, Aviye, peye vahecuer rese cheu’ ehi. ¹⁴ ‘Evocoiyase ndo co, eipisi nde guarepochi, eraso. Che rumo amondo pota co ava ipa tã oique vahe upe inungar tupri ndeu amboepi. ¹⁵ Esepia, cheu iyacatu ité che remimbotar rupi mbahe ayapo che guarepochi rese. Nderecatëhi tie ambuae ava mbahe rese che ayapose mbahe aviye vahe chupe’ ehi.

¹⁶ “Indó, ãgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tã vahe rä yuvireco curi” ehi güemimbohe upe.

Jesús omombehu iri omano água

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tupri che ñehé rese: yasora tecua Jerusalén ve. Aheve che, Ava Riquehir, che pisira, che mondo pahí eta rerecuar iyavei Moisés porocuaíta rese oporombohe vahe povrive yuvireco. Ahe, “Tomano” ehira yuvireco cheu. ¹⁹ Ipare che mondora ava ndahei vahe yande mu upe mara-mara tã che rerecó água che reroirosa pipe. Ipipe che yucara curusu rese yuvireco. Imombosapisa ari pipe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu água mbahe rese. ²¹ Evocoiyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepe nde mbahe rese pocosa coti, ambuae nde mbahe rese pocoehisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pïha co mbahe-mbahe tã aiporara vahe rä, inungar-ra que água iro vahe aihu vahe rä viña? —ehi.

—Taa, orocatuño itera —ehi yuvireco.

²³—Supi eté peiporarara mbahe-mbahe tēi. Co rumo ndiyai cheu, che piri opomboguari āgua che mbahe rese pocola coti, ambuae che mbahe rese pocohisa coti avei. Che Ru rumo omoingatu güembiporavo upe nara oguari vaheerā che ipive —ehi.

²⁴ Aipo iñehesa renduse ore ambuae diez semimbohe, orofemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborecuar guasu yuvirecoi vahe Tüpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirasá omborecuasa pipe yepi. ²⁶ Pe rumo ēgüe ndapeyei chira peico. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ²⁸ Esepia, che, Ava Riquehir, ayu ndahei ava che rese ihañeco āgua, che rumo ayu ava rese che hañeco āgua iyavei amano vaheerā ava eta repirā Carugar povri sui senose āgua —ehi.

Jesús ombogüera ñuvirio ndasesapiso vahe

²⁹ Ipare Jesús, güemimbohe reseve ofocuse tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirio ava ndasesapiso vahe oguari yuvinoi. Evocoyase osenduse Jesús ocuase supi, osapucái pirata yuvireco chupe aipo ehi:

—¡Ore Yar, mborecuar guasu David suindar, ore paraisuerecomi tēi eve! —ehi yuvinoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucái pirata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaheerā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoyase saiusave opoco sesa rese. Ahe ramoseve ndasesapiso vahe osareco tupri ai eté yuvireco. Ipare yuvirasoño ité supi.

21

Jesús oi que Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipiimi. Aheve omondo ñuvirio güemimbohe ² aipo ehi chupe:

—Peso co tecuami yande rovaingarve. Aheve pesepiara guaricu imembri reseve ñapichimbri imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyeví voñora” peyera chupe —ehi güemimbohe upe.

⁴ Co ēgüe ehi chupe arachendar Tüpa ñehe mombehusar ñehengagüer mboaviye āgua, aipo ehi vahe:

⁵ “Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembri reseve’ peyera” ehi.

⁶ Evocoyase evocoi semimbohe yuviraso, oyapo ité ocuasa yuvireco. ⁷ Güeru guaricu imembri reseve yuvireco chupe. Omondo oturucuar icupeao āgua yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetei guasusa pipe. Ambuae evocoyase oyasia pindo omondo peri rupi yuvireco saperā. ⁹ Ava rehii senonde, saquicuei avei oguata vahe osapucái yuvireco aipo ehi:

—¡Co mborecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡ivave imboeteipri tasecoi! —ehi yuvireco.

¹⁰ Oiquese Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pñha co mbia? —ehi tēi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tüpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tüparo pipe sui

¹² Ipare Jesús oi que judío tüparo guasu pipe. Ipipendar opa omombo ichui ava mbahe mondosar, mbahe reroquasar. Iyavei ava guarepochi recuñarasar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri arachendar pipe aipo ehi: ‘Che rēta yeruresa rētarā’ ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapiso vahe, ipāri-pāri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuaite rese oporombohe vahe yuvireco mbahe ndayasepiai vahe sembiapo, iyavei tüparo pipe

osenduse chihivahe sapucaisa: “¡Imboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chihivahe yuvireco! —ehi.

—Taa, asendu ité —ehi—. Pe no, ¿ndapeyeroqui vo sesendar ñehesa icuachiapri pipe: ‘Chihivahemi, pítanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipape opaño oseya ava oso tecua Betania ve. Aheve ñepe pítu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevisé tecua Jerusalén ve, Jesús ndasiepoi oico. ¹⁹ Aheve peri popive osepiá ivira higuera. Ahe sese oyemboya oso ‘¿iha pñha?’ oya viña. So güeraño tēi rumo osepiá. Evocoyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—¡Too, mara ehi rutei pñha co cūrteimi opa voi ipiru! —orohe tēi chupe.

²¹ Ahese omboyevi oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoyase osiriño itera. ²² Indó, acoi peyeruse mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oi que iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuara ndeu? —ehi.

²⁴ Evocoyase ahe aipo ehi chupe:

—Che avei aporandura mbahe rese pñu. Pemboyevisé che porandusa, ahese che avei amombehura ava porocuita rupi eté pñha ayapo co mbahe vichico. ²⁵ ¿Ava vo Juan ombou ava ãpiramo água? ¿Tūpa pñha, ava tēi tie? —ehi.

Evocoyase oñemoñeta aipo ehi oyeupe yuvireco: “ ‘Tūpa ombou’ yahese chupe, ahe evocoyase omboyevira yandeu: ‘¿Mahera ru evocoyase ndaperoyai?’ ehira. ²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pñu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pñhañemoñetasa co rese? Oime mbia vireco vahe ñuvirío guahir. Ahe aipo ehi ocuacua catu vahe upe: ‘Che rahir, co pipe eresora, eporaviqui cove’ ehi. ²⁹ ‘¡Nachequerēhil!’ ehi voñño. Coiye rumo, ‘¿Mahera ēgüe ahe?’ ehi. Ipape osoño ité, oporaviqui. ³⁰ Ipape oso ambuae guahir upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipape rumo ndosoi eté. ³¹ ¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerecuasave pe sui. ³² Esepia, Juan Oporoãpiramo vahe ou co tecocuer ihivi vahe mboyeuca água pñu pe reco tupri água viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipape rumo ndapeñecuñaroi pe recocuerai sui seroya água —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri seroco, oyapo uva riavii água; oyapo avei oiivate vahe ahe sese mahemoha água. Ipape oseya oivi ava oporaviqui vahe upe iporu água. Ichui osē oso amombri vahesa rupi. ³⁴ Coiye oyepotase ari uva pohosa, ahese omondo güembiguai oporaviqui vahe upe imboporandu água ‘taipisi uva pohopri cheundar cute’ oyapave viña. ³⁵ Ipape rumo oporaviqui vahe oipisi sembiguai yuvireco: amove oinupa-nupa yuvireco, amove

oyuca, oyapi-yapi avei amove ita pipe yuvireco. ³⁶ Ipare rumo ivi yar setá catu omondo iri güembiguaí. Oporavíqui vahe rumo mara-mara tēñño avei vireco yuvireco.

³⁷ “Coíye rumo guahír teieté omondo chupe cute. Ahe ipihañemoñeta: ‘Omboyeroya catura revo che rahír yuvireco’ ehi viña. ³⁸ Evocoiyase ahe ava tahir repiase, ‘Co aipo oipísira vu mbahe; yayucaño, evocoiyase co ivi opitara yandeu nara’ ehi oyeupe yuvireco. ³⁹ Evocoiyase oipísi, vínose miti páhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporavíqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saísuēhisa pipe ité co ava ndipihái vahe yuvireco. Ipare revo omondora oivi ambuae ava oporavíqui vahe uve iporu āgua ‘ahe tombou voimi uva ipohopírer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndapeyeroquii vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapísi ai eté’

ehi icuachiapri pipe. ⁴³ Sese che Ru Tūpa mborerrecuasa serocuasara pe sui. Ambuae ava upe rumo imondosara. Ahe vírasora che Ru mombaheha sara. ⁴⁴ Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipísi pota voi yuvireco viña. Osiquiyēño rumo ava rehíi sui yuvireco. Esepia, opacatu ava ipihañemoñeta: “Co ité Tūpa píratasa pipe oñehe” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerrecuasave inungar mborerrecuar guasu guahír mendase oyapo pieta.

³ Ipare oyocuai güembiguaí eta ‘ava ichohopri upe toyugüeru cute’ oya. Ichohopri rumo níquerēhi iri yugüeru aheve. ⁴ Ipare oyocuai iri ambuae güembiguaí eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tiví iyavei ambuae mbahe mímba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguaí upe. ⁵ Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave, ⁶ ambuae rumo oipísi sembiguai mara-mara tēi sereco āgua. Ahe ipipe oyuca yuvireco. ⁷ Evocoiyase mborerrecuar guasu oñemoiro etepri save omondo osundao eta co ava oporapíchi vahe yuca ucapa āgua, iyavei secua rapípa āgua. ⁸ Ipare aipo ehi ambuae güembiguaí eta upe: ‘Opa oingatu tembihu mendasave. Co rumo yipíndar ichohopri, ndiya iri chira yugüeru vaherā cohava. ⁹ Sese peso opacatu ava guata catusa rupi, peñehe mendasave yugüeru vaherā opacatu pe rovaichisar upe’ ehi. ¹⁰ Evocoiyase sembiguai eta yuvínosepa yuvíraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; Ēgüe ehi ava savapípo tupri oi guasu mendasave yuvireco.

¹¹ “Evocoiyase acoi mborerrecuar oi que ava ichohopri repia. Ipare omahecia tupri ñepeí ava ipáhu pendar rese. Ahe rumo ndomondei turucuar mendasa resendar. ¹² Evocoiyase aipo ehi chupe: ‘Che mborípar, ¿mara ere eique ave co turucuar mendasa resendar porēhi?’ ehi. Ahe rumo noñeheño ité chupe. ¹³ Evocoiyase, ‘Peipísi co mbía, peñapíchi ipí, ipo avei, pemose ocarve pítumímbsave. Aheve oyaseho tēira, sáitere-tere tēira mbaherasicuer rereco’ ehi ichohopri rese hañecosar upe. ¹⁴ Esepia, setá tēi ichohopri, movíromi tēi rumo iporavopri ipáhu sui” ehi mborerrecuareta uve.

Fariseo osecóaha iri tēi Jesús guarepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerrecuar rovai imomara-mara tēi āgua. ¹⁶ Ahe evocoiyase omondo movíro ovoya yuvireco mborerrecuar Herodes rupíndar reseve Jesús upe. Ahese aipo ehi angahu chupe:

—Porombohesar, ore oroicua nde supí eté vahe mbahe eremombehu eico iyavei ereromombohe mbahe supí tupri vahe Tūpa recocuer rese. Nde niha nndereroyai vahe ava ñehesa tēi. Esepia, ava píhañemoñeta rupi ndereicoi vahe; nde píhañemoñeta rumo ñepeí reseve erereco. ¹⁷ ¿Mara ehi nde píhañemoñeta? ¿Aviyera píha yamondo guarepochi rese oporanduse Roma pendar mborerrecuar ívate catu vahe upe viña, aní tie? —ehi yuvireco.

¹⁸ Oicua rumo fariseo píhañemoñeta raísa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye!
 19 Pemboyecua ru ñepeí guarepochi mborerecuar guasu upendar cheu —ehi.

Evocoyase güeru yuvireco chupe.

²⁰ —¿Ava rahanga vo co guarepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tüpa upendar mbahe evocoyase pemondora Tüpa upe —ehi fariseo upe.

²² Osenduse, oyepihamondí tēi yuvireco. Evocoyase yuvínose yuviraso ichui.

Saduceo oporandu Jesús upe cuerayevisa rese secoãhasave

²³ Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

²⁴ —Porombohesar, Moisés aipo ehi aracahe:

‘Que cuimbahe omanose guahiēhiseve, ahese tivri omendara sembirecocuer rese ahe viquehír omano vahecuer upe nara tahirá oico’ ehi —ehi yuvireco chupe—.

²⁵ Cohave, ore pãhuve, oime siete tupri oyesuindar pãve yuvirecoi vahe. Yipíndar vahe omenda. Ipape omanoño guahiēhiseve. Evocoyase tivri omenda sembirecocuer rese.

²⁶ Ahe omano guahiēhiseve avei no. Ēgüe ehi avei opacatu ambuae tivri, omano avei guahiēhiseve yuvireco. ²⁷ Opacatu imano pare, cuña avei omano cute. ²⁸ Evocoyase opase ocuerayeví yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co coti tēi eté. Esepia, ndapeicuai eté Tüpa ñehe icuachiapri arachendar, ndapeicuai avei Tüpa pīratasa —ehi—. ³⁰ Esepia, acoi omano vahe ocuerayevisa, chupe ndipo iri chira mendasa. Ahe rumo Tüpa rembiguai iva pendar nungar yuvirecoira ivave —ehi—. ³¹ Co cuerayevisa resendar rumo amombehura pëu. Aviye ndapeyeroquií anga vahe acoi Tüpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tüpa aico’ ehi. ¡Tüpa ndahei omano vahecuer Tüpa, ahe rumo oicove vahe ité Tüpa secoi! —ehi.

³³ “¡Too!” ehi ava rehí. “¡Mara ehi rutei iporombohesa!” ehi tēi yuvireco.

Porocuita aviye catu vahe

³⁴ Ipape fariseo oyanduse yuvireco Jesús omonguiriripañose saduceo oyesui, ahese oñemonuha yuvireco. ³⁵ Ñepeí ipãhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi ñehe Moisés porocuita sui yandeu’ oyapave viña:

³⁶ —Porombohesar, ¿uma ité vo porocuita aviye catu vahe opacatu ambuae porocuita sui? —ehi.

³⁷ Evocoyase ahe aipo ehi chupe:

—‘Eresaisura nde Yar Tüpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuita aviye catu vahe ambuae porocuita sui.

³⁹ Imofüviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. ⁴⁰ Co ñuvirío porocuita rupi oguata opacatu Moisés porocuita icuachiapri, opacatu Tüpa ñehe mombehusar rembicuachía avei —ehi.

¿Ava suindar pīha Poropísirosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepihañemoñeta acoi Tüpa Rembiporavo ou vaheṛá ava pīsiro água rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pīha evocoyase David oñehese Espírítu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴ ‘Yar aipo ehi che Yar upe:

Eguapi che acato coti acoi che amondose voi eté nde amotarēhimbar nde povrive yuvireco’ ehi David aracahe. ⁴⁵ Evocoyase, ¿mahera ru: “Poropísirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶ Evocoyase ndoicatu iri imboyevi água yuvireco cute. Ahe ari pipe sui ndipo iri que ñepeí iquerēhi vahe ñehe avi uca água oñehe pipe yuvireco.

23

Jesús oicua uca fariseo iyavei Moisés porocuita rese oporombohe vahe recocuerai

¹ Ipape Jesús aipo ehi ava eta upe, oreu avei no: ² “Co Moisés porocuita rese oporombohe vahe iyavei fariseo eta, ahe icuaita Moisés porocuita mombehu tupri água yuvireco. ³ Sese

iya peroyañó ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco. ⁴ Iyavei omondo porocuaíta inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepeí oporocuaíta yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro āgua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otūparo pipe yuvireco no. ⁷ Oipota avei ava oyeupe ‘avirave’ apo āgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha íva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepia, Poropisiosar güeraño ité pe rerecuar secoi. ¹¹ Acoi ava seco ivate catu vahe, ahe toporopitívii güeco mbegüesa pipe. ¹² Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuaíta rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rägüer sui peico yepi. Pe avei eté ndapeiquei ipovrive, iyavei acoi yuviroique pota vahe pemömbitaño seique rägüer sui.

¹⁴ “¡Peparaisu catu itera pe Moisés porocuaíta rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipirata catu vahe curi.

¹⁵ “¡Peparaisu catu itera pe Moisés porocuaíta rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratava nara tēi pereco uca.

¹⁶ “¡Peparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye āgua, ěgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. ¹⁷ ¡Pe ndapembahecuaí vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. ¹⁸ Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ěgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya ité yamboaviyera yande ñehe yepi’ aipo peye tēi. ¹⁹ ¡Pe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. ²⁰ Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, ²¹ iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secoi. ²² Iyavei acoi omombehu vahe mbahe que ambuae ava upe íva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoi.

²³ “¡Peparaisu catu itera, pe Moisés porocuaíta rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeí-peí diez pe remití menta, anis, comino pereco vahe sui ñepeí Tūpa uve nara viña, pe rumo pepoi co porombohosa aviye catu vahe porocuaíta resendar sui. Ahe peyapora mbahe ihívi vahe, peporoparisueredora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴ ¡Pe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ęgüe peye co mborocuaíta upe.

²⁵ “¡Peparaisu itera pe Moisés porocuaíta rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ęgüe ehi tēi pe recocuer pe monda raisave, mbahe pota-pota tēisave avei. ²⁶ ¡Pe fariseo peico vahe, ndapepīhañemoñetai vahe mbahe pe rembiapo ai rese, pemoatiro rane pe pīha pipe mbahe yavaeté vahe sui! Ahese ramo pe rembiapo ícatuprira cute.

²⁷ “¡Peparaisu catu itera, pe Moisés porocuaita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbrī tēi. Iharīve tēi icatupri chupe. Ipīpe rumo tehōgüer cangüer iyavei opacatu mbahe yavaeté vahe ovireco oyese. ²⁸ Ēgüe peye: ava rembiepiave avīye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

²⁹ “¡Peparaisu catu itera pe Moisés porocuaita rese oporombohe vahe, pe fariseo peico vahe, pe reco tupri angahu tēi vahe! Esepia, pemoigatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihīvi vahe ruvipagüer yepi viña. ³⁰ Ipare aipo: ‘Yande yaicose revo aracahe yande ramoi recose, ndayaipitīvi chietera Tūpa ñehe mombehusar yuca āgua yuvireco viña’ peye tupri tēi. ³¹ Aipo peyese rumo, pemboyecua Tūpa ñehe mombehusarer yucasar suindar pe yesusa. ³² ¡Pemboyeapi iriño evocoyase pe ramoi rembiapocuerai!

³³ “¡Pe mboi vai suindar tēi peico! Ndapesoyepi chira rumo Tūpa ñemoirosa sui, pesora rumo tata guasuve. ³⁴ Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara yuca tecua yacatu rupi. ³⁵ Sese pēuño ité oura Tūpa ñemoirosa opacatu ava avīye vahe yuca agüer rese co ivi pipe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequias rahir Zacarías sui avei, ahe peyuca vahe tūparo pipe mbahe seropovēhepri renda rovai. ³⁶ Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

³⁷ “¡Too rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. ³⁸ Sese seyapirā tēi peicora. ³⁹ Esepia, ndache repiai chira peye acoi, ‘¡Imboeteipri Yar remimbou taseco!’ peyese voi che repia irira peye” ehi Jesús ava eta upe.

24

Jesús omombehu judío tūparo guasu mocañi āgua

¹ Ipare Jesús osé judío tūparo pipe sui oso. Aheseve ore semimbohe oroyemboya sese aipo orohe chupe: “¡Ore Yar, esepia co tūparo!” orohe. ² Ahe rumo:

—Supi eté omombehu pēu: co opacatu pesepia vahe, ndipoi chietera che ñepe i ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vahe rā ari cañi renonde

³ Ipare Jesús oso ivitri Olivo ve oguapi oī. Aheve ore güeraño tupri oroso chupe mbahe rese ore porandu āgua:

—Emombehu catu oreu: ¿Mbahese vo aipo mbahe yavīyera? ¿Mbahe poromondiisa rese rane vo icuasara nde yu āgua iyavei ari cañi āgua? —orohe chupe.

⁴ —Peicua catu, peyembopa ucai rene ambuae ava upe peico. ⁵ Esepia, setá ava yugüerura, ‘Che aico Tūpa remimbou ava písiro āgua’ ehi tēira ava eta mbopa yuvireco. ⁶ Iyavei pesendura ñehesa vavasa resendar cohove iyavei che rupi. Ndapeyembosiquiyei chira rumo ichui. Esepia, ēgüe ehi rane itera niha; ndehi vitei chira rumo ari cañisa. ⁷ Esepia, ñepe i ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi riri opacatu-catu tēi tecua rupi. ⁸ Opacatu evocoi mbahe rumo omboipi ramoni vahe mbahe tēi porarasa.

⁹ “Ahese pe písira yuvireco mara-mara tēi pe rereco āgua, pe yuca āgua avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe ari rupi evocoyase setá ava ndache reroya iri chira yuvireco. Ahe oyeamotarēhira iyavei omondora ambuae omboetasagüer yamotarēhimbar povrive yuvireco. ¹¹ Iyavei setá Tūpa ñehe mombehusar angahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipīpe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo ari ipa vahe rupi, ipísiropri yuvirecoira. ¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca āgua. Ahese ramo oimera cañisa co ivi pipe” ehi oreu.

¹⁵ “Tūpa ñehe mombehusar Daniel oicuachía mbahe-mbahe tēi aposa resendar oime vahe rā tūparo guasu maranehi vahe pipe aracahe. Ahe pesepiase oi maranehi pipe — acoi oyoerqui vahe, ahe tosenducua tupri yuvireco —, ¹⁶ evocoyase Judea ve yuvirecoi vahe toñemipa poyava ivitri rese yuvireco ichui; ¹⁷ iyavei acoi güeta harive yuvirecoi vahe

ogüeyise, toique iri eme güêtave ombahe reca; ¹⁸ iyavei acoi que rupi tēi yuvirecoi vahe, toyevi iri eme güêtave que oyeaosa renose ägua yuvireco. ¹⁹ ¡paraisu itera cuña ipuruha vahe, imembi pitani vahe avei yuvireco! ²⁰ Peporandu Tüpa upe pe recua pipe sui pe sēēhi ägua irohí pipe, mbítuhusa ari pipe avei. ²¹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhuse Tüpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pipe omombituhura” ehi.

²³ “Iyavei que ava, ‘Esepia co Poropisrosar secói’; anise, ‘Peve secói’ ehise yuvireco pēu, aní chira peroya aipo ehi vahe. ²⁴ Esepia, yugüerura ava ‘che Poropisrosar aico’ ehi tēi vahe iyavei ‘che amombehu vahe Tüpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua ägua yuvireco. Ipipe osecoāhara Tüpa rembiporavo imbopa ägua yuvireco. ²⁵ Opa aipo co senondeve amombehu pēu. ²⁶ Sese que ava pēu: ‘Pesepia pe ivi iporupirēhisave secói’ ehise, pesoi rene aheve seroyasave, aní chiaveira peroya acoi ‘pesepia co secói oi pipe’ ehi vahe yuvireco. ²⁷ Che rumo inungar overa vahe sendi añihivei sui caharu coti ocua ivi ahe rese, ēgüe ahera che, Ava Riquehír, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi ägua resendar

²⁹ “Ahe ari pipe mbahe-mbahe tēi pare cūrteimi ndoyecua iri chira ari, yasi avei ndosesape iri chira, yasitata avei opara oviapi ivi sui iyavei ivi resendar mbahe oririra yuvireco. ³⁰ Ahese oimera ivi rese iporēhi vahe che, Ava Riquehír, yu ägua resendar. Evocoiyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise ivi quiha rese che pīratasa rendigüer porañetesa pipe. ³¹ Iyavei amboura che rembiguai eta ivi pendar. Ahe evocoiyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha ägua” ehi.

³² “Peyembohera ivira higuera recocuer sui: Co ivira soqui ramose, yaicua cōimi ari sacu vahe yepota ägua yandeu yepi. ³³ Na ehi aveira pēu che ñehe rupi tupri mbahe pesepiase, sese peicua cōimi eté che yevi ägua. ³⁴ Supi eté yuvirecove vitera ava osepia vahe co mbahe opase yaviye. ³⁵ Iva, ivi opara ocañi, che ñehengagüer rumo imboaviyasa rane itera.

³⁶ “Ndipoi eté rumo ava oicua vahe ari iyavei hora che yevi ägua. Iva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ēgüe ehi tupri aveira che, Ava Riquehír, yevi ägua renonde. ³⁸ Yipive amarusu renonde, ahese ava ocaru, oihi; guahir, guayri avei momendaño yuvireco. Noé arca pipe seiquese, ēgüe ehi vite yuvireco. ³⁹ Nomohai eté rumo amarusu viapi ägua yuvireco oyeupe viña, ēgüe ehi rumo aviyeteramo tēi amar oviapi imocañipa. ēgüe ahe aveira che, Ava Riquehír, ayevi aviyeteramo tēi. ⁴⁰ Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opitara. ⁴¹ ēgüe ehi aveira ñuvirío cuña ohicho vahe upe: ñepe serasosara, indugüer rumo opitara.

⁴² “Sese pemahemoha yepi. Esepia, ndapeicuai mbahe ari pipe che, pe Yar, ayevira ivi sui. ⁴³ Iyavei peyapisaca tupri co rese: inungar acoi oi yar oicuae revo que hora pítu pipe imonda vahe yepota ägua, ahese imahemohara sese güeta pipe seiqueēhi ägua viña. ⁴⁴ ēgüe peye aveira peyemoingatu che yevi ägua rese. Esepia niha, che, Ava Riquehír, aporoesapiha tēira vitu curi” ehi.

Mbiguai omboaviye vahe ocuaita, nomboaviyei vahe avei

⁴⁵ “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güeta pipendar rese hañeco ägua ‘tembihi tomondo che rēta pipendar upe che porocuaita rupi’ ohesave. ⁴⁶ Acoi omboaviyese ocuaita, ahese oviharetera güerecuar yevise. ⁴⁷ Supi eté niha serecuar oyocuaira opacatu ombahe rese hañeco ägua. ⁴⁸ Ahe mbiguai rumo ndipihaise ‘ndoyepota vitei chira revo che rerecuar’ oya, ⁴⁹ omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oihi tēi ägua. ⁵⁰ Ipare rumo serecuar oyepotara imahemohaēhiseve. ⁵¹ Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe eta upe.

25

Diez cuñatai ndaseco marai vahe resendar ñehesa

¹ “Evocoi ari pipe Tüpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi pisi ägua yuvireco. ² Ipähuve yuvirecove cinco

ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirā yuvireco, ndovirasoi rumo yandi guataendi riru mboapipo iri āgua yuvireco; ⁴ evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵ Acoi ndoyepota apihaise cuña mevi, ahese sopesii tēi yuvireco. Coiye opaño yuviroque yuvireco ichui. ⁶ Pitu mbiter senise rumo, osendu ñehesa aipo ehi vahe yuvireco: ‘¡Coi imevi turil! ¡Pesē ipisi āgua cute!’ ehi. ⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chīhi pe yandi oreu. Esepia, ogüe pota itē ore rataendi’ ehi tēi yuvireco. ⁹ ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi. ¹⁰ Imboepi yuviraso vitesevē, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. ¹¹ Ipare oyepotase ambuae cinco cuñatai yugüeru aipo ehi yuvireco oi yar upe: ‘¡Emboimi tēi oreu!’ ehi tēi yuvinoha. ¹² ‘Aní, ndopocuai vahe itē’ ehiño chupe.

¹³ “Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevira” ehi Jesús oreu.

Ñehesa guarepochi mondosa resendar

¹⁴ “Iyavei Tūpa omborerecuasave inungar-ra ava mbahe yar oso āgua renonde ivi amombrisave omonuha güembigui oguarepochi rāro āgua viña. ¹⁵ Yipindar ñepeu upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepeu-peu upe seco etegüer rupi-rupi. Ipare voi oso cute. ¹⁶ Evocoiyase evocoi mbigui oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. ¹⁷ Inungar avei ambuae oipisi vahe dos mil, ichui oipisi catu iri ambuae dos mil. ¹⁸ Ambuae oipisi vahe rumo ñepeu guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyevisē serecuar, ahese oñehe güembigui upe oguarepochi retacuer cua āgua. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye itē, nde mbigui seco aviye vahe ereico iyavei eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi chupe. ²² Ipare ambuae sembigui oipisi vahe dos mil guarepochi, oyemboya güerecuar rese aipo ehi chupe: ‘Ndo co erembou vahe dos mil cheu. Ipipe sui co ambuae aipisi irimi dos mil avei ndeu’ ehi. ²³ ‘Aviye itē, nde mbigui seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovihara che rese’ ehi avei chupe.

²⁴ “Ipare acoi oyepotase ambuae mbigui oipisi vahe mil guarepochi, ahe aipo ehi güerecuar upe: ‘Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepiper tēi avei ereipisi ndeyeupe nara. ²⁵ Sese che siquiyesa pipe añomi ivivive nde guarepochi. Ndo co nde mbahe’ ehi chupe. ²⁶ ‘Nde mbigui ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose āgua cheu imboeyevī catumi āgua viña’ ehi. ²⁸ Ipare aipo ehi: ‘Perocua guarepochi ichui, pemondora evocoi diez rupi guarepochi omboua vahe upe’ ehi. ²⁹ ‘Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbigui ēgüe ehi tēi vahe ocarve pitumimbisave. Aheve toyaseho, tasāitere tēi oñi ehira serecuar chupe” ehi Jesús oreu.

Jesús oura opacatu ava recocuer rese porandu āgua

³¹ “Che, Ava Riquehir, ayevisē, opacatu che Ru rembigui iva pendar reseve che reco ivategüer pipe, ahese aguapira che renda porañete vahesave ava recocuer rese porandu āgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoñehisa coti. ³⁴ Ahese che mborerecuar ivate catu vahe aipo ahera che acato cotindar upe: ‘Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taihu; che aguata tēise pe recua rupi vichico, pe avei oi pembou che que āgua. ³⁶ Turucuar cheu ipanese, pe avei pembou che turucuarā; chembaheasise, peso avei che piri; che roquendasave peso avei che repia no’ ehi. ³⁷ Evocoiyase evocoi seco catupri vahe aipo ehira yuvireco cheu: ‘Ore Yar, ¡mbahese vo

nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoyase oromondo ndeu? ³⁹ Iyavei, ¿mbahese vo aipo nde repiasa nembahesise, anise que nde roquendasave, aheve aipo oroso nde repia yepi? ehirã yuvireco cheu. ⁴⁰ Evocoyase che, mborerecuar ivate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepeí seco mbegüemi vahe che rocyosar pãhu pendar upe viña, cheu rumo ñgüe peye’ ahera.

⁴¹ “Ahe se aipo ahera cute che mbahe rese pocoñhisa cotindar upe: ‘Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu carugar upe nara serecuar reseve. ⁴² Esepia, ndacheriepoise, pe evocoyase: Yamondomicaru ñgua, ndapeyei eté cheu; che huseise, ahe se, Yamondomi toihu, ndapeyei avei cheu; ⁴³ ambuae tecua pipe aguata tẽise vichico, ahe se, Eique che rõtave che piri, ndapeyei eté cheu. Ipanese che turucuarã, pe rumo ndapembou cheu, chembahesise vichico, iyavei che roquendasave, Yasomi tẽi sepia, ndapeyei eté cheu’ ahera. ⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahesise, anise nde roquendasave, marase vo mbahe rese nande pĩtivĩisai?’ ehi tẽira yuvireco cheu. ⁴⁵ ‘Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté’ ahera. ⁴⁶ Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opañhise yuvirasora” ehi Jesús oreu.

26

Jesús yamotarẽhimbar omboguai yuca ñgua yuvireco

¹ Ipare Jesús aipo ehi oreu:

² —Pe peicua ñuvirio ari tẽi ipane vite co Pascua pieta yepota ñgua yandeu. Ahe se che, Ava Riquehir, imondopri aicora che atica ñgua curusu rese yuvireco —ehi.

³ Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rõtave. ⁴ Aheve oñemoñeta: ‘Yambopa ipisi yuca ñgua’ ehi yuvireco oyeupe. ⁵ Ahe rumo:

—Ndiyai pieta pipe ité yaipisi ava rehii yemondii guasuñhi ñgua yandeu —ehi.

Cuña oipiyere Jesús ñca rese mbahe siacua vahe

⁶ Jesús tecua Betania ve secói, Simón lepra vireco vahecuer rõtave. ⁷ Aheve mesave chiniseve, cuña vireco vahe mbahe siacua vahe siru reseve viroyepota chupe. Ahe oipiyere Jesús ñca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi tẽi! ⁹ Omondo vahe ité tie co setá guarepochi rupi ava iparaisu vahe pĩtivii ñgua viña —orohe tẽi chupe.

¹⁰ Jesús rumo oicua ore pihañemoñetasa. Sese aipo ehi oreu:

—¡Mahera vo co cuña pemañeco tẽi! Esepia, co mbahe oyapo vahe aviye ité cheu. ¹¹ Ava iparaisu vahe niha yuvirecoiño itera pe pãhuve. Che rumo ñgüe ndahe viteñoi chira vichico pe pãhuve. ¹² Esepia, co cuña oipiyere mbahe siacua vahe che rese che tĩ ñgua renondeve. ¹³ Supi eté aipo ahe pẽu: co ñhesa pĩsirosa resendar mombehuse opacatu tecua rupi, imombehusa aveira co cuña rembiapo sese mahenduha ñgua —ehi.

Judas Iscariote oyemoingatu Jesús mondo ñgua yamotarẽhimbar povrive

¹⁴ Ipare ñepeí ore pãhu pendar, Judas Iscariote, oso, oñhehe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús pẽu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mondo ñgua yamotarẽhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahe se ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoyase,

—Peso tecua guasuve che cua vahe rõtave aipo peyera chupe: ‘Ore Mbohesar aipo ehi: Cõimi che mano ñgua, sese ayapo potami sõtave Pascua pieta che remimbohe reseve, ehi ndeu’ peyera chupe —ehi.

¹⁹ Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ Pĭtu ramomise, opacatu orogupĭ mesave Jesŭs piri ore caru āgua. ²¹ Ore carusave aipo ehi oreu:

—Supi eté aipo ahe pĕu: ñepei pe pāhu pendar che mondora che amotarĕhisar upe —ehi.

²² —Che Yar, ¿che pĭha? —orohe-rohe tĕi ñepei-peĭ ore yacatu ore viharĕhisa pipe chupe.

²³ —Omondo vahe opo che caro pipe, ahe che mondora che amotarĕhisar upe —ehi—.

²⁴ Imboaviyesa itera che, Ava Riquehĭr, rese ñehesa icuachiapri. ĭlparaisu catura rumo acoi mbia che mondosar! Aviye catura ndoyesuise viña —ehi.

²⁵ Ahese Judas imondosavi oporandu:

—Ore Mbohesar, ¿che tie? —ehi.

—Taa, ĩnde ité niha ĕgŭe erera! —ehi chupe.

²⁶ Ore caru viteseve, Jesŭs oipĭsi pan, “Aviye ndeu” ehi Vu upe. Aipo ohe pare, ombohimbohi oreu imondo, aipo ehi:

—Ndo co, pĕhu co che rete —ehi.

²⁷ ĩpare oipĭsi ĭgua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepia, co che ruvi, ahe omoimera che Ru remimbotar ĭpiasu vahe pĕu, ahe oyepiyerera ava rehĭi angaipa rese ñero āgua. ²⁹ Ndaihu ĭri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ĭpiasu vahe —ehi oreu.

Jesŭs, “ ‘Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivĭtri Olivo ve. ³¹ Evocoiyase Jesŭs aipo ehi oreu:

—Opara pemocañi che rese yeroyasa peyesui co pĭtu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tĕira ovesa opacatu rupi yuvireco’ ehi vahe.

³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya ĭri chira yuvireco, che rumo ndayepĕpii chietera nde sui —ehi chupe.

³⁴ —Che rumo supi eté aipo ahe ndeu: co pĭtu pipeve voi eté tacura ñehere nondeve, “Ndaicuai vahe ité aipo mbia” erera mbosapĭ oyupagŭer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pāve tupri tĕi chupe.

Jesŭs oyerogui Getsemanĭ ve

³⁶ ĩpare Jesŭs rupi orosoño Getsemanĭ ve. Aheve aipo ehi oreu:

—Peguapĭ cohave; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirĭo Zebedeo rahĭr. Ahese oyandu oviharĕhisa oico. ³⁸ Evocoiyase ahe aipo ehi chupe:

—Ndavihai eté. Esepia, che hā oyandu ité manosa. Pepĭta rane cohave iyavei pemahe-mohara pe yeroqui pipe che rese —ehi.

³⁹ Evocoiyase oso tenonde catumi. Aheve oñenopiha ovapĭ ivĭ rese oyerogui Vu upe aipo ehi: “Che Ru, iyase ndeu che renose mbahe-mbahe tĕi sui eve; tayapo eme ru che remimbotar tĕi, nde remimbotar rupi catu tayapo” ehi.

⁴⁰ ĩpare oyevi gŭemimbohe upe. Ahe rumo opaño yuviroque yuvirocua. Ahese aipo ehi Pedro upe:

—ĭNdapeñemosai eté vo pe ropesĭi upe che rāro āgua que ñepei hora che mondugŭe āgua peye! ⁴¹ Pemahemoha, peyerogui mbahe tĕi pipe pe viapiĕhi āgua. Supi eté pequerĕhi ité viña, pe retecuer tĕi niha nipiratai pĕu —ehi.

⁴² Ichui imoñuvirĭosa rupi oso ĭri oyerogui aipo ehi: “Che Ru, ereipotase che reique āgua co mbahe tĕi pipe, eyapo nde remimbotar che rese” ehi.

⁴³ ĩpare oyevisĕ, osesapiha ĭri ĭquesĕve ou. Esepia, sopesĭi nomboyeroyai eté yuvireco.

⁴⁴ Evocoiyase oseypa ĭri oso oyerogui āgua imombosapĭsa rupi. Aipo ehi tupriño avei oyerogui Vu upe. ⁴⁵ ĩpare oyevi ĭri gŭemimbohe upe aipo ehi chupe no:

—ĭPequeño vite vo peyu! Osupiti che, Ava Riquehĭr, mondo āgua ava yangaipa vahe povrive. ⁴⁶ Pepŭha, yaso. Esepia, cōimi eté che amotarĕhisar upe che mondo vaherā secoi —ehi.

Jesŭs oipĭsi yuvireco

⁴⁷ Jesŭs ñehere viteseve, Judas oyepota oso chupe. Ahe ñepei semimbohe ore pāhu pendar, iyavei setā iteanga ava yugŭeru quise pucu, ivira reseve-seve supĭ. Ahe pahĭ eta rerecuar yuvirecoi vahe judĭo rerecuareta porocuaĭta rupi oyapo yuvireco. ⁴⁸ ĩpĭndar rumo

imondosar Judas aipo ehi: “Asovaupitese, ahese peicuar; ahe peipsisira” ehi. ⁴⁹ Ipape oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoyase semimbohe seci vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoyase cūrítei voi omboura doce mil sui setá catu vahe güembiguai che repi água viña? ⁵⁴ Egüe ehise rumo Tüpa Ñehengagüer icuachiapri ndayaviyei chietera viña, ahe co cūrítei osupiti —ehi.

⁵⁵ Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi água imonda rai vahe nungar che rereco peye. Che ari yacatu rupi aguapise pe pãhuve pe mbohe água tũparo pipe, ndapeyapoi eté co nungar cheu. ⁵⁶ Co rumo opacatu egüe peye Tüpa ñehe mombehusar rembicuachiagüer mboaviye água cute —ehi ava rehii upe.

Ahese voi opacatu oroñemosaipe, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

⁵⁷ Ahese Jesús pisisar viraso Caifás rêtave yuvireco, ahe pahi rerecuar ivate catu vahe seci. Aheve oñemonuha Moisés porocuaite rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive tēi osaquicue moña oso. Egüe ehi oyepota pahi rerecuar ivate catu vahe rēta rocar áchisave. Aheve oi que ipipe, iyavei oguapi oĩ sundao pãhuve ‘¿mara ehi etera piña sereco yuvireco?’ oya.

⁵⁹ Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca água yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosii eté rumo mbahe sembiapo naporai vahe yuca uca água yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

⁶¹ —Co mbia aipo ehi: ‘Che aicatu co tũparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶² Ahese pahi rerecuar ivate catu vahe opũha, oporandu Jesús upe:

—¿Mahera vo nderemboyeveii eté ñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³ Noñehei eté rumo. Ahese,

—Che orocuai Tüpa supi eté vahe rer pipe emombehu oreu: ¿Poropísirosar ité nde ereico, Tüpa Rahir? —ehi pahi rerecuar ivate catu vahe chupe.

⁶⁴ —Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir; aguapise Tüpa mbahe mboavaisarēhi acato coti, ayevise avei iba quíha rese curi —ehi.

⁶⁵ Evocoyase pahi rerecuar ivate catu vahe imboasipave omondo oturucuar aipo ehi:

—¡Indó, mbahe tēi eté ñehe Tüpa upe! ¡Mbahe iri vo yaipota vite yaico! Yasendupa niha aipo Tüpa upe ñehe-ñehe tēisa cūrítei. ⁶⁶ ¿Mara ehi aipo pe pihave? —ehi.

—Supi eté, oyavi mbahe. ¡Tomanofño ité! —ehiño ivoya eta yuvireco chupe.

⁶⁷ Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸ aipo ehi yuvireco chupe:

—Nde niha aipo ereico Tüpa remimbou Poropísirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹ Pedro evocoyase oguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi seci Jesús Nazaret pendar rupi yepi —ehi ava upe.

⁷² —¡Aní! —ehi iri ahe cuña upe—. ¡Tüpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tüpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pëu! —ehi angahu tēi chupe.

Aipo iheseve, tacura oñehe. ⁷⁵ Ahe Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahe osē, oyasehó iteanga oso.

27

Jesús serasosa Pilato rovai

¹ Cõhe ramose, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco. ² Ipare oipocua-pocua seraso mborerecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tũparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi ãgua aipo ehi:

⁴ —Che ayemboangaipa tiēte vichico. Esepia, amondoño tēi mbia seco catupri vahe pëu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tũparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porrecosa riru pipe. Esepia, ava yucapirã repri tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehögüer tĩ ãgua’ oyapave yuvireco.

⁸ Sese cūrtei co ivi upe, “Ava ruvi repri tēi” ehi yuvireco yepi. ⁹ Ēgüe ehi co imboaviye ité Tüpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. ¹⁰ Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tüpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoyase acoi pahi eta rerecuar iyavei judío rerecuareta oñemonuha vahe eipeve oiñehengapo-ngapo tēi yuvireco. Nomboyevi eté rumo iñehe chupe oyeepi ãgua.

¹³ Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevi eté rumo que ñepe i angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepe i ava soquendapri renose ãgua Pascua pieta pipe ava rehii remimbotar rupi yepi. ¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pëu: Barrabás pñha, anise Jesús “Poropisirosar” ehi vahe yuvireco chupe tie? —ehi.

¹⁸ Esepia, ahe oicuaño ité ava rese yemoecatēhisa pipe sui imondopri secoise.

¹⁹ Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰ Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he ãgua yuvireco. ²¹ Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherã pëu? —ehi.

—¡Barrabás tosē! —ehi yuvireco.

²² —¿Mbahe vo evocoiyase che ayapora Jesús rese chupe acoi ava, “Poropísirosar” ehi yuvireco? —ehi.

—¡Tayaticasa curusu rese! —ehi ati-atño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upe.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoiyase Pilato: “Ndaicatui mbahe moingatu sepi āgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi: —Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica āgua.

²⁷ Evocoiyase mborecurar sundao viroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omonde turucuar p̄ra vahe yuvireco sese ²⁹ iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecurar tasecoi! —ehi angahu sese oguayí tēisa pipe yuvireco.

³⁰ Iyavei ondivi-ndivi yuvireco sese. Ipare yuvirocua-rocua ipo pendar tacuarmi pipe ñaca rese yuvireco. ³¹ Ēgüe ehi yoyai catu-catu yuvireco. Ipare virocuase turucuar p̄ra vahe ichui, ahese omonde iturucuar ité yuvireco sese. Ichui v̄raso curusu rese yatica āgua yuvireco cute.

Jesús yaticasa curusu rese

³² Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús v̄reco vahe rese” ehi voño tēi yuvireco.

³³ Oyepotase yuviraso Gólgota serer vahesave, ahe ‘ava ācagüer’ oya aipo ehi chupe, ³⁴ aheve uva ricuer imboyeshapri mbahe pihaupiar rese omondo tēi yuvireco Jesús toihu. Osāha tēi, ndoihu potai rumo.

³⁵ Ipare oyatica curusu rese yuvireco. Ahese sundao iguayíño oyeupe iturucuar mboyaho-yaho āgua rese. ³⁶ Ipare aheve uguapi yuvinoi s̄aro. ³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecurar guasu” ehi icuachiapri oi.

³⁸ Ñuvirío imonda rai vahe yaticasa avei curusu rese supive yuvireco, ñepeí mbahe rese ipocosa coti, ambuae evocoiyase mbahe rese ipocoñehisa coti yuvireco. ³⁹ Acoi ava ñocuasar iñehe-ñehe tēi, oñeaca mbovava, ⁴⁰ aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tūpa Rahir nde recose, egüeyi curusu sui! —ehi tēi yuvireco chupe.

⁴¹ Aipo ehi avei pahí eta rerecurar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴² —Oipísiro ambuae, ahe ae rumo ndoicatui oñepisiro. Israel rerecurar guasu secoise, ¡togüeyi curusu sui cūrítei, ahese voi seroyasara! ⁴³ Ahe oyeroya Tūpa rese, Tūpa evocoiyase oipotase, toipísiro cūrítei. Esepia, ahe, “Che Tūpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵ Ahese mbiter ari pipe, opa tupri p̄itu ivi rupi. Ēgüe ehi las tres rupi. ⁴⁶ Ahese tupri avei Jesús oñehe p̄rata aipo ehi: “Elí, Elí, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñehe, aipo ehi yuvireco:

—Esendu co mbia, Tūpa ñehe mombehusar Elías upe oñehe —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pipe imondo iv̄ira apri rese chupe ‘toihu’ oya. ⁴⁹ Ambuae rumo aipo ehiño yuvireco:

—Ēgüe tehiño rane, ¿oura p̄lha Elías ipísiro āgua? —ehi yuvireco.

⁵⁰ Ahese Jesús s̄ase p̄rata iri, omano. ⁵¹ Ahe pipeve voi tūparo guasu turucuar ivate coti sui ovo tupri. Aheseve avei ivi oririi iyavei ita guasu-guasu oyeca. ⁵² Tehögüer ruvípa ita apopri avei oyemboi yuvireco iyavei setá Tūpa reroysar omano vahecuer, ahe avei opa ocuerayevi yuvireco. ⁵³ Ēgüe ehi Jesús cuerayevire, ahe opa yuvinosé tehögüer ruvípa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴ Evocoiyase co sundao rerecuar iyavei Jesús rãrosareta, ahe oyanduse ivi ririri yuvireco iyavei ambuae mbahe êgüe ehi vahecuer repiase, ahese oyembosiquiye guasu aipo ehi yuvireco:

—iSupi eté catu co mbia Tüpa Rahir ité secoi! —ehi tēi yuvireco.

⁵⁵ Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oipitivi yuvireco yepi. ⁵⁶ Ahe ipãhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

⁵⁷ Pitu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoiyase ahe oso Pilato upe oporandu Jesús rehögüer rese. Evocoiyase Pilato aipo ehi: “Aviye, timondosaño chupé” ehi. ⁵⁹ José evocoiyase víraso sehögüer. Ipape oimama tupri turucuar secose vahe ndiquihai vahe pipe. ⁶⁰ Ichui omoingue ombahe tuvipa ipiasu vahe, ita oyoho uca vahe pipe. Ipape osovapi ita guasu yapayere vahe pipe oso. ⁶¹ Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶² Ahere ayihive mbituhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosapi ari pare omano vahe pãhu sui” ehi acoi cuese oicove vitese —ehi yuvireco—. ⁶⁴ Sese emondo sundao sehögüer ruvipa rãro tupri ãgua mbosapi ari rupi semimbohe ñomiêhi ãgua pitu pipe yuvireco. Aviyeteramo, “Ocuera yevi omano vahe pãhu sui” aipo ehi tupri tēi tiêtera ava upe yuvireco. Aipo ehise yuvireco, yipindar semira tēi vahe sui ivate catura serecosa —ehi yuvireco.

⁶⁵ Pilato evocoiyase aipo ehi chupe yuvireco:

—Aviye —ehi—. Amondora sundao pëu. Peraso, pemoviracua tupri ité sãro ãgua —ehi.

⁶⁶ Evocoiyase yuviraso tehögüer ruvipa rãro tupri ãgua yuvireco. Ahese omondo tehögüer rovapisa ita guasu rese mbahe imomisa cua ãgua yuvireco. Ipape oseya aheve sundao sãro ãgua yuvireco cute.

28

Jesús ocuerayevi

¹ Cõhe ramomise, domingu pipe, María Magdalena iyavei ambuae María yuviraso tehögüer ruvipa repia yuvireco. ² Aviyeteramo tēi oririri pĩratá ivi Tüpa rembiguai iva sui igüeyise. Êgüe ehi oyepota tehögüer ruvipave ou, ahe virocua itape guasu sovapisa ichui. Ipape iharive oguapi oĩ. ³ Êgüe ehi sendí iteanga aviye acoi overa vahe. Iturucuar evocoiyase morochi eté. ⁴ Osepia sundao, oririri eteanga osiquiyepave yuvireco ichui, opa oyuca pucu-pucu tēi yuvireco. ⁵ Tüpa rembiguai rumo aipo ehi voi eté cuña upe:

—Pesiquirei rene. Esepia, che aicua pe peseca Jesús yaticapirer. ⁶ Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipape aipo ehi:

⁷ —Peso poyava voi, tapemombehu semimbohe eta upe: ‘Ocuera yevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pëu —ehi Tüpa rembiguai cuña upe.

⁸ Evocoiyase cuña yuviraso poyava voi suvipa sui, osiquiye pãhuve rumo ovihãño yuvireco; êgüe ehi yuvinoñá iteanga imombehu yugüeru oreu. ⁹ Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopiha ipicuhaguã imboetisave yuvireco. ¹⁰ Evocoiyase ahe aipo ehi chupe:

—Pesiquirei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepiã yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco. ¹² Evocoiyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve pitu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Êgüe ehi vite cüritei judío Jesús cuerayevisa reroyaêhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoyase êgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro têi ore pâhu pendar ndoviroya tupri vitei yuvireco viña. ¹⁸ Evocoyase ahe oyemboya ore rese aipo ehi oreu:

—Tüpa che mbou mborerecuar ivate catu vahe che reco ãgua ivave, ivive nara avei no — ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaherã; peñapiramo avei che Ru rer pipe, che rer pipe, Espiritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoãpiramo vahe ivi iporupirêhisa rupi secoi

¹ Co yipîndar aviye vahe ñehesa Jesucristo, Tûpa Rahir, recocuer resendar amombehu potami pëu. ² Yipiîndar Tûpa aipo ehi imombehu oñehe mombehusar Isaias rembicuachia pipe aracahe:

“Amondora che ñehe mombehusar nde renonera, ndeu peri moatiro âgua” ehi.

³ “Oyeendu ñehesa ipîrata vahe ava porêhisave: ‘Pemoingatu yande Yar raperã; pemohivi tupri avei’ ehi” ehi aracahe.

⁴ Êgüe ehi Juan ou ava âpiramo ivi iporupirêhisa rupi oico, aipo ehi: “Pemboasi pe angaipa, peyevi Tûpa upe, ahese opoãpiramora Tûpa pëu ñero âgua pe angaipa rese” ehi ava upe.

⁵ Opacatu ava oyugüero iñehe rendu âgua ivi Judea rupindar, iyavei tecua Jerusalén pendar oangaipagüer mombehu âgua. Ahese Juan oñapiramo iai Jordán pipe.

⁶ Juan turucuar camello ragüer apopri, sumbicuasa mbahe pîrer, sembihu evocoyase tucru, eiri caha pipendar avei. ⁷ Ahe aipo ehi oñehe ava upe oico: “Che raquicuei oura seco pîrata catu vahe che sui, sese cheu ndiyai chira ayeaivi ipitaquisã yora âgua. ⁸ Che supi eté opoãpiramo i pipe têi; ahe rumo pe âpiramora Espiritu Santo pipe” ehi.

Jesús âpiramo agüer

⁹ Ipare Jesús osê tecua Nazaret sui oso Galilea rupi. Aheve Juan oñapiramo iai Jordán pipe.

¹⁰ Osê ramoseve i sui, Jesús osepia iva oyemboi tupri, ahese Espiritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, aviha etepri nde rese” ehi vahe.

Jesús recoãhasa

¹² Ipare voi, Espiritu Santo viroguata Jesús ava porêhisa rupi. ¹³ Aheve Jesús secoi cuarenta ari mbahe mîmba vai pãhuvé. Aheve avei Carugar oseoçaha; Tûpa rembugai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cõimi eté Tûpa mborerecuasa yandeu. Sese, pemboasi pe angaipa, peyevi Tûpa upe, iyavei peroya co ñehesa aviye vahe Tûpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepi ari Jesús oguata ipa Galilea ivii. Ahese osepia Simón, tivri Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca âgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chîhi oguata irimise, ahese osepia Santiago, Zebedeo rahir, tivri Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoyase vu oseya carite pipe ipitiviisar reseve, yuviraso supi.

Mbia carugar vireco vahe oyese

²¹ Oyepotase tecua Capernaum ve yuvireco mbituhusa ari pipe, Jesús oiique oporombohe tûparove. ²² Evocoyase ava osenduse iporombohesa, “¿Mara ehi rutei?” ehi têi yuvireco chupe. Esepia, ahe oporombohe güeco pîratasa pipe, ndahei Moisés porocuita rese oporombohe vahe nungar. ²³ Aheve mbia ahe tecua pendar vireco vahe carugar oyese, oñehe pîrata chupe aipo ehi:

²⁴ —¿Mahera vo ereyüño têi cohava oreu, Jesús Nazaret pendar? ¿Ereyu vo ore mocañi âgua têi? Che orocua ité, nde Tûpa suindar ndaseco marai vahe ereico —ehi chupe.

²⁵ Oñehe pîrata rumo carugar upe aipo ehi: —¿Quiriri, esê co mbia sui! —ehi chupe.

²⁶ Evocoyase carugar mbia rese secoi vahe omoehoha seiti ivive, sãse, osê oso ichui.

²⁷ Opacatu ava ombosiquiye, ichui oporandu-randu oyeupe yuvireco aipo ehi:

—¿Mbahe pîha co? ¡Iporombohesa ipiasu vahe ité! ¡Co mbia vireco ité omborerecuasa! ¡Carugar avei eté omboyeroya oyeupe iñehese! —ehi têi ava yuvireco.

²⁸ Cûriteimi voi yandusa serãcua opacatu ivi Galilea rupi.

Jesús ombogüera Pedro rembireco si

²⁹ Jesús yuvinosese tūparo sui, yuviraso Santiago, Juan rese Simón, Andrés rētave. ³⁰ Aheve Simón rembireco si sohí iteanga vupave ou. Evocoiyase omombehu Jesús upe imbahehasisa yuvireco. ³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² Pitu ramose opacatu imbaheasi vahe iyavei carugar vireco vahe viraso yuvireco chupe imbogüera água. ³³ Opacatu ava ahe tecua pendar oñemonuha oquendipive yuvireco. ³⁴ Evocoiyase setá ombogüera mbahehasi-rasi tēi vireco vahe, iyavei omboyepepi setá carugar ava sui. Ndoipotai rumo carugar ñehe. Esepia, ahe oicua ité evocoiya seco yuvireco.

Jesús Vu Tūpa Ñehengagüer omombehu judío tūparo rupi

³⁵ Ayihiteve Jesús oñarapuha oso ava porēhisave oyeroku água. ³⁶ Evocoiyase Simón ondugüer reseve yuviraso seca. ³⁷ Osepiase,

—Opacatu ava nde reca tēi yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu água aheve; evocoi nungar apo água niha che ayu —ehi.

³⁹ Egüe ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose carugar ava sui.

Jesús ombogüera mbia lepra vireco vahe

⁴⁰ Ñepe mbia lepra rerecosar oyemboya Jesús rese, oñenopiha sovai aipo ehi:

—Ereipotase, iya nde che mbogüeramí eve —ehi.

⁴¹ Iparaisuerecosave opoco sese.

—Aipota. ¡Erecuerara cūrítei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuita rupi. Evocoiyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique água güecocuer mombehuse tecua rupi; secoiño tēi tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepe ari pipe Jesús oyeve ou tecua Capernaum ve, ahese opacatu oyandu ñepe oive secoise yuvireco. ² Cūríteimi voi eté setá ava oñemonuha yuvireco secosave. Sese ndipoi eté ava reique iri água oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota ndoguatai vahe yuvireco chupe. ⁴ Ahe rumo ndiyai seroique água Jesús uve ava rehísave yuvireco. Sese viroyeupi oi haríve seraso yuvireco. Aheve teca vírocua oi sui yuvireco; supí viroyi supa reseve imondo Jesús rovai tupri yuvireco. ⁵ Ahe oicua co mbia yuvirecoi vahe oyese yeroya, aipo ehi imbaheasi vahe upe: —Che rahír, che ñero nde angaipa rese ndeu —ehi.

⁶ Moisés porocuita rese oporombohe vahe rumo ipihañemoñeta aheve yuvinoi:

⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi água” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pñha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehír, areco mborerecuasa co ivi pipe ava angaipa upe che ñero água —ehi.

Evocoiyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osē oso ichui opacatu ava rembiepiave. Sese opacatu oyepihamondi yuvireco, omboetei Tūpa yuvireco aipo ehi: —Yipisuive ndayasepiái vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivii. Aheve oporombohe oyese ava rehí yemboyase. ¹⁴ Ichui oguata vitese, osepi Leví, Alfeo rahír, guarepochi rerochasave chinise, aipo ehi chupe:

—Erio che rupi —ehi.

Evocoyase Leví opūha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi reroquasar iyavei ava yangaipa vahe pāhuve. Esepia, setá ava osaquicue moñaño ité yuvireco. ¹⁶ Evocoyase Jesús ocaruse ipāhuve, fariseo eta, oporombohe vahe Moisés porocuaita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi reroquasar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacusa rese ñehesa

¹⁸ Ñepeí ari pipe Juan Oporoāpiramo vahe remimbohe oyecuacu yuvireco, fariseo eta avei oyecuacu yuvireco no. Evocoyase moviro mbia ipāhu pendar yuviraso, oporandu Jesús upe:

—¿Mahera ru nde remimbohe ndoyecuacui eté yuvireco? Esepia, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoyase ombovevi ahe ava upe:

—ñdiyai eté ichohopri mendasave iyecuacu āgua imer oicove viteso ipāhuve! ²⁰ Oimera rumo ari imer reraso āgua ichui curi, ahese ramo oyecuacura yuvireco cute —ehi.

²¹ “ñdiyai yayapete turucuar cuacua turucuar ipiasu vahe pipe. Esepia niha, ipiasu vahe oichohó turucuar cuacua imondoro iri āgua, ichorosa evocoyase tuvicha catu-catuño ité.

²² Iyavei uva ricuer ipiasu vahe ndiyai iñasa mbahe pírer cuacua pipe. Esepia, uva ricuer ipiasu vahe ososo mbahe pírer cuacua vahe pipe, ombopuñora, uva ricuer evocoyase ocañipa tēira, iyavei mbahe pírer ocañi tēi aveira. Sese uva ricuer ipiasu vahe ñoñasara mbahe pírer ipiasu vahe pipe yepi” ehi.

Jesús remimbohe oipoho trigo mbituhusa ari pipe yuvireco

²³ Ñepeí mbituhusa ari pipe, Jesús oguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sãhii yuvireco. ²⁴ Evocoyase fariseo aipo ehi:

—¿Mahera nde remimbohe mbituhusa ari pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroquí niha icuachiapri aracahendar pipe mborerecuar guasu David rembia-pogüer rese acoi ndasiepoise ondugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tūpa rēta pipe pan imboeteipri Tūpa upendar reca ondugüer reseve yuvirohu āgua. Ahe chupe acoi ndipotasai ihu āgua yuvireco viña; judío pahi yuvirecoi vahe upeño ité niha ipotasa ihu āgua yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa ari yaposa ava upe nara, ndahei ava yaposa mbituhusa ari upe nara. ²⁸ Sese Ava Riquehir mbituhusa ari rerecuar secoi —ehi Jesús fariseo upe.

3

Mbia ipo nomii vahe Jesús ombogüera

¹ Jesús oique iri judío tūparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pīha mbituhusa ari pipe?’ oya omahengatu yuvireco sese ‘yaiñhengapo angahu’ oyapave tēi. ³ Evocoyase Jesús aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pīha, mbahe naporai vahe tie? ¿Yaiipiñiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoyase omahe ava oyese oyere tupri vahe rese vorieñhisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoyase oichoho oyiva, ocuera tupri ité. ⁶ Ahese fariseo opa yuvinose yuviraso oyemoingatu Herodes rupindar rese Jesús yuca āgua yuvireco.

Ava rehii ipa popi rupi yuvirecoi

⁷ Ipare Jesús yuviraso güemimbohe reseve ipa popi rupi, ava rehii avei ivi Galilea rupindar yuviraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sepia água. ⁹ Sese oyocuai güemimbohe vireco voi vaheñã ñepe carite yuvireco ava omboti etepriñhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuviraso chupe sese opoco água.

¹¹ Iyavei ava carugar vireco vahe sepiase, oñenopiha sovai, oñehe pucu-pucu yuvireco: —ñde Tüpa Rahir ereico! —ehi.

¹² Jesús rumo oñehe pĩrata chupe: “Che mombehui rene ava rovaque peye” ehiño imondo.

Jesús oiporavo doce tupri güemimboherã

¹³ Ipare Jesús oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvireco chupe. ¹⁴ Ahe ipáhu pendar osenoi doce tupri güemimboherã ‘toguataño che rupi, tomombehui Tüpa Ñehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerrecuasa carugar ava sui imboyepepi água yuvireco’ oyapave. ¹⁶ Evocoi doce yuvirecoi vahe, ahe: Simón (sererguã acoi omondo Pedro), ¹⁷ Santiago iyavei tivri Juan Zebedeo rahir, ahe avei omondo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe, Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe páhu pendarer; ¹⁹ iyavei Judas Iscariote, ahe omondo vaheñã Jesús yamotarēhisar upe.

“Jesús carugar pĩratasa vireco oyese” ehi tēi ava yuvireco

²⁰ Ipare Jesús oi que oi pipe güemimbohe reseve. Aheve oñemonuha ati irise ava yuvireco sese, ndiyai icaru água yuvireco. ²¹ Oyanduse imu secocuer yuvireco, oyugüeru seraso água ‘ndayaracua iri revo’ oya.

²² Iyavei oporombohe vahe Moisés porocuita rese oyugüeru vahe Jerusalén sui aipo ehi: “Co mbia carugar rerecuar Beelzebú oyocuai vahe, ipĩratasa pipe tēi omboyepepi carugar ava sui” ehi yuvireco.

²³ Evocoiyase Jesús omombehui carugar recocuer aipo ehi: “¿Mara ehira aipo carugar ahe ae oyeenose ava sui viña? ²⁴ Acoi mborerrecuar guasu povri pendar, ahe ovavavase oyeupe; evocoi nungar mborerrecuar pĩratasa ocañi tēira. ²⁵ Acoi oñemu oyese ae oyeamotarēhise, oyemboyahose yuvireco viña, ahe ndipocopi chiaveira yuvireco. ²⁶ Acoi carugar oyemboyahose ovava água oyeupe ae yuvireco, ndipocopi chiaveira yuvireco, ahe evocoiyase secocuer ocañi tēi vaheñã ité yuvireco.

²⁷ “Ndiipo eté niha va oi que vahe que ava ipĩrata etepri vahe rēta pipe imbahe rero cuapa água ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe eñu: Acoi ava yangaipa vahe upe Tüpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espiritu Santo rese, ahe chupe ndipo iri chietera ñerosa apirēhi vaheñã ité” ehi.

³⁰ Aipo ehi Jesús imboyevi ahe upe. Esepia, “Carugar tēi erereco” ehiño ava yuvireco chupe.

Jesús si, tivireta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvireco. Ichui omondo oñehe yuvireco chupe oyeupe ichē água. ³² Yivii yuvinoi vahe oñehe yuvireco chupe:

—Nde si, nde rivireta, nde reindri reseve ocarve nde reca tēi yuvireco —ehi.

³³ Ahe rumo,

—¿Ava pĩha che si; ava pĩha che rivireta yuvirecoi? —ehi.

³⁴ Evocoiyase omahe ava oivirindar yuvinoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tüpa remimbotar oyapo vahe yuvireco, ahe che rivri, che reindri, che si avei yuvirecoi —ehi.

4

Mbahe miti sui yembohesa

¹ Jesús oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve uguapi oñehe. Ava rumo opacatu ivi átasa rupi opitaño yuvireco. ² Evocoiyase ava mbohe água omboyoya tecocuer mbahe tēsa rese aipo ehi:

³ “Pesendu co ñehesa: Ñepe mbia osē omaheti. ⁴ Ahe otiapi-apĩse mbahe rāhii oso, moviro oviapi peri rupi. Vĩrai yugüeruse rumo, opaño yuvirohu. ⁵ Iyavei moviro oiti ivi nayanai vahesave, ita páhuve. Sese cūrteimi sori. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu páhuve; ahe yu rumo sori poyava catu. Sese opaño

oyopi. Evocoyase ahe miti ndihai eté. ⁸ Ambuae mbahe rāhii oiti ivi aviye vahesave. Ahe opa ocuacua miti, iha tupri ai yuvireco: amove iha treinta tupri ohí rese, amove sesenta, amove cien tupri ité oha vireco” ehi.

⁹ Evocoyase, “Acoi osendu pota vahe che ñehe, toyapisacaño sese” ehi Jesús ava rehii upe.

¿Mahera pīha co yembohesa imboyoyasa ambuae mbahe rese?

¹⁰ Ipare Jesús opita ahe ae. Ava opita vite vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pēu niha Tūpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenducuai chietera yuvireco, Tūpa upe oyevi potaēhisave, ipipe sui ndipoi chira ñeroisa yuvireco chupe” ehi.

Jesús omombehu tupri yembohesa mbahe tisa resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri āgua? ¹⁴ Evocoi mbahe rāhii oñoti vahe, Tūpa Ñehengagüer mombehusar nungar. ¹⁵ Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Carugar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetes pipe; ¹⁷ ndovirecoi rumo guapo oyese opirata āgua. Evocoyase yuvirecoise mbahe-mbahe tēi pipe Tūpa Ñehengagüer sui tēi, cūrteimi seroyaēhisave, ‘Apoira ichui’ ehi yuvireco. ¹⁸ Ambuae ava recocuer inungar mbahe rāhii ñotimbri yu pāhu rupi: osenduse ñehesa Tūpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saiskusave. Oyembopa uca rumo ombahe eta upe. ‘Opacatu ité mbahe tareco’ ehi tiēte viña. Ipipe sui omocañi tēi Tūpa Ñehengagüer. Ndoyapo ucai avei mbahe eta aviye vahe evocoi nungar ava upe. ²⁰ Ambuae ava rumo osendu vahe Tūpa Ñehengagüer seroyasa pipe, oyapoño ité mbahe aviye vahe. Ahe inungar mbahe rāhii ñotimbri ivi aviye vahe rese: amove vireco ohí rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvriva nara tēi iyavei yande rupavrive nara tēi no? Aní, tataendi imondosa ivate poroesape āgua. ²² Ndipoi chietera mbahe ñomipri ndayasepiaí vahe rā cūrí. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Iharive amondo iri catura pēu. ²⁵ Vireco tupri vahe upe, imondosa catura. Acoi ndovireco tupri vahe sui, serocusañora” ehi.

Yembohesa mbahe rāhii rorisā resendar

²⁶ Aipo ehi iri avei Jesús: “Tūpa mborerecuasa co ivi pipe inungar que ava oñoti vahe mbahe rāhii. ²⁷ Omaheti pare, oso oque. Ipare coiye catu oñarapuha. Ahe oñocua pītu, ari avei, evocoyase mbahe rāhii sorí poyava yuvireco. Itisar rumo ndoicuai mara ehi vori. ²⁸ Ivi rese niha oyesu miti: yipindar sorí, ipare iha, ipare sāhii yuvinose sese. ²⁹ Evocoyase co mbia mbahe ha yaviyese, oipoho. Esepia, oyepota ari ipoho āgua chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi pipe pēu; mbahe rese pīha iyacatu imboyoyasa icua āgua? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Noti pare rumo, sorí, ocuacuase tuvichá catu ambuae mbahe miti sui. Sāca tuvichá ité, sese vīrai oyemboaiti sovri rupi yuvireco” ehi.

Jesús imboyoyasa ambuae mbahe rese oporombohe yepi

³³ Ēgüe ehi Jesús oporombohe Tūpa Ñehengagüer rese, omboyoya-yoya ñepeí mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyañhi pipe. Ahe rumo omombehu tupri güemimbohe upe ahe aemi yuvirecoise.

Jesús omombituhu i ohitu vahe, ivitu ai reseve

³⁵ Ahe ari pipe pītu ramomise, aipo ehi güemimbohe upe:

—Yaso ipa rovai —ehi.

³⁶ Evocoyase ava sui osiri yuvireco, yuviraso carite pipe. Ambuae carite pipendar avei yuviraso supí. ³⁷ Oyepotase rumo ivitu ai ipirata vahe, i ohitu vahe oha guasu-guasú carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese? ¡Opara moco yaso ipive! —ehi.
³⁹ Evocoyase aipo hese, omahe, oñehe pīrata ivitu ai upe, ipa upe avei:
 —¡Pepituhu! —ehi.
 Aheseve voi opituhu tupri. ⁴⁰ Ipape aipo ehi güemimbohe upe:
 —¿Mahera pesiquiyé iteanga? ¿Ndapeyeroa vitei vo che rese? —ehi.
⁴¹ Ahe rumo osiquiyepave oporandu-randu oyeupe yuvireco:
 —¿Ava pīha co mbia secoi? Esepia niha, ivitu ai, ipa avei omboyeroa —ehi tēi yuvireco chupe.

5

Mbia Gerasa iguar vireco vahe carugar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia carugar rerecosar tuvipa pāhu rupi secoi vahe oso Jesús upe. ³ Co mbia tuvipa pāhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pītu rupi oguata, osapucaí oico ivitri mahugüer rupi, tuvipa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pīrata chupe:

—¡Eyepéi che sui Jesús, Tūpa seco ivate catu vahe Rahir! ¡Aporandu Tūpa rer pipe che mombaraisuēhi āgua eve! —ehi.

⁸ Aipo ehi, esepia, yipīndar Jesús aipo ehi chupe:

—¡Carugar mbahe tēi vahe, esé co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehii eté —ehi.

¹⁰ Oporanduño chupe omondopaēhi āgua co ivi sui. ¹¹ Ichui namombriimi setá cuchi ocaru vahe ivitri rese yuvireco. ¹² Sese carugar oporandu yuvireco chupe:

—Ore mondopaño cuchi aviterve eve —ehi yuvireco.

¹³ Evocoyase Jesús omondo carugar sē āgua ahe mbia sui. Ahe opa yuviroique cuchi aviterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoyase cuchi rārosar yuvinoña osiquiyepave yuviraso imombehu āgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pīha?’ oya yuvireco. ¹⁵ Oyepotase Jesús recosave, aheve osepia mbia carugar vireco vahecuer yuvireco oyemonde tuprise oī, yaracua tuprise avei. Ahese oyembosiquiye tēi yuvireco. ¹⁶ Mbahe oime vahe carugar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoyase ava Jesús upe: “Esé cohave sui” ehi yuvireco.

¹⁸ Oha irise Jesús carite pipe, co mbia carugar rerecosarer oporandu chupe supi oso āgua. ¹⁹ Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoyase ava opacatu, “¡Mara ehi rutei!” ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoyase opitaño ipa popive. ²² Evocoyase oyepota mbia mborerecuar tūparo pendar, ahe serer Jairo. Jesús repiase, oñenopiha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera āgua —ehi.

²⁴ Evocoyase oso supi. Ava rehii avei yuviraso supi. ²⁵ Ipāhuve avei oime cuña doce araviter rupi suvi yepiyere-yere vahe. ²⁶ Iparaisú iteanga, setá oporoposano vahe ndoicatu imbogüera yuvireco omomandaivete catu iposanosa pipe yuvireco. Opa tupri tēi omondo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava rehii pāhuve, iturucuar rese opoco. ²⁸ Aipo ehi oyeupe oico: “Iturucuar rese apocose rumo, acuerara” ehi. ²⁹ Ahe ramoseve voi ndasuvi yepiyere iri. Ipape oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osēse opīratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vite ité ava oiviindar rese ‘¿uma ité pîha opoco che turucuar rese?’ oya. ³³ Evocoiyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoiyase Jesús aipo ehi chupe:

—Che rayri, erecuera cūrítei nde yeroyasa pipe. Eso tupri. Esepia niha, erecuera nde mbaherasisa sui —ehi chupe.

³⁵ Ñehe viteseseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vite Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho ãgua; Pedro, Santiago, Juan güeraño oipota. ³⁸ Oyepotase Jairo rēta, osepia ava yemondii oyaseho vahe. ³⁹ Ichui oiquese oi pipe, aipo ehi:

—¿Mahera vo perãse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaēhisave yuvireco. Evocoiyase omose opacatu ava. Ipare omoingue iyesupa, ichi, oyeupindar reseve cuñatai rehögüersave. ⁴¹ Ipare oipopisi aipo ehi:

—Talita, cum —ehi chupe (‘cuñatai, eñarapuha, ahe ndeu’ ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare uguata. Sepiase ava, oyembosiquiye guasu yuvireco. ⁴³ Jesús rumo oyocuai imombehuēhi ãgua ambuae ava upe. Ipare,

—Pembocarú co cuñatai —ehi.

6

Jesús Nazaret ve secoi

¹ Jesús osē co tecua sui oso güecuave; semimbohe avei yuviraso supi. ² Oyepotase mbituhusa ari, ahese oporombohe tūparo pipe. Setá ava ñehe rendusar oyepihamondisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pîha vinose co mbahecuaa co poromondiisa apo ãgua? —ehi yuvireco oyeupe—. ³ Co niha carpintero, María membri; Santiago, José, Judas iyavei Simón riquelir, seindri avei yuvirecove yande pãhuve —ehi.

Sese ndoviroyai yuvireco. ⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco —ehi.

⁵ Ndoicatuí mbahe oporomondii vahe apo ãgua va viroyaēhisa pipe, sese moviro tēi imbaheasi vahe harive omondo opo imbogüera ãgua. ⁶ Ndoymbovihai ava viroyaēhisa rese.

Jesús oyocuai güemimbohe Tūpa mborerecuasa mombehu ãgua

Ipare Jesús oso, uguata tecua-tecuami namombrii vahe rupi oporombohe oico.

⁷ Evocoiyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pīratasa carugar mboyepepi ãgua chupe.

⁸ —Ndaperasoi chira rumo mbahe peguatasa rupi, pe pococa güeraño ité perasora —ehi—. Ndiyai avei peraso mbahe riru, pan, guarepochi avei. ⁹ Iyavei pemondera pitaqui güeraño. Ndapemondugüei chiaveira pe camisa seraso.

¹⁰ —Que pesosave peiquese oi pipe, pepitaño ipipe, ichuive tupriño ité pesēra pecua. ¹¹ Acoi ambuae tecua pendar ndape pisi potaise, ndosendu potaise avei pe ñehe yuvireco, peyepiñora ichui. Peipipeteño aveira pe pi ivi rātachigüer sui. Ēgüe pe hesa omboyecua cañisa apirēhi yuvireco chupe —ehi.

¹² Evocoiyase semimbohe eta yuviraso, “Pemboasi pe angaipa, peyevi Tūpa upe” ohe ãgua yuvireco. ¹³ Iyavei setá omboyepepi carugar ava sui, setá avei omondo mbahe quira ava imbaheasi vahe rese imbogüera ãgua yuvireco.

Juan Oporoãpiramo vahe mano agüer

¹⁴ Mborerecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoãpiramo vahe revo ocuerayevi. Sese oyapo poromondiisa ipīrata vahe —ehi.

¹⁵ Ambuae rumo,

—Tūpa ñehe mombehusar Elías mo evocoi —ehi yuvireco.

Ambuae evocoiyase,

—Tüpa ñehe mombehusar aracahendar mo evocoi —ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoi che añaca asia uca vahecuer, ahe cūrítei ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pipe soquenda. Esepia, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoiyase oyuca pota Juan yamotarēhisave; ndoicatui rumo yuca. ²⁰ Esepia, Herodes osiquieño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti ari Herodías remimbotar apo āgua, ahe se Herodes oharagüer pipe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oi que carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoiyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta mbocayhora ndeu” ehi. ²⁴ Ahe cuñatai osē oso, osi upe oporandu:

—¿Mbahe rese pīha aporandura chupe? —ehi.

Ichí aipo ehi chupe:

—Eporandu Juan Oporoāpiramo vahe āca rese —ehi chupe.

²⁵ Ipare cuñatai oña, oi que oso mborerecuar guapisave, aipo ehi chupe:

—Che aipota co pipeve voi eremboura Juan Oporoāpiramo vahe āca poratu pipe cheu —ehi.

²⁶ Mborerecuar rumo ndoyembovihal tēi. Esepia, ava ichohopri rovaque ité yipindar oñehe. Sese ndoicatui, “Aní” ohe āgua. ²⁷ Evocoiyase ipare voi mborerecuar oyocuai sundao Juan āca reru āgua. ²⁸ Sundao oso soquendasave, oyasia Juan āca, seru poratu pipe. Mborerecuar omondo co cuñatai upe, evocoiyase cuñatai omondo osi upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahe se aipo ehi oapóstol upe:

—Perío cohave, yaso, yapituhumi rane co coti —ehi.

Esepia, oyepindecuño ité ava yugüeru chupe, sese ndiyai icaru āgua yuvireco. ³² Evocoiyase ahe güeraño apóstol reseve yuviraso carite pipe co coti ava sui. ³³ Setá rumo ava osepia ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepia ava rehí, ahe se iparaisu ava eta chupe, inungar ovesa ndovirecoi vahe guārosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocuca ocaru āgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura pīha oreu dosciento denario pan repirā ava mbocarū āgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoiyase omboyaho-yaho ava imboguapi capihi harí rupi. ⁴⁰ Cincuenta, cien rupi-rupi oyemboyaho yuvireco. ⁴¹ Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehí upe imondo āgua yuvireco. Pira ñuvirío vahe avei omboyaho-yaho opacatu ava upe. ⁴² Evocoiyase opacatu ava ocaru vahe ihitaropa tēi yuvireco. ⁴³ Ipare semimbohe omboapipopa doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i harí rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyerocui āgua. ⁴⁷ Pituse carite ipa mbiterve ité secoi. Jesús rumo ahe ae

opitaño ivive. ⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovaichi yuvireco. Cōhe potase, oguata i hari rupi güemimbohe coti oso. Aviye ité acoi oñocuaño vahaerā oso. ⁴⁹ Sepiase rumo 'hāgüer tēi revo' oya, sāse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiqüiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi güemimbohe upe.

⁵¹ Ahe ohasa carite pipe, opituhu voi ivitu. Evocoiyase, “¡Mara ehi rutei!” ehi tēi yuvireco.

⁵² Esepia, ndoicua vitei eté pan apo ati agüer yuvireco, yavai vite seroya āgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehive oñapichiño carite yuvireco. ⁵⁴ Yuvinosepa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oimi rupi, ahe supi imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoiyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoiyase fariseo eta, Moisés porocuita rese oporombohe vahe avei yugüeru Jerusalén sui oyemboia Jesús rese yuvireco. ² Ahese ahe osepia Jesús remimbohe ocaru āgua iyepoiēhise porocuita mboaviyeēhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta arachendar recocuer sui ndipoisai eté yuvireco, sese oyepoiēhise ndocarui eté yuvireco yepi. ⁴ Mbahe recocuasa sui oyevise, ndocarui oyepoiēhi viteseve yuvireco. Iyavei tecocuer arachendar tēi oyapo vite yuvireco inungar igua riru piisa, mbahe riru guarepochi apopri iyavei vupa moatiro tuprisa.) ⁵ Sese fariseo eta iyavei Moisés porocuita rese oporombohe vahe oporandu Jesús upe yuvireco:

—¿Mahera vo nde remimbohe yande ramo arachendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Tüpa reroyasar angahu tēi peico vahe, supi tupri ité Tüpa ñehe mombehusar Isaías rembicuachía arachendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuita tēi’ ehi.

⁸ Ēgüte peye pepoipa Tüpa porocuita sui ava recocuer arachendar rupi tēi pe guata āgua —ehi.

⁹ Iyavei aipo ehi iri chupe:

—Pe ramo recocuer arachendar pipe tēi peseyaño co coti Tüpa porocuita. ¹⁰ Esepia, Moisés aipo ehi: ‘Pemboyeraya iyavei peipitiviira pe ru, pe si avei no. Acoi iñehe mara vahe oyesupa upe ahe, Tomanño, ehi’ ehi aracahe. ¹¹ Pe rumo aipo peye tēi: ‘Acoi ava aipo ehi vahe vu upe, osi upe avei no: Ndiyai chira mbahe mondo āgua pēu. Esepia, che opacatu mbahe areco vahe Tüpa upe imondopri, ahe Corbán, ehi’ peye; ¹² pe evocoiyase, aipo ehi vahe upe, ‘Ndiyai eté oyesupa pítivi āgua’ peye. ¹³ Co nungar apo pipe Tüpa porocuita ndaperoyai. Esepia, ndapepoi potai ava recocuer arachendar sui. Setá mbahe co nungar yepapo vite —ehi.

¹⁴ Ipare, “Perio” ehi iri ava rehü upe.

—Peyapisaca, pesenducua tupri che ñehe: ¹⁵ Ndahei ocar sui tēi ou ava recocuer monguiha āgua. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese —ehi.

¹⁷ Ipare oseyapase ava, oique oi pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oi que vahe ava aviterve nomboangaipai eté? ¹⁹ Esepia niha, ndahei ipihave oso, ahe rumo oso yaviterve. Ipare osē ichui —ehi ‘opacatu tembihu aviyeño ité’ oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepia, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe tēi pota raisa, mbahe rese ñemoirosa, ava rese ñemoñeta tēisa, teco ivate aisa, pihañemoñetasa

nihivi vahe. ²³ Co mbahe opacatu naporai vahe yuvínose ava sui imboangaipa uca āgua —ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oi que oi pipe, ndoyecua uca potai ava upe viña; ndoicatu rumo ava sui oñemi. ²⁵ Oime cuña vireco vahe omembri cuñatai, ahe vireco carugar oyese; ahe cuña oicuaese Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: “Enose che membri sui carugar” ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepia, naporai yarocua pan tahir sui cave tohu imondo āgua —ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer oviapi vahe tahir mesavri pendar —ehi.

²⁹ Aipo ihese, aipo ehi:

—Aviye ité nde ñehe. Eveyi eso. Carugar osē nde membri sui —ehi chupe.

³⁰ Co cuña oyepotase güétave, osepia omembri supave; yípive rumo osē carugar ichui.

Jesús ombogüera mbia ndayapisai, ñehe ipiti-piti vahe

³¹ Jesús oveyi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, ñehe ipiti-piti vahe rerasosar: “Emondomi tēi nde po iharive” ehi yuvireco chupe. ³³ Ichui Jesús viraso coi cotimi ava sui. Aheve ocuá omonde yapisa pipe. Ipare omondo güendi ñapecu rese. ³⁴ Ipare omahe iva rese, ipituhe pucu aipo ehi: “¡Efata!” ehi (“timboisa” ohesave aipo ehi).

³⁵ Ahe pipeve voi yapisa tupri, oñehe tupri avei. ³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco. ³⁷ Evocoiyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esepia, ndayapisai vahe omboapisa, ñehe ipiti-piti vahe avei omoñehengatu tupri!” ehi yuvireco.

8

Jesús oyopoi cuatro mil cuimbahe

¹ Ñepeí ari pipe setá ava oyemboya iri Jesús rese yuvireco. Ndipoi rumo mbahe icaru āgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esepia, mbosapi ari yuvirecoi yande piri, iyavei ndipoi eté mbahe semihura. ³ Amondopase sètave sieporēhi reseve, viroviapi-api tietera tieporēhi peri rupi yuvireco viña. Esepia, setami ava yugüeru amombri sui —ehi.

⁴ Semimbohe aipo ehi yuvireco chupe:

—¿Mara yahera vo ava tohu mbahe mondo cohava ava porēhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovireco siete pan —ehi semimbohe yuvireco chupe.

⁶ Evocoiyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tūpa upe. Ichui omboyaho-yaho pan imondo güemimbohe upe, semimbohe evocoiyase omondo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tūpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava rehii ocaru vahe retacuer cuatro mil tupri. Ipare Jesús, “Aviye, peso tupri” ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi āgua yuvireco. Jesús recoña āgua, oporandu iva pendar poromondiisa rese ‘¿Tūpa sui eté pīha ou?’ oya yuvireco chupe. ¹² Sese Jesús ipituhe pucu, aipo ehi:

—¡Mahera vo co ava oipota iva pendar poromondiisa che recocuer cua āgua yuvireco! Namboyecuai chietera rumo que ñepeí evocoi nungar mbahe pēu —ehi.

¹³ Ipare oseypaña ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan viraso güemihura yuvireco. ¹⁵ Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: “Pan ndayaruisse revo aipo ehi yandeu” ehi-ehi tēi oyeupe yuvireco.

¹⁷ Ahe rumo oicua güemimbohe pihañemoñetasa, aipo ehi:

—¿Mahera, “Pan ndayarui” peye? ¿Ndapeicua vîtei vo che rembiapo? ¿Yavai vite tie seroya ãgua pëu? ¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbïrer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbïrer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vîtei vo? —ehi güemimbohe upe.

Jesús ombogüera ava ndasesapisoi vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapisoi vahe yuvireco chupe ‘epocomi tēi sese’ oya yuvireco. ²³ Evocoiyase oipopisi ndasesapisoi vahe seraso co cotimi tecua sui. Aheve omondo güendi sesa rese, omondo avei opo iharive. Ipare oporandu chupe: “¿Eresepia vo mbahe?” ehi. ²⁴ Ndasesapisoi vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoiyase omondo iri opo sesa rese. Ipare co mbïa omahe tupri ité cute, ocuera ité, opacatu mbahe osepia tupri. ²⁶ Ichui Jesús omondo sêtave aipo ehi chupe:

—Ereyevi iri eme tecuave —ehi.

Pedro oicua uca Jesús Tüpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipo ivi rese. Peri rupi oporandu güemimbohe upe:

—¿Mara ehi vo ava oñehe yuvireco che rese? —ehi.

²⁸ Semimbohe evocoiyase omboyevi yuvireco chupe:

—Amove ava, “Juan Oporoãpiramo vahe” ehi yuvireco ndeu; ambuae evocoiyase, “Elías” ehi; ambuae, “Tüpa ñehe mombehusar mboetasa” ehi yuvireco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoiyase aipo ehi chupe:

—Nde niha Tüpa Rembiporavo Poropísirosar ereico —ehi.

³⁰ Jesús rumo, “Pemombehui rene que ñepeiva upe” ehi.

Jesús omombehu omano ãgua

³¹ Evocoiyase Jesús omboipi oporombohe: “Che, Ava Riquehir, che paraisu itera, iyavei opacatu judio rerecuareta, pahí rerecuar ivate catu vahe iyavei Moisés porocuaíta rese oporombohe vahe remiamotarēhi aicora. Ahe avei che yuca ucara yuvireco. Acuerayevira rumo mbosapi ari rupi” ehi. ³² Ahe omboyecua tupri ité chupe. Evocoiyase Pedro viraso co cotimi chupe oñehengata ãgua. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Carugar! Esepia, nde nandepihañemoñetai mbahe Tüpa upendar rese; ava nungar tēi nde pihañemoñeta eico —ehi.

³⁴ Evocoiyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaisu ãgua iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisiora. ³⁶ ¿Aviye ai angahu pïha vahe upe opacatu mbahe ivi pipendar pisi ãgua tēi, ahe ae tēi omocañi güecocuer yuvireco viña? ³⁷ ¿Mbovi pïha omondora ava güecocuer repirã viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipar viyar ndaseco tupri vahe rovai, che avei, Ava Riquehir, égüe ahera acoi ayevisse che Ru reco pïrata porañetesa pipe, sembuguai rehü va pendar maranehi reseve curi —ehi.

9

¹ Ipare Jesús aipo ehi iri:

—Supi eté, oimera amove cohava ava nomano vîtei chivaherã, osepia rane itera ouse Tüpa mborerecuasa ipïratasa pipe yuvireco curi —ehi.

Jesús ñecuñaro agüer

² Seis ari pare, Jesús viraso Pedro, Santiago, Juan reseve ivitri ivate vahesave oyeupi. Aheve aviyeteramo tēi oñecuñaro güemimbohe rovai. ³ Iturucuar sendí, morochí eteanga. Ndiipo eté que ava co nungar co ivi pipe turucuar oyosei vahe. ⁴ Iyavei aviyeteramo tēi

oyemboyecua Elías, Moisés reseve Jesús rese oñemoñeta yuvinoha. ⁵ Ipape Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoyase Elías upe nara —ehi.

⁶ Osiquiye tēi semimbohe yuvireco. Sese Pedro ndoicuaise oñehe ãgua, aipo ehiño tēi. ⁷ Ahe ramose avei ogüeyi iva quíha iharive, oyopípa tupri yuvireco. Ahe ipãhuve oyeendu ñehesa aipo ehi vahe: “Co che Rahir, che rembiaisu; peyapísaca catu iñehe rese” ehi vahe.

⁸ Ahe ramoseve avei omahese oivii yuvireco, ndosepiaí eté que ambuae ava, Jesús güeraño tupri ité osepia opãhuve yuvireco.

⁹ Ipape ogüeyi ivitri sui yuvireco, aipo ehi güemimbohe upe ou: “Ndapemombehui chiera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi tēi vireco aipo ñehesa yuvireco, ahe rumo oporandurandu oyeupe: “¿Mara oya pñha aipo, ‘Acuerayevira’ ehise?” ehi tēi yuvireco. ¹¹ Evocoyase semimbohe oporandu chupe:

—¿Mahera ru Moisés porocuaíta rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoyase aipo ehi chupe:

—Elías rane ité niha oura opacatu mbahe moingatu ãgua. ¿Mahera arachendar icuachiapri pipe aipo ehi: “Ava Riquehir oiporarara mbahe, yamotarēhimbrí avei secoira” ehi? ¹³ Che niha aipo ahe pēu: Elías rumo ou ité, ava evocoyase opacatu güemimbotar tēi oyapo yuvireco sese. Ēgüe ehi opacatu yaviye arachendar icuachiaprirer sese —ehi.

Jesús ombogüera chñhivahe carugar rerecosar

¹⁴ Ipape oyeví yuvireco güemimbohe recosave. Aheve osepia ava rehí oyeve guasuse yuvireco sese, iyavei oime aheve Moisés porocuaíta rese oporombohe vahe oñehepoepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepeí ipãhu pendar omboyeví chupe:

—Porombohesar, co aru che rahir ndeu, vireco vahe carugar oyeve, nomoñhengatu ucai vahe yepi. ¹⁸ Iyavei que iguatasa rupi co carugar aviyeteramo tēi opocose sese, oiti voi ivive iyavei sendiriyuiyusu, sãitere-tere avei; sese cūrítei nĩpirata iri eté. “Penosemi carugar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyeví chupe:

—¡Too, ndapeyeroa tupri vitei eté che rese! ¿Mboví rupi rutei vo aico vitera pe pãhuve che ñemosasa pipe? Peru evocoi chñhivahe cheu —ehi.

²⁰ Evocoyase ogüeru yuvireco chupe. Osepiase carugar Jesús, oiti uca iri chñhivahe ivive. Ombopayere-yere iyavei sendiriyui guasu-guasú. ²¹ Sese oporandu tu upe:

—¿Mbahese vo na ehi chupe? —ehi.

Tu evocoyase aipo ehi:

—Ichñhivahemi suive ité. ²² Amove co carugar oiti uca tatave, ive avei yuca pota uca ãgua yepi. Sese ereicatuse, ore pĩtiviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pĩtivii ru eve nde reroa catu ãgua! —ehi pĩrata chupe.

²⁵ Osepiase Jesús ava rehí, oyemboyase sese, oñehe pĩrata carugar upe aipo ehi:

—Carugar noñehi vahe, ndayapísai vahe, che orocuai, epoi co chñhivahe sui, ereique iri eme secocuer rese —ehi.

²⁶ Carugar sãse pucu chñhivahe yuca tupri oso. “Omano ité co chñhivahe” ehi ambuae ava yuvireco. ²⁷ Jesús rumo oipopísai imopuha; evocoyase chñhivahe opũha tupri voi eté.

²⁸ Ichui oi que oi pipe. Aheve semimbohe ahe aemi oporandu yuvireco chupe:

—¿Mahera pñha ndoromose catui eté carugar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar carugar yaicatu imombo —ehi.

Jesús omombehu iri omano ãgua

³⁰ Ichui yuvinosepase, yuviraso ivi Galilea rupi. Jesús rumo ndoyemboyecua uca potai eté que ambuae ava upe. ³¹ Esepia, güemimbohe güeraño ité ombohe aipo ehi:

—Che, Ava Riquehir, imondopri aicora che amotarēhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu água yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroiquese oi pipe,
—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehi tupri yuvireco chupe. Esepia, peri rupi, “¿Ava pñha ivate catu vahe?” ehi asi-asi oyeupe yuvireco. ³⁵ Evocoyase oguapisave, “Periopa” ehi güemimbohe upe, aipo ehi avei:

—Oimese pe pãhu pendar oyemboivate ai vahe, ahe rumo seco ivi coti catura opacatu sui ava eta pítivii água —ehi.

³⁶ Ipare oipisi chíhivahe güemimbohe pãhuve senoha aipo ehi:

³⁷ —Acoi ava oipisi vahe co chíhivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotarëhimbar, ahe yande mboyoyasar secoi

³⁸ Evocoyase Juan aipo ehi chupe:

—Ore mbohesar, orosepia mbia nde rer pipe omombo vahe carugar. Ahe rumo ndogutai cüritei ore rupi; ore ité ndoroipotai chupe —ehi.

³⁹ Jesús rumo,

—Aní êgüe peye —ehi—. Esepia, ndipoi eté que ambuae oyapo vahe poromondiisa che rer pipe, oicatu vaheñã oñehi rai che rese. ⁴⁰ Sese ndayande amotarëhii vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pëu, evocoi nungar oipisi itera porerrecosa oyeupe nara —ehi.

Yaicua catura mbahe tã apoëhi água

⁴² “Acoi que ava omboangaipa uca vahe co chíhivahemi nungar che reroyasar, iyacatu evocoi nungar ñapichisa ita mbahe mbocuhisa iyeshi rese para guasu pipe imombo água. ⁴³ Sese pe po pe mboangaipa uca vahe peyasia ité peyesui. Esepia, aviye catu peiquera tecove apirëhisave ñepe pe po rese, peso rãgüer sui que ñuvirio pe po rese tata guasu apirëhisave. ⁴⁴ Aheve acoi uru nomanoi vahe, tata ndogüei vahe avei. ⁴⁵ Pe pi pe mboangaipa ucasa, peyasia avei peyesui. Esepia, aviye catu ndape pindugüei peique tecovesave, que ñuvirio pe pi rese peique rãgüer sui tata guasu ndopai vahesave. ⁴⁶ Aheve acoi uru nomanoi vahe, tata ndogüei vahe avei. ⁴⁷ Pe resa avei pe mboangaipa ucasa, penose ité peyesui. Esepia, aviye catu peique ñepe pe resa rese Tüpa mborerrecuasave que ñuvirio pe resa rese tata guasu apirëhisave pe reique rãgüer sui. ⁴⁸ Aheve acoi uru nomanoi vahe, tata ndogüei vahe avei.

⁴⁹ “Esepia, opacatu ava imoehesara tata nungar pipe. ⁵⁰ Sese yucri aviye ai eté. Nasehe irise rumo, ndayaicatu chira imoehi iri água. Peico catu yucri nungar mbahe tupri pipe peyeupe nara” ehi.

10

Jesús oporombohe mendasa sui poiëhi água

¹ Ipare Jesús osë tecua Capernaum sui, oso Judea ivi rupi iai Jordán rovai ari sësa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri.

² Evocoyase fariseo oyemboya seco rãha água tã yuvireco sese, “¿Aviye pñha cuimbahe omenda vahe opoi güembireco sui?” ehi yuvireco chupe. ³ Ahe rumo omboyevi chupe:

—¿Mara ehi vo acoi Moisés porocuita pipe? —ehi.

⁴ Ahe evocoyase omboyevi yuvireco chupe:

—Moisés remimombehu aipo ehi: “Pmondora pe rembireco upe cuachiar poisa re-sendar pe poi água pe rembireco sui” ehi —ehi fariseo yuvireco chupe.

⁵ Evocoyase fariseo upe aipo ehi:

—Moisés omondo co porocuita pe poreroaëhisa pipe sui pëu. ⁶ Yipisuive ité niha, Tüpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepipira oyesupa sui güembireco rese ité yuvirecoi água. ⁸ Evocoyase ñuvirio yuvirecoira ñepe ava nungar. Sese ndahe iri ñuvirio, ñepe nungar ité yuvirecoira. ⁹ Evocoyase ava Tüpa omomenda vahe oyese, ndiyai ava tã omboyepipi yuvireco oyesui —ehi.

¹⁰ Oive yuvirecoi vitese, semimbohe oporandu iri co mbahe rese yuvireco chupe.

¹¹ Evocoyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. ¹² Acoi cuña oposito omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upe.

Jesús osovasa chihivahe

¹³ Ipare ogüeru chihivahe Jesús upe yuvireco sese ipoco ãgua. Semimbohe rumo, “¿Mahera vo peruño tēi chihivahe?” ehi opiha viracuasa pipe serusar upe yuvireco. ¹⁴ Evocoyase Jesús osepiase, ndasori güemimbohe upe aipo ehi:

—¡Mahera ndapeipotai iyu ãgua! Toyugüeruño chihivahe cheu. Esepia, co chihivahe nungar ava yuviroiquera che Ru Tüpa mborerecuasave. ¹⁵ Supi eté, acoi ndoipisii vahe che Ru Tüpa mborerecuasa chihivahe nungar yuvireco, ahe evocoyase ndoyuviroiquei chietera ipipe —ehi.

¹⁶ Evocoyase oipisi, omondo opo iharive osovasa.

Ñepe mba chihivahe imbahe eta vahe oñehe Jesús upe

¹⁷ Oguata vitesé Jesús yuvireco, aheseve mba chihivahe oña oso sovai, oñenopiha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco ãgua? —ehi.

¹⁸ Jesús evocoyase aipo ehi ahe mba upe:

—¿Mahera vo, “Aviye vahe” ere cheu? Oime rumo ñepe aviye vahe ité, ahe Tüpa secói. ¹⁹ Ereicua niha Tüpa porocuita: ‘Ndereporoyucaí chira, nandeguasai chira, nandemondai chira, nanderemirai chira ambuae ava rese, ndereporombopai chira, eremboyerara nde ru, nde si avei’ ehi vahe —ehi.

²⁰ Ahe mba rumo,

—Porombohesar, che aipo nungar opacatu amboaviye ité che chihivahe suive —ehi.

²¹ Evocoyase omahe saiusave sese, aipo ehi chupe:

—Ñepe mbahe rumo ipane vite ndeu: eso, emondopa rane nde mbahe; ahe sepi evocoyase emondo ava iparaisu vahe upe. Ichui ererecora mbahe aviye vahe ivave. Ipare ereguatará che rupi —ehi chupe.

²² Aipo oyeupe hese rumo, ahe mba oyepepiño ichui oviharēhisave oso. Esepia, ahe mbahe yar ité secói.

²³ Evocoyase omahe oiviindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tüpa mborerecuasave! —ehi.

²⁴ Semimbohe evocoyase, “¡Mara ehi rutei!” ehi tēi ñehe renduse yuvireco. Ahe rumo omombehu iri:

—Che rahireta, ¡yavai eté Tüpa mborerecuasave imbahe eta vahe reique ãgua ombahe eta rese tēi ipihañemoñeta vahe upe! ²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisiora yuvireco viña?” ehi.

²⁷ Evocoyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tüpa upe rumo ndayavaimi eté. Esepia, Tüpa opacatu mbahe mboavaisarēhi secói —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che raisusa pipe iyavei ñehesa ñepisiora raisusa pipe oseypa vahe güeta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeave oipisi aveira tecovesa apirēhi vahe curi. ³¹ Setá vai rumo cūrítei yipindar vahe; ipa tēira yuvirecoi. Setá aveira cūrítei ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secói güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñehe iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi: ³³ “Peicua niha, yasora tecua Jerusalén ve, aheve rumo che, Ava Riquehir, che pisira che mondo pahí eta rereciar iyavei Moisés porocuita rese oporombohe vahe povrive yuvireco. Ahe, ‘Tomano’ ehira yuvireco cheu. Ipare che mondo

aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondivi-ndivira, oyuvirocua-rocuara che rese, che yuca aveira yuvireco. Mbosapí arí rupi rumo acuera yevira” ehi güemimbohe upe.

Mbahe aviye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe aviye vahe oreu —ehi.

³⁶ Ahe evocoyase,

—¿Mbahe vo peipota ayapo vahe rã pēu? —ehi chupe.

³⁷ —Ore oroipota nde mborerecua porañetesave ore mbogupira ndeyepiri eve, ñepei nde mbahe rese pocosa coti, ambuae nde mbahe rese pocoēhisa coti —ehi yuvireco chupe.

³⁸ Evocoyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vahe rã, inungar-ra que igua iro vahe aihu vahe rã viña? Iyavei, ¿peicatura pīha che āpiramosa aipisi vahe rã pisi? —ehi.

³⁹ —Taa, oroicatuño itera —ehi yuvireco.

Evocoyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vahe rã nungar.

⁴⁰ Co rumo ndiyai cheu che piri pe guapí āgua, che mbahe rese pocosa coti, ambuae che mbahe rese pocoēhisa coti. Che Ru Tūpa omoingatu güembiporavo upe nara oguapí vahe rã che ipive —ehi.

⁴¹ Evocoyase ambuae semimbohe diez yuvirecoi vahe ñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoapirasá iteanga omborerecua pipe yepi. ⁴³ Pe rumo ēgüe ndapeyei chira pe yeereco. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ⁴⁴ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ⁴⁵ Aherã niha che, Ava Riquehir, ayu ndahei ava che rese ihañeco āgua; che rumo ayu ava rese che hañeco āgua, iyavei amondo vahe rã che recocuer manosave ava eta repirã Carugar povri sui senose āgua —ehi.

Jesús ombogüera Bartimeo sesapisoēhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve perí popive mbia ndasesapisoi vahe Bartimeo serer vahe, Timoteo rahir, oguapí oī. ⁴⁷ Osenduse, “Jesús Nazaret pendar” hesa, osapucaí pīrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pīrataño ité chupe.

⁴⁹ Evocoyase osenduse ñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epūha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opūha yesapiha oso chupe.

⁵¹ Evocoyase oporandu ndasesapisoi vahe upe:

—¿Mbahe vo ereipota ayapo vahe rã ndeu? —ehi.

Ahe evocoyase,

—Porombohesar, che mbosearecomi tēira eve viña —ehi.

⁵² Evocoyase aipo ehi ahe mbia upe:

—Eso tupriño eico; erecuera niha. Esepia, ereyeroya ité che rese —ehi.

Ahe ramoseve ndasesapisoi vahe osareco tupri ité. Ipare osoño ité Jesús raquicuei perí rupi.

11

Jesús oi que Jerusalén pipe

¹ Ovirovise tecua Jerusalén yuviraso, serovicave oime ñuvirio tecuami: Betfagé, Betania avei ivitri: Olivo ipiimi. Aheve Jesús omondo ñuvirio güemimbohe, ² aipo ehi chupe:

—Peso evocoi tecuami yande rovaindarve. Peyepotase aheve, pesepiara guaricu ñapichimbri imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo ēgüe peye?” ehise pēu, “Ore Yar oiporu pota, ipare niha omboyevi voiñora” peyera chupe —ehi.

⁴ Evocoyase ahe yuviraso perí rupi. Aheve guaricu ñapichimbri osepia imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohessa rupi tupri ité omboyeve yuvireco chupe. Evocoiyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omondo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoiyase oyasia pindo omondo peri rupi saperá yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pĩrata yuvireco chupe —. ¹⁰ ¡Sovasapri yande ramoi David mborerecuasa tasecoi ou vahe oico! ¡vave imboeteipri tasecoi! —ehi yuvireco chupe.

¹¹ Ēgüe ehi Jesús oiquese Jerusalén ve. Ipare oi que tũparo pipe. Aheve opacatu rupi mbahe osepia. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico. ¹³ Osepia amombri ivira higuera so ati vahe, oso chupe ‘¿iha pĩha?’ oyapave. Ahe rumo osepia so pãve tẽi sese. Esepia, ahe ivira upe ndosupiti vitei iha água. ¹⁴ Evocoiyase aipo ehi ahe ivira upe:

—¡Co pipe suive ndipo iri chira ava nde ha yuvirohu vahe! —ehi.

Semimbohe osendu iñehe yuvireco.

Jesús omombopa ava mbahe mboepisar tũparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tũparo guasu pipe, omboipi ava mbahe mondosar, mbahe rero cuasar mombopa tupri ocarve oico iyavei ava guarepochi refuñarosar opa ombovapi mesa imondo, apicasu mondosar renda avei omboviapi imondo. ¹⁶ Ndoipotai eté que ambuae mbahe seroi quepirã tũparo pipe. ¹⁷ Ipare oporombohe aipo ehi:

—Icuachiapri arachendar pipe aipo ehi: ‘Co che rëta yeruresa rëtarã opacatu ava ivi pipendar uve nara’ ehi. Pe rumo imonda rai vahe rëta nungar tẽi pereco —ehi.

¹⁸ Pahi eta rerecuar iyavei oporombohe vahe Moisés porocuita rese osenduse, “¿Mara yahera pĩha sereco yuca uca água?” ehi voi yuvireco chupe. Osiquiye rumo opacatu ava sui. Esepia, ahe ndoyembovhai iporombohesa rese yuvireco. ¹⁹ Pitu ramomise, Jesús yuvinosese güemimbohe eta reseve yuviraso ahe tecua sui.

Ivira higuera ndihai vahe ipiru

²⁰ Ahere ayihive, añihive yuvirasose, osepia ivira higuera sapo suive ipirupa vahe yuvireco. ²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, esepia co ivira higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tũpa rese —ehi—. ²³ Supi eté aipo ahe pëu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, Ēgüe ehi etera chupe.

²⁴ Sese aipo ahe pëu: opacatu que mbahe rese peporanduse pe yeroquisa pipe, peyeroya itera mbahe oime vahe rã rese pëu, ahese peipisi itera. ²⁵ Acoi peyerouise, yipindar peñero rane que pe amotarẽhimbar upe, ahese Ēgüe ehi aveira pe Ru iva pendar iñero pe angaipa rese pëu. ²⁶ Ēgüe ndapeyeise, pe Ru iva pendar avei niñeroi chira pe angaipa rese pëu —ehi.

Jesús mborerecuasa

²⁷ Ipare oyeve Jerusalén ve yuvireco. Aheve Jesús secoise judío tũparo guasu pipe, pahi eta rerecuar, Moisés porocuita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu co nungar apo água? —ehi yuvireco chupe.

²⁹⁻³⁰ Evocoiyase omboyeve chupe:

—Che avei aporandura mbahe rese pëu: ¿Ava vo Juan ombou ava ãpiramo água; Tũpa pĩha, ava tẽi tie? Pemboyeveise cheu, ahese che avei amombehura pëu ava porocuita rupi eté pĩha ayapo co mbahe vichico —ehi.

³¹ Evocoiyase oñemoñeta aipo ehi oyeupe yuvireco: “ ‘Tũpa ombou’ yahese chupe viña, ahe evocoiyase: ‘¿Mahera ru ndaperoyai?’ ehira yandeu. ³² ‘Ava tẽi remimbo’ ndayahei chiaveira chupe” ehi. Ahe osiquiye tẽi ambuae ava sui yuvireco. Esepia, opacatu ité oicua Juan oñehe Tũpa suindar ñehesa rese yepi. ³³ Evocoiyase omboyeve chupe yuvireco:

—Ndoroi cuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

12

Ava mbahe tēi oporaviqui vahe recocuer sui yembohesa

¹ Evocoyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose água. Oyapo avei oi ivate vahe opacatu mbahe moha água. Ipape oseyá oivi ava oporaviqui vahe upe iporu água. Ichui osē, oso amombri vahesa rupi. ² Oyepotase ari uva pohosa, ahese omondo güembiguai oporaviqui vahe upe imboporandu ‘tomboumi uva pohopri cheundar cheu cute’ oyapave viña. ³ Ahe rumo oipisiño, inupa-nupa imboyevi tupri tēi yuvireco. ⁴ Evocoyase ahe ivi yar omondo iri ambuae güembiguai. Ahe oyapicha-pichaño ñaca rupi, ñehe mara-mara tēiño avei yuvireco chupe. ⁵ Ipape omondo iri ambuae. Ahe oyucaño yuvireco. Ichui omondo ati iri tēi. Ahe ipāhu pendar rese yuvirecua-rocuñaño yuvireco, oyucaño avei ambuae yuvireco.

⁶ “Iyavei ñepeí opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. ⁷ Oporaviqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pāve topita co ivi’ ehi yuvireco. ⁸ Ichui oipisi, oyucaño yuvireco. Ipape ovinose sehögüer ahe miti sui co coti yuvireco.

⁹ “¿Mbahe vo evocoyase oyapora ivi yar? Osora chupe, opara oyuca oporaviqui vahe, iyavei omondopara oivi ambuae ava upe.

¹⁰ “¿Ndapeyeroqui vo pe co icuachiapri pipe? Aipo ehi niha acoi: ‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri água.

¹¹ Ëgüe ehi niha yande Yar yapo.

¡Mara ehi rutei revol’ ehi icuachiapri pipe” ehi.

¹² Evocoyase oviraso pota voi Jesús soquenda água yuvireco. Esepia, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo oseoña iri tēi Jesús guarepochi rese yuvireco

¹³ Ipape mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehe’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepia, “Ëgüe ehi co mbia” nderei eté ava upe iyavei ereporombohe mbahe supi tupri vahe Tüpa remimbotar apo água rese. ¿Aviyera pñha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihañhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoyase ñepeí guarepochi cheu, tasepia —ehi.

¹⁶ Ipape fariseo güeru yuvireco chupe, ahe guarepochi repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoyase aipo ehi fariseo upe:

—Pemondora mborerecuar upe mbahe chupendar; Tüpa upendar mbahe evocoyase pemondora Tüpa upe —ehi.

Evocoyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoñasave

¹⁸ Evocoyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseyá güembicuachiagüer yandeu aipo ehi: “Que cuim-bahe omenda vahe omanose guahiñhiseve, tivri evocoyase omendara sembirecocuer rese ahe viquehir omano vahecuer upe nara tahirá oico.” ²⁰ Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo. ²¹ Ipape tivri omenda viquehir sembirecocuer rese. Ahe rumo omanoño, ndatahii avei rumo. Ëgüe ehi tupri avei tivri imombosapisa. ²² Ëgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoyase opase ocuerayevi yuvireco, ¿uma rembireco itera pñha? Esepia niha, siete tupri ité omenda tēi yuvireco sese —ehi yuvireco chupe.

²⁴ Evocoyase Jesús omboyevi chupe:

—Pe pihañemoñeta pipe peyavi. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pīratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave. ²⁶ Co cuerayevisa resendar rumo amombehura pēu: aviye ndapeyeroqui anga vahe Moisés rembiucuachigüer pipe, acoi caha rese sendi guasu vahe aviterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahecuer Tūpa! ¡Ahe rumo oicove vahe Tūpa secoi! Sese pe pihañemoñeta pipe peyavi —ehi saduceo yuvirecoi vahe upe.

Porocuaíta aviye catu vahe

²⁸ Ñepeí Moisés porocuaíta rese oporombohe vahe osendu ñehe pīratase oyeupe yuvireco, oicua avei Jesús omboyeví tuprise ñehe yuvireco chupe, evocoiyase oyemboya sese oporandu chupe:

—¿Uma vo porocuaíta aviye catu vahe opacatu sui? —ehi.

²⁹ Jesús omboyeví chupe:

—Yipindar mborocuaíta aviye catu vahe aipo ehi: ‘Pesendu Israel: yande Yar Tūpa aheño ité ñepeí yande Yar secoi. ³⁰ Eresaisura nde Yar Tūpa opacatu nde pihá pipe, opacatu nde recocuer pipe, opacatu nde yapisacasa pipe iyavei opacatu nde pīratasa pipe’ ehi. ³¹ Iyavei imoñuviriosa porocuaíta ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuaíta aviye catu vahe co sui —ehi.

³² Evocoiyase porocuaíta rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepeí Tūpa iyavei ndipoi eté ambuae. ³³ Iyavei yasaisura Tūpa opacatu yande pihá pipe, opacatu yande yapisacasa pipe, opacatu yande pīratasa pipe, iyavei yasaisura ava yande yeaisu nungar. Ahe ité aviye catu mbahe seropovēhepri sui iyavei opacatu porerecosa sapipri tēi sui —ehi.

³⁴ Evocoiyase Jesús icuase co ava pihañemoñeta tuprise, aipo ehi chupe:

—Namombriimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaheerā mbahe rese yuvireco chupe.

¿Ava suindar pīha Poropīsīrosar?

³⁵ Jesús oporombohesa tūparo pipe aipo ehi:

—¿Mahera ru Moisés porocuaíta rese oporombohe vahe: “Poropīsīrosar David suindar ité” ehi yuvireco? ³⁶ Esepia, David ité aipo ehi Espiritu Santo pīratasa pipe:

‘Yar aipo ehi che Yar upe:

Eguapi che acato coti, acoi che amondose voi eté nde amotarēhimbar nde povrive yuvireco’ ehi David aracahe. ³⁷ ¿Mahera ru, “Poropīsīrosar David suindar secoira” peye, David teieté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuaíta rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuaíta rese oporombohe vahe sui. Esepia, ahe oturucuar ipucu vahe rese uguata pota rai yuvireco yepi, iyavei oipota oyeupe ‘avirave’ apo água ocar rupi omboeteisa pipe yuvireco. ³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda aviye catu vahesave uguapi yuvireco yepi no. ⁴⁰ Iyavei cuña imer mano vahecuer rēta virocua-rocuá tēi ichui. Oarondaguá tēi avei oyoerqui pucu-pucu yuvireco. Ahe rumo oipisira Tūpa ñemoirosa ipirata catu vahe yuvireco curi” ehi.

Cuña imer mano vahecuer porerecosa

⁴¹ Ñepeí ari Jesús uguapi oí porerecosa riru rovai ava repia água mara ehi oporerecosa imondo ipipe yuvireco. Aheve setá mbahe yar omondoño ité guarepochi yuvireco. ⁴² Ahe pipeve oyepota cuña imer mano vahecuer iparaisu vahe. Ahe avei omondo ñuviriomi guarepochi oporerecosa ipipe. ⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaisu vahe setá catu guarepochi oporerecosa omondo ambuae ava eta sui co guarepochi riru pipe. ⁴⁴ Ambuae ava eta rumo uguarepochi rumbirermi tēi omondo oporereco água yuvireco; co cuña rumo oparaisusa pipe opa ité omondo uguarepochi —ehi güemimbohe upe.

13

“Imondurusara tūparo guasu” ehi Jesús

¹ Jesús osése tūparo guasu pipe sui, ahese ñepeí semimbohe aipo ehi chupe:

—Ore mbohesar, ¡esepia oi ita imopuhapri, icatupri ai! —ehi.

² Jesús rumo omboyeví chupe:

—¿Pesepia co oi tuvichá vahe ité? Ndipoi chietera rumo que ñepeí ita oyeha víte vahe; opacatu ité imondurusara curi —ehi.

Cañi renonde mbahe oime vaheṛā

³ Evocoyase Jesús yuviraso ivitri Olivo ve, ahe ivitri tūparo guasu rovai tupri. Aheve Jesús oguapise oī, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴ “¿Mbahe vo aipo mbahe yaviyera? ¿Mbahe poromondiisa rese rane vo icuasara?” ehi.

⁵ Jesús rumo omboyeveí chupe: “Peicua catu, peyembopa ucai rene ambuae ava upe. ⁶ Esepia, setá ava yugüerura, ‘Che niha Poropísirosar aico’ ehi tēira ava eta mbopa yuvireco.

⁷ “Pesenduse rumo ñehesa vavasa resendar cohava, iyavei que rupi, ndapeyembosiquiyei chietera. Esepia niha, ěgüe ehi rane itera; ndehi víteí chira rumo ari cañi. ⁸ Esepia, ñepeí ivi pipendar ovavara ambuae ivi pipendar rese oyeupe yuvireco; iyavei oimera ivi riríi opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. ěgüe peyera peñehe che recocuer rese chupe. ¹⁰ Cañi renonde rumo co ñehesa písirosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahe pīha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyeuara Tūpa pe ñehe āgua pēu. Esepia, ndahei chira peyesuí tēi peñehe, Espiritu Santo ité oñehera. ¹² Ipare rumo ava omondoñora vivri yamotarēhisar upe ‘toyuca yuvireco’ oya. ěgüe ehi aveira ava guahir upe; tahir avei oyamotarēhiñora oyesupa yuca uca āgua yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemoviracua vaheño rumo ari ipa vahe rupi, ahe ipísiroprí yuvirecoira.

¹⁴ “Tūparo guasu maranehi pipe pesepiase mbahe-mbahe tēi aposa —acoi oyeruqui vahe, ahe tosenducua tupri yuvireco—, evocoyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güeta harive secoi vahe, ahe ari toi que iri eme güetave mbahe renose āgua. ¹⁶ Acoi que rupi tēi secoi vahe, toyeveí eme avei güetave oyeaosa renose āgua. ¹⁷ ¡Iparaisu itera cuña ipuruha vahe ahe ari pipe, imembi pītani vahe avei! ¹⁸ Peporandu Tūpa upe, toime eme co nungar mbahe sōhisa vahe pipe pēu. ¹⁹ Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui; ipare ndipo iri chietera evocoi nungar. ²⁰ Iyavei yande Yar nomombituhise ari naporai vahe, ndipoi chietera oñepísiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esepia, co Poropísirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esepia, yugüerura ava, ‘Che Poropísirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tūpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi íva sui, iyavei íva resendar mbahe oririira yuvireco. ²⁶ Ahese che, Ava Riquehír, íva quíha rese ayecua itera vitu che pīratasa pipe che rendigüer porañetesa pipe avei. ²⁷ Ipare amboura che rembiguai eta íva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que íva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota āgua yandeu yepi. ²⁹ Na ehi aveira niha pēu che ñehe rupi tupri mbahe pesepiase. Sese peicuara che, Ava Riquehír, cōimi eté che yevi āgua. ³⁰ Supi eté yuvirecove vitera ava osepia vahe, co mbahe opase yaviye. ³¹ Íva, ivi opara ocañi; che ñehengagüer rumo imboaviyesa rane itera.

³² “Ndi poi eté rumo ava oicua vahe ari iyavei hora che yevi āgua yuvireco, che Ru rembiguai íva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rārora peye. Esepia niha, ndicuasai che yevi āgua. ³⁴ Inungar que mbía amombri oso pota āgua renonde, güembiguai oseypa güeta rāro āgua, omondo avei ñepeí-peí upe iporaviqui āgua, iyavei omondo güeta roquendiipi rāro āgua. ³⁵ Pe evocoyase pemahemohara. Esepia, ndapeicuai marase che oi yar ayevira pēu, aviyeteramo pítu ramose, pítu mbiter, tacura ñehese, anise añihivei. ³⁶ Ndaipotai

pemahemohaēhiseve tēi ayevirā. ³⁷ Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca āgua rese yuvireco

¹ Ipare ñuvirio ari judío Pascua pieta āgua ipane, ahe pieta pipe yuvirohu pan ndayapepoi vahe yepi, pahi rerecuareta, Moisés porocuaita rese oporombohe vahe avei oyemomborandu: “¿Mara yahera Jesús mbopa ipisi yuca āgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehii yemondiiēhi āgua yandeu —ehi.

Cuña Jesús rese mbahe siacua vahe oipiyere

³ Aheve Jesús seci Betania ve Simón lepra vireco vahecuer rētave. Aheve mesave chiniseve, cuña güeru mbahe siacua vahe siru reseve sepí iteanga vahe. Ahe osovapisa rerocua, ipare oipiyere Jesús āca rese. ⁴ Ambuae ava aheve yuvinoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe siacua vahe? ⁵ Omondo vahe ité tie co tresciento ari rupindar mboraviqui repri rupi ava iparaisu vahe pitiivi āgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgüe tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoiño itera pe pāhuve, iyavei peyapoño itera mbahe aviye vahe peyapo potase chupe; che rumo ēgüe ndahe viteñoi chira vichico pe pāhuve.

⁸ Iyavei co cuña oyapo mbahe ocatuguer rupi; opa voi omoiacua che rete che manoēhi viteseve. ⁹ Supi eté aipo ahe pēu: ñehesa písirosa resendar mombehue opacatu tecua rupi, imombehusa aveira co cuña rembiapo sese mahenduha āgua —ehi.

Judas oyemoingatu Jesús mondo āgua yamotarēhimbar upe

¹⁰ Evocoiyase Judas Iscariote, semimbohe doce vahe pāhu pendar, oso pahi eta rerecuar upe imoñeta Jesús mondo āgua. ¹¹ Senduse, oyemboviharete: “Yamondo guarepochi chupe” ehi voi eté yuvireco. Evocoiyase Judas oseca voi Jesús mondo āgua yamotarēhimbar upe.

Jesús caru agüer ipa vahe güemimbohe rese

¹² Yipindar ari pan ndayapepoi vahe husa pipe, aheve avei ovesa Pascua resendar yucapri seropovēhesa yepi, ahe ari pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirio güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora, ¹⁴ seiquesave aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera. ¹⁵ Evocoiyase ahe omboyecuara oi guasu ivatendar imoingatupri pēu. Aheve pemoingatu mbahe yahu vahe rā —ehi güemimbohe upe.

¹⁶ Evocoiyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoingatu carusa Pascua pieta resendar yuvireco.

¹⁷ Pitu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepepe pe pāhu pendar yande piri ocaru vahe che mondora che amotarēhimbar upe —ehi.

¹⁹ Evocoiyase semimbohe ndoyembovihal tēi yuvireco, iyavei oporandu-randu tēi ñepepei chupe yuvireco:

—¿Che pīha? —ehi yuvireco.

²⁰ Omboyevi rumo güemimbohe upe:

—Ñepepe eté pe pāhu pendar ahe co omoaqui pan che caro pipe. ²¹ Supi eté che, Ava Riquehii; amboaviyera icuachiapri; ¡iparaisu catura rumo acoi mbia che mondosar! Aviye catura ahe mbia ndoyesuise viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohimbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu. ²⁴ Aheve aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara. ²⁵ Supi eté aipo ahe pēu: ndaihu iri chietera uva ricuer cheu ari oyepotase voi che Ru Tūpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoi mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rãrosar, aheše oñemosai tẽira ovesa opacatu rupi yuvireco’ ehi. ²⁸ Che cuerayevire rumo aso voi etera pe renonera Galilea ve —ehi.

²⁹ Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ãgũe ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co pĩtu pipeve voi eté tacura ñehe yupagũe renondeve, “Ndaicuai vahe evocoi mbia” erera mbosapi oyupagũer rupi cheu —ehi.

³¹ Ahe rumo,

—Yepe che amano tẽira nde rupi viña, che rumo, “Ndaicuai vahe evocoi mbia” ndahei chietera —ehi-ehi catuño ité chupe.

Ambuae opacatu aipo ehi tupri ãvei yuvireco chupe.

Jesús oyoeroqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohava, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Aheše ndoyepihamboviñhai eté oico ³⁴ aipo ehi:

—Che cũritei ndaviñhai eté. Esepia, che hã oyandu ité manosa. Pepita rane cohava, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaivi ivi rese oso, oporandu Tũpa upe mbahe tasi vahe reimeñhi ãgua oyeupe. ³⁶ Oyoeroqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe tẽi sui eve; tayapo eme che remimbotar tẽi, nde remimbotar rupi catu tayapo” ehi.

³⁷ Ipare oyevi güemimbohe upe. Ahe rumo opaño yuviroque yuvirocua. Aheše aipo ehi Pedro upe:

—Simón, ¿ereque? ¿Ndereñemosai eté vo que ñepeí hora nde ropesi upe? ³⁸ Pemahemoha, peyeroqui mbahe tẽi pipe pe viapiñhi ãgua. Pe niha pequerẽhi ité viña, pe retecuer tẽi rumo nipiratai pẽu —ehi.

³⁹ Ichui oso iri oyoeroqui, aipo ehi tupri avei oñehe. ⁴⁰ Ipare oyevise, osesapiha iri iqueseve tẽi avei. Esepia, sopesi nomboyeroyai eté yuvireco, aheše ndoicatui eté ñehe mboyevi yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehĩr, mondo ãgua ava yangaipa vahe povrire. ⁴² Pepũha, yaso. Esepia, cõimi eté che amotarẽhisar upe che mondo vaherã secõi —ehi.

Jesús ipisisa

⁴³ Jesús oñehe viteseve ohã, Judas oyepota oso chupe, ahe doce pãhu pendar semimbohe, iyavei setã ava yugũeru quise pucu, ivira reseve-seve supi. Ahe pahi eta rerecuar, Moisés porocuaite rese oporombohe vahe, judío rerecuareta porocuaite rupi oyapo yuvireco.

⁴⁴ Yipindar rumo imondosar Judas aipo ehi: “Asovarepita vahe rese peicuara. Ahe peipisi tupri itera seraso” ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Aheše oipisi Jesús yuvireco.

⁴⁷ Semimbohe secõi vahe supi ovinose oquise pucu. Ipipe oyasia pahi rerecuar ivate catu vahe rembiguai nambi. ⁴⁸ Aheše Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisi ãgua. Imonda rai vahe nungar che rereco peye. ⁴⁹ Ari yacatu rupi niha pe pãhuve aporombohese tũparove vichico, na ndapeyei eté cheu. Co rumo ãgũe peye icuachiapri mboaviye ãgua cute —ehi.

⁵⁰ Aheše semimbohe oñemosaipe oseyã Jesús ahe ae tupri imoha yuvireco. ⁵¹ Mbia chĩhivahe rumo turucuar pipe güerañomi oñemama vahe supive secõi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoiyase Jesús viraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaite rese oporombohe vahe avei no. ⁵⁴ Pedro avei amombrĩ rupive tẽi oi que ité oso pahi rerecuar ivate catu vahe rãta ãchisa pipe. Aheve oguapiño mbia sundao pãhuve tata ipive oyepehe oĩ.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tẽi ava oñehe-ñehe tẽi vaherã Jesús rese yamotarẽhisave yuca uca ãgua yuvireco; ndoicatui

eté rumo yuvireco. ⁵⁶ Iyavei setá iteanga tēi semira yuvireco sese; oyeecopi-copi tēi rumo güemira pipe. ⁵⁷ Amove aipo ehi tēi yuvireco seco momara ägua:

⁵⁸ —Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoiyase ava tēi rembiapo’ ehi —ehi tēi yuvireco chupe.

⁵⁹ Ndahoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboveyii chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheño ité rumo chupe. Pahi rerecuar ivate catu vahe rumo oporandu iri chupe:

—¿Poropīsirosar ité vo nde ereico, Tūpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavasarēhi acato coti; ayevise avei iva quíha rese curi —ehi chupe.

⁶³ Evocoiyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vite yaico? ⁶⁴ Yasendupa niha aipo Tūpa upe iñehe-ñehe tēisa, ¿mara ehi aipo evocoiyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondivi-ndivi sese iyavei osesacua, ipare yuvirocua-rocua sese aipo ehi yuvireco:

—¡Eicua ité ru, ava evocoi ocua nde rese! —ehi-ehi yuvireco chupe.

Sundao tūparo rārosar avei osovapete-pete yuvireco.

Pedro, “Ndaicuai vahe evocoi mbia” ehi Jesús upe

⁶⁶ Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe. ⁶⁷ Osepiase Pedro iyepesehese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

⁶⁸ Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osēse oquendipive ohã, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi tēi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoiyase,

—¡Tūpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuvirosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evocoi mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cōhe potase, pahi eta rerecuar, judío rerecuar, Moisés porocuita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe. ⁴ Evocoiyase Pilato oporandu iri chupe aipo ehi:

—¿Mahera vo ndereñehei eté? Esepia, setá mbahe nde rembiavi omombehu yuvireco —ehi.

⁵ Nomboyevii eté rumo Pilato upe. Evocoiyase, “¿Mara ehi rutei pīha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepeí ava soquendapri renose ägua Pascua pieta pipe ava rehii porandusa rupi yepi. ⁷ Mbía Barrabás serer vahe, ahe pipeve avei soquendasa yuvireco ambuae oporapichí vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vahe rã judío rerecuar? —ehi.

¹⁰ Esepia, Pilato oicuano ité ava rese yemoecatēhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-ati uca ava yuvireco.

¹² Evocoiyase Pilato oporandu ahe ava upe:

—¿Mbahe vo peipota ayapora co mbia chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atíño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-ati iriño yuvireco.

¹⁵ Evocoyase Pilato, mbahe tupri opita água ava rese, omose uca Barrabás. Ipape oinupá iteanga uca Jesús tucumbo tupeicha nungar pipe, imondo curusu rese yatica água.

¹⁶ Ahe se sundao viraso mborecuar rēta sui ambuae oi pipe, aheve opacatu omboetasa omonuha yuvireco. ¹⁷ Aheve omboyemonde turucuar pīraumbi vahe pipe yuvireco, ipape yu piapri omonde ñaca rese. ¹⁸ Sāse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirecua-rocua ivira pipe ñaca rupi yuvireco sese, ondívī-ndivi avei oñenopiha-piha avei sovai yuvireco imboeteisave angahu. ²⁰ Mara-mara tēi sereco pare, ovirocua iturucuar pīraumbi vahe yuvireco ichui, ahe se omonde iturucuar ité yuvireco sese. Ichui vinose ocarve yatica água yuvireco.

Jesús yaticasa curusu rese

²¹ Ñepeí mbia Simón serer vahe Cirene pendar, Alejandro, Rufo yesupa, ahe pipe avei oyepota chupe que co coti rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voíño tēi yuvireco chupe.

²² Jesús oviraso Gólgota serer vahesave yuvireco (‘Ava Āca Cangüer’ oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. ²⁴ Evocoyase oyatica yuvireco. Ipape sundao iguayíño Jesús turucuar rese ‘¿uma pīha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oī. ²⁷ Supive avei yaticasa ñuvirío imonda rai vahe ñepeí mbahe rese ipocosa coti, ambuae mbahe rese ipocōehisa coti. ²⁸ Ēgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipape mbosapi ari rupi opa irira amopuha” ere acoi cuese. ³⁰ ¡Eñepisiro n rde ae cute; egüeyi curusu sui! —ehi yuvireco chupe.

³¹ Ēgüe ehi avei pahi eta rerecuar, oporombohe vahe avei Moisés porocuita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatu i oñepisiro. ³² ¡Poropisiosar Israel rerecuar guasu, toyeeroyi ahe ae curusu sui cūrítei, ahe se voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pītu ivi rupi. Ēgüe ehi las tres rupi. ³⁴ Ahe se tupri avei Jesús oñehe pīrata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehugar Elías upe oñehe —ehi yuvireco chupe.

³⁶ Evocoyase ñepeí imboetasa oña oso mbahe saviyu vahe reca. Ahe omoaqui vinagre pipe imondo ivira apri rese chupe ‘toihu’ oya:

—Ēgüe tehiño rane, ¿oura pīha Elías seroyi água curusu sui? —ehi.

³⁷ Ahe se Jesús sāse pīrata. Ipape omano. ³⁸ Ahe seve tūparo asiata turucuar ivate coti sui ovo tupri. ³⁹ Iyavei sundao rerecuar Roma iguar, ahe Jesús rehögüer rese omahengatu ohā. Osenduse Jesús rāse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osepia catu yuvinoha; ahe yuvirecoi María Magdalena, José si María, ahe avei Santiago chíhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipitivi vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvipa pipe

⁴² Pītu ramose, ahe ari pipe oyemoingatu ava yuvireco ari mbítuhusa upe nara yepi, ⁴³ ahe se José, tecua Arimatea pendar, porandusa ivate catu vahe pendar, acoi Tūpa mborecuaosa osāro vahe oico, oquerēhisa pipe ité oi que oso Pilato upe oporandu água Jesús rehögüer rese. ⁴⁴ Pilato rumo oyepihamondii tēi, “Omano” hese. Oñehe sundao

rerecuar upe oporandu āgua ‘¿marase vo ēgüe ehi?’⁴⁵ Sundao rerecuar omombehuse chupe, ahese omondo sehōgüer José upe.⁴⁶ Evocoiyase José virocua turucuar secose vahe. Curusu sui seroyi pare, oimama voi eté ipipe. Ipare omoingue tuvipa ita yohopri pīpe. Ichui ita yapayere vahe pīpe osovapi.⁴⁷ María Magdalena iyavei María, José si, osepiaño yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe virocua mbahe siacua vahe Jesús rehōgüer rese nara yuvireco.² Iyavei añihiveive, yipindar ari semana pīpe, oyepota Jesús ruvipave icatu ramose yuviraso.³ Aheve aipo ehi oyeupe yuvireco:

—¿Ava pīha co tehōgüer rovapisa virocua yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihāi,⁵ yuviroiquese tehōgüer ruvipave yuvireco, aheve osepia ombahe rese pocosa coti mbia chñhivahe, iturucuar pucu morochi vahe oguapise oī. Ahese cuña oyembosiquiye yuvireco.⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohove. Pesepia ru supagüer.⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoiyase ahe cuña yuvinosese tuvipa sui, yuvinoña yuviraso, oriri avei osiquiyepave. Iyavei nomombehui eté ambuae ava upe osiquiyepave yuvireco.

Jesús oyemboyecua María Magdalena upe

⁹ Jesús ocuerayevire añihiveive domingo pīpe, oyemboyecua yipindar María Magdalena upe, ahe ichui acoi siete tupri carugar opa omboyepipi.¹⁰ Ahe oso imombehu supindar upe. Ahe rumo oyaseho vite oviharēhisave yuvireco.¹¹ Osenduse cuña ñehe: “Jesús ocuerayevi, che ité asepia” ehise, ndoviroyai eté yuvireco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pīpe peri rupi.¹³ Ahe avei yuviraso omboetasa upe imombehu; ndoviroya viteiño avei rumo yuvireco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvirecoi vahe upe mesave yuvinoi viteseve, oñehengata ahe oyese yeroyaēhisa rese chupe, iyavei ocuerayevisa mombehusar reroyaēhi rese avei.¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa pīsirosa resendar peico.¹⁶ Acoi viroya vahe, iyavei oñeapiramo vahe, ahe oñepisiora yuvireco; acoi ndoviroyai vahe rumo, ahe imocañipirā tēi yuvirecoira.¹⁷ Co mbahe poromondiisa omboyecua che reroyasar yuvireco: Che rer pīpe omboyepipira carugar ava sui. Oñehe aveira ñehesa ndicuasai vahe pīpe yuvireco.¹⁸ Oipisi aveira mboi yuvireco, yuviroihuse mosa oporoyuca vahe, ndoyapoi chietera mbahe yuvireco chupe; iyavei omondose opo ava imbaheasi vahe harive, ombogüera aveira yuvireco” ehi.

Jesús oso ivave

¹⁹ Oñehe pare, yande Yar Jesús oso ivave. Aheve oguapi Vu Tüpa acato coti oī.²⁰ Semimbohe evocoiyase opa yuviraso opacatu ivi rupi ñehesa pīsirosa resendar mombehu. Yande Yar avei oipitivi, iyavei mbahe poromondiisa pīpe omboyecua uca ité ñehesa pīsirosa resendar supi eté vahe. Aipo rupive.

LUCAS REMBICUACHIA JESUS RECOUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboaviyesa cūrítei yande pãhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri água, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoiyase nde ereicua tuprira co porombohesa supi eté vahe acoi nde mbohe agüer.

Tüpa rembiguai omombehu Juan Oporoãpiramo vahe ha água

⁵ Yipindar Jesús ha renondeve, Herodes mborerecuar ivi Judea rupindar recose aracahe, ahese aipo judío pahi secoci Zacarías serer vahe. Ahe pahi Abías rupindar secoci. Sembireco aipo pahi Aarón suindar, ahe serer Isabel. ⁶ Co ñuvirio secocuer aviye tupri Tüpa upe; viroya tupri opacatu Yar porocuaita yuvireco. Evocoiyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahii vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepeí ari aipo osupiti icuaita tüparo pipe imboetasa reseve iporaviqui água Tüpa rovaque yuvireco. ⁹ Pahi recosa ité ègüe ehi aracahe suive, ahese iporavosa Zacarías yipindar yasiapri tüparo maranehi pipe oiqhe vaheerã itaisi rapí água. ¹⁰ Itaisi rapí viteseve aipo, opacatu ava oyerure yuvireco ocarve. ¹¹ Aheseve aipo oyemboyecua yande Yar rembiguai itaisi renda maranehi ique coti chupe. ¹² Tüpa rembiguai repiase aipo, oyembosiquiyé iteanga. ¹³ Tüpa rembiguai rumo aipo ehiño chupe:

—Zacarías —ehi—, eresiquiye eme. Tüpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyembviharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Tüpa rovaque. Ndoiñui chietera uva ricuer sai vahe, iyavei que ambuae mbahe sai vahe; secoira rumo Espíritu Santo rese ohaëhi viteseve. ¹⁶ Ègüe ehira omonguerëhi setá ava judío Yar Tüpa reroya iri água oico. ¹⁷ Ahe virecora espíritu pĩratasa oyese oyoyara Tüpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporeroyai vahe yuvireco seco catupri vahe aracuasa mboyeroya água rese’ oyapave. Ègüe ehira ava mbohe imoingatu yande Yar pisi água sereco —ehi chupe.

¹⁸ Evocoiyase,

—¿Mara ahera pĩha aipo reroya? Che rumo acuacuami eté vichico, iyavei che rembireco ocuacuami avei no —ehi Tüpa rembiguai upe.

¹⁹ —Aní —ehi chupe—. Che aico Tüpa rembiguai Gabriel, Tüpa rovaingar. Ahe niha che mbou ndeu che ñehe água iyavei co ñehesa aviye vahe mombehu água. ²⁰ Nde rumo ndereroyai acoi amombehu vahe ndeu. Sese co pipe suive ité nandehengatui chira eico. Osupitise voi che remimombehugüer, acoi ohase nde rahir, ahese ramo ndehengatura —ehi aipo Tüpa rembiguai chupe.

²¹ Osãro pucu tēi aipo ocarve ambuae imboetasa eta yuvireco. “¿Mahera pĩha nose vitei tüparo pipe sui?” ehi tēi yuvireco chupe. ²² Osēse aipo tüparo pipe sui, niñehengatui voi eté. “Ñaro osepia mbahe tüparo pipe” ehiño ité aipo imboetasa eta yuvireco chupe. Ipo äta-äta tēi aipo oñehengatuēhise mbahe mombehu oico.

²³ Ipape omboaviyese ocuaita tüparo pipe, oyevi oso güëtave. ²⁴ Coiye aipo sembireco Isabel ipuruha oico. Judío porocuaita mboyeroyasave nose iri eté ambuae ava piri poyandepo yasi rupi. Ipĩhañemoñeta: ²⁵ “Yar Tüpa ité ègüe ehi cheu ava che rese ñeheñhi iri água yuvireco” ehi vorivetesa pipe aracahe.

Tüpa rembiguai Jesús yesu água omombehu

²⁶ Coiye seis yasi pipe Tüpa omondo güembigui Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehe água; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tüpa rembiguai oiqhe co cuña rêtave aipo ehi chupe:

—¡María, Tüpa nde rovasa, erereco mbahe icatupri vahe pĩtiviisa Yar Tüpa suindar! Tüpa nde rese ité secoci; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya pīha co aipo ehi cheu?” ehi tēi osiquiyepave opīhañemoñeta rereco. ³⁰ Evocoyase Tūpa rembiguai aipo ehi chupe:

—María, eresiquiye eme. Esepia niha, Tūpa ité nde poravo nde rovasa āgua. ³¹ Cūrítei vaira rumo ndemembira: ererectora nde membri; ahe serer-ra Jesús. ³² Ahe niha secovicha catu vaherā secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera mborerecurar guasu seco āgua inungar tamoi David aracahe. ³³ Mborerecurar guasu secoira judío recua rupi apirēhi vaherā; imborerecuasa niha apirēhi vaherā ité secoira —ehi.

³⁴ Evocoyase ahe aipo ehi:

—¿Mara ahera vo aipo che membí viña? Esepia niha, ndaico vitei vahe cuimbahe rese —ehi Tūpa rembiguai upe.

³⁵ —Espíritu Santo ogüeyira nde harive iva quiha nungar; Tūpa güeco pīratasa pipe nde momembira. Sese acoi ohase nde membri seco maranehi vahe, “Tūpa Rahir” hesara chupe. ³⁶ Cūrítei nde mu Isabel avei ocuacuami pipe imembí oico; ahe niha ndimembí vahe yipindar viña, cūrítei rumo vireco seis yasi omembri vie pipe. ³⁷ Esepia niha, Tūpa upe ndipoi eté mbahe yavai vahe —ehi.

³⁸ Evocoyase María aipo ehi:

—Che Yar rembiguai aico, tayaviye ayase Tūpa remimbotar cheu nde ñehe rupi —ehi. Aipo ihe pare, Tūpa rembiguai oyepepi oso ichui.

María oso omu Isabel piri

³⁹ Ahese María oso voi eté ivitri rupi tecua ivi Judea ve. ⁴⁰ Aheve aipo Zacarías rēta pipe oiqueste oso, oyapo “avirave” omu Isabel upe. ⁴¹ Evocoyase Isabel rie pipe omí imembri ñehe renduse. Ahese Espíritu Santo oiqueste Isabel aviterve. ⁴² Ipape osapucaí pīrata aipo ehi chupe vorivetesave:

—¡Tūpa nde rovasa cuña opacatu sui, iyavei osovasa nde membri! ⁴³ Noromohai eté che piri ereyu vaherā viña, che Yar si. ⁴⁴ Esepia, cheu “avirave” ereyapose, che membri omí voi vorivetesave che rie pipe. ⁴⁵ ¡Sovasapri ereico! Esepia, ereroya ité ñehesa ndeundar. Iyavei Tūpa omboaviyera güemimombehu nde rese —ehi Isabel chupe.

⁴⁶ Evocoyase aipo ihese,

“Che niha amboetei che Yar vichico;

⁴⁷ cheroriveté Tūpa che Písirosar rese.

⁴⁸ Esepia, ahe omahe che rese che reco yemominisa pipe seroyasar che recosave. Co pipe suive, ‘Sovasapri secoi’ ehira opacatu ava yuvireco cheu.

⁴⁹ Esepia niha, Tūpa mbahe mboavaisarēhi, oyapo mbahe tuvichá vahe cheu.

¡Tūpa imboeteipri catu tasecoi yepi!

⁵⁰ Ahe oiparaisuereco opacatu omboeteisar yepi.

⁵¹ Nomboavai eté mbahe yapo.

Osecoreroyi ava oyemboivate ai tēi vahe.

⁵² Viroyi mborerecurar seco pīrata vahe pīratasa sui; ava seco mbegüemi vahe rumo osec-omboivate.

⁵³ Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

⁵⁴ Oipitiviñi niha opacatu viroyasareta judío yuvirecoi vahe.

Esepia, ndasesarai eté poroparaisuerecosu mundo āgua ⁵⁵ güemimombehugüer rupi yande ramo arachendar Abraham upe, ichuindar upe avei yepi no” ehi vorivetesave pipe omu

Isabel upe.

⁵⁶ Ipape María opita Isabel piri mbosapi yasi rupi. Ichui oyevi oso güetave.

Juan Oporoāpiramo vahe haragüer

⁵⁷ Osupitise ari Isabel upe, imembira. Ahe imembri cuimباهemi. ⁵⁸ Imu iyavei icotindar oyanduse Tūpa rembiapo mbahe aviye vahe, aipo ehi yuvireco chupe: “Aviye ai catu Yar Tūpa secoi co cuña rese” ehi vorivetesave yuvireco. ⁵⁹ Ocho ari pipe aipo, ahe pītani ombocircuncida yuvireco judío porocuaita mboyeroyasa pipe. Ipape aipo omondo pota iyepi Zacarías rer yuvireco sese viña, ⁶⁰ ichi rumo,

—Aní —ehiñi—. Juan itera rumo serer —ehi.

⁶¹ —¿Mahera vo? Ndiipo eté rumo nde mu rer aipo nungar —ehi yuvireco chupe.

⁶² Evocoyase aipo omahe pītani yesupa rese yuvireco ‘¿mbahe pīha ahe omondo pota sererguā viña?’ oyapave yuvireco. ⁶³ Evocoyase aipo iyepi oporandu ivirapemi rese sese serer oicuachía vaherā. Ahe serer oicuachía: ‘Juan sererguā’ ehi imoi. Ahese aipo opacatu ava: “¿Mara ehi rutei pīha co?” ehi tēi oyeupe yuvireco. ⁶⁴ Ahese ramo Zacarías ñehengatu, omboipi Tūpa upe osapucaí oico. ⁶⁵ Opacatu aipo sēta cotindar oyembosiquiye

têi yuvireco, iyavei aipo opacatu Judea recua rupi omombehu-mbehu mbahe osepia vahecuer yuvireco. ⁶⁶ Mbahe osendu vahecuer rese avei aipo oporandu-randu oyeupe yuvireco: “¿Mbahe pîha aipo pîtani oyapora curi?” ehi. Esepia niha, supi eté Tûpa osovasa.

Zacarías sapucaí agüer

⁶⁷ Zacarías, Espiritu Santo pîratasa pipe, oñehe Tûpa oyeupe ñehesa pipe aipo ehi:
⁶⁸ “¡Yande Yar Tûpa imboeteipri tasecoi!

¡Esepia niha, ahe ou yande judío yaico vahe pîsîro ãgua!

⁶⁹ Ombou niha Poropîsîrosar güembiguai David suindar yandeu.

⁷⁰ Êgüe ehi imombehu opacatu oñehengagüer mombehusar seco maranehi vahe upe aracahe.

⁷¹ Ahe yande pîsîrora yande amotarêhimbar sui.

⁷² Êgüe ehi Tûpa imbou oporoparisuerecosa yande ramoi aracahendar upe, iyavei iye-momahenduha ãgua güemimbotar maranehi mombehu agüer rese.

⁷³ Evocoiyase, ‘Che supi eté ayapora evocoi mbahe’ ehi yande ramoi Abraham upe aracahe

⁷⁴ yande renose ãgua yande amotarêhimbar povri sui ‘tache mboetei osiquiyêhisa pipe yuvireco’ oya;

⁷⁵ ‘toyuvirecoi che rembiepiave güeco ñvisa pipe iyavei güeco maranehisa pipe ari yacatu rupi’ oyapave.

⁷⁶ Nde, che rahir, ‘Co Tûpa ivate vahe ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi ãgua senondeve eico.

⁷⁷ Supi eté nde niha eremboyecua opacatu ava Tûpa upendar yuvirecoi vahe upe angaipa sui ñeroisa pisi ãgua iñepîsîro ãgua.

⁷⁸ Esepia, yande Ru Tûpa, oporoparisuerecosa pipe ombou oporoesapesa iva pendar yandeu yande reco mbopiasu ãgua

⁷⁹ iyavei ava Tûpa cuaparêhi resape ãgua ‘toyuvirecoi mbahe tupri pipe’ oyapave.

Esepia, ahe inungar ava pîtumimisave yuvirecoi vahe, ocañi têi vaherã yuvireco” ehi Zacarías.

⁸⁰ Ichui pîtani ocuacua iyavei vireco pîratasa Espiritu suindar oyese. Ipare rumo oso oyemboerecua ivi iporupirêhi rupi. Coiye oyemboyecua omu Israel pendar upe oico.

2

Jesús yesu agüer

¹ Yipîndar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipîndar yecuachiasa mborerecuar Cirenio, Siria pendar rêise. ³ Opacatu ava yuviraso güecua yacatu rupi oyecuachía ãgua yuvireco.

⁴ Sese José avei osê Nazaret, Galilea ivi rupi sui oso ivi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Êgüe ehi oyoya yuviraso güembirecovi María rese oyecuachía ãgua. María rumo imembira pota ité oico. ⁶ Aheve oyepota ramose, osupiti ari imembira ãgua. ⁷ Aheve oha imembri yipîndar vahe cuimbahemí. Ahese María oyao omembri turucuar pipe, êgüe ehi imoñeno imondo mbahe mîmba rembihu riru pipe. Esepia niha, ndoyosui eté oque ãgua aheve yuvireco.

Tûpa rembiguai eta omombehu Jesús haragüer ovesa rãrosar upe yuvireco

⁸ Namombriimi Belén sui ovesa rãrosar yuvirecoi. Aheve osãro ovesa pîtu pipe yuvireco. ⁹ Aviyeteramo têi oyemboyecua Tûpa rembiguai iva pendar chupe. Tûpa porañetesa avei sendi yivii chupe yuvireco. Ahe sepiase, oyembosiquiyé iteanga têi yuvireco ichui. ¹⁰ Ahe rumo aipo ehi chupe: “Pesiquire eme. Esepia, che ayu mbahe icatupri vahe mombehu ãgua pëu pe mboviharete ãgua iyavei opacatu ava mboviharete ãgua avei no. ¹¹ Co pipe oha David recua Belén ve Poropîsîrosar pëu nara. Ahe niha Tûpa Rembiporavo, pe Yarguã secoi. ¹² Icuã ãgua peyosura pîtani yaopri tuprimi vahe tui mbahe mîmba rembihu riru pipe” ehi.

¹³ Aviyeteramo têi oyemboyecua ambuae setã Tûpa rembiguai iva pendar yivii yuvireco. Tûpa upe osapucaí yuvireco aipo ehi:

¹⁴ “¡Imboeteipri tasecoi Tûpa ivave!

¡Ivive ava Tûpa rembiaisu toyuvirecoi tupri oyeaisusa pipe!” ehi osapucaí yuvireco.

¹⁵ Opase oyevi Tûpa rembiguai ivave yuviraso, ahese ovesa rãrosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoiyase ipoyava yuvíraso. Ipape osepia María, José, Jesús pītani avei yuvireco cute. Ahe pītani omoñenomi mbahe mimba rembihu riru pipe ino. ¹⁷ Ipape yuvínose omombehu-mbehu ambuae ava upe Tūpa rembiguai remimombehugüer pītani resendar ñehesa yuvireco. ¹⁸ Evocoiyase opacatu ava oyepihamondii co ñehesa renduse yuvireco. ¹⁹ María rumo opacatu co mbahe rese oyapísacaño; ahe ehiño ité ipihañemoñetas. ²⁰ Oyevíse ovesa rārosar yuvíraso, omboetei iyavei osapucái Tūpa upe yuvireco. Esepia niha, opacatu mbahe osendu vahe, osepia vahecuer yuvireco imombehupri rupi tupri ité.

Jesús pītani seropovēhesa Tūpa upe tūparo pipe

²¹ Ocho ari pipe ahe pītani ombocircuncida yuvireco; omondo sererguā Jesús yuvireco, ahe terer tupri avei acoi Tūpa rembiguai omombehu María upe imembiēhi viteseve.

²² Ipape omboaviyese ohari güetave oñemoatiro āgua, ahe aipo ēgüe ehi Moisés porocuita rupi yuvireco yepi, ahese vínose pītani seraso tecua guasu Jerusalén tūparo pipe seropovēhe āgua Yar upe yuvireco. ²³ Ēgüe ehi yuvireco. Esepia, Yar porocuita aipo ehi icuachiapri pipe aracahe: “Opacatu yipindar pītani cuimbahe mini yuviroha vahe ipehasara Tūpa upe nara yepi” ehi. ²⁴ Yuvíraso oporerrecosa reropovēhe āgua yuvireco yande Yar porocuita rupi: “Ñepi oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secói Simeón serer vahe. Ahe mbia aviye etepri vahe. Oyerure vahe Tūpa upe, osāro vahe avei Israel recua pendar Písirosar imombehupri. Ahe secói vahe ité Espírítu Santo rese. ²⁶ Ahe chupe Espírítu Santo opa uca oicua “eresepia rane itera Poropísirosar Tūpa remimbou nde mano renondeve” ehi vahe. ²⁷ Ahe ari pipe Espírítu Santo viroguata tūparove. Oyepotase José, María reseve yuvireco tūparove Jesús pītani reropovēhe āgua Tūpa porocuita rupi tupri, ²⁸ ahese Simeón oyemboya oso sese, osupi ichi sui, viroyeroqui Tūpa upe señoña aipo ehi:

²⁹ “Che Yar, cūrítei che, nde rembiguai, amano tupriño itera. Esepia niha, nde remimombehugüer eremboaviye ité cheu.

³⁰ Asepia ité niha Poropísirosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secói.

Esepia, omboyecua mbahe supi eté vahe ava ndahei vahe judío yuvirecoi vahe upe, iyavei omondara poromboeteisa nde recua Israel pendar judío yuvirecoi vahe upe” ehi oyeroguqui.

³³ José iyavei María ndoyembovihai tēi yuvireco pītani rese Simeón yeroqui renduse.

³⁴ Evocoiyase Simeón osovasa ahe pītani iyésupa reseve. Ipape aipo ehi ichi María upe:

—Esendu, co pītani reroyaēhisa pipe setá yande mu judío oviapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecua mbahe ava upe. Amove rumo viroñoñora yuvireco. ³⁵ Ipape sui ava pihañemoñetas icuasara curi. Iyavei co opacatu mbahe tasira nde piha pipe inungar quise pucu osasara nde piha viña —ehi chupe.

³⁶ Aheve avei cuña cuacumi yaracua vahe secói, ahe serer Ana, Fanuel rayri, Aser suindar. Ocuñataimiseve rumo omenda, iyavei secói raimi tēi omer rese siete araviter rupive. ³⁷ Cūrítei secói omer mano pare ochenta y cuatro araviter. Nosei eté tūparo pipe sui oico. Ēgüe ehi yande Yar mboetei pītu, ari rupi oyecuacusa pipe iyavei oyeruresa pipe avei oico no. ³⁸ Ahe evocoiyase ahesa reseve avei ou pītani upe, “Aviye ndeu” ehi Tūpa upe. Ipape oñehē secocuer rese opacatu ava Jerusalén pendar osāro vahe güecua písiro āgua upe oico.

Jesús pītani reroyevi agüer Nazaret ve

³⁹ Evocoiyase opacatu Moisés porocuita mboaviyere, opa oyeví Galilea pendar güecua Nazaret ve yuvireco. ⁴⁰ Ahese pītani ocuacua catumi imbahecua-ecua irimi eté oico iyavei ipírata catu irimi. Esepia, Tūpa osovasa ité sereco no.

Jesús chīhivahe tūparo pipe secói

⁴¹ Iyésupa yuvíraso araviter yacatu Jerusalén ve Pascua pieta repia yepi. ⁴² Jesús doce araviter virecose, ahese víraso iyésupa Jerusalén ve oyeupi pieta repia yuvireco. Esepia, ēgüe ehi eté judío recocuer pietase yuvireco yepi. ⁴³ Ahe pieta pare voi, oyevíse yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepi ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyeví iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tūpa porocuita rese oporombohe vahe pāhuve oī; oyapísaca iñehē rese iyavei oporandu-randu ahe ava upe Tūpa Ñehengagüer rese oī. ⁴⁷ Evocoiyase opacatu ava ndoyembovihai tēi

imbahecua vaisa rese yuvireco. Esepia, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyesuspa, oyepihamondii yuvireco. Ahese ichi aipo ehi chupe:

—Che membri, ¿mahera vo ñegüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoiyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaheñā? —ehi osi upe.

⁵⁰ Iyesuspa rumo ndosenducuai eté aipo oyeupe hesa yuvireco.

⁵¹ Evocoiyase oyevi Nazaret ve oso supi. Aheve omboyeroñaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tūpa upe iyavei ava eta upe avei no.

3

Juan Oporoāpiramo vahe secoi ivi iporupirēhispa rupi

¹ Quince araviter pipe mborerecuar guasu Tiberio recose, Poncio Pilato evocoiyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoiyase mborerecuar secoi Iturea ve iyavei Traconite ve, Lisantias avei mborerecuar secoi Abilinia ve. ² Anás iyavei Caifás ahe pahí rerecuar ivate catu vahe yuvirecoi. Ahese Tūpa, “Emombehu che ñeha ava upe cute” ehi Zacarías rahir Juan upe oico ivi iporupirēhisave. ³ Juan evocoiyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tūpa upe, ahese opoāpiramora Tūpa pēu ñero āgua pe angaipa rese” ehi. ⁴ Co yaviye ité Tūpa ñeha mombehusar Isaías rembicuachigüer pipendar aipo ehi vahe:

“Sendusa ivi iporupirēhisave ava sapucaisa aipo ehi vahe:

‘Pemoingatu yande Yar raperā, pemohivi tupri avei’ ehi.

⁵ ‘Evocoiyase opacatu ivisocuer opara imboapiposa chupe, opacatu ivitri ivate vahe iyavei ivitri mini opara imboyoyasa tupri no.

Acoi perí ipāri vahe, ahe imohivisapara; perí ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pīsirosa resendar Tūpa remimbou yuvireco cute’ ehi vahe” ehi.

⁷ Ava rehii yuvinosepa chupe ‘tayande āpiramo’ oyapave yuvireco viña. Ahe rumo aipo ehi: “¡Pe mboi mboetas tēi peico! ¿Ava vo, ‘Pesēra Tūpa ñemoirosa ou vaheñā sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro āgua. Esepia, Tūpa oicatuño ité co ita sui Abraham suindar nungar tupri apo āgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia āgua yepi. Yasiapri evocoiyase imondosapara tatave” ehi.

¹⁰ —¿Mbahe pīha evocoiyase oroyapora ore recocuer recuñaro āgua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepeí pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarepochi reroquasar ‘tayande āpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahe vo ore oroyapora Tūpa rupi ore guata āgua oroico? —ehi yuvireco chupe.

¹³ Evocoiyase aipo ehi ahe ava yuvirecoi vahe upe:

—Aní perocua catu iri guarepochi pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahe vo ore oroyapora? —ehi.

—Ndaperocuai chietera que mbahe ambuae ava sui, ndapeñeha-ñeha tēi chira ava upe sembipañehi rese, iyavei peyemboviñañora pe poraviqui repri rese —ehi sundao upe.

¹⁵ Ava rumo, “¿Ndahei pīha co Poropīsiosar sārombri secoi?” ehi tēi Juan upe yuvireco.

¹⁶ Juan rumo aipo ehi opacatu ava upe: “Che opoāpiramo i pipe tēi; oura rumo ambuae che raquicuei, ahe pe āpiramora Espiritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āgua ichui” ehi. ¹⁷ “Ahe güeru trigo mbovevesa ihigüer sui ipeha āgua. Sāhii evocoiyase yapocatusa, ihigüer rumo imondosa tata apirēhi vahesave” ehi ava upe.

¹⁸ Omombehu-mbehu vite ñehesa aviye vahe ava upe ‘toyemonguerēhi güecocuer recuñaro āgua yuvireco’ oya. ¹⁹ Ipare rumo Juan oñehe pīrata mborerecuar Herodes upe secocueraí rese. Esepia, vivri Felipe rembireco Herodías rese secói, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva. ²² Ipare Espiritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese aviha ité nde rese —ehi.

Ava eta oyesu vahe Jesucristo yesu renondeva

²³ Jesús virecose treinta araviter, ahese ramo omboipi oporombohe. Ahe icuapri vahe ité José rahir secose viña. José Elí rahir secói, ²⁴ Elí evocoiyase Matat rahir, ahe Matat evocoiyase Levi rahir, Levi evocoiyase Melqui rahir, ahe Melqui evocoiyase Jana rahir, Jana evocoiyase José rahir, ²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, ²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir, ²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, ²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, ²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, ³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José Jonam rahir, Jonam evocoiyase Eliaquim rahir, ³¹ Eliaquim Melea rahir, ahe Melea Mena rahir, Mena evocoiyase Matata rahir, ahe Matata evocoiyase Natán rahir, ³² Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir, ³³ Naasón Aminadab rahir, ahe Aminadab evocoiyase Admin rahir, Admin evocoiyase Arni rahir, Arni evocoiyase Esrom rahir, ahe Esrom evocoiyase Fares rahir, Fares evocoiyase Judá rahir, ³⁴ ahe Judá Jacob rahir, Jacob evocoiyase Isaac rahir, ahe Isaac Abraham rahir, Abraham evocoiyase Taré rahir, Taré evocoiyase Nacor rahir, ³⁵ ahe Nacor Serug rahir, Serug evocoiyase Ragau rahir, ahe Ragau evocoiyase Peleg rahir, Peleg Heber rahir, ahe Heber evocoiyase Sala rahir, ³⁶ Sala Cainán rahir, ahe Cainán evocoiyase Arfaxad rahir, Arfaxad evocoiyase Sem rahir, ahe Sem evocoiyase Noé rahir, Noé evocoiyase Lamec rahir, ³⁷ ahe Lamec Matusalén rahir, Matusalén evocoiyase Enoc rahir, Enoc evocoiyase Jared rahir, ahe Jared Mahalaleel rahir, Mahalaleel evocoiyase Cainán rahir, ³⁸ ahe Cainán evocoiyase Enós rahir, Enós evocoiyase Set rahir, ahe Set Adán rahir, Adán evocoiyase Tüpa rahir.

4

Jesús recoāhasa

¹ Jesús Espiritu Santo rese ité secói. Ahe osē iai Jordán sui oso. Ipare Espiritu viroguata ivi iporupirēhisa rupi. ² Aheve cuarenta ari secoise Carugar osecoāha. Ndocarui avei oico. Sese ndasiepoi eté. ³ Carugar evocoiyase aipo ehi chupe:

—Tüpa Rahir ité nde recose, co ita sui eyapo pan cūrítei —ehi.

⁴ Evocoiyase Jesús omboeyvi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Carugar upe.

⁵ Ipare Carugar viraso ivate vahesave. Aheve ñepeí reseve opacatu ava-ava tēi mborerecuasa ivi pipendar omboyecua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrive. Esepia niha, co opacatu cheu imboupri; iya ité amondo vaheṛā ava upe che remimbotar rupi. ⁷ Acoi ereñenopihase cheu che mboetei āgua, ahese opacatu co mbahe erepisira nde mahera —ehi tēi Carugar chupe.

⁸ —Icuachiapri pipe rumo: ‘Emboetei nde Yar Tüpa, ahe güeraño tupri avei eremboyeraya’ ehi —ehi Carugar upe.

⁹ Ipare Carugar viraso oyeupi tecua guasu Jerusalén ve. Aheve oviroyeupi tüparo apiterve. Aheve Carugar aipo ehi chupe:

—Tüpa Rahir ité nde recose, eviapi cohava sui. ¹⁰ Esepia niha, icuachiapri pipe:

‘Tüpa oyocuíra güembiguaí eta nde rāro āgua.

11 Ahe nde mopuhara yuvireco que ñepeí ita nde momara rãgüer sui' ehi —ehi Carugar chupe.

12 Evocoiyase omboyeví Carugar upe:

—¡Aní! Icuachiapri pipe niha aipo ehi avei: 'Ndereseoãhai chira nde Yar Tüpa' ehi —ehi chupe.

13 Ahese Carugar ndoicatu iri eté Jesús recoãha ãgua oico. Ipare oyepepiño raimi tēi oso ichui.

Jesús omboipi oporombohe Galilea rupi

14 Jesús, Espíritu Santo reco pĩratasa pipe, oyeví oso Galilea ve. Ipare serãcua oguata opacatu tecua-tecuami rupi. 15 Esepia, ahe oporombohe judío tũparo pipe oico. Ahese opacatu ava omboetei yuvireco.

Jesús oyeví Nazaret ve

16 Ichui Jesús oyeví Nazaret ve ocuacua agüerve. Aheve judío mbituhusa ari pipe oique tũparove inungar oyapo yepi. Ahese opũha 'tayeroqui icuachiapri maranehi pipe' oya.

17 Evocoiyase tũparo rese ñangarecuar pĩtĩviisar omondo Tũpa ñehe mombehusar Isaías rembiacuachía chupe. Oyorase ahe cuachiar, oyerroqui icuachiapri aipo ehi vahe pipe ohã:

18 —“Yar Espíritu secoi che rese.

Esepia niha, ahe ombou che cuaitarã cheu co ñehesa avĩye vahe mombehu ãgua ava iparaisu vahe upe.

Che cuaita avei ava mbahe-mbahe tēivĩve yuvirecoi vahe senose ãgua ichui, iyavei ava ndasapĩsoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose ãgua,

19 iyavei 'cũritei Yar oyemoingatu oporovasasa mondo ãgua pēu' he ãgua” ehi icuachiapri pipe

—ehi oyerroqui.

20 Sese oyerroqui pare, oyapoapipa cuachiar imondo tũparo rese ñangarecuar pĩtĩviisar upe. Ipare oguapi oĩ ava rembiepiave. Ahese opacatu tũparo pipendar omahe ati yuvireco sese.

21 Evocoiyase ahe oñehe aipo ehi:

—Cũritei yavĩye co icuachiapri pipendar opacatu pe rovaque —ehi.

22 Opacatu ava oñehe tupriño ité yuvireco sese. Ndoyembovihai tēi iñehe tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

23 Ahe rumo aipo ehi ava upe:

—Pe aipo peyera cheu: 'Oporombogüera vahe, eñeposano nde ae eico' peyera. Ipare aipo peyera cheu: 'Acoi orosendu vahe nde rembiapogüer Capernaum pipe, ãgüe ere avei eyapo cohove nde recua pipe ité' peyera cheu —ehi.

24 —Supi eté, ndipoi eté niha que ñepeí yepe Tũpa ñehe mombehusar oipisi tupri vahe güecua pipe yuvireco yepi. 25 Supi tupri ité Tũpa ñehe mombehusar Elías recose, iñehe rupi tupri ndoquii eté mbosapĩ aravĩter yemombĩtesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña,

26 Tũpa rumo nomondoi Elías cuña imer mano vahecuer Israel pendar upe ipĩtĩvi ãgua. ãgüe ehi rumo omondo cuña ndahei vahe Israel pendar ipĩtĩvi ãgua. Ahe cuña tecua Sarepta pendar, ahe Sarepta Sidón ipĩmĩndar. 27 Iyavei setá ava oime Israel recua pipendar imbaheasi vahe lepra rerecosar yuvireco evocoi Tũpa ñehe mombehusar Eliseo recose.

Evocoi ava yuvirecoi vahe rumo ndipoi eté que ñepeí ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi

—ehi ava upe.

28 Ahese opacatu ava judío tũparo pipendar oñemoiró iteanga yuvireco sese aipo mbahe renduse. 29 Sese opa voi eté opũha Jesús reraso ãgua tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. 30 Jesús rumo ipãhu sui osē tupriño oso.

Jesús ombogüera mbia carugar vireco vahe oyese

31 Ichui Jesús oso Capernaum ve, ahe tecua Galilea rupindar. Aheve ombohe ava oico mbituhusa ari pipe. 32 Ipare opacatu ava, “¡Mara ehi rutei!” ehi tēi iporombohesa renduse yuvireco. Esepia niha, ahe oñehe güeco pĩratasa pipe.

33 Ahese judío tũparo pipe oime mbia vireco vahe carugar oyese, ahe oñehe pĩrata Jesús upe:

34 —¡Ore mañeco tēi eme eve! ¡Mahera ereyuño tēi cohove oreu, nde, Jesús Nazaret pendar! ¿Ereyu vo ore mocañi ãgua tēi? Che orocua ité. Nde niha seco maranehi vahe ereico Tũpa suindar —ehi chupe.

³⁵ Evocoiyase,

—jQuiriri, esē co mbia sui! —ehi oñehe pīrata carugar upe.

Ahese carugar omboviapi ahe mbia ava rovai, osē ocua ichui; nomomaraí eté rumo.

³⁶ Opacatu ava oyembosiquiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepia, co mbia opīratasa pipe oyocuai carugar ava sui imose āgua! —ehi yuvireco.

³⁷ Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoiyase Jesús osē judío tūparo pipe sui oso, oi que Simón Pedro rētave. Simón rembireco si sohi iteanga ou. Evocoiyase oñehe ahe pendar sese Jesús upe ‘tombogüerami tēi’ oyapave yuvireco. ³⁹ Evocoiyase Jesús oyeaivi oso chupe sohi sui ombogüera āgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasi vahe

⁴⁰ Ari so ramomise opacatu ava imbaheasisa ambuae tēi vahe güeru Jesús upe yuvireco. Ahe evocoiyase opo omondo iyacatu iharive ñepei-peí imbogüera. ⁴¹ Iyavei setá ava sui opa omose carugar. Evocoiyase carugar osapucaí tēi aipo ehi yuvireco:

—jNde acoi Tūpa Rahir ité ereico! —ehi.

Ahe rumo oñehe pīrata carugar upe, nomoñehe iri. Esepia niha, carugar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cōhe ramomise, Jesús osē tecua pipe sui, oso ivi iporupirēhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoēhi āgua ité yuvireco vinā. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñehesa aviye vahe Tūpa mborerecuasa resendar ava upe. Esepia, aherā niha che mbousa —ehi.

⁴⁴ Ēgüe ehi Jesús uguata oporombohe Judea tūparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe,

oyere ati yuvireco sese. Esepia niha, ahe osendu pota ité Tūpa Ñehengagüer yuvireco.

² Aheve oime ñuvirío carite imbehí popive. Ahe ava pira mbohasar opa yuvinoso evocoi

carite pipe sui yuvireco. Ipape opira mbohasa oyosei yuvinoi. ³ Evocoiyase Jesús osepiase,

oha Simón carite pipe iyavei aipo ehi chupe: “Tosiri catumi tēi chñhi coi coti iai popi sui” ehi.

Ipape uguapi oī carite pipe. Aheve ombohe ava cute. ⁴ Oñehe pare aipo ehi Simón upe:

—Yaso ipa tipi catu vahesave. Aheve erembohara pira —ehi.

⁵ Simón rumo omboyevi chupe:

—Porombohasar, orosāha tēi niha pītu momba pira mboha oroico. Nde porocuita pipe rumo amondo irira pira mbohasa ive —ehi.

⁶ Ēgüe ehise, pira rehii omondoromi ombohasa yuvireco. ⁷ Ahese oyaiti yuvireco

ombohasa evocoi ambuae carite pipe yuvirecoi vahe upe ‘toyugüerumi yande pītivii’

oyapave yuvireco chupe. Ahe yugüeru chupe. Ipape opa ñuvirío carite omboapipo tupri

yuvireco; seni iri rumo omondo ipive. ⁸ Co mbahe repiase, Simón Pedro oñenopiha oso sovai

aipo ehi chupe:

—jEyepipimi tēi che sui, che Yar! ¡Esepia, che yangaipa vahe tēi aico! —ehi.

⁹ Esepia, Simón iyavei opacatu ava yuvirecoi vahe supi osiquiyé iteanga co pira rehii

repiase yuvireco. ¹⁰ Iyavei Simón mboetasā ambuae carite pipendar ahe Santiago, Juan

Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ēgüe ere aveira ava reca cheu

nara —ehi.

¹¹ Evocoiyase opa vinose carite ivi ātasave yuvireco, oseypaño opacatu mbahe. Ipape

yuviraso supi.

Jesús ombogüera ava lepra rerecosar

¹² Ñepei ari Jesús secoise tecua pipe, aheve oime mbia lepra vireco vahe opacatu güetecuer

rese. Jesús repiase, oñenopiha oyeaivi oso chupe. Ipape oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūrítei! —ehi chupe.

Aipo ihe ramoseve voi eté ocuera. ¹⁴ Ipape oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipape eicuavêhe nde porerecosa nde cuerasa resendar Moisés porocuita rupi. Ipape sui toicua opacatu ava nde cuerasa yuvireco —ehi chupe.

¹⁵ Jesús rerâcua rumo oyembouvicha catu-catu iri eté. Evocoiyase setá ava oyemboya yuvireco sese iñehe rendu âgua ‘tayande mbogüerami tēi yande mbahehasisa sui’ oyapave yuvireco. ¹⁶ Ava rehii sui rumo amove Jesús oyepipiño ahe aemi oyerure âgua yepi.

Jesús ombogüera ava ndoguatai vahe

¹⁷ Ñepei ari Jesús oporombohe oico. Yar Tüpa pīratasa vireco oyese ava mbogüera âgua. Aheve avei uguapi yuvinoi fariseo, Moisés porocuita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui yuvireco. Ivi Judea rupi sui, tecua Jerusalén sui avei yugüeru no. ¹⁸ Aheve ava ndoguatai vahe güeru supa pipe yuvireco. Viroique pota oi pipe sovai eté seroyi âgua yuvireco viña; ¹⁹ ndoicatu eté rumo seroique yuvireco ava rehii pāhu rupi. Evocoiyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyi imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuae co mbia yuvirecoi vahe oyese yeroyasa, aheve aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tüpa ñehe nungar pipe tēi; Tüpaño ité niha oicatu ava angaipa upe oñero âgua” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Riquehir, areco ité mborerecuasa co ivi pipe ava angaipa upe che ñero âgua —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Aheve opūha voi ava rovaque, osupi vupagüer. Ipape osapucai oso güetave Tüpa upe. ²⁶ Aheve opacatu tupri ité ava, “¡Too! ¿Mara ehi rutei pīha co?” ehi tēi imboetisave yuvireco. Iyavei osiquiyepave aipo ehi yuvireco:

—Co pipe yasepia mbahe ndayasepia vahe ité —ehi.

Jesús oñehe Leví upe

²⁷ Ichui osēse Jesús, osepia mbia Roma ve nara guarepochi rerocuar Leví serer vahe, ahe guarepochi rerocuasave chini. Sepiase,

—Erio che rupi —ehi chupe.

²⁸ Evocoiyase Leví opūha. Oseyapa oporaviquisa, oso supi.

²⁹ Ipape Leví oyapo pieta guasu chupe nara güetave. Aheve iyemboisave setá imboetasa ava guarepochi rerocuar iyavei ambuae ava ocaru yuvinoi ipiri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarepochi rerocuar rese iyavei ambuae ava yangaipa guasu vahe rese tēi avei no! —ehi.

³¹ Jesús rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepia, che ndayui ava seco catupri vahe reca; che rumo ayu ava yangaipa vahe reca Tüpa uve iyevi âgua yuvireco —ehi.

Yecuacusa rese ñehesa

³³ Ipape ava oporandu yuvireco chupe:

—¿Mahera vo oyecuacu serai iyavei oyerure Juan Oporoāpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboyeuacu mendasave imer oicove viteseve ipāhuve. ³⁵ Oimera rumo ari imer reraso âgua ichui, aheve ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi âgua:

—Ndiyai eté ava upe virocua vahe rā turucuar ipiasu vahe sui ambuae turucuar cuacuami vahe apete âgua. Esepia niha, êgüe ehise evocoiyase turucuar ipiasu vahe omomara; iyavei turucuar ipiasu vahe apirer naporai chira turucuar cuacua vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pিরer cuacua pipe no. Esepia niha, êgüe ehise, uva ricuer piasu evocoiyase opara ombopu mbahe pিরer cuacua viña, êgüe ehira oyepiyerepa, mbahe pিরer avei evocoiyase ocañi tēira viña. ³⁸ Uva ricuer piasu rumo

yamondora mbahe pিরer piasu pipe. ³⁹ Iyavei ndipoi eté que ava oiuhu vahe uva ricuer ipiasu vahe yuvireco uva ricuer cuacua vahe yusei ai pare. Esepia niha, ava aipo, ‘Co uva ricuer cuacua vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepeí mbituhusa ari pipe Jesús viroguata güemimbohe mbahe miti pāhu rupi. Semimbohe evocoyase oipoho-poho yuviraso trigo rāhii. Ipare oyequii opo pipe sāhii yuvireco igua. ² Evocoyase fariseo osepiase, aipo ehi yuvireco semimbohe eta upe:

—¡Mahera peporaviquiño tēi co mbituhusa ari pipe peico! —ehi.

³ Jesús rumo omboyeví chupe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴ Ahe niha oi que ité Tūpa rēta pipe, opoco pan imboeteipri Tūpa upendar rese evocoi pahí upe güeraño ipotasa vahe ihu āgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Riquehir mbituhusa ari rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa ari pipe, Jesús oi que judío tūparo pipe oporombohe oico. Aheve mbia yasu coti ipo nomii vahe secoi. ⁷ Moisés porocuaíta rese oporombohe vahe, fariseo avei omahengatu Jesús rese yuvireco ‘¿ombogüerara pīha co mbia mbituhusa ari pipe?’ oya; ‘yaiñehengapo angahu’ oyapave tēi yuvireco. ⁸ Ahe rumo oicuaño ité ipihañemoñetasa oico. Ipare aipo ehi evocoi mbia ipo nomii vahe upe:

—Epūha cohava terehā ava pāhuve —ehi.

Ahe mbia evocoyase opūha, opita aheve ohā ⁹ Aheve Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa ari pipe yepi, mbahe tupri pīha, anise mbahe naporai vahe tie? ¿Yai pīsiro pīha ava recocuer; yamocañi uca tēi tie? —ehi.

¹⁰ Evocoyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yīva —ehi.

Ahe mbia evocoyase oichoho oyīva; evocoyase ipo ocuera tupri ité. ¹¹ Evocoyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara āgua?’ oya.

Jesús oiporavo doce tupri güemimboherā

¹² Ahe ari rupi Jesús oso ivitri ve, oyerure pītu momba tupri Vu upe oico. ¹³ Cōhese, “Perió” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi. ¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simón, ava güecua rese secatēhí vahe pāhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotarēhimbar uve.

Jesús ombohe ava rehii

¹⁷ Ipare Jesús ogüeyi ivitri sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboya ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyasa Tiro, Sidón cotindar, ahe oyemboya avei yuvireco sese. Ahe ava ēgüe ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoyase opacatu ava opoco pota ité sese yuvireco. Esepia niha, ahe oporombogüera opacatu güeco pīratasa pipe oico.

Ava sorivete vahe iyavei ava ndoyembovihai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepia niha, Tūpa mborerecuasa pēu nara ité secoi.

²¹ “Perorivete catu cūríteindar ndasiepoi vahe. Esepia niha, pehitarora peico curi.

“Perorivete catu pe acoi ava cūrítei oyaseho vahe. Esepia niha, peviharetera coipe peico.

²² “Perorivete catu pe acoi ava pe amotarēhise, pe mboyepepiñose avei oyesui yuvireco, iñehe-ñehe tēise yuvireco pēu pe amotarēhisave, iyavei acoi viroñrose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovihaño iyavei perorivete catuñora ahe ari pipe peico. Esepia niha, ipare peipisira porerecosa tuvichá vahe ivave. Ēgüe ehi

tupri avei evocoi ava ramoi aracahendar mara-mara tēi Tūpa ñehe mombehusar sereco yuvireco” ehi.

²⁴ “¡Peparaisu catu rumo cūrítei mbahe yar peico vahe! ¡Esepia niha, pemboaviye pe rorivetesá peico!

²⁵ “¡Peparaisu catu acoi pe ihĩtaro vahe cūrítei! ¡Esepia niha, ndaperiepoi chira peico coiye! “¡Peparaisu catu acoi peviha vahe pe pietase cūrítei! ¡Esepia, peyasehora pe viharēhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepia niha, ēgüe ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarēhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarēhimbar; peyapo tupri mbahe aviye vahe ava nape ambotai vahe upe. ²⁸ Peporandu Tūpa porovasasa rese ava pēu ñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese. ²⁹ Acoi que pe amotarēhimbar pe rovapetese, co cotindar avei pemoporēhiñora chupe. Iyavei acoi que ava virocuaño tēise pe yeosa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi āgua rese. ³¹ Acoi mbahe peipota vahe ambuae ava oyapo vaherā pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepia niha, ava naporai vahe ēgüe ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime aviye vahe ipipe? Esepia niha, ava angaipa viyar avei ēgüe ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoiyase oime aviye vahe ipipe? Esepia niha, ava angaipa viyar ēgüe ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasãroño rane mbahe cheu imboyevi āgua vichico’ ndapeyei chietera. Ahese oimera porrecosa aviye catu vahe pēu. Pe evocoiyase Tūpa seco ivate catu vahe rahir peicora. Esepia niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparisuereco inungar pe Ru Tūpa oporoparisuereco yepi” ehi.

Ndiyai ambuae ava seroñrosa

³⁷ “Ndiyai, ‘Oyavi ité mbahe’ peye voĩño tēi ambuae ava upe. Evocoiyase Tūpa, ‘Oyavi mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa ñeroño itera pēu. ³⁸ Pemondose mbahe ava upe, evocoiyase Tūpa omondoño itera mbahe aviye vahe pēu inungar-ra omondo pe mbahe riru pipe pēu sãhambri tupri aviye vahe viña. ēgüe ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: “¿Oicatu pĩha ñepeĩ ndasesapisoĩ vahe ambuae ndasesapisoĩ vahe reroquata? ¡Aní eté! Esepia, oyaya voi oviapira que ivicuar pipe yuvireco viña. ⁴⁰ Ñepeĩ yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osputira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropitiviĩ mbahe nde rembiavi rese’ peye vahe vahe chupe. Esepia, pe peyavi guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiavi tuvicha catu vahe peyesui, ahese ramo ambuae ava rembiavi tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivira aviye vahe icuasa iha rese. Esepia, ivira aviye vahe, iha aviye avei; ivira naporai vahe, iha naporai avei no. Supi eté ndipohosai ivira sãchi ati vahe sui higuera ha, iyavei ndahipohosai uva, yu pãhu sui. ⁴⁵ ēgüe ehi avei ava upe. Ava aviye vahe oyapo mbahe tupri. Esepia, ahe vireco mbahe tupri opiha pipe yepi. Iyavei acoi ava ndaseco pōrai vahe oyapo mbahe tēi. Esepia niha, ahe vireco mbahe tēi eté opiha pipe yepi. Esepia niha, pe pihá pipe sui tēi osé pe ñehe āgua” ehi.

Ava oyemoviracua vahe iyavei ndoyemoviracuai vahe Jesús reroyasave

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güetara ita harive yepi. Yipindar rumo oyoho picucu

rane ité ita harive imopuha āgua. Yepe ahe oi upe oyepota tēi ivitu ai, amarusu reseve oinupa pīrata tēi, nomboyerocuai eté rumo. Esepia niha, vireco ité ovīracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavii acoi ava oyapo vahe güētara ivi cuhi harive tēi, ndovirecoi eté ovīracuasa. Ipape amar, ivitu ai reseve oinupa pīratá, opaño omonduru; ocañi tēi eté evocoyase” ehi Jesús ava mbohe.

7

Jesús ombogüera chíhivahe sundao rerecuar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secói vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerācua anduse rumo, oyocuai movíro tēi omboripar judío imboeteipri chupe ñeñe āgua ‘toumi tēi che remimboacua mbogüera’ oyapave. ⁴ Ahe judío evocoyase oyemboya Jesús rese yuvireco iyavei oporandu yuvireco chupe aipo ehi:

—Ore mboripar sundao rerecuar oipota nde ereyapomi tēira mbahe icatupri vahe chupe viña. ⁵ Esepia niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omboripar chupe. Imboripar evocoyase omombehu ñeñe aipo ehi vahe: “Che Yar, ereyemañecoi rene. Esepia niha, ndiyai eté che rēta pipe nde reique āgua. ⁷ Sese niha che teieté ndasoi nde reca. Nde ñeñe pipe tēi rumo che remimboacua erembogüerara. ⁸ Esepia, che avei niha areco che cuaita. Iyavei areco sundao che voya. Eso peve, ahese ñepeí upe, ahe evocoyase oso voi eté; ambuae upe: Erio, ahese, ou voñño ité cheu. Ipape, Ereyapora co mbahe, ahese che rembiguai upe, ahe evocoyase che reroyañño voi” ehi ore mboripar” ehi Jesús upe yuvireco.

⁹ Aipo oyeupe hese Jesús, “¡Too!” ehi. Ipape aipo ehi vupindareta upe:

—Supi eté ndasepiaí vahe ité co mbia che reroya tupri vahe nungar judío eta pāhuve —ehi.

¹⁰ Yuvirovevise sundao rerecuar mboripar sētave yuvireco, aheve osepia evocoi semimboacua yuvireco ocuera tuprise.

Jesús ombogüerayevi cuña imer mano vahecuer membri cuimbahe

¹¹ Ipape voi Jesús oso tecua Naín ve, iyavei semimbohe yuvirasño ité supi ava rehii reseve avei no. ¹² Virovise tecua oso, osepia tehögüer ava virocuase yuvireco ñoti āgua. Ahe cuña imer mano vahecuer membri ñepeí vahe ité viña. Tecua pipendar setá iteanga ava yuvirasno supi. ¹³ Cuña repiase rumo, oiparaisuereco. Ipape aipo ehi chupe:

—Ereyaseho eme —ehi.

¹⁴ Evocoyase oyemboya oso, opoco tehögüer riru rese. Sese ovosii vahe evocoyase viropitaño yuvireco chupe. Ipape aipo ehi tehögüer upe:

—Mbia chíhivahe, che aipo ahe ndeu: ¡Eñiarapuha! —ehi.

¹⁵ Evocoyase omano vahecuer oñarapuha oñ iyavei oñeñe no. Ichui Jesús omondo ichi upe.

¹⁶ Opacatu tupri ité ava oyembosiquiye sepiase yuvireco:

—Cūrítei oyemboyecua Tūpa ñeñe mombehúsar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pítivii āgua oico —ehi avei yuvireco.

¹⁷ Ipape co Jesús rerācua yandusa opacatu Judea rupi, yivirindar rupi avei no.

Juan Oporoāpiramo vahe omondo vupindar Jesús recocuer cua uca āgua

¹⁸ Juan avei oyandu opacatu co mbahe oico. Esepia niha, vupindareta omombehua co mbahe yuvireco chupe. ¹⁹ Evocoyase omondo ñuvirío vupindar Jesús upe mbahe rese porandu āgua ‘¿nde ité vo Tūpa Rembiporavo aipo sārombri ereico, anise oime tie ambuae orosāro vaheerā?’ oyapave. ²⁰ Evocoyase oyepota yuvirasno Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaheerā, anise ambuae pīha orosārora oroico? —ehi yuvireco chupe.

²¹ Ahe ari pipeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapisoi vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndas-episoi vahe osareco tupri cūrítei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapísapa, omano vahe opa ocuerayevi

yuvireco iyavei ava iparaisu vahe upe imombehusa p̄sirosa resendar ñehesa” peyera chupe. ²³ ¡Oviharetera acoi ava oyeroyaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihata ivitu ombova-mbova vahe nungar p̄iha? ²⁵ Anise, ¿pesepia tie iturucuar porañete ai vahe iyemboetise? Ēgüe ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehugar ité p̄iha? Ahe ité, iyavei evocoi niha ivate catu vahe Tūpa ñehe mombehugar sui. ²⁷ Ahe chupe ité Tūpa icuachiapri aracahendar pipe aipo ehi:

‘Amondaca che ñehe mombehugar nde renondeve nde raperā moingatu āgua’ ehi. ²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

²⁹ “Co ñehe renduse opacatu ava, opacatu guarepochi rerocuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviyē vahe ité’ ehi eté yuvireco cute. ³⁰ Fariseo eta rumo iyavei Moisés porocuaite rese oporombohe vahe ahe noñeapiramo uca potai vahe Juan upe yuvireco, ahe viroiroño Tūpa remimbotar oyeupendar yuvireco.

³¹ “¿Mbahe rese p̄iha amboyoyara ava recocuer cūriteindar? ¿Mara ehi p̄iha secocuer?

³² Ahe inungar ch̄ihivahe iguayi tēi vahe ocar rupi. Ipape oñehe pucu-pucu omboripar upe yuvireco aipo ehi: ‘Oromoñehe tēi mimb̄i p̄eu, ndapepivoi eté rumo; iyavei orosapucái tēi sapucaisa viharēhisa resendar p̄eu, ndapeyasehoi avei’ ehi. ³³ Esepia, ou Juan Oporoāpiramo vahe oico. Ahe ndohui vahe pan iyavei ndoihui vahe uva ricuer. Pe evocoiyase, ‘Co mb̄ia caruguar vireco vahe’ peye tupri tēi chupe no. ³⁴ Coiye che ayu, Ava Riqueh̄ir, acarú iyavei aihu tupri avei. Ipape, ‘Co mb̄ia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu. ³⁵ Ava Tūpa mbahecuasa vireco vahe rumo icuasara sembiapo rese” ehi.

Fariseo Simón serer vahe r̄etave Jesús secoi

³⁶ Fariseo Simón serer vahe oñehe Jesús upe: “Terocarumi che piri” ehi. Jesús evocoiyase oso s̄etave oguapi oī mesave. ³⁷ Ahese cuña angaipa viyar evocoi tecua pendar secoi vahe oyandu ichose Simón r̄etave icaru āgua. Sese viroyepota aheve mbahe siacua vahe siru pipe seraso sepirusu vahe chupe. ³⁸ Aheve oyaseh̄o ite oñenopiha Jesús p̄ive iyavei güesai pipe opa tupri omoaq̄ui ipi. Ipape opaño omombiru oha apri pipe ichui, iyavei oip̄irupite, oip̄iyere avei mbahe siacua vahe ipi rese. ³⁹ Sepiase fariseo, ipihañemoñeta tēi: “Co mb̄ia Tūpa ñehe mombehugar itese, oicuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰ Evocoiyase aipo ehi fariseo upe:

—Simón, amombehu potami mbahe ndeu —ehi.

—Aviyē Porombohesar, emombehu ru cheu —ehi.

⁴¹ Evocoiyase Jesús aipo ehi chupe:

—Ñuvir̄io mb̄ia oime virocua guarepochi mb̄ia guarepochi mondosar sui yuvireco. Ñepe virocua guarepochi quiniento tupri mborav̄iqui repir̄ā ichui. Ambuae evocoiyase cincuenta rupive virocua. ⁴² Ipape ndoicatu irise ité imboyevi āgua yuvireco chupe, evocoi mb̄ia guarepochi mondosar iñeroño chupe yuvireco —ehi—. Esāha, emombehu cheu, ¿uma evocoiyase osaisu catura mb̄ia guarepochi mondosar? —ehi fariseo upe.

⁴³ —Cheu ndoyavīi guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoiyase omahe cuña rese aipo ehi Simón upe:

—¡Emahe co cuña rese! Aiquese acoi nde r̄eta pipe, nde nderembouimi eté i che pisei āgua cheu; co cuña rumo güesai pipe oyosei che pi. Ipape omombiru oha apri pipe ae no. ⁴⁵ Iyavei nde ndache rovarupitei eve; co cuña rumo, acoi nde r̄eta pipe che reique ramomiseve che pirupite voi eté.

⁴⁶ “Nde nderemondoi mbahe siacua vahe che āca rese; co cuña rumo opa tupri voi oip̄ichi mbahe siacua vahe che pi rese. ⁴⁷ Sese co cuña opa oip̄isi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

⁴⁸ Ahese aipo ehi cuña upe:

—Oime nde angaipa upe ñerosa ndeu —ehi.

⁴⁹ Evocoiyase ambuae ava ichohopri oguapi vahe yuvinoi aheve, ahe aipo ehi oyeupe yuvireco:

—¡Uma p̄iha co mb̄ia iñero vahe ité angaipa upe! —ehi.

⁵⁰ Jesús rumo aipo ehiño cuña upe:

—Nde yeroyasa pipe erepisi p̄sirosa. Sese eso tupriño eico —ehi.

8

Cuña oipítivii vahe Jesús yuvireco

¹ Ipare Jesús oguata opacatu tecua rupi, omombehu ñehesa aviye vahe Tüpa mborerecuasa resendar oico. Doce vahe apóstol supive yuvirecoi. ² Cuña avei yuviraso supi, ahe ombogüera vahecuer carugar rerecosa sui imbaherasisa sui avei no. Ahe ipãhuve avei Maria secoi, Magdalena serer yoapisa vahe, ahe ichui osê vahecuer siete tupri carugar; ³ iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipítivii mbahe güembiereco pipe yuvireco.

Yembohesa mbahe miti rese tecocuer mboyoyasa

⁴ Setá ava yuvinose tecua yacatu rupi pipe sui Jesús repia água yuvireco. Ipare oñemonuha guasuse yuvireco, ahese Jesús setá mbahe rese omboyoya-yoya oporombohe aipo ehi: ⁵ “Ñepe mbia osê omaheti oico. Ahe otiapi-apaise mbahe rãhii oso, moviro oiti peri rupi. Ahe opa tã oicambe yuvireco, iyavei vírai opa tã yuvirohu. ⁶ Iyavei moviro tã oiti ivi nayanaí vahesave ita pãhuve. Sese cūrítei sorí; opaño rumo ipiru. Esepia niha, ivi nañaquíi chupe. ⁷ Iyavei ambuae oiti yu pãhuve. Ipare oyoya tupri sorí yuvireco; yu rumo opaño oyopi. ⁸ Ambuae rumo oiti ivi aviye vahesave. Ipare sorise, iha vai eté yuvireco; ahe iha retacuer amove cien tupri ité ñepeí-peí mbahe miti sui osê” ehi.

Aipo ohe pare, Jesús oñehe pĩratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pãha co yembohesa imboyoyasa ambuae mbahe rese?

⁹ Ipare semimbohe eta oporandu yuvireco chupe: “¿Mara oyapave vo aipo co yembohesa?” ehi. ¹⁰ Evocoiyase omboyevi chupe: “Pëu Tüpa oicua uca ité mbahe ndicuasai vahe omborerecuasa resendar; ambuae ava rumo ambohe tã ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvireco’ viya” ehi.

Jesús omombehu tupri yembohesa mbahe tãsa resendar

¹¹ “Co yembohesa resendar aipo oyapave aipo ehi: Mbahe rãhii ahe inungar Tüpa Ñehengagüer; ¹² iyavei mbahe rãhii peri rupi seitipri, ahe inungar acoi ava osendu tã vahe Tüpa Ñehengagüer yuvireco oyapave. Ipare rumo ou vírai chupe, ahe inungar carugar ou vahe chupe opaño oyaracua mocañi Tüpa Ñehengagüer sui ‘toviroya eme iyavei toñepisiro eme yuvireco’ oyapave tã. ¹³ Acoi mbahe rãhii seitipri ita mahugüer rupi, ahe inungar acoi ava osendu tã vahe Tüpa Ñehengagüer yuvireco iyavei oipisi tupri oviharetasa pipe yuvireco viña no. Ahe rumo inungar co mbahe miti ndovirecoi vahe guapo oviracua água; viroya raimi tã yuvireco. Oyepotase rumo mbahe tã chupe, oyepipi voiño yuvireco ichui. ¹⁴ Acoi mbahe rãhii seitipri yu pãhu rupi, ahe inungar acoi osendu tã vahe. Ipare rumo oyemboyepesi uca mbegüño ambuae mbahe rese opihañemoñetá iteangasa pipe tã, ombahe eta rese iyavei güemibotarai mbahe tã potasa pipe avei. Ëgüe ehi ahe ava inungar mbahe miti ndihai vahe ité. ¹⁵ Acoi mbahe rãhii seitipri rumo ivi aviye vahesave, ahe inungar ava vireco vahe opihañemoñetasa aviye vahe iyavei oyemoingatu voi Tüpa Ñehengagüer rese oyapisaca água yepe; viroya tupri ité no; yuvirecoiño ité sese. Ëgüe ehise, oyapo mbahe aviye vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pipe, ‘Tamondo che rupavriye’ ndehi eté chupe; osupiño ivate imoi opacatu oi pipe yuviroique vahe resape água. ¹⁷ Esepia, ndipoi eté mbahe ñomipri, ndayasepiai vaheerá curi. Iyavei yaposa vahe imombehupirëhi, icuasano itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroya oyese, ichui serocuasano itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaheerá yuvireco ava rehii sui. ²⁰ Oime rumo ambuae ava imombehusar chupe, —Nde si, nde rivireta reseve nde repia pota tã ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, viroya tupri vahe avei, ahe che si, che rivri yuvirecoi —ehiño Jesús chupe.

Jesús omombituhu i ohitu vahe, ivitu ai reseve

²² Ñepeí ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoiyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivitu ai omboha guasu-guasú carite pipe i, omondo pota ité ipive viña.

²⁴ Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pírata ivitu ai upe iyavei i ohitu vahe upe: “¡Pepituhul!” ehi. Aheseve voi opituhu tupri. ²⁵ Evocoiyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyéño, ndoyembovihaiño iyavei oporandu-randu tēi oyeupe yuvireco:

—¡Mara ehi vahe pñha co mbia! Esepia niha, ivitu ai, para guasu avei omboyeroa —ehi tēi oyeupe yuvireco.

Mbia Gerasa iguar vireco vahe carugar oyese

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai.

²⁷⁻²⁹ Aheve mbia tecua iguar carugar vireco vahe secói. Aracahe suive nani tupri ité secói iyavei ndopitai vahe ité oi pipe yepi; ñgüe ehi rumo ahe tehögüer ruvipa rupindar tēi secói. Setá rupi carugar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme carugar’ oyapave yuvireco chupe viña, ahe rumo ombosando-sandoño ité iyavei carugar omoñemi ucaño ava porēhisa rupi sereco. Evocoiyase Jesús osēse carite pipe sui, osovañchi ahe mbia. Sepiase rumo, ahe mbia oñenopiha voi oso sovai oñehe pírata chupe:

—¡Eyepipi che sui, Jesús, Tüpa seco ivate catu vahe Rahir! ¡Che mombaraisui rene evel! —ehi. Esepia, Jesús opa oyocuai carugar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri carugar yuviroique yaviterve. ³¹⁻³² Oimese rumo cuchi setá ocaru vahe ivitri ruambesave, carugar evocoiyase oporandu chupe aipo ehi: “Toroiqueño mi tēi co cuchi aviterve” ehi yuvireco chupe ‘tayande mondo eme cañi tēisa apirēhi vahe pipe’ oyapave viña. “Peiqueño sese” ehi carugar upe. ³³ Ahese opa yuvinoese mbia sui yuviroique cuchi aviterve cute. Aheseve voi cuchi opa yuvinoña yuviraso ivivate sui ipa pipe. Aheve ipive opa tēi eté ocañi yuvireco.

³⁴ Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵ Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osepiase ahe mbia carugar rerecosarar oguapi oi ñipimi, oyemonde tupri, yaracua tupri avei oico. Ahese oyembosiquiyé tēi yuvireco. ³⁶ Acoi ava osepiase vahecuer, ahe opa mbahe omombehu yuvireco co mbia carugar rerecosar cuera agüer. ³⁷ Ahese opacatu ava Gerasa pendar, yivirindar avei Jesús upe, “Esiri cohava sui” ehi yuvireco. Esepia niha, osiquiyé iteanga yuvireco ichui. Evocoiyase oha carite pipe. Ipare osoño. ³⁸ Yipindar rumo evocoi mbia carugar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹ —Eyevi nde rētave, emombehupa opacatu mbahe Tüpa oyapo vahecuer nde rese —ehi.

Ahe mbia evocoiyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰ Oyevise Jesús ipa rovai oso, aheve ava rehii oviharetasa pipe oipisi tupri yuvireco. Esepia niha, ava opacatu ité osāro yuvireco. ⁴¹ Ahese Jairo serer vahe oyepota oso Jesús upe, evocoi judío tüparo rese yangarecuar secói vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave. ⁴² Esepia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve perri rupi ava rehii yuvirasoño supi; oyemboti tupri ité yuvireco. ⁴³ Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera āgua repirā yepi; ndocuerai eté rumo. ⁴⁴ Ahe cuña evocoiyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵ Evocoiyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoiyase aipo ehi chupe:

—Porombohesar, ava rehii mo oyemboya nde rese iyavei nde moañi-añii yuvireco opacatu rupi —ehi.

⁴⁶ —Che rumo aicua oime ava opoco vahe che turucuar rese. Esepia, ayandu che pírata osēse che sui —ehi Pedro upe.

⁴⁷ Ahe cuña ndoicatu oñemi. Sese oririñ oñenopiha sovai. Oyemombehu chupe opacatu ava rovaque: “Che apoco nde turucuar rese. Esepia, ‘Acuera tupri ara apocose iturucuar rese’ ahe ndeu” ehi. ⁴⁸ Ahese aipo ehi cuña upe:

—Che rayri, erecuera tupri ité. Esepia niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rêta sui aipo ehi Jairo upe oso:

—Omano nde rayri cute. Eremañeco tēi iri rene Porombohesar —ehiño Jairo upe.

⁵⁰ Evocoyase ñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rêtave oso, aheve ndomougue uca potai eté ava oyeupi. Pedro, Santiago, Juan iyavei cuñatai yesupa upeño oipota seique água. ⁵² Aheseve opacatu ava oyaseho ati, ndoyembovihai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyañhisave yuvireco. Esepia niha, ahe oicua ité imanose yuvireco viña. ⁵⁴ Evocoyase oipopisi cuñatai. Ipape aipo ehi chupe:

—¡Cuñatai, eñarapuhá! —ehi.

⁵⁵ Ahe evocoyase oñarapuha voi eté ocuerayevi. Ipape Jesús, “Pembocarú” ehi iyesusupa upe. ⁵⁶ Iyesupa evocoyase, “¿Mara ehi rutei pñha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepeí ava upe” ehi.

9

Jesús doce güemimbohe omondo Vu Tüpa mborecuasa resendar mombehu água

¹ Jesús opa omonuha güemimbohe doce vahe oyeupe. Ipape omondo opíratasa opacatu upe caruguar ambuae-ae tēi vahe imboyepepi água ava sui iyavei ava mbogüera água imbaherasisa sui. ² Opa omondo Vu Tüpa mborecuasa resendar mombehu água, ava imbaheasi vahe mbogüera água avei. ³ Yipindar rumo aipo ehi chupe:

—Ndaperasoí chira mbahe pe guatasa rupi: que mbucoca, mbahe riru, tembihu, que guarepochi avei no. Perasora rumo ñepeí güeraño pe turucuar; ndahei chira ñuvirío peraso.

⁴ Pepitami ranera ñepeí oi pipe güeraño tecua yacatu peico. ⁵ Acoi ava ndape moingue uca potaise güeta pipe yuvireco, peyepipiñora ichui iyavei peipipetera pe pi sui ivi cuhi ‘toicua Tüpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoyase opa yuvínose yuviraso, iyavei oñemosai opacatu tecua rupi omombehu Tüpa Ñehengagüer písirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pñha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoyase, “¿Mara ahera pñha?” ehi tēi. Esepia niha, aipo, “Juan ocuerayevi” ehi yuvireco chupe.

⁸ Ambuae aipo ehi: “Tüpa ñehe mombehusar Elías, ahe tēi oñemoporēhi iri” ehi yuvireco. Ambuae aipo ehi: “Que ñepeí Tüpa ñehe mombehusar arachendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan áca —ehi—. ¿Uma rerácua pñha evocoyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepipi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvirasofño saquicuei. Evocoyase, “Perioño” ehi chupe. Ipape oñehe Vu Tüpa mborecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyái vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepia niha, cohava ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ēgüe ehi semimbohe yuvireco chupe. Ipape oguapi opacatu ava yuvireco.

¹⁶ Evocoyase oipisi poyandepo pan iyavei ñuvirío pira. Ipape omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe

imondo ãgua yuvireco. ¹⁷ Evocoiyase opacatu ava ocaru vahe ihãtaropa tẽi yuvireco. Ipape semimbohe omboapipopa doce tupri iruova sembilu rumbirer yuvireco.

Pedro, “Jesús, Tũpa Rembiporavo Poropĩsĩrosar secoi” ehi

¹⁸ Ñepeí ari pipe Jesús oyerocuĩ ahe ae güemimbohe pãhuve. Ahese oporandu güemimbohe upe:

—¿Mara ehi vo ava oñehe yuvireco che rese? —ehi.

¹⁹ —Amove ava, “Juan Oporoãpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tũpa ñehe mombehúsar arachendar ocuerayevi” ehi yuvireco ndeu —ehi.

²⁰ Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tũpa Rembiporavo Poropĩsĩrosar ereico —ehi Pedro imboyeví chupe.

Jesús omombehu omano ãgua

²¹ Ahe rumo aipo ehi güemimbohe eta upe: “Pemombehui rene Tũpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuar ivate catu vahe iyavei Moisés porocuita rese oporombohe vahe remiamotarẽhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipape aipo ehi opacatu upe:

—Acoi uguata pota vahe che rupi, topoi mbahe güemimbotar tẽi aposa sui iyavei inungarra curusu rese ovosiira viña, toyemoingatu voi che recocuer rese oparaisu ãgua ari yacatu rupi iyavei toguata tupri che rupi. ²⁴ Esepia, acoi ava güetecuer tẽi rausapar ocañi tẽi itera; acoi ava omocañi tẽi vahe rumo güetecuer che recocuer rese, ahe oñepisirora. ²⁵ Esepia, ¿aviye ai angahu pĩha ava upe opacatu mbahe co ivi pipendar pisi ãgua tẽi, ahe ae tẽi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, egũe ahera ichui acoi ayevisẽ che reco pĩratasa pipe, che Ru reco pĩrata porañetesa pipe avei sembuguai rehii iva pendar maranehi reseve curi. ²⁷ Supi eté, oimera amove cohava ava nomano vitei chivaherã, osepia rane itera ouse Tũpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure ãgua. Pedro, Santiago iyavei Juan ahe viraso oyeupi. ²⁹ Oyerure viteseve, oñecuñaro sepiaca. Iturucuar evocoiyase sendi, morochi eteanga. ³⁰ Ahese ñuvirio ava oyemboycua yivii imoñeta yuvinoha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesa yuvireco sese, iyavei co ñuvirio mbia oñehe imano ãgua rese yuvireco chupe: “Nde niha ereyemomborarara nde mano ãgua Jerusalén pipe eico” ehi yuvireco chupe. ³² Yepe Pedro, ondugüer reseve sopesi eteanga yuvireco viña. Aviyeteramo tẽi opa sopesii yuvireco ichui. Ahese osepia Jesús porañetesa yuvireco iyavei co ñuvirio mbia yuvinoha vahe yivii no. ³³ Evocoi mbia oyepepise ichui yuvireco, ahese Pedro aipo ehi chupe:

—Ore mbohesar, javiye ai eté cohava yaico! Toroyapo mbosapi teyupami: ñepeí ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa. ³⁴ Iyavei ñehe viteseve, aviyeteramo tẽi iporẽhi iva quihã, oyopipa tupri ité. Evocoiyase osiquiye tẽi yuvireco. ³⁵ Ipãhuve oyeendu ñehesa aipo ehi vahe: “Co che Rahir, che Rembiporavo ité; peyapisaca catu ñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae ihãise yuvireco. Semimbohe rumo oyeupe tẽi ovireco yuvireco; ndomombehu vitei eté ava upe mbahe osepia vahecuer yuvireco.

Jesús ombogüera chĩhivahe carugar rerecosar

³⁷ Ahere ayihive, ogüeyise ivitri sui yuvireco, setã ava oyugüeru Jesús rovaichi yuvireco. ³⁸ Ahese mbia ava pãhuve aipo ehi pĩrata voi eté:

—Porombosar, ereyapomira mbahe icatupri vahe cheu viña. Esepia, che rahir ñepeimĩ vahe ité; ³⁹ carugar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tẽi vireco iyavei ndopoi potai eté ichui. ⁴⁰ Amombehu tẽi niha nde remimbohe upe ‘tomboyepepimi tẽi carugar ichui’ che yapave viña; nomboyepipi eté rumo ichui yuvireco —ehi.

⁴¹ Ahe omboyeví:

—¡Too, ndapeyeroa tupri vitei eté che rese, co coti tẽi vite pe pĩhãñemoñetasa! ¿Mbovi rupi rutei vo aico vitera pe pãhuve che ñemosasa pipe? Eru nde rahir cohava cheu —ehi ahe mbia upe.

⁴² Chīhivahe oyemboyase rumo sese, carugar omboviapi voi imondo ivive, imoeōha iri. Jesús rumo oñehe pīrata carugar upe imose āgua chīhivahe sui. Ahese chīhivahe ocuera tupri ité. Ipare ombovevi tu upe. ⁴³ Ahese opacatu ava, “¡Mara ehi rute!” ehi tēi yuvireco Tūpa pīratasa rembiapo aviye vahe repiase.

Jesús omombehu iri omano āgua

Opacatu ava ndoyembovihal viteseva yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehír, imondopri aicora che amotarēhimbar povrive —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Tūpa ndoipotai eté senducua āgua chupe; osiquiye chupe oporandu āgua yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pīha ivate catu vahe rā curi?’ oyapave. ⁴⁷ Jesús rumo oicuaño ipihañemoñetasu yuvireco. Evocoyase oipisi chīhivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepia, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar, ahe ndahei yande amotarēhisar

⁴⁹ Evocoyase Juan aipo ehi chupe:

—Ore mbohesar, orosepia niha mbia ombogüera vahe carugar pīratasa sui ava nde rer pipe oico; ore rumo ndoroipotai chupe evocoyase seco āgua. Esepia niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepia niha, evocoi nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñhengata Santiago upe, Juan upe avei

⁵¹ Virovise rumo ari ivave Jesús so āgua, ahese ahe aipo ehi: “Yaso ru Jerusalén ve cūritei” ehi. ⁵² Evocoyase omondo ava güenonera. Ahe yuviraso tecua Samaria ivi rupi ipituhu āgua moingatu viña; ⁵³ Samaria iguar rumo nomoingue potai eté güétave yuvireco. Esepia, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata iva sui co ava mocañi āgua —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güétara, vīrai avei vireco guaiti; che rumo, Ava Riquehír, ndarecoi que che rēta che pituhu āgua —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

⁶⁰ —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

⁶¹ Evocoyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rēta mbahe moingatu che so āgua —ehi.

⁶² —¡Aní! —ehi ahe mbia upe—. Esepia, inungar acoi oipisi vahe ivi mboyeresu imohivi tupri āgua, omahese rumo guaquicuei coti, evocoi nungar naporai Tūpa mborerecuasave yuviroque vahe rā —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepeipei tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirā setá iteanga; sese oporaviqui vahe rumo moviromi tēi. Sese peporandu mbahe miti Yar upe, tombou ava imonuha āgua” ehi. ³ “Peso, opomondo ovesami nungar ava mbahe mimba oñaro vahe nungar pāhuve.

⁴ Peraso rene mbahe riru iyavei guarepochi siru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiquese que oi pipe,

yipindar rumo peyapo ranera: ‘Avirave. Tūpa tape rovasa’ peyera. ⁶ Acoi aheve oimese ava aviye vahe, ahe oipisira Tūpa porovasasa; anise evocoiyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peñhura ahe sembiereco. Esepia, ava poraviquise imboepisa chupe. Sese ndapeguatai chira ambuae ava rêta rupi-rupi tēi. Ñepei oi pipe güeraño pepitañora. ⁸ Acoi que tecuave peyepotase, ahe pendar pe repia potañose yuvireco, acoi ahe ombouse mbahe yuvireco tapehu, pehuñora ichui. ⁹ Ahe pendar imbaheasi vahe evocoiyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua pipendar ivi chimborer oya vahe ore pi rese oroipipete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroyai vahe

¹³ “¡Peparaisu ava tecua Corazín pendar, pe avei peparaisu tecua Betsaida pendar! Esepia, acoi poromondiisa pe pähuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa mboasisa pipe yuvireco viña no. ¹⁴ Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiyē. ¹⁵ Pe avei no tecua Capernaum pendar, ¡pemoha co ivave pe reco āgua viña! ¡Pe mombosapara rumo ivicuar ipicucu catu vahesave!

¹⁶ “Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepepiño vahe oyesui, ahe evocoiyase che avei che mboyepepi oyesui yuvireco. Acoi ava rumo che mboyepepiño vahe oyesui, ahe evocoiyase che mbousar avei omboyepepiño oyesui” ehi güemimbohe upe.

Oyevipa iri ava setenta y dos vahe

¹⁷ Oyevipase ava setenta y dos vahe, oviharetēsave aipo ehi yuvireco chupe:

—¡Ore Yar, carugar avei eté niha ore mboyeroya etepri yuvireco nde rer pipe! —ehi.

¹⁸ Evocoiyase aipo ehi güemimbohe eta upe:

—Taa, asepia ité niha carugar rerecuar oviapise iva sui overa vahe nungar. ¹⁹ Che niha amondo pīratasa pēu peguata vahe rā mboi iyavei mbahe rumbiquiape hari rupi opacatu pe amotarēhisar pīratasa reroyi āgua, que mbahe pe momaraēhi āgua avei. ²⁰ Peyemboviharetei rene carugareta pe mboyeroyase. Iya rumo peyemboviha pe rer iva pendar icuachiapri rese —ehi güemimbohe eta upe.

Jesús oviharete

²¹ Ahe pipeve voi Jesús, Espíritu Santo rese, vorivetesā pipe aipo ehi: “Che Ru, che oromboetēi. Nde niha iva Yar, ivi Yar avei no. Esepia niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tupri vahe upe nde rese oyeroyase. Ahe niha ereipota ité, che Ru” ehi.

²² “Opacatu mbahe che Ru ombou cheu. Iyavei ndipoi ava che cua vahe tahir che renose; che Ru güeraño ité rumo che cua. Ndiipoi avei che Ru oicua tupri vahe yuvireco no; che güeraño ité aicua. Iyavei acoi que ava upe aicua uca potase, aicua uca tupri aveira” ehi ava eta upe.

²³ Evocoiyase omahe güemimbohe eta rese, chupe güeraño aipo ehi: “Perorivete catu co mbahe pesepia vahe rese. ²⁴ Esepia niha, setā etepri ava Tūpa ñehe mombehusar yuvirecoi vahe iyavei mborerecuar guasu eta aracahendar osepia pota tēi mbahe pe rembiepia; ndosepia eté rumo yuvireco. Osendu pota tēi co pe remiendu yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguar recocuer sui

²⁵ Iyavei no Tūpa porocuaita rese oporombohe vahe oso Jesús upe secoāha āgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

²⁶ Ahe omboyevi:

—¿Mara ehi vo Moisés porocuaita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoiyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde pīratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evocoi, ahese ererecora tecovesa apirêhi vahe —ehi co mbia upe.

²⁹ Co mbia rumo oyeepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoiyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocuapa imbahe yuvireco ichui, iturucuar opacatu reseve; iyavei yuvirocua-rocua yuvireco sese. Ipape oyuca seni seya peri rupi yuviraso. ³¹ Ahese judío pahi ou ahe peri rupi. Evocoi mbia repiase rumo, co coti rupi oñacuasaño oso. ³² Êgüe ehi tupri avei ambuae mbia pahi pítiviisar levita, osepiase, oñacuasa tupriño avei oso no. ³³ Ipape rumo mbia sepi potapirêhi Samaria iguar oso ahe peri rupi avei. Ahe osepiase, oiparaisuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipape osupi güemba harive oaprive, viraso ava quesave. Aheve ihañeco sese. ³⁵ Ahere ayihive Samaria iguar osose, omondo guarepochi ahe pendar oi yar upe. Ipape aipo ehi chupe: “Esãro tuprimi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaisuereco vahe iparaisu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuaite rese oporombohe vahe upe.

Jesús oso Marta iyavei María rētave

³⁸ Ipape Jesús güemimbohe eta reseve oguata vite oyepota cuña recosave yuviraso, ahe cuña rer Marta. Ahe omoingue tupri güēta pipe. ³⁹ Icupihir evocoiyase María serer. Ahe oguapi Jesús pive iñehe rendu oī. ⁴⁰ Marta rumo oyembopihaviracua opacatu mbahe rese oico. Ipape oyemboya oso Jesús rese opihaviracuasa pipe aipo ehi chupe:

—Che Yar, ¿aviye ai vo evocoi che cupihir chini tēi nde piri che poraviqui viteseve? Emombehu chupe, tou, tache pítiviñ rane —ehi chupe.

⁴¹ Omboyevi rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo água eico? ⁴² Iya rumo ñepe mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaheñā ichui —ehi Jesús Marta upe.

11

Jesús ombohe güemimbohe eta yerure água rese

¹ Ñepe ari Jesús oyerure. Iyerure pare semimbohe aipo ehi chupe:

—Ore Yar, ore mbohemi tēi ore yerure água rese eve inungar Juan ombohe güemimbohe eta seroco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Tūpa, ivave ereico vahe, imboeteipri nde rer tasecoi.

Tou nde mborerecuasa oreu.

Tayaposa nde remimbotar co ivi pipe, iva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepi niha, ore oreñero opacatu ore amotarēhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mboripar viña. Ipape pesora ahe sētave pītu mbit̄er rupi aipo peyera chupe: ‘Che mboripar, emboumi tēi mbosapi pan cheu tamboyevire ndeu. ⁶ Esepi, ambuae che mboripar oyepota ou che rētave; ndarecoi eté rumo mbahe amondomi vaheñā chupe’ peyera chupe. ⁷ Ipape ahe, ‘Che mañeco tēi rene eve. Esepi, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña.

⁸ Supi eté, yepe nopuhai chietera mbahe mondo pēu pe mboripar secose viña, opūhaño itera rumo ‘tache mañeco iri eme’ oyapave. Ipape omondoño itera opacatu mbahe pe porandusa pēu. ⁹ Sese aipo ahe pēu: Peoporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, êgüe peyera peyeroquisa pipe Tūpa upe, ahese imboisara mbahe mbou água pēu. ¹⁰ Esepi, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyoerquisa pipe omota vahe oquenda Tūpa upe, chupe imboisara.

¹¹ “Oimese tahi vahe pe pãhuve, tahir oporanduse pira rese vu upe, ¿omondora pãha mboi tãhi guahir upe viña? ¹² anise, ¿omondora pãha oporanduse mbahe rupiha rese, mbahe rumbiquiãpe tãhi chupe viña? ¹³ ¡Aní! Esepia, pe yepe ava ndaseco pãrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espiritu Santo acoi ava oyeupe porandusar upe!” ehi güemimbohe eta upe.

“Jesús víreco carugar pĩratasa oyese” ehi tupri tãhi ava yuvireco

¹⁴ Ambuae ari pipe, Jesús osepia mbia carugar nomoñehengatui vahe. Evocoyase omose carugari ichui. Aheseve voi ñehengatu. Ipare ava rehii sepiase, ndoyembovihal tãhi yuvireco. ¹⁵ Amove rumo ava aipo ehi tãhi yuvireco: “Beelzebú, carugar rerecur pĩratasa pipe revo omboyepepi carugar oico” ehi tãhi yuvireco chupe.

¹⁶ Ambuae ava secoãhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua água” ehi tãhi. ¹⁷ Ahe rumo oicuaño ipihañemoñetasa. Evocoyase aipo ehi chupe:

“Que mborerrecuar guasu povri pendar ovava-vavase oyeupe oyeamotarẽhisave yuvireco, ahese evocoi mborerrecuar pĩratasa ocañi tãira. Iyavei ava omu rese ae oyeamotarẽhi vahe, oyemocañi aveira yuvireco no. ¹⁸ Ègüe ehi avei niha carugar. Esepia, serecur omboyepepise opovri pendar, ovavara oyeupe yuvireco viña. Ahese oyemocañi tãira yuvireco. Co ñehesa aipo ahe pãu. Esepia pe, ‘Beelzebú pĩratasa pipe tãhi opa omose carugar ava sui oico’ peye tãhi cheu. ¹⁹ Ègüe ahese rumo viña, ¿ava pĩratasa pipe ru evocoyase pe voya omboyepepi carugar ava sui? Pe voya ae omboycuara pe ñehere rembiavi yuvireco pãu. ²⁰ Che rumo Tũpa pĩratasa pipe carugar amboyepepi ava sui. Sese cũritei Tũpa mborerrecuasa oyepota ité pãu.

²¹ “Inungar oime ava ipĩrata etepri vahe, iyavei víreco oyeroyasa. Ipipe osãro güeta opacatu mbahe ipipendar avei icañiñhi água. ²² Acoi ose rumo ambuae ipĩrata catu vahe chupe, ahe osecoreroyise, opa vírocua iyeroyasa ichui. Evocoyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarẽhimbar yuvirecoi; iyavei acoi ava ndosecai vahe ava cheu, ahe omosai tãhi yuvireco che sui” ehi.

Carugar oyevi iri güeco agüerve

²⁴ “Acoi osẽse carugar ava sui, oguata tãhi ivi ipiru vahe rupi opituhu água reca. Ipare rumo ndoyosuisse, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tãhi catu ité secocuer yipĩndar güeco agüer sui” ehi Jesús ava rehii upe.

Tũpa Ñehengagüer víroya vahe sovasapri secoira

²⁷ Oñehere víteseve aipo mbahe rese, cuña ava rehii pãhu pendar oñehere pĩrata aipo ehi: —¡Evocoi mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tũpa Ñehengagüer iyavei víroya vahe ité, ahe sovasapri secoira che Ru Tũpa rovaque! —ehi ahe cuña upe.

Ava eta ndaseco pãrai vahe oporandu poromondiisa rese yuvireco

²⁹ Ava rehii oyere ati vítese Jesús rese yuvireco, ahe aipo ehi: “Pe cũriteindar ava ndaseco pãrai vahe, peparandu tãhi poromondiisa che recocuer cua água rese. Che rumo namboycuai chira ambuae poromondiisa pãu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ègüe ehi aveira niha Ava Riquehir reco pipe oimera poromondiisa ava cũriteindar upe. ³¹ Acoi ari cañi pipe cuña mborerrecuar guasu irohí coti secua vahe porandusave omombehura co ava cũriteindar cañipa água. Esepia, ahe ou amombri ivi sui Salomón mbahecuaa rendu água; cũritei rumo oime ivate catu vahe cohava Salomón sui. ³² Iyavei ari cañi pipe ava tecua Nínive pendar porandusave omombehura ava cũriteindar cañipa água. Esepia niha, omboasise oangaipa, oyevi Tũpa upe yuvireco Jonás omombehuse Tũpa Ñehengagüer chupe; cũritei rumo oime ivate catu vahe Jonás sui pe pãhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoi chiveira que mbahevri. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepia, aviyepe pe resa, opacatu pe retecuer upe osesape. Acoi imarase rumo, pe retecuer pitumimbi vahe nungar tãhi. ³⁵ Sese peicua catu co poroesapesa pereco vahe, tape rereco

eme pítumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pítumimbisa nungar mbahe ipipe, evocoyase ahe inungar tataendi osesape vahe opacatu pe recocuer pipe. Ahese ndipoi que pítu vahe pëu” ehi.

Jesús omombehu fariseo iyavei Moisés porocuita rese oporombohe vahe recocuerai

³⁷ Opase oñehe Jesús, fariseo viraso güetave imbocarú. Oíquese sètave oso, oguapi mesave oi. ³⁸ Ocaru renondevé ndoyepoise rumo, ahese fariseo ndoyembóvihal tēi nomboaviyese judio porocuita. ³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquihá opitaño ité, égüe ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosá ava iparaisu vahe upe pe recatēñehisa pipe. Evocoyase ipipe sui opacatu imoatirombri peicora.

⁴² “¡Peparaisu pe fariseo! Esepia, yepe pe remiti sui pemondo peyacatu ñepeipei diez vahe sui Tūpa upe viña, pe rumo ndaperoyai teco ñvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosá sui pe polēhisa pipe viña.

⁴³ “¡Peparaisu pe fariseo! Esepia, peipota pe renda porañete catu vahe pe guapi āgua tūparo pipe, iyavei peipota pëu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaisu! Esepia, pe recocuerai inungar tehōgüer ruvípa icuañehise ava oguata ihari rupi yuvireco” ehi chupe.

⁴⁵ Evocoyase Moisés porocuita rese oporombohe vahe,

—Porombohesar —ehi—, aipo eremombehu vahe pipe niha ava ore amotarēñiño yuvireco —ehi.

⁴⁶ Ahe rumo aipo ehi:

—¡Peparaisu avei pe Moisés porocuita rese oporombohe vahe! Esepia, pemondo porocuita yavai vahe ava upe; pe rumo evocoyase ndapeipítivimi eté ahe ava imboaviye āgua rese yuvireco.

⁴⁷ “¡Peparaisu! Esepia, pemoingatu Tūpa ñehe mombehúsar ruvípagüer peico Tūpa mboeteisa angahu pipe tēi. Pe ramoi teieté rumo oyuca yuvireco. ⁴⁸ Evocoyase pemboyecua co pe ramoi eta pihañemoñeta agüer secocuer moña pipe peico. Esepia, ahe oyuca Tūpa ñehe mombehúsar yuvireco. Pe evocoyase cūrítei pemoingatu vite suvípagüer peico.

⁴⁹ “Sese Tūpa ombahecuasa pipe aipo ehi: ‘Amondora che ñehe mombehúsar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae mara-mara tēi vírecola yuvireco’ ehi. ⁵⁰ Esepia, ava ndiporeroyai vahe cūríteindar upe ité omondora oñemoirosa opacatu oñehe mombehúsar yucagüer rese aracahe suive, cūríteindar avei oyucase yuvireco. ⁵¹ Abel yuca agüer suive oyepotara Zacarías yuca agüerve oso. Ahe oyuca tūparo marañehi rocar mbahe reropovēhesa rovai. Supi eté aipo ahe pëu: Tūpa opara omondo oñemoirosa ahe yuca agüer rese ava ndiporeroyai vahe cūríteindar upe curi.

⁵² “¡Peparaisu pe Moisés porocuita rese oporombohe tēi vahe! Esepia, pe mbahecuaasa aviye soquendapri pereco ava sui. Pe niha ndaperoyai, iyavei ambuae ava upe ndapeipotai seroya āgua” ehi chupe.

⁵³ Ipare Jesús osē oso ichui. Ahese Moisés porocuita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe, ⁵⁴ osecóñha-ñha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñehe

¹ Ahe pipeve avei ava oñemonuha atí iteanga oyemboti tupri oyemombo guasu-guasú yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepia, ahe ndoyavii supi tupri vahe viña; ndahei eté rumo. ² Esepia, yaposa vahe imombehupirēhi cūrítei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pítumimbisave, ahe sendusa tuprira ari pipe coíye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oi harive opacatú ava rovaque” ehi.

¿Uma sui pñha siquiyesara?

⁴ “Iyavei aipo ahe pëu, che mboripareta: ndapesiquiyei chira acoi ava pe yuca potasar sui. Esepia, ipare ndoicatu iri ambuae mbahe apo āgua pëu. ⁵ Che rumo amombehura pëu uma sui pesiquiyera: acoi oicatu vahe omborerecuasa pipe pe yuca pare pemondo tata guasuve. Ahe ichui eté pesiquiyera.

6 “Pe pemondo poyandepo vírai ñuivirío guarepochi rupivemi tēi yepi. Tūpa rumo ndasesarai eté que ñepeí sui. 7 Tūpa niha oicua ñepeí-peí yande ha retacuer. Sese, pesiquiye eme; pe niha ivate catu vahe ité peico opacatu vírai sui” ehi.

“Che aroya ité Jesucristo” ehi vahe opacatu ava rovaque

8 “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secói’ aipo ahera che Ru upe sembuguai rovaque. 9 Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoyase, ‘Co ndahei che reroyasar secói’ ahe aveira che Ru Tūpa upe sembuguai rovaque” ehi.

10 “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tēi vahe rumo Espíritu Santo amotarēhisave, ahe chupe ndipoi chietera ñeroisa” ehi.

11 “Acoi pe amotarēhisar che recocuer sui tēi pe rerasose porandusave pe recoãha ãgua yuvireco, anise mborerecuar mbahe moingatusar rovai, que ambuae mborerecuareta upe avei no, ‘¿Mbahe pīha amombehura?’ ndapeyei chira. 12 Esepia niha, ahe pīpeve voi Espíritu Santo pe mbohera aviyeteramo tēi mbahe mombehu ãgua rese” ehi güemimbohe eta upe.

Ñearosa mbahe pota raisa sui

13 Ñepeí mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboyahomi tēi mbahe che momba-hesa cheu —ehi.

14 Ahe rumo omboyeví chupe:

—Che mboripar, che ndachecuaítai mbahe moingatu ãgua, mbahe mboyaho-yaho ãgua avei —ehi ahe mbia upe.

15 Ipare aipo ehi:

—Peñearo tupri opacatu mbahe pota raisa sui. Esepia niha, ndahei mbahe rereco ati ãgua pe recocuer —ehi.

16 Ipare omboyoya ambuae mbahe rese imbohe: “Oime mbia mbahe yar, iha tupri ai eté semiti. 17 Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu ãgua’ ehi. 18 Ipare ipihañemoñeta cute: ‘Aicua mbahe che rembiaporã. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. 19 Evocoyase aipo ahera cheyeupe: Che mboripar, oime setá mbahe cheu araviter momba-momba ãgua; sese cūritei apituhura vichico, acarura, acahura iyavei ayemboviharetera no, ahera’ ehi. 20 Tūpa rumo aipo ehira chupe: ‘Mbia, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoyase?’ ehira chupe. 21 Ëgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque” ehi ahe mbia upe.

Tūpa osāro opacatu guahir

22 Ipare aipo ehi Jesús güemimbohe upe: “Co amombehura pēu: Ndapeyemomahenduha guasu ai chira pe remihura rese pe recove ãgua, pe turucuarã rese tēi avei no. 23 Yande recovesa rumo aviye catu vahe tembihu sui; yande retecuer avei aviye catu turucuar sui no. 24 Pesepia vírai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vírai sui! 25 Ndipoi eté que ñepeí pe pāhu pendar oicatu vahe opihañemoñeta iteangasa pipe tēi güecocuer mbosasaviño ãgua. 26 Supi eté ndapeicatuise yapo, ndiyai peyemomahenduha guasu ai mbahe rese.

27 “Pemahecura ru mbahe potri caha pipendar rese: ndoporaviqui eté iyavei ndoipiai oturucuarã. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. 28 Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omondo catura turucuar pēu, pe ava nimbahe roroya tuprii vahe! 29 Sese, ¿Mbahe pīha yahura, mbahe pīha yamondera?’ ndapeyei chira pe yemomahenduha guasu aisa pipe. 30 Esepia, ava Tūpa reroyasarēhi co ivi pipendar aipo nungar mbahe reseño tēi ipihañemoñeta yuvireco yepi. Pe Ru Tūpa rumo oicua ité pēu mbahe ipane vahe. 31 Aviye catu rumo pesecara pe Yar Tūpa povrive pe reco ãgua, ahese omboura que mbahe ipane vahe pēu” ehi.

Ivave mbahe eta oime vahe yandeu

32 “Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrive pe rereco ãgua. 33 Pemondopa mbahe pereco vahe ava oipota vahe upe. Ipare pemondo seprí avei iparaisu vahe upe. Ahe yapocatusa ivave mbahe riru ndituyui vahe nungar pipe. Aheve ava imonda raí vahe ndoiqúi chira ñomi

ãgua pe sui iyavei mbahe rasoí nomomaraí chiveira. ³⁴ Esepia, pe mbahe pe rembiereco setá catu vahesa rupi-rupi pe pihañemoñeta yepi” ehi.

Peyemoingatu Tûpa Rahír yevi ãgua

³⁵ “Peyemoingatu tupri che yevi ãgua. Inungar tataendi ndogüei vahe, pemboyecua tupriño ité che recocuer pe recocuer pipe ava upe. ³⁶ Peico imboacuapri güerecuar osáro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoiyase serecuar ae niha ihañecora sese, omboguapira mesave imbocaru. ³⁸ Yepe serecuar oyepotara pîtu mbîter ou viña, anise añihiveive, ahe rumo osároño itera chupe imboi ãgua yuvireco. Evocoiyase serecuar aviye ai etera chupe. ³⁹ Peyapisaca tupri co rese: acoi oi yar oicuaase mbahe hora imonda vahe yepota ãgua, ahese opitara imonda vahe rãro güêta pipe sui mbahe renoseñhi ãgua. ⁴⁰ Êgüe peye aveira peyemoingatu che yevi ãgua. Esepia niha, che, Ava Riquehír, aporoesapiha têira vitu curi” ehi Jesús viroyasareta upe.

Mbiguai omboaviye vahe ocuaita iyavei nomboaviyei vahe

⁴¹ Evocoiyase Pedro oporandu Jesús upe aipo ehi:

—Che Yar, ¿oreuñomi piha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoiyase omboyevi Pedro upe aipo ehi: “Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarã güêta pipendar rese hañeco ãgua ‘tembihu tomondo che rêta pipendar upe che porocuaita rupi’ ohesave. ⁴³ Acoi omboaviyese ocuaita, ahese oviharetera güerecuar yevise. ⁴⁴ Supi eté niha, serecuar oyocuaica opacatu ombahe rese hañeco ãgua. ⁴⁵ Ahe mbiguai rumo ‘ndoyepota vitei chira revo che rerecuar’ oya omboetasa cuimbahe iyavei cuña omboipi mara-mara têi sereco iyavei ocaru, oiuhu têi osavaipo-ipoño avei oico. ⁴⁶ Ipare rumo serecuar oyepotara imahemohañhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua têise mbahe güerecuar remimbotar, noyemoingatuise rumo iyavei ndoviroyaise oico, ahe evocoiyase serecuar oinupara. ⁴⁸ Acoi mbiguai nomboaviyei vahe ocuaita icua tupriñhisa pipe, nañemoirosa rutei chira chupe. Esepia niha, acoi imondosa catu vahe icuaitarã, porandusa catura chupe. Acoi oyeroya catu vahe, oporandu catu aveira sese” ehi.

Jesús reroyasa pipe sui oimera yeamotarñhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. ⁵⁰ Aigue ranera rumo mbahe têi che recoñhasa pipe, jêgüe ahera che paradisú itera imboaviye ãgua! ⁵¹ ‘Mbahe tupri ai revo güeru co ivi pipe’ ndapeyei chira cheu. Êgüe ehi rumo che ayu che sui ava yeamotarñhi ãgua. ⁵² Esepia niha, co pipe suive ité que poyandepo tupri revo oñemu yuvirecoi vahe amove oyeamotarñhira yuvireco che recocuer sui: mbosapi oyamotarñhira ñuvirío vahe, ñuvirío vahe evocoiyase oyamotarñhira mbosapi vahe yuvireco. ⁵³ Que ava oyamotarñhira guahír, anise tahír evocoiyase oyamotarñhira vu; cuña oyamotarñhira omembri, imembri evocoiyase oyamotarñhira osi; sovayar oyamotarñhira vovayar” ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: “Pe pesepiase mbahe pîtu ari sosa coti sui opñhase, ahese, ‘Oquirá’ peye. Êgüe ehi eté oqui. ⁵⁵ Iyavei acoi ivitu oiipeyuse irohi coti sui, ahese, ‘Sacú iteangara’ peye. Ipare êgüe ehi eté. ⁵⁶ ¡Pe Tûpa reroyasar angahu têi peico vahe! Pe niha peicua mbahe íva rese oyecua vahe têi iyavei ivi rese mbahe oyecua vahe têi mombehu, ¡mahera ru ndapeicuai peyeupe mbahe cüritei oime vaherã mombehu peico!” ehi.

Peñero pe amotarñhimbar upe

⁵⁷ “¿Mahera napesãha ranei pe ae ité co mbahe supi eté vahe? ⁵⁸ Acoi que ava nde amotarñhisar nde soho ucase nde mondo ãgua mborerecuar rovai, emoingatu tupri voi mbahe eico chupe tenondeve nde rerasoñhi ãgua sovai; anise, mborerecuar nde mondora ava naporai vahe raroasar upe. Ahe evocoiyase nde roquendará. ⁵⁹ Supi eté nderesêi chietera acoi eremboepipase voi eté eresêra ichui” ehi ava rehii upe.

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovêhese mbahe mîmba yucapri yuvireco chupe. Ahe suvi oyeseha mbahe mîmba ruvi rese.

² Ipare Jesús aipo ehi chupe: “Pemoha co pe: Mbahe tēi oime vahe evocoi mbia Galilea pendar upe, yangaipa guasu catu rese ambuae güecua pendar sui êgüe ehi mbahe chupe viña. ³ ¡Aní rumo! Acoi ndapemboasiise pe angaipa Tüpa upe pe yevi âgua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, ‘Ahe yangaipa catu yuvireco ambuae ava Jerusalén pipendar sui’ peye viña no. ⁵ Aní rumo; acoi ndapemboasiise pe angaipa Tüpa upe peyevi âgua, pe avei opara pecañi tēi” ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pîha?’ oyapave. Ndosecai eté rumo iha sese. ⁷ Ahese aipo ehi mbia oco rãrosar upe: ‘Esendu, che ayu pihi tēi higuera ha reca mbosapi araviter rupi. Ndasepiai eté rumo que ñepe iha sese yepi’ ehi. ‘Eyasiapa; ndiyai ihâi tupri tēi cohave’ ehi. ⁸ Ico rãrosar rumo omboyevi chupe aipo ehi: ‘Che rerecuar, êgüe tehiño vite tēi rane co araviter; amonguhira ivi chupe. Ipare amondora ivi sũ vahe mbahe repochi resendar sese. ⁹ Ahese revo ambuae araviter ihara cute; anise ité rumo, ereyasia ucaño itera’ ehi ico rãrosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa ari pipe

¹⁰ Ñepe mbituhusa ari pipe Jesús oporombohe judío tũparo pipe. ¹¹ Aheve oime cuña imbaheasi vahe, dieciocho araviter rupi ahe mbahehasisa vireco, carugar tēi omboyepami uca sereco. Sese ndocataui opüha tupri oguata. ¹² Osepiase rumo Jesús, “Erio” ehi chupe.

—Cuña, cüritei nanembaheasi iri eico cute —ehi.

¹³ Evocoiyase omondose opo sese, aheseve voi cuña oyemohivi. Ipare omboetei Tüpa oico. ¹⁴ Judío tũparo rerecuar rumo oñemoiro ahe cuña mbogüerasa rese mbituhusa ari pipe. Sese aipo ehi ava eta upe:

—Oime niha seis ari mboraviqui âgua; ahe ari pipe peyura peposano âgua, ndahei chira mbituhusa ari pipe —ehi.

¹⁵ Evocoiyase ahe mbia upe omboyevi aipo ehi:

—Pe Tüpa reroyasar angahu tēi peico vahe, ¿nombohui vo pe pãhu pendar acoi güemba tivi iyavei guaricu mbituhusa ari pipe yuvireco yepi no? ¹⁶ Co rumo cuña, Abraham suindar Carugar omombaheasi vahe dieciocho araviter suive sereco, ¿ndiyai eté pîha evocoiyase imbogüerasa mbituhusa ari pipe? —ehi tũparo pendar rerecuar upe.

¹⁷ Aipo ehise, opacatu yamotarêhisar yuvinochi tēi yuvireco ichui. Ambuae ava rumo oyembovihanõ opacatu Jesús rembiapo osepiase yuvireco.

Yembohesa mostaza rãhi suindar

¹⁸ Evocoiyase Jesús aipo ehi avei: “¿Mbahe nungar pîha Tüpa povri pendar, iyavei mbahe rese vo amboyoyara? ¹⁹ Oyoya tupri ité mostaza rãhi rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sãca rese virai rehi oyapo guaitirã” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese pîha amboyoyara Tüpa povri pendar? ²¹ Oyoya tupri co pan mboapeposa rese, acoi cuña omboyeseha tupri vahe mbosapi sãhambri trigo cuhi rese opacatu imboapepo âgua yepi” ehi oporombohe.

Jesús peri icãhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepe mbia oporandu chupe aipo ehi:

—Che Yar, ¿supi eté pîha moviromi tēi ava oñepisirora yuvireco? —ehi.

Ahe evocoiyase omboyevi chupe:

²⁴ —Peyemoviracua tupri catu peique âgua oquendipi cãhimi rupi. Esepia niha, supi eté setá ava osãha tēira yuviroique vahe rã ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tēira yuvireco: ‘Ore niha orocarua vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. ²⁷ Ahe rumo aipo ehira: ‘Ñepe reseve niha acoi, Ndopocuai vahe, ahe pëu. ¡Pesiri che sui, pe opacatu

mbahe-mbahe tēi aposar!' ehiñora chupe. ²⁸ Pe rumo imomboprira pe recouer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrive ivave. ²⁹ Iyavei ava yuguerura añihivei coti sui, caharu coti sui, norte coti sui iyavei irohī coti sui, ahe evocoiyase yuviroguapira ocaru Tūpa mborerecuasave ipiri yuvireco. ³⁰ Supi eté amove ava ndoyavi ipa tēi vahe seique āgua ivave Tūpa piri viña, ahe ranengatu rumo yuviroiqueño itera itera pīpe iyavei amove ava tenonde catu vahe ndoyavi ahe rane oi que vahe rā ivave viña. Ahe rumo ipa tēi yuviroiquera —ehi Jesús ava rehi upe.

Jesús oyaseho Jerusalén pendar rese

³¹ Ahe ari pipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co pipe iyavei ayihive amboyepepiñora ava sui carugareta vichico, ambogüerañora ava imbaherasisa sui, curi ayihive evocoiyase amombara che cuaita’ peyera. ³³ Che rumo aporaviquiño itera co pipe, ayihive iyavei curi ayihive vichico. Ipare asora Jerusalén ve. Esepia niha, ndiyai Tūpa ñehe mombehusar omano co coti tēi Jerusalén sui yuvireco —ehi.

³⁴ “¡Too rute! pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrive, ěgüe ahe pota tēi pe rereco viña, pe rumo ndapeipotai eté! ³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepeí mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco. ² Aheve avei mbia iruru vahe secoi. ³ Evocoiyase Jesús oporandu Moisés porocuita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera āgua; aní tie? —ehi.

⁴ Ahe rumo noñehiño yuvireco chupe. Ahe se ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoiyase aipo ehi:

—¿Ava pīha pe pāhu pendar novinose voi chira güeimba guaricu, anise tivī oviapise ivicuar pipe mbituhusa ari pipe viña? —ehi.

⁶ Ahe se nomboyevi catui eté ñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imboyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucasa mendasa pietasave yuvireco, ndayaguapii chira ava imboeteipri catu vahe renda harive. Esepia, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epūha evocoi sui, co mbia toguapi eipeve’ ehira yandeu. Evocoiyase yande yachī tēira yaso ipami tēi yaguapi. ¹⁰ Yande soho ucasa rumo yuvireco, yaguapira evocoiyase ipa; yande soho ucasar ouse, aipo ehira yandeu: ‘Mbori, erio cohava tenda imboeteipri catu vahesave ore piri’ ehira. ěgüe yahera imboeteipri yaico acoi ava yuviroguapi vahe rovaque yande piri. ¹¹ Esepia niha, acoi ava oyemboivate ai vahe opara seco reroyisa; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potasa pieta, ndereichocho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepia niha, ahe omboyevira ndeu, nde soho ucara oyepiri yuvireco; ěgüe ehira evocoiyase mbahe imboyevira yuvireco ndeu. ¹³ Ereyapose rumo pieta, ereichocho ucara ava iparaisu vahe, ava ipo ichutu vahe, anise ipi chutu vahe, ipāri-pāri vahe, ndasesapiso vahe avei. ¹⁴ Esepia niha, ahe ndoicatu mbahe mboyevi yuvireco ndeu. Opase rumo ocuerayevi ava seco catupri vahe yuvireco, ahese ereviharetera eico. Esepia, ereipisira mbahe avīye vahe Tūpa suindar —ehi.

Jesús oporombohe carusa rese

¹⁵ Ñehe renduse rumo, ñepeí mbia yuviroguapi vahe mesave, ahe aipo ehi Jesús upe:

—¡Sovasapri catu ava Tūpa piri ocaru vahe imborerecuasave! —ehi.

¹⁶ Evocoiyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru água, ahese aipo ehi güembiguai mondo: ‘Toyugüerupa che piri ichohopri. Esepia niha, mbahe opa oingatu cute’ ehi. ¹⁸ Opacatu rumo ava, ‘Eñemosañomi tēi cheu’ ehi pāve yuvireco. Yipindar mbia aipo ehi: ‘Che rumo arocuva ivi; iya ité aso sepia. Sese eñemosañi cheu’ ehi chupe. ¹⁹ Ambuae mbia aipo ehi: ‘Che arocuva ramo diez tupri tivi, ahe asāha ranera. Sese eñemosañi cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi. ²¹ Oyevise mbiguai, opa tupri omombehu mbahe güerecuar upe. Ahese serecuar aipo ehi ofñemoirosa pipe güembiguai upe: ‘Eso voi evocoyase opacatu ocar rupi. Supi sui eru ava iparaisumi vahe, que ava ipo chutu vahe, anise ipi chutu vahe, que ndasesapiso vahe, anise que ava ipāri-pāri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cauita; ipane vite rumo ava’ ehi. ²³ Evocoyase aipo ehi güembiguai upe: ‘Eguata iri ambuae peri tecua ivirindar rupi avei toyugüerumi che rētave yuvireco che piri, tomoapipota ité che rēta yuvireco’ ehi. ²⁴ ‘Esepia niha, acoi yipindar ava aichoho uca vahe ndipoi chietera que ñepeí ocaru vaheṛā che piri’ ehi güembiguai upe —ehi Jesús ahe mbia mbohe.

Yavai Cristo rupi guata água

²⁵ Ava rehii Jesús raquicuei uguata yuvireco. Sese ahe oyemboyere aipo ehi ava upe: ²⁶ ‘Acoi oimese que ava oipota vahe che rupi uguata água, tache raisu catu que ambuae ava sui, que oyesupa, osi, güembireco, guahireta, vivireta iyavei güeindireta sui, oyesui avei. Ēgüe ndehise, evocoyase ndiyai chupe che remimbohe seco água. ²⁷ Iyavei que ava noñemosañi vahe mbahe-mbahe tēi upe oiporarase ari yacatu rupi inungar-ra ocurusu rese ovosoi vahe viña che rupi uguata água, ahe chupe ndiyai che remimbohe seco água’ ehi. ²⁸ ‘Que ava pe pāhu pendar omopuha potase oi, ¿ndoyapisaca ranei chira ‘¿amomba angara pīha?’ oyapave?’ ²⁹ Esepia niha, omondose oi renara yipindar. Ipare rumo nomboaviye catuise, ahese opacatu ava sepiase viroírora ³⁰ aipo ehira yuvireco: ‘Aye evocoi mbia omopuha pota tēi oi viña, ndoicatuí eté rumo imboaviye’ ehira yuvireco chupe. ³¹ Iyavei que mborecuar guasu diez mil sundao vireco vahe oyeepi potase ambuae mborecuar veinte mil ava vireco vahe sui, oyapisaca ranera yipindar icua tupri água ‘¿yaicatura pīha setá catu vahe rese yavava?’ ohesave. ³² Esepia, ndoicatuise, evocoyase ambuae mborecuar guasu amombri vite secoise, omondora mbahe mombehúsar mbahe tupri rese porandu água chupe. ³³ Ēgüe ehi avei pe recouer ndapeseya potaise pe mbahe opacatu, ēgüe ehi vahe ndaheí eté che remimbohe’ ehi.

Yande recocuer inungar yucrí

³⁴ ‘Yucrí aviye vahe ité yandeu; nasehe irise rumo, ndayaicatui chietera imoehe iri água. ³⁵ Naporai eté ivi upe nara; ndiyai avei ivi mbahe repochi resendar rese oyeseha vaheṛā. Evocoyase ahe imombopri tēi vaheṛā. Sese aipo ahe acoi ava oyapisaca pota vahe, toypisacaño’ ehi.

15

Porombohesa ovesa ocañi tēi vahe resendar

¹ Opacatu ava sui guarepochi reroquasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. ² Sese fariseo yuvirecoi vahe iyavei Moisés porocuaíta rese oporombohe vahe yuvireco, ahe oviroíro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³ Evocoyase Jesús omombehu ovesa resendar yembohesa: ⁴ ‘Que ñepeí pe pāhuve virecose cien ovesa güemba, ipare co ocañira ñepeí ichui viña, oseya ranera evocoyase evocoi noventa y nueve tēi aviye vahesave seco água. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesa pipe. ⁶ Ipare oyepotase güētave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepia niha, ayosu ité ovesa ocañi vahecuer cute’ ehira. ⁷ Supi eté ēgüe ehi aveira oime torivetesa guasu catu ivave acoi ñepeí ava yangaipa guasu vahe ofñecuñarose güecocueraí sui noventa y nueve yuvirecoi tupri vahe sui yuvireco’ ehi.

Yembohesa guarepochi ocañi vahe resendar

⁸ ‘Acoi que cuña omocañise ñepeí guarepochi diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoyase oyosuse, omonuhara omboripareta, ocotindareta avei no chupe aipo ehira: ‘Yayembovihara che piri. Esepia niha, ayosu guarepochi che sui ocañi vahecuer cute’ ehira. ¹⁰ Supi eté ēgüe ehi aveira oime torivetesa Tūpa rembiguai iva pendar rehii upe que ñepeí ava yangaipa guasu vahe ofñecuñarose güecocueraí sui’ ehi.

Yembohesa mbia rahir ocañi vahe resendar

¹¹ Aipo ehi avei oporombohe: “Oime mbia vireco vahe ñuvirío guahir. ¹² Chñihivahe catu vahe aipo ehi oyesupa upe: ‘Che ru, embou mbahe che mombahecha cheu’ ehi. Iyesupa evocoiyase omboyaho ombahe imondo chupe. ¹³ Ipape coiye catumi, omonuhapa opacatu ombahe. Ichui oso amombri ambuae tecuave. Aheve oguarepochi oiporupa tñi mbahe pota raisa pipe. ¹⁴ Acoi oiporupa tñise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tñi oico. ¹⁵ Evocoiyase oso mboraviqui reca mbia piri aheve. Ahe mbia evocoiyase omondo ocove güeimba cuchi rãro ãgua. ¹⁶ Aheve oyemohitaro pota tñi cuchi rembihu pipe oico viña. Ndipoi eté rumo omondo vahe chupe. ¹⁷ Evocoiyase oyemomahenduha tñi güeta pendar oporaviqui vahe rese: ‘¡Che ru rêtave oporaviqui vahe rumo co omoumbire guasu-guasú tñi güembihu yuvireco! ¡Che rumo che yuca pota tñi che rieporeñi che rereco cohavel! ¹⁸ Sese ayevira che ru rêtave. Aipo ahera chupe: Ayemboangaipa Tũpa rese, nde rese avei no. ¹⁹ Ahese che ndahe iri chira nde rahir nungar aico; iyacatu revo ndeu, oporaviqui vahe nungar tñi che rerecoñora eve, ahera’ ehi. ²⁰ Evocoiyase oyeve iri oso vu rêtave cute.

“Amombri vitemi tahir recose rumo iparaisu catu chupe, oña voi oso guahir rovañchi, oyaco osovapite avei. ²¹ Ahese tahir aipo ehi chupe: ‘Che ru, ayemboangaipa Tũpa rese, nde rese avei; ndiya iri nde rahir che reco ãgua’ ehi. ²² Tu rumo aipo ehi güembiguai upe: ‘Peso, taperumi aviye catu vahe turucuar pemboyemunde, pemunde avei cuã penda sese, pitaqui avei. ²³ Iyavei guaca iquira catu vahe peyuca. ¡Yayapora pieta guasul’ ehi. ²⁴ ‘Esepia, co che rahir aviye omano vahe secoi viña, cüritei rumo oyeve iri cheu’ ehi. Ëgüe ehi opacatu sorivete yuvireco pieta apo.

²⁵ “Tahir cuacua catu vahe rumo ocove vite secoi. Oyeveise ou güeta rerovicave, osendu voi ipieta guasu vahe yuvireco. ²⁶ Evocoiyase oporandu mbiguai upe mbahe oime vahe rese. ²⁷ ‘Nde rivri mo co oyeve tupri iri ou. Sese nde ru oyuca uca guaca iquira vahe iyevisa resendar’ ehiño. ²⁸ Evocoiyase tiquehir oñemoirosa pipe, ndoique potai oyesupa uve oi pipe; tu rumo osẽño ité ocarve ‘eique’ oya chupe. ²⁹ Evocoiyase tahir omboyevi chupe aipo ehi: ‘Che niha setã araviter rupi oropitivi vichico nde mboyeroyasave viña, nderemboumi eté rumo que mbahe cheu, que mbahe mamba angara viña che mboripar rese ore pieta ãgua’ ehi vu upe. ³⁰ ‘Indó, cüritei oyepota ndeu nde rahir, omocañi tñi vahe nde guarepochi cuña ndipihai vahe rese tñi. Ahe eremboetei catú che sui; ereyuca uca rutei guaca iquira vahe chupe’ ehi.

³¹ “Evocoiyase tu: ‘Eyapisacaño, che rahir, nde niha nderesirii vahe che sui. Opacatu che areco vahe rumo nde mbahe ité yepi. ³² Cüritei rumo iyacatu ité yande rorivetesave yayapora pieta. Esepia, co nde rivri ocañi tñi vahecuer rese yamahe iri’ ehi guahir upe” ehi Jesús ava eta mbohe.

16*Mbahe yar mbahe rese ñangarecuar ndoyemboaracuai vahe resendar yembohesa*

¹ Jesús aipo ehi avei güemimbohe eta upe: “Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe mocañi tñi güer mombehu. ² Evocoiyase serecuar ñepeí opitiviisar omondo seca, ahe güeruse, ‘¿Mbahe vo aipo ereyapo eico; ayandu cüritei nde rerãcua? Emoingatupa tupri voiño nde poraviquisa resendar cheu’ ehi, ‘Nandehañeco iri chira cohava mbahe rese cheu’ ehi, ‘Nandehañeco iri chira cohava mbahe rese cheu’ ehi chupe. ³ Evocoiyase mbahe rese ñangarecuar: ‘¿Mara ahera pñha co evocoiyase vichico imombopri che recose che poraviquisa sui? Ndareco iri rumo pñratasa cheyese ivi rese che poraviqui ãgua. Achñi eteanga aveira rumo mbahe rese che porandu ãgua’ ehi tñi. ⁴ ‘Aicua rumo cute mara ahera vichico: che poraviquisa sui opa che momboise, oimera che pisi tupri vaherã oyepiri’ ehi. ⁵ Evocoiyase oñehe ñepeí-peí güerrecuar sui mbahe vinose tñi vahe rese chupe. Yipindar vahe upe oporandu: ‘¿Mbovi mbahe erenose tñi yande rerecuar sui?’ ehi. ⁶ ‘Cien tupri chereve aceite siru tuvichagüe vahe rese’ ehi. Evocoiyase, ‘Eguapi ru, co oime cuachiar sesendar nde yecuachía agüer. Emondoro, eyapo iri ambuae cincuenta rupindar año’ ehi chupe. ⁷ Ichui ambuae mbahe vinose tñi vahe upe oporandu no: ‘¿Mbovi mbahe vo erenose tñi yande rerecuar sui?’ ‘Cuatro ciento quintar rupindar’ ehi. Evocoiyase, ‘Co oime cuachiar sesendar. Yaicuachiara rumo tresciento veinte quintar rupindar’ ehi. ⁸ Evocoiyase serecuar oyanduse, ‘Too, oicua ité mbahe apo’ ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tũpa oicua catu mbahe moingatu ãgua oyeupe Tũpa reroyasar sui.

⁹ “Sese che aipo ahe pñu: peiporu pe guarepochi pereco vahe co ivi pipe pe mboripar reime ãgua. Ichui opa tñise pe guarepochi, oimera pe pisi vaherã teco apirẽhisave.

¹⁰ “Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ěgüe ndehi vahe chīhi vahe rese, ěgüe ndehi chiaveira mbahe tuvichá vahe rese. ¹¹ Evocoiyase ndapemboaviyeise co ivi pipendar pe cuaita guarepochi rese, ahes ndaperecoi chira ivave mbahe rese hañeco água. ¹² Iyavei acoi ndapemboaviyei tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?”

¹³ “Iyavei ndipoi chietera ñepei mbiguai omboyeroya vahe ñuvirio güerecuar. Esepia, ñepei osaisu catura imboyeroya pipe, ambuae evocoiyase ndoyambotai chira imboyeroya potaēhisa pipe. ěgüe peye avei ndapeicatui Tūpa mboyeroya guarepochi pota raisa pipe” ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarepochi raisusa pipe oviroiro yuvireco. ¹⁵ Evocoiyase aipo ehi fariseo eta upe: “Pe co ava rembiepiave pe recocuer aviye angahu pe reco viña. Tūpa rumo oicua opacatu pe pihañemoñetasa. Esepia, yepe ava rovaque ndoyaviñ aviye ai vahe pe recocuer viña, Tūpa uve rumo mbahe tēi eté” ehi.

Mborocuita iyavei Tūpa mborerecuasa rese ñehesa

¹⁶ “Yipisuiwe Moisés porocuita iyavei Tūpa ñehese mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mborerecuasa resendar, sese ava iquerēhi catu cūrítei aheve yuviroique vahe rā.

¹⁷ “Yavai catura que ñepei Tūpa porocuita mboaviyeēhi água co iva, ivi opa vahe rā sui” ehi.

Jesús oporombohe mendasa sui poiēhi água

¹⁸ “Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviye vahe pipe oyemboetei eteanga, iyavei ari yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha ati vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer oviapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvireco. ²² Omanose co mbia iparaisu vahe, ahes Tūpa rembiguai eta oviraso yuvireco Abraham pirí ivave. Mbahe yar avei omano, opa oñoti yuvireco.

²³ “Ahes oso Tūpa ñemoirosave. Aheve oparaisuse, omahe ivate coti, osepia amombri aracadendar Abraham Lázaro reseve. ²⁴ Evocoiyase osapucái pīrata: ‘¡Che ramoi Abraham, che paraisuercomi tēi eve! Emboumi tēi Lázaro che ápecu morohisa água ive ocuá pipe. Esepia, che paraisu etepri co tata pīratagüer pipe vitu’ ehi. ²⁵ Evocoiyase Abraham omboyevi aipo ehi chupe: ‘Che rumino, ndemahenduha eipeve nde reco agüer rese nipaneise mbahe ndeu nde recove pipe. Lázaro rumo iparaisumi tēi oico’ ehi. ‘Cūrítei rumo Lázaro oviharete oico cohava, nde evocoiyase nde paraisu eipeve eico. ²⁶ Iyavei oime co ivicuar ipicucu vahe rasaēhi água oreu iyavei pēu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro ²⁸ che rivri poyandepo vahe upe, chupe ñehese água. Ahe tosecuñaro güecocuer yugüeruēhi água co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuita iyavei Tūpa ñehese mombehusar rembicuachiagüer yuvireco. ¡Ahe toviroya yuvireco!’ ehiño chupe. ³⁰ Evocoiyase, ‘Taa, che ramoi Abraham, que omano vahecuer páhu pendar rumo yuvirasose chupe, ahe evocoiyase omoingatura güecocuer yuvireco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuita rese iyavei ambuae Tūpa ñehese mombehusar remimombehu rese no, ndoviroyai chiaveira que ava omano vahecuer ocuerayevise yuvireco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroãtoisa che reroyasar reiti água. ¡Ahe imboangaipa ucasar rumo iparaisu itera! ² Iyacatu evocoi nungar ava ñapichisa ita mbahe mbocuhisa iyesho rese para guasu pipe imombo água chīhivahemi nungar mboangaipa uca rāgüer sui. ³ ¡Sese peñero tupri!

“Acoi nde mboetasa Tūpa reroyasar oyemboangaipase, pemboaracuara. Omboasi pare oyevise güecocuer tupri pipe, ahes peñerora chupe. ⁴ Supi eté acoi que ambuae ava pe amotarēhi vitese rumo siete yupagüer ñepei ari pipe, acoi ouse pēu siete yupagüer avei, ‘Ěgüe ndahe iri chira’ ehise, peñero chupe” ehi Jesús güemimbohe upe.

Yayeroyase Tūpa rese oime pīratasa

⁵ Co doce tupri apóstol aipo ehi chupe:

—Emboumi oreu Tūpa rese ore yeroya catu āgua —ehi yuvireco chupe.

⁶ Evocoiyase yande Yar omboyeve chupe:

—Supi eté, Tūpa rese pe yeroyasa, yepe ndoyavii chira mostaza rāhii tahimi vahe viña, co ivira tuvicha vahe upe rumo, ‘Eyepoho ave sui. Eso eñeñeti para guasu aviterve’ peyese Tūpa rese pe yeroyasa pipe, ahe evocoiyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pāhu pendar virecora güembiguai oporaviqui vahe ivi mboyere cove, anise que guaca rāro yuvi rupi viña; ichui iyevisé, ¿‘Eique, eguapi tereraru’ ehira pīha serecaru chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurā avei. Ipape nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Ēgüe peye avei mbiguai nungar pe opacatu Tūpa pe cuaitarā ombou vahe mboaviyere, ‘Yande niha mbiguai tēi yaico. Esepia, yande cuaita mboaviyesar tēi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucái yuvireco chupe aipo ehi:

—¡Jesús, Porombohesar, ore paraisuerecomi tēi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoiyase ñepeí ipāhu pendar, Samaria pendar, osepiase ocuerasa, oyeve chupe osapucái pīrata Tūpa upe imboeteisave. Oñenopiha oso sovai, oyaivi, “Aviye ndeu” ehi Jesús upe. ¹⁷ Evocoiyase ahe aipo ehi:

—¿Ndahei vo acói diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbia ambuae ivi pendar güeraño rumo oyeve ‘aviye ndeu’ ohesave Tūpa uve! —ehi.

¹⁹ Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha erecuera eico —ehi Jesús chupe.

Tūpa mborerecuasa yande pāhuve secoi

²⁰ Ñepeí ari pipe fariseo eta, “¿Marase vo aipo oura Tūpa omborerecuasa pipe mbahe moingatu āgua?” ehi Jesús upe yuvireco. Ahe omboyeve chupe:

—Tūpa mborerecuasa ndahei acói yasepia vahe. ²¹ ‘Co secoi, aheve secoi’ ndapeyei chira chupe. Esepia, ahe oicove ité pe pāhuve —ehi fariseo eta upe.

²² Ipape aipo ehi güemimbohe eta upe:

—Oimera ari pe peipota tēira aico vaheṛā pe piri que ñepeí ari rupi che, Ava Riquehír, che recosa pipe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. ²⁴ Esepia, inungar acói overa vahe osesape guasu iva rese ocua yepi, Ēgüe ahera che, Ava Riquehír, vitu ari osupitise che yevi āgua curi. ²⁵ Yipindar rumo co ivi pipe che paraisu ranera ava cūríteindar mara-mara tēi che rerecose yuvireco che repia potaēhisave. ²⁶ Inungar ava Noé recose yuvirecoi aracahe, Ēgüe ehi tupri aveira che, Ava Riquehír, yevi āgua renonde. ²⁷ Esepia, ocaru, oihu, omendaño avei yuvireco. Oyepotase rumo ari ipapapri amarusu viapi āgua, ahese Noé yuviroique arca pipe. Ambuae ava rumo opa ocañi tēi yuvireco. ²⁸ Ēgüe ehi avei aracahe Lot recose, ava ocaru tēi, oihu tēi, virocua tēi mbahe omahera yuvireco iyavei mbahe mondosar tēi, mbahe tísar tēi, oi aposar tēi avei yuvirecoi oyapisacāhisa pipe. ²⁹ Osēse rumo Lot tecua Sodoma sui, aviyeteramo tēi oviapi tata amar nungar iva sui. Opa tupri oyuca ava rehii aracahe. ³⁰ Ēgüe ahe aveira aviyeteramo tēi che, Ava Riquehír, ayemboyecuaru curi.

³¹ “Ahe ari pipe acói ava güeta harive secoi vahe, ahe toique iri eme güeta pipe ombahe renose. Iyavei ava que rupi tēi secoi vahe, toyeveí iri eme güetave. ³² Sese peyemomahenduha co aracadendar Lot rembireco rese. ³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

³⁴ “Ahe pítu pipe oimera que ñuvirío ava vupave yuviroque vahe yugüeru: ñepeí acói che reroyasar serasosara, ambuae rumo opitara. ³⁵ Ahese avei ñuvirío cuña ohichora yuvireco: ñepeí serasosara, indugüer rumo opitara. ³⁶ Ēgüe ehi aveira ñuvirío ava amombri güecua sui yuvirecoi vahe: ñepeí serasosara, indugüer rumo opitara” ehi.

³⁷ Aipo ñehesa renduse, oporandu yuvireco chupe:

—Ore Yar, ¿que vo aipo Ēgüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño āgua ari yacatu rupi ² aipo ehi: “Ñepei tecuave oime mbia mborerecuar mbahe moingatusar ndosiquiyei vahe Tūpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivi potai. Coiye catu rumo cuña ombopihaviracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu pihiehī āgua’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese. ⁷ Tūpa avei niha omoingatura mbahe güembiporavo oyeupe yeruresar ari, pītu rupindar upe yepi. Nosaro tēi chiranera opitivi āgua yuvireco. ⁸ Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevisē co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi reroquasar sui

⁹ Ichui Jesús oporombohe iri ambuae ava recocuer rese. Esepia, oime amove ava aviye ai angahu secōi oyeupe viña, iharive rumo viroiro ambuae ava. ¹⁰ “Ñuvirio ava yuviraso tūparove oyerōqui. Ñepei ava fariseo, ambuae evocoiyase ava sui guarepochi reroquasar. ¹¹ Evocoiyase fariseo oso tenonde ava rembiepiave oyerōqui aipo ehi: ‘Tūpa, avei ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe. Iyavei ndahei eté che recocuer co mbia ava sui guarepochi reroquasar nungar tēi aico no. ¹² Iyavei ñuvirio yupagüer ñepei semana pipe ayecuacu ité nde recocuer rese, iyavei ñepei-peī cien guarepochi che poraviqui reprī aipisi vahe sui amboyaho diez che porerecosa ndeu’ ehi. ¹³ Ava sui guarepochi reroquasar rumo opitaño amombri ichui. Aheve nomahei iva rese oyerōqui āgua oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa vahe aico!’ ehi oyerōqui” ehi. ¹⁴ “Sese aipo ahe pēu: co mbia ava sui guarepochi reroquasar opa oipisi ñerosa Tūpa suindar güētave oso. Fariseo rumo ani eté. Esepia niha, opacatu acoi oyemboivate ai vahe, opara seco reroysa. Acoi ava seco mbegüe vahe rumo seco mboivate catusara curi” ehi.

Jesús osovasa chihivahe eta

¹⁵ Iyavei chihivahe güeru Jesús uve yuvireco sovasapirā. Evocoiyase semimbohe osepiase yuvireco, “¿Mahera vo peruño tēi chihivahe?” ehi opihaviracuaa pipe serusar upe yuvireco. ¹⁶ Jesús rumo aipo ehi:

—¡Mahera ndapeipotai iyu āgua! Toyugüeruño chihivahe cheu. Esepia, co chihivahe nungar ava yuviroiquera che Ru Tūpa povrive. ¹⁷ Supi eté acoi ndoipisi vahe che Ru Tūpa mborerecuaa chihivahe nungar yuvireco, ahe evocoiyase ndoyuviroiquei chietera ipipe —ehi.

Ñepei mbia mborerecuar imbahe eta vahe omoñeta Jesús

¹⁸ Ñepei mbia mborerecuar oporandu Jesús upe:

—Porombohesar aviye vahe, ¿mbahe vo ayapora tecovesa apirēhi vahe rereco āgua? —ehi.

¹⁹ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa secōi.

²⁰ Ereicua niha co porocuaita aipo ehi vahe: ‘Nandeaguasai chira, ndereporoyuca chira, nandemondai chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chihivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprī evocoiyase eremondora ava iparaisu vahe upe. Ichui ererecora mbahe aviye vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyemboivhai tēi. Esepia niha, mbahe yar ité secōi.

²⁴ Sese omahe aipo ehi:

—¡Yavai eté rumo ava mbahe yar reique ãgua che Ru Tũpa mborerecuasave! —ehi—. ²⁵ Yavai rai camello upe yucuar rupi seiŕque ãgua; ava imbahe eta vahe upe rumo yavai catu che Ru mborerecuasave seiŕque ãgua —ehi.

²⁶ —¿Ava angahu pĩha evocoyase oñepisirora yuvireco viña? —ehi sendusar chupe.

²⁷ Evocoyase ahe chupe aipo ehi:

—Ava tẽi upe mbahe yavai eté, Tũpa upe rumo ndayavaimi eté —ehi.

²⁸ Evocoyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoyase aipo ehi gũemimbohe upe:

—Supi eté acoi oseya vahe que gũeta, gũembireco, viquehĩr, vivri, oyesupa, que guahĩr Tũpa mborerecuasa rese, ³⁰ ahe setá iteanga catu oipĩsira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirẽhi vahe curi —ehi.

Jesús omombehu iri omano ãgua

³¹ Evocoyase yande Yar opa viraso co cotimi doce gũemimbohe. Aheve aipo ehi: “Cũritei yasora tecua Jerusalén ve yaico, aheve omboaviyera co Tũpa ñehe mombehusar rembicuachiagũer co che, Ava Riquehĩr, resendar ñehesa. ³² Che imondopri aicora ndahei vahe yande mu upe mara-mara tẽi che rereco ãgua. Che roeroĩro-ĩrora iyavei ondivi-ndivira yuvireco che rese” ehi. ³³ “Iyavei che nupa-nupara. Ipare che yucara yuvireco. Imombosapisa ari pipe rumo acuera yevira omano vahe pãhu sui” ehi.

³⁴ Semimbohe rumo ndosenducuai eté ñehe yuvireco. Esepia niha, yavai eté senducua ãgua yuvireco chupe.

Jesús ombogũera ñepeĩ mbia ndasesapisoĩ vahe

³⁵ Evocoyase Jesús ovirovise tecua Jericó oso, aheve mbia ndasesapisoĩ vahe oguapi oĩ peri popive porerecosa oyeupe mondo ãgua rese. ³⁶ Osenduse ahe ndasesapisoĩ vahe ava rehĩ piambu, ahese, “¿Mbahe vo pẽu?” ehi ava upe. ³⁷ Ahe evocoyase, “Jesús, Nazaret pendar, ocuara co rupi” ehi yuvireco chupe. ³⁸ Evocoyase ahe gũendapeve oñehe pĩrata:

—¡Jesús, David suindar, che paraisuerecomi tẽi eve! —ehi chupe.

³⁹ Evocoyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tẽi eve! —ehi pĩrataño ité chupe.

⁴⁰ Evocoyase Jesús opitase aheve, oyocuai ava seru ãgua. Ovirovise seru yuvireco, aipo ehi ndasesapisoĩ vahe upe:

⁴¹ —¿Mbahe vo ereipota ayapo vahe rã ndeu? —ehi.

—Che Yar, che mbosarecomi tẽira eve viña —ehi chupe.

⁴² —¡Esareco, erecuera niha! Esepia, ereyeroya ité che rese —ehi chupe.

⁴³ Ahe ramoseve ndasesapisoĩ vahe, osareco tupri ité; osoño ité Jesús rupi imboeteisave. Opacatu ava osepia vahe avei omboetei Tũpa yuvireco.

19

Zaqueo osepia pota Jesús

¹ Ichui Jesús oiŕque tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi reroquasar rerecuar. ³ Osepia pota tẽi Jesús ‘taicua ité’ oya viña. Ndoicatuĩ rumo opucũehise ava rehĩ pãhuve sepiã ãgua. ⁴ Evocoyase ahe oña tenonde oso ‘tasepia ité’ oyapave, oyeupi ivira rese ivate oĩ senonera. ⁵ Evocoyase oyeopotase, omahe Zaqueo rese ivate chinise, aipo ehi chupe:

—Zaqueo, egũeyi poyava. Esepia, asora nde rõtave nde piri —ehi.

⁶ Aipo oyeupe he ramoseve, Zaqueo ogũeyi voi vorivetesã pipe oipisi. ⁷ Sepiase rumo opacatu ava, “Yangaipa guasu vahe rõtave tẽi oso” ehi yuvireco chupe. ⁸ Evocoyase Zaqueo opũha aipo ehi chupe:

—Che Yar, esendu rane, amboyaho tuprira che mbahe eta ava iparaisu vahe upe; mbahe aĩomi vahecuer avei, ayapĩrasã catu-catura irungatu rupi imboeyevi ãgua —ehi chupe.

⁹ —Co pipe Tũpa oipĩsiro ité co mbia. Esepia, ahe niha Abraham suindar avei secoi. ¹⁰ Esepia, che, Ava Riquehĩr, ayu co ivi pipe ava ocañi tẽi vahe pĩsiro ãgua —ehi Jesús Zaqueo upe.

Guarepochi sui yembohesã

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepia, virovi Jerusalén, “Oyepota voi etera revo Tũpa mborerecuasa” ehi ava yuvireco viña.

¹² Ahe rumo aipo ehi ava upe imbohe: “Oime mbia imboyeroyapri, ahe senoipri oso vahe rã amombri oivi pendareta rerecuarã oyevisẽ. ¹³ Oso ãgua renonde oichohopa uca

diez tupri güembuguai. Ahese opa omondo ñepeipei upe guarepochi sepírusu vahe, aipo ehi chupe: ‘Peporaviqui co guarepochi rese imboeta água che yevise nara’ ehi. Ipare oso. ¹⁴ Setá ava rumo secua pendar saquicuei tēi viroiro yuvireco. Sese omondo moviro ava ‘tomombehu: Ore rumo ndoroipotai ore rerecuarā seci água, tehi yuvireco’ oya viña.

¹⁵ “Ahe rumo mborerecuar guasu güecosa pipe oyevi ou cute. Opa uca oichoho oguarepochi pisisarer ‘¿mbovi-mbovi pñha oipisi oyacatu yuvireco?’ oya. ¹⁶ Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoiyase mborerecuar guasu omboyevi chupe: ‘Mbiguai aviye vahe ereico, nde cuaita co nde poraviquisa chíhimi vahe remboaviye ité. Sese ereicora diez tecua guasu pendar rese hañeco água’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco água’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuarmpi pipe sereco. ²¹ Esepia, che asiquiye nde sui. Nderecatēhi mete ai vahe mbahe rese. Ambuae ava poraviqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoiyase mborerecuar guasu aipo ehi chupe: ‘Nde mbiguai ndaseco pñrai vahe ereico. Nde ñehe sui aicuara nde recocuer. Ereicuase egüe che hesa viña, ²³ evocoiyase, ¿mahera ru ndereyapocatu che guarepochi guarepochi apocatusave che yevise voi senose água cheu imboyevi catumi água viña?’ ehi. ²⁴ Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upe’ ehi vupindar upe. ²⁵ Supindar rumo aipo ehi: ‘Ore rerecuar, ovireco rumo evocoi diez tupri avei iharive guarepochi’ ehi tēi yuvireco chupe. ²⁶ Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotarēhimbar, ndache potai vahe mborerecuarā yuvireco, ahe opara peru cohava che rovai yucapa água’ ehi’ ehi Jesús ava eta upe.

Jesús oique Jerusalén pipe

²⁸ Jesús aipo ohe pare, oguata vite oso Jerusalén coti. ²⁹ Evocoiyase coiye catu tecua Betfagé iyavei Betania rerovicave, ivitri Olivo ipiimi, aheve omondo ñuvirio güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbrí imoha ava ndoyeupi vitei vahe yuvireco sese. Ahe peyorañora seru. ³¹ Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñora chupe —ehi güemimbohe upe.

³² Evocoiyase semimbohe yuviraso, semimombehu rupi tupri ité osepia mbahe yuvireco. ³³ Evocoiyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare víraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso água. ³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi água oso, opacatu ava seroyasur supi oguata vahe omboipi osapucái yuvireco vorivetesave mbahe poromondiisa sembiapogüer rese Tüpa upe ³⁸ aipo ehi yuvireco:

—¡Sovasapri seci mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tüpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri água —ehi tēi yuvireco.

⁴⁰ Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucái pñratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuaru tarahu co co ari pipe teco tuprisa amondo pota vahe pēu viña, cūrítei rumo ocañi tupriño pe sui, ndapeicatui eté sepia!” ehi oyaseho. ⁴³ “Oimera rumo ari imombehupri naporai vahe pēu curi. Pe amotarēhimbar oñachi irira pe recua. Ipare oyere tupri yuvireco pe rese pēu ovava água. ⁴⁴ Iyavei yuviroiquera pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepeí oya vahe ambuae rese. Esepia, ndapeicuai eté Tüpa ouse pēu pe písiro água” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oique judío tūparo guasu pipe. Aheve omboipi ava mbahe mondosar mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca āgua viña?’ ehi yuvireco chupe.
⁴⁸ Ndoicatui rumo yuvireco. Esepia, ava rehiŋ oyapísaca iporombohesa rese yuvireco.

20

Jesús mborerecuasa

¹ Ñepeí ari Jesús judío tūparo guasu pipe güecose, ombohe ava eta, omombehu ñehesa písirosa resendar oico. Aheve yugüeru pahi eta rerecuar guasu yuvireco iyavei Moisés porocuita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā? —ehi ahe ava yuvireco chupe.

³ Ahe omboyeví chupe:

—Che avei aporandura mbahe rese pēu. Pemboyevíra cheu —ehi—. ⁴ ¿Ava vo Juan ombou ava āpiramo āgua: Tūpa pīha, ava tēi tie? —ehi ahe ava yuvirecoi vahe upe.

⁵ Aheve, “¿Mara yahera pīha?” ehi-ehi tēi oyeupe yuvireco. “ ‘Tūpa’ yahese chupe, ‘¿Mahera ru ndaperoyai?’ ehira yandeu. ⁶ Anise, ‘Ava tēi remimbou’ yahese chupe, opacatu seroyasar evocoyase yande api-apira ita pipe yuvireco. Esepia, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. ⁷ Evocoyase ahe ava, “Ndorocuai rumo Juan mbousar, que sui oporoāpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuita pipe co mbahe ayapo’ ndahei chietera pēu —ehi mborerecuar guasu upe.

Ava mbahe tēi oporaviquí vahe recocuer sui yembohesa

⁹ Ipare Jesús oñehe ava eta upe ambuae ava recocuer rese aipo ehi: “Oime mbia oñoti vahe uva oivi pipe. Ipare oseya oivi ava oporaviquí vahe upe iporu āgua. Ichui oso pucu que amombri vahesa rupi. ¹⁰ Evocoyase oyepotase ari uva pohosa, aheve omondo ñepeí güembiguai oporaviquí vahe upe imboporandu ‘tomboumi uva pohopri cheundar cheu cute’ oyapave viña. Ahe rumo oinupa-nupaño imboyeví tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyeví imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

¹³ “Coíye miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoyase ahe ava tahir repiase, ‘Co aipo oipísira vu mbahe. Yayaña. Yandeu nara pāve topita co ivi’ ehi oyeupe yuvireco. ¹⁵ Evocoyase ovinose miti pāhu sui, oyuca ité yuvireco.

“¿Mbahe vo evocoyase oyapora ivi yar ahe ava naporai vahe upe? ¹⁶ Oura evocoyase ahe ava mocañipa āgua, omondora ambuae ava upe oivi rese oporaviquí vahe rā” ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?:

‘Co ita oi aposar opaño omombo yuvireco, ahe ita rumo aviye catu vahe oi moviracua tupri āgua’ ehi.

¹⁸ Acoi que oviapi vahe evocoi ita harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehi sui yuvireco.

Judío rerecuar osecoña iri tēi Jesús guarepochi rese yuvireco

²⁰ Ahe judío rerecuar evocoyase omondo ava ndaseco asiimi angahu vahe iviro, chupe iñehe āgua ‘toyavi angahu oñehe’ oya viraso vahe rā mborerecuar Pilato rovai. ²¹ Ahe evocoyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pīha yamondo guarepochi Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴—Pemboyecua ru ñepei guarepochi cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵—Taa, pemondo ru mborerecuar uve chupendar, iyavei Tüpa upendar pemondoño ité Tüpa upe —ehi ahe ava upe.

²⁶ Ndojaví uca catuí eté ñehe ava rovaque ipisi água yuvireco. Ahe rumo oyeupe imbovise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe “ndipoi eté cuerayevisa” ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseya güembicuachiagüer yandeu aipo ehi: ‘Que cuim-bahe omenda vahe omanose guahiēhiseve, tivri evocoyase omendara sembrecocuer rese. Ahe viquehir omano vahecuer upe nara tahira oico’ ehi. ²⁹ Evocoyase oime siete tupri oyesuindar päve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivri omenda sese. Ahe omanoño avei guahiēhiseve. ³¹ Ipare imombosapisa tivri omenda iri tēi sese. Ēgüe ehi tupriño avei chupe. Ambuae ichuindar ēgüe ehi tupri avei omanopa yuvireco guahiēhiseve. ³² Coiye cuña avei omano cute. ³³ Evocoyase opase ocuerayevi yuvireco, ¿uma rembireco itera pñha omendase opacatu siete yuvirecoi vahe rese? —ehi saduceo yuvireco chupe.

³⁴ Ahe rumo omboyevi chupe:

—Co ivi pipe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroico vaheerā, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tüpa rahir, Tüpa rembiguai eta iva pendar nungar yuvireco. ³⁷ Moisés rembicuachía agüer pipe niha caha pähu sendi vahe resendar oicua uca cuerayevisa yandeu. Aheve aipo ehi: “Ahe niha yande ramo arachendar Abraham, Isaac, Jacob Tüpa” ehi. ³⁸ ¡Tüpa ndahei omano vahe Tüpa! ¡Ahe rumo oicove vahe ité Tüpa secoi! Esepia, chupe opacatu yuvirecove vahe —ehi saduceo upe.

³⁹ Evocoyase moviro Moisés porocuita rese oporombohe vahe aipo ehi:

—Supi eté aipo ere, Porombohesar —ehi yuvireco chupe.

⁴⁰ Sese niquerēhi iri eté mbahe rese oporandu água yuvireco chupe.

¿Ava suindar pñha Poropisrosar?

⁴¹ Evocoyase Jesús aipo ehi ahe ava upe:

—¿Mahera ru, “Poropisrosar David suindar ité” ehi yuvireco? ⁴² David teieté niha aipo ehi güembicuachía pipe:

‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopiha água nde povrive yuvireco’ ehi David aracahe.

⁴⁴ ¿Mahera ru, “Poropisrosar David suindar secoira” peye? David teieté, “Che Yar” ehise chupe —ehi Jesús ahe ava upe.

Jesús oicua uca Moisés porocuita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo água acar rupi omboeteisa pipe yuvireco. Oseca avei tenda porañete catu vahe güenara otüparo pipe, carusave avei oseca tenda aviye catu vahe yuvireco. ⁴⁷ Iyavei virocua-rocuñaño tēi cuña imer mano vahecuer rēta ichui. Oarondaguā tēi avei oyeroku pucu-pucu yuvireco. Ahe rumo oipisira Tüpa ñemoirosa ipñrata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi riru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerecosa. ³ Evocoyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui.

⁴ Esepia, ava imbahe eta vahe, oguarepochi rumbirer tēi omondo oporerecosa Tüpa upe yuvireco. Co cuña rumo oparaisusa pipe virecomi vahe guarepochi oyeupe, opacatu ité omondo oporereco água Tüpa upe —ehi.

Jesús omombehu tüparo guasu monduru água

⁵ Evocoiyase amove semimbohe oñehe yuvireco tũparo guasu recocuer rese: “Co tũparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶—Oimera ari opacatu co mbahe cūrítei pesepia vahe pipe ndipoi chietera que ñepeí ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa íva rese

⁷ Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoiyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropisirosar aico, cūrítei osupiti ari imombehupri yandeu’ ehi tẽira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquívei chira rumo serãcua anduse ichui. Evocoi nungar rane ité niha oimera. Ndehi vitei chira rumo ari cañi” ehi.

¹⁰ “Ñepeí ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi riríi tuvichá vahe, tiavor, mbaherasisa opacatu-catu tẽi tecua rupi. Iyavei pesepiara íva rese mbahe pe mbosiquíve vahe, poromondiisa tuvichá vahe avei curi.

¹² “Co mbahe-mbahe tẽi reime renondeve rumo pe pisira yuvireco che recocuer sui mara-mara tẽi pe rereco água. Pe reraso aveira pẽu porandu água tũparove, pe roquenda aveira, iyavei pe rerasora mborerecurar rovai, mborerecurar ívate catu vahe rovai avei yuvireco che recocuer sui tẽi. ¹³ Ipipe pemombehura che recocuer chupe yuvireco. ¹⁴ ‘Aipo ahera añehe’ ndapevei chira pepihañemoñeta rereco pe yeepi água. ¹⁵ Esepia, che amondora che mbahecuaa pe ñehe água. Ndoicatu chietera evocoiyase pe amotarẽhimbar imboeyi yuvireco pẽu. ¹⁶ Pe amotarẽhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pãhu pendar yuvireco. ¹⁷ Opacatu ava ndape ambotai chira che recocuer sui tẽi yuvireco. ¹⁸ Nocañi chietera rumo que ñepeí pe ha pe áca sui. ¹⁹ ¡Peyemoviracua evocoi nungar mbahe upe pe ñepisiro água!

²⁰ “Iyavei pesepiase ava Jerusalén rese sundao oyere tuprise, peicuara evocoiyase mbahe-mbahe tẽi reime água yuvireco chupe. ²¹ Evocoiyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pipe yuvirecoi vahe, ahe toyuvinoose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. ²² Esepia, ahe ari oimera Tũpa ñemoirosa. Ahe omboaviyera icuachiapri aracahendar pipe imombehupri. ²³ ¡paraisu itera ahe ari pipe cuña ipuruha vahe, imembi pitani vahe avei! Esepia, oimera tecoasisa co ivi pipendar upe, ñemoirosa tuvichá vahe ahe ava recocuer rese. ²⁴ Iyavei quise pucu pipe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe” ehi.

Ava Riquehir yevisa

²⁵ “Íva rese iporẽhira poromondiisa, ari rese, yasi rese, yasitata rese; iyavei ivi pipe, opacatu tecua rupi ava ndayaracua iri chira yuvireco. Oyembosiquíve guasu-guasú tẽi aveira yuvireco para guasu riapugüer renduse. ²⁶ Ahese ava setá yaracua cañi tẽira osiquíyepave yuvireco opihañemoñeta guasu aise co ivi pipe mbahe oime vaherá sui. Ahese avei íva resendar opacatu mbahe oririira. ²⁷ Ahese ramo opacatu ava che, Ava Riquehir, che repiara yuvireco, agüeyise íva quíha rese che piratasá rendigüer porañetesa pipe. ²⁸ Omboipise evocoi nungar mbahe, peyemonguerẽhi catura, peyemopoase pe querẽhisa pipe. Esepia, pe renososa pihavira mbahe tẽi sui” ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramose, yaicua cõimi ari sacú vahe yepota água yandeu yepi. ³¹ Na ehi aveira pẽu che ñehe rupi tupri mbahe pesepiase. Sese peicuara Tũpa mborerecuasa cõimi eté secoise.

³² “Supi eté yuvirecove vitera ava osepia vahe co mbahe opase yaviye. ³³ Íva, ivi opara ocañi, che ñehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya água mbahe tẽi aposa pipe, pe caguar tẽisa pipe, co ivi pipendar tecocuer rese pe pihañemoñeta tẽisa pipe avei. Evocoiyase toposesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoi nungar mbahe. ³⁶ Sese peyemoingatu, peyerõqui ari rupi co mbahe tẽi sui pe yepepi água, pe yemboyecua tupri água che, Ava Riquehir, rovai” ehi güemimbohe eta upe.

³⁷ Egüe ehi Jesús oporombohe ari rupi tũparo guasu pipe. Pitu pipe evocoiyase opita ivitri Olivo rese. ³⁸ Iyavei opacatu ava yuviraso añihiveive tũparo guasu pipe ñehe rendu água yepi.

22

Yemborandusa Jesús yuca água

¹ Ovirovise Pascua pieta pan ndayapepoi vahe hu água, ² ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tēi Jesús yuca água yuvireco.

³ Evocoiyase Carugar oi que Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta água, “Tamondo Jesús pe povrive” ehi. ⁵ Ahe evocoiyase oyemboviaharete yuvireco. “Yamondo guarepochi chupe” ehi voi eté yuvireco. ⁶ Judas evocoiyase, “Aviye” ehi. Oseca voi ava porēhiseve Jesús mondo água yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu água. Ahe pipeve avei ovesa Pascua pieta resendar yucapri seropovēhesa yepi. ⁸ Evocoiyase Jesús omondo güemimbohe Pedro, Juan reseve aipo ehi:

—Peso, tapemoingatu yande caru água Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

¹⁰ Evocoiyase aipo ehi:

—Peyepotase tecua pipe, aheve pesepiara mbia vireco vahe cambuchi pipe i. Pesora sētave supi. ¹¹ Aipo peyera peñehe oi yar upe: “Ore mbohesar oporandu: ‘¿Uma oi pipe vo Pascua pieta resendar orohura che remimbohe rese?’ ehi” peyera. ¹² Evocoiyase ahe omboyecuara oi guasu, ivatendar pēu. Aheve pemoingatura yande caru água —ehi güemimbohe upe.

¹³ Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

¹⁴ Osupitise icaru água apóstol reseve yuviroguapi mesave. ¹⁵ Evocoiyase aipo ehi:

—¿Cueseve tēi eté niha aipota acarú vahe rā pe piri Pascua pieta resendar rese che mano água renonde! ¹⁶ Esepia niha, ndayapo iri chira pieta Pascua resendar acoi yaviyese voi eté Tūpa mborerecuasa pipe —ehi.

¹⁷ Evocoiyase oipisi igua riru, “Aviye ndeu” ehi Vu upe, iyavei aipo ehi:

—Co amondora pēu, perova-rova peyacatu. ¹⁸ Esepia, co pipe suive ndaihu iri chira uva ricuer acoi ouse voi Tūpa mborerecuasa —ehi.

¹⁹ Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pipe che rese yepi —ehi.

²⁰ Ēgüe ehi avei carusa pare yapo igua riru rese aipo ehi:

—Co igua riru pipendar omboyecua che Ru remimbotar ipiasu vahe pēu nara, ahe che ruvi ipiyerepirā pe recocuer rese nara. ²¹ Cūritei rumo oime mbia mesave yande piri che mondo vahe rā che amotarēhimbar upe. ²² Supi eté imboaviyesa itera che, Ava Riquehir, rese ñehesa yipive imombehuri. ¡Iparaisu catura rumo acoi mbia che mondosar! —ehi.

²³ Evocoiyase aipo ehise, semimbohe oporandu-randu tēi oyeupe: “¿Ava piha ēgüe ehi?” ehi tēi yuvireco.

¿Ava vo ivate catu vahe?

²⁴ Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. ²⁵ Evocoiyase Jesús aipo ehi: “Ava mborerecuar co ivi pipendar oyocuai pirata ava yuvireco yepi. Ahe chupe rumo, ‘Mbahe tupri aposar’ ehi yuvireco. ²⁶ Pe rumo ēgüe ndapeyei chira. Acoi oyemboivate pota vahe, toyemochihivaheño güeco mbegüesa pipe. Acoi ava cuaisar, tihañeco catu ambuae ava rese. ²⁷ ¿Uma piha ivate catu vahe: co mesave oguapi vahe ocaru yuvireco? ¿Sese ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoñhasa pipe. ²⁹ Sese che amondo pēu pe mborerecuasa inungar che Ru ombou cheu che mborerecuá água. ³⁰ Esepia, pecarura iyavei peihura che mborerecuasave che piri. Iyavei peguapira opacatu judío recocuer rese porandu água” ehi güemimbohe upe.

Jesús, “Ndaicuai vahe evocoi mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Caruguar oporandu pe recoãha ãgua rese. ³² Che rumo ayeroqui nde rese nde yeroyasa paneẽhi ãgua. Ereyevise cheu, emonguerẽhi catu ambuae nde rivireta imoviracua uca ãgua yuvireco oyese —ehi Pedro upe.

³³ —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoi mbia” erera mbosapi oyupagüer rupi cheu —ehi.

Virovi ité Jesús recoãha ãgua

³⁵ Evocoiyase Jesús oporandu güemimbohe eta upe:

—Opomondose acoi mbahe riru porẽhi, guarepochi riru porẽhi, ambuae pe pitaqui ndugüer rerasoẽhise, çipane vo acoi mbahe ahese pẽu? —ehi.

—Aní eté —ehi yuvireco chupe.

³⁶ Evocoiyase,

—Cüritei, acoi mbahe riru vireco vahe, toviroveño, guarepochi riru vireco vahe, toviroveño avei; acoi ndovirecoi vahe quise pucu, tomondo oyeaosa quise repirã. ³⁷ Supi eté amombehu pẽu: iyacatu ité imboaviye tupri ãgua co che rese ñehesa imombehupri aipo ehi vahe: ‘Ava vireco ndaseco põrai vahe nungar yuvireco’ ehi vahe. Supi eté yaviyera co icuachiapirer che resendar —ehi.

³⁸ Evocoiyase semimbohe aipo ehi yuvireco:

—Ore Yar, cohave oime ñuvirio quise pucu —ehi.

—Ahe güeraño ité aviye —ehi güemimbohe eta upe.

Jesús oyerogui Getsemaní ve

³⁹ Ipare Jesús osẽ oso ivitri Olivo ve. Ahe ivitrive oso yepi, aheve semimbohe yuviraso yuvireco supi. ⁴⁰ Oyepotase aheve yuvireco, Jesús aipo ehi güemimbohe upe:

—Peyeroqui angaipa pe yapoẽhi ãgua —ehi.

⁴¹ Ipare oyepepi güemimbohe sui, inungar ita imombosa vahe amombri, aheve ofenopiha, oyerogui ⁴² aipo ehi: “Che Ru, ereipotase, che renose eve co mbahe tẽi sui; tayapo eme che remimbotar tẽi, nde remimbotar rupira rumo” ehi.

⁴³ Evocoiyase oyemboyecua Túpa rembiguai chupe, seco momirata ãgua. ⁴⁴ Mbahe-mbahe tẽi porarasa pipe oyerogui catu. Ahese sacuvor inungar tuvi osẽ ichui otiqui ivive.

⁴⁵ Oñarapuhase oyeroguisa sui, oyevi oso güemimbohe uve. Ahe rumo opaño yuviroque yuviroca oviharẽhisa pipe. ⁴⁶ Evocoiyase,

—¡Mahera opaño peque! Peñarapuha, peyerogui catu pe viapiẽhi ãgua mbahe tẽi pipe —ehi güemimbohe upe.

Jesús oipisi yuvireco

⁴⁷ Jesús ñehe viteseve, oyepota ati ava yuvireco chupe. Judas doce semimbohe pãhu pendar tenonde seci. Ahe oyemboya oso sese sovaupite ãgua. ⁴⁸ Evocoiyase aipo ehi Judas upe:

—Judas, çmahera vo che, Ava Riquehir, rovaupitesa pipe che mondo eve che amotarẽhimbar upe? —ehi.

⁴⁹ Semimbohe eta rumo, mbahe-mbahe tẽi repiase, oporandu yuvireco:

—Ore Yar, çyavavara yande quise pucu pipe? —ehi yuvireco chupe.

⁵⁰ Ñepe rumo supindar, pahi rerecurar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecurar upe, túparo rãrosar upe, tecua pipendar rerecurar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose túparo pipe pe pãhuve ari yacatu rupi, na ndapeyapoi eté co nungar cheu. Aviyẽño rumo, oyepota ité niha pẽu imombehupri Caruguar piratasa pipe mbahe-mbahe tẽi apo ãgua —ehi.

Pedro, “Ndaicuai vahe evocoi mbia” ehi Jesús upe

⁵⁴ Evocoiyase Jesús oipisi yuvireco, oviraso pahi eta rerecurar ivate catu vahe rõtave yuvireco. Pedro rumo amombri rupive tẽi osaquicue moñaño oso. ⁵⁵ Aheve ñachimbri pipe oyatapí yuvireco, oyere tupri tata rese oyepehe yuvinoi. Aheve avei Pedro ipãhuve çhini.

⁵⁶ Evocoiyase çuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesús rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tẽi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepe hora paremi tēi, ambuae aipo ehi chupe:

—Supi eté rumo co ité supi secoi vahe. Esepia, Galilea iguar ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoiyase yande Yar oyemboyere sese. Ahe ramoseve oyemomahenduha: “Co pipe tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. ⁶² Ahese osē, oyasehó iteanga oso.

Sārosar mara-mara tēi Jesús vireco yuvireco

⁶³ Evocoiyase ava Jesús rārosar iguayi tēi yuvirocua-rocua yuvireco sese. ⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi oca nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari pipe, cōhese, oñemonuha ava judío rerecuar, pahi eta rerecuar iyavei opacatu Moisés porocuaita rese oporombohe vahe yuvireco Jesús reraso uca āgua ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropisirosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upe—.

⁶⁸ Inungar che aporanduse mbahe rese pēu, pe avei ndapemboyevii chietera cheu viña no. ⁶⁹ Co pipe suive rumo che, Ava Riquehir, aguapira Tūpa mbahe mboavaisarēhi acato coti —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tūpa Rahir? —ehi.

—Supi eté niha aipo aipo peye cheu —ehi mborerecuar eta upe.

⁷¹ Evocoiyase ahe aipo ehi yuvireco:

—¡Indól ¿Ava iri vo evocoiyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoiyase opacatu ava opūha yuvireco Jesús reraso āgua mborerecuar Pilato rovai. ² Aheve oiñhengapo aipo ehi yuvireco:

—Orosepia co mbia oipihañemoñeta roerva ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropisirosar mborerecuar ivate catu vahe aico” ehi oico —ehi yuvireco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevii Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherā —ehi

⁵ Ahe ava eta rumo,

—Supi eté opacatu ava oipihañemoñeta mboyeavirati uca opacatu tecua rupindar. Yipindar omboipi Galilea rupi oico. Cūrítei co Judea ve ēgüe ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñehesa oporandu, “¿Supi eté pīha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omondo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esepia, setá ari osepia pota tēi serācua anduse yepi. Evocoiyase oipota ité pomondiisa oyapo vaherā oyeovaque viña. ⁹ Sese oporandu ati mbahe rese chupe. Nomboyevii eté rumo Herodes upe. ¹⁰ Aheve opacatú pahi eta rerecuar iyavei Moisés porocuaita rese oporombohe vahe eta seroirosave oñemoñeta-ñeta tēi sese Herodes rovaque yuvireco. ¹¹ Evocoiyase Herodes osundao eta reseve iñehe mara-mara tēi Jesús upe sese oguayi tēisa pipe yuvireco. Omboyemonde avei turucuar iporañete vahe pipe yuvireco. Ēgüe ehi imboyevii Herodes Pilato upe. ¹² Ahe ari pipe suive oyemboiri Pilato Herodes rese. Ndoyembotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha peru co mbía cohawe cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe remimombehu rupi. ¹⁵ Herodes avei, ‘Ndipoi mbahe sembiapo naporai vahe imano água’ ehi. Sese omboveyiño Jesús imbou cheu. ¹⁶ Ainupa ucara rumo. Ipare amoseñora —ehi Pilato.

¹⁷ Pascua pieta pipe iya ité Pilato ava upe ñepe soquendapri mose água.

¹⁸ Opacatu guasu rumo ava oñehe pĩrata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbía Barrabás tecua pipe mbahe tēi mopuhasa sui iyavei oporapichisa sui oyeoquenda uca vahe. ²⁰ Pilato rumo omose pota Jesús viña. Sese oporandu iri ava upe imose água. ²¹ Ahe rumo osapucaĩ pĩrata catu yuvireco:

—¡Aní, tayaticasa! ¡Tayaticasa curusu rese! —ehi ati-atiiño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca água, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucaĩ pĩrata catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoiyase semibotar yuvireco” ehiño Pilato ava eta upe. ²⁵ Ëgüe ehi imose co mbía Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sãrosar upe ava remimbotar apo água sese.

Jesús yaticasa curusu rese

²⁶ Oime mbía Simón serer vahe Cirene iguar ou vahe que co coti rupi sui. Ovirasose Jesús yuvireco yatica águave, ahe mbía upe, “Nde terevosii curusu rese Jesús raquicuei” ehi voiiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharēhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. ²⁹ Esepia, oura arí naporai vahe. Ahese aipo peye tēira: ‘Áviye catu acoi cuña nimembii vahe iyavei ndoicuai vahe imocambu omembri’ peye tēira. ³⁰ Ahese avei ava ivitri uve aipo ehira yuvireco: ‘¡Toviapí ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, Ëgüe ehise ivira yivive vitese, ¿mara ehira vo catu oipise? —ehi cuña eta upe.

³² Iyavei viraso ñuvirío mbía ndaseco pōrai vahe supive yaticapirã yuvireco. ³³ Oyepotase Ava Áca Cangüer serer vahesave, aheve oyatica curusu rese yuvireco. Iyavei oyatica ñuvirío mbía, ñepe mbahe rese ipocosa coti, ambuae evocoiyase mbahe rese ipocōehisa coti.

³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepia, ndoicuai co mbahe güembiao yuvireco —ehi.

Sundao evocoiyase iguayiiño Jesús turucuar rese oyeupe imboyaho-yaho água yuvireco.

³⁵ Ava rehii osepia yuvireco; mborerecuareta avei seroĩrosave aipo ehi yuvireco chupe:

—Oipisiro ambuae ava, toñepisiro ru ahe ae ité cute Tũpa Rembiporavo Poropisirosar güecosa pipe —ehi yuvireco.

³⁶ Iyavei sundao seroĩropare omondo vinagre itoihu yuvireco, ³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oĩ: “Co judío rerecuar guasu” ehi.

³⁹ Evocoiyase ndaseco pōrai vahe yaticapri iñehe mara tēi chupe aipo ehi:

—¡Nde Poropisirosar ereicose, eñepisiro ru nde ae, ore avei ru ore pisiro eve! —ehi chupe.

⁴⁰ Ambuae evocoiyase aipo ehi voi ondugüer upe:

—¿Nderesiquiyeyimi rutei vo Tũpa sui? Nde avei niha ocañi tēi vaherã. ⁴¹ Yande rumo co yande rembiapo sui tēi mara-mara tēi yande rereco yuvireco; co mbía rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoiyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoiyase omboveyi chupe:

—Supi eté co pipe ereicora tecua apirēhi vahesave che rupi —ehi Jesús ahe mbía upe.

Jesús mano agüer

⁴⁴ Osupitise rumo mbiter ari, opa tupri p̄itu ivi rupi; las tres pipe rumo opa icatu. ⁴⁵ Ari avei ogüe tupri, turucuar guasu t̄uparo asiasa avei mbiter rupi tupri ovo. ⁴⁶ Evocoyase Jesús ofehe p̄irata:

—¡Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoyase Roma iguar sundao rerecuar osepiase co mbahe poromondiisa T̄upa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa t̄ei oyepihamondiisa pipe yuvireco. ⁴⁹ Opacatu avei ava oicua vahe Jesús, ip̄ahuve cuña Galilea sui yugüeru vahe, osepiaño t̄ei amombrive co nungar mbahe yuvireco.

Jesús apacatu agüer tuvipa pipe

⁵⁰⁻⁵¹ Oime mbia aviye etepri vahe, ahe serer José, tecua Arimatea pendar. Ahe tecua ivi Judea p̄endar; judío rerecuar ñemonuhasa ivate catu vahe pendar secoi. Ahe mbia viroya vahe ité T̄upa ombou vaheñā omborecuasa pipe mbahe moingatu āgua. Sese ndahei ip̄ihañemoñeta rupi co mborerecuar oyapo vahe mbahe Jesús upe yuvireco. ⁵² Evocoyase ahe oso Pilato r̄etave oporandu āgua Jesús rehögüer rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vit̄ei vaheve yuvireco. ⁵⁴ Esepia, ahe ari omoingatu mbahe mb̄ituhusa ari upe nara, ahe mb̄ituhusa rumo osupiti pota ité.

⁵⁵ Cuña yugüeru vahe Jesús rupi Galilea sui, yuvirasoño ité supipave, osepia sehögüer apocatusé yuvireco. ⁵⁶ Oyevisé güetave yuvireco omoingatu mbahe s̄iacua vahe tehögüer resendar ip̄ichi āgua.

24

Jesús ocuerayevi

Ahe cuña opituhu mb̄ituhusa ari pipe judío porocuaita reroyasave yuvireco. ¹ Cõhe ramomise domingu pipe, oyevi yuviraso tuvipave mbahe s̄iacua vahe reseve. ² Oyepotase yuvireco tuvipave, osepia soquendasa ita guasu ndipo irise güendagüerve. ³ Evocoyase yuviroique voi tuvipa pipe. Ndoyosui rumo yande Yar rehögüer yuvireco. ⁴ Ndoyembovihal t̄ei; ndoicatu iri. Aheve aviyeteramo t̄ei osepia ñuvir̄io mbia iturucuar sendi vahe oipive yuvireco. ⁵ Opaño ñaca iviso ivi coti yuvireco osiquiyepave. Evocoyase co mbia aipo ehi yuvireco chupe:

—¡Mahera peseca tuvipa p̄ahu rupi ava oicove vahe! ⁶ Ndipoi mo cohave; ocuerayevi mo ahe. Peyemomahenduha iñhengagüer ivi Galilea rupi omombehu vahecur rese, ⁷ “Che, Ava Riqueh̄ir, imondoprira ava angaipa viyar povrive, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoyase cuña oyemomahenduha voi Jesús ñhengagüer rese yuvireco. ⁹ Oyevisé tuvipa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo oyeupe mombese aviye aipo ehi t̄ei vahe; ndoviroyai eté yuvireco.

¹² Pedro rumo yandu ramoseve voi, os̄e, oña oso tuvipave. Omahese tuvipa pipe, turucuar güeraño osepia co cotimi tuise. Evocoyase oyepihamondii t̄ei ‘¿mara ehi rutei p̄iha?’ oya oyevi oive oso.

Jesús oyemboyecua ñuvir̄io güemimbohe upe tecua Emaús piar rupi

¹³ Ahe ari pipeve caharuse, ñuvir̄io semimbohe yuviraso tecua Emaús ve. Ahe once kilómetro tecua Jerusalén sui. ¹⁴ Ahe peri rupi oñemoñeta yuviraso opacatu co mbahe oime vahecur rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia t̄ei, ahe rumo ndoyepiacua ucai eté chupe. ¹⁷ Evocoyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvinoha. ¹⁸ Ip̄ahu pendar Cleofas serer vahe omboyevi chupe: —Nde güeraño revo Jerusalén ve ereico vahe ndereicuai mbahe oime vahe tecua pipe —ehi.

¹⁹ Evocoyase,

—¿Mbahe vo oime yandeu? —ehi.

—Jesús mo Nazaret pendar, ahe T̄upa ñehe mombehusar seco p̄irata vahe opacatu mbahe apo āgua, mbahe mombehu āgua avei T̄upa rovaque iyavei opacatu ava rovaque. ²⁰ Omondo pah̄i rerecuar iyavei yande rerecuareta yamotar̄ehisave yuca uca āgua curusu rese yuvireco. ²¹ Ore rumo oroyeroya ité sese. “Ahe yande p̄isirora yande amotar̄ehimbar sui” orohe chupe viña. C̄uritei rumo opa mbosapi ari yucare. ²² Ore p̄ahu pendar cuña

ndore mbovihai eté oyevise suvîpa sui yuvîreco. Esepia, yîpîndar yuvîrasose añihiveive tuvîpave, ²³ ndoyosui eté sehôgüer yuvîreco. Ahese aipo osepia Tûpa rembiguai aipo ehi vahe yuvîreco chupe: “Jesús mo oicove cûritei” ehi. Ahe evocoiyase yugüeru imombehu oreu. ²⁴ Iyavei ambuae ore ndugüer yuvîrasose tuvîpave cuña remimombehu rupi tupri avei. Ndosepiai eté rumo Jesús yuvîreco —ehi Cleofas chupe tupri ité.

²⁵ Evocoiyase aipo ehi ahe ñuvîrio mbia upe:

—¡Ndapeicuai eté rumo pe piha pipe seroya tupri âgua opacatu Tûpa ñehe mombehusar remimombehugüer! ²⁶ ¿Ndapeicuai vo Poropîsirosar iparaisu rane itera mbahe-mbahe tēi virecosa pipe güecua porañetesave güeique âgua renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Tûpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuvîraso, Jesús rumo aviye oguataño vite vaherã senonde. ²⁹ Co mbia rumo oñehe yuvîreco chupe:

—Epitaño ore piri, caharu etepri. Pîtura moco ndeu —ehi yuvîreco chupe.

Evocoiyase oique, opitaño ipiri yuvîreco. ³⁰ Oguapise yuvînoi mesave, oipisi pan, “Aviye ndeu” ehi Tûpa upe. Ipare ombohi co ñuvîrio mbia upe imondo. ³¹ Ahese voi semimbohe omahecua ramo yuvîreco sese, ahe rumo cûriteimi ndoyemboyecua iri sovai chupe. ³² Evocoiyase aipo ehi oyeyu yuvîreco:

—Yande mbopihañemoñeta pîratami eté peri rupi oñehese yandeu co tecocuer icuachiapri rese —ehi yuvîreco.

³³ Ipare ndopita pucu iri; oyeviño voi yuvîraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvîreco:

—Supi eté rumo yande Yar ocuerayevi. Esepia, oyemboyecua ité Simón upe —ehi.

³⁵ Evocoiyase ahe avei omombehu, “Oreu avei oyemboyecua oroguatase peri rupi. Ombohise pan ore piri, ahese ramo oroicua” ehi yuvîreco omboetasa upe.

Jesús oyemboyecua güemimbohe eta upe

³⁶ Ahe oñehe viteseve yuvîreco co tecocuer rese, ahese Jesús oyemboyecua chupe aipo ehi:

—Avîrave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvîreco ‘hâgüer revo’ oyapave.

³⁸ —¡Mahera pesiquiye! ¡Mahera pereco vite pe poreroyañehisa pe piha pipe! ³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hã ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboyecuapa opo, opi avei chupe. ⁴¹ Ahe rumo vorivetesu pipe iyavei oyepihambosiquiye vitesa sui ndoviroya tupri vitei eté yuvîreco. Evocoiyase aipo ehi:

—¿Perecomi vo mbahe yande caru âgua? —ehi güemimbohe upe.

⁴² Evocoiyase omondo pira apiremi oyi vahe yuvîreco chupe. ⁴³ Ipare oipisi, ohu opacatu güemimbohe rovaque. ⁴⁴ Ipare aipo ehi:

—Co rese acoi añehe vichico cuese pe rese aico vitese che mano renondeve. Yaviye ranera opacatu ñehesa che resendar Moisés porocuita cuachiapri pipe, iyavei Tûpa ñehe mombehusar yuvîrecoi vahe rembicuachiagüer pipe, Salmo pipe avei —ehi.

⁴⁵ Êgüe ehi evocoiyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropîsirosar iparaisura omano âgua. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tûpa upe pēu ñeroi âgua” hesara. ⁴⁸ Pe niha peico opacatu co nungar mbahe repiasar imombehu âgua. ⁴⁹ Che amboura che Ru remimombehu pe harive. Pepitañora rumo cohava tecua Jerusalén ve acoi peipisise voi pîratasa iva suindar —ehi güemimbohe eta upe.

Ivave Jesús so agüer

⁵⁰ Evocoiyase Jesús yuvînose tecua sui yuvîraso tecua Betania popive. Aheve ñuvîrio opo omopuha, osovasa mbahe tupri reime âgua chupe. ⁵¹ Ipare oyepipi güemimbohe sui. Ahe ramoseve serasosa ivave. ⁵² Semimbohe evocoiyase osapucui imboetisave. Ipare oyevi Jerusalén ve vorivetesu pipe yuvîreco. ⁵³ Iyavei ahe ari yacatu rupi yuvîraso tûparo guasu pipe osapucui Tûpa mboetisave yuvîreco yepi. Aipo rupive.

JUAN REMBICUACHIA JESUS RECOUER RESENDAR SAN JUAN

Tūpa Ñehe oyeapo ava

¹⁻² Jesús yipisuive ité Tūpa Ñehe secói. Ahe oicove mbahe apoëhi viteseve Tūpa rese. Esepia, ahe niha Tūpa secói. ³ Ipipe avei Tūpa opacatu mbahe oime vahe oyapo; ndipoi eté mbahe sembiapoëhi. ⁴ Jesús niha vireco tecovesa apirëhi vahe oyese. Ahe tecovesa tesapesa nungar secói opacatu ava upe. ⁵ Ahe tesapesa omboyecua tecocuer supi eté vahe pītumimbi nungar mbahe naporai vahe aposar pāhuve. Ahe mbahe tēi aposar rumo ndoicatu eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca āgua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombehugar tēi rumo secói. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipipe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisii yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco āgua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pāhuve co ivi pipe oporoaisusave mbahe supi eté vahe aposa pipe. Iyavei orosepia ité seco porañetesa. Co seco porañetesa oipisi vahe Vu sui Tahir ñepe vahe güeco pipe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaheṛā che raquicuei, ahe ivate catu vahe che sui. Esepia, yipive ité secói che yesuëhi viteseve’ ahe” ehi.

¹⁶ Esepia, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepia vahe Tūpa; Tahir ñepe vahe, secói vahe ité ipiri, ahe oicua uca yandeu.

Juan Oporoāpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipitiviisareta imondo Juan uve ‘¿Ava vo nde? tehi yuvireco chupe’ oyapave icua āgua. ²⁰ Ahe rumo oyemombehu ité aipo ehi:

—Che ndahei eté Poropisirosar aico —ehi.

²¹ Evocoyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoyase,

—¿Nde tie acoi Tūpa ñehe mombehugar ou vaheṛā? —ehi yuvireco chupe.

—Aní eté —ehi.

²² —¿Ava rutei vo evocoyase nde? ¡Emombehu oreu ore oromombehu vaheṛā ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupirëhisa rupi aipo ahe: ‘Pemoingatu pe recocuer yande Yar yepotase nara’ ahe pëu. Ahe inungar acoi Tūpa ñehe mombehugar Isaiás aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi, ²⁵ oporandu yuvireco chupe:

—Evocoyase ndahei niha aipo nde Poropisirosar, ndahei avei Elías, ndahei eté Tūpa ñehe mombehugar imombehupri ereico. ¿Mahera ru evocoyase ereporoāpiramo? —ehi yuvireco chupe.

²⁶ Evocoyase fariseo upe aipo ehi:

—Che rumo i pipe aporoāpiramo; oime rumo mbia pe pāhuve ndapeicuai vahe. ²⁷ Ahe co ivi pipe ou vaheṛā che raquicuei. Che rumo ndahei eté seco catupri vahe aico ipitaquisā yora āgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoāpiramo yepi.

Tūpa remimbou Ovesa nungar opacatu ava angaipa repirā

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tūpa remimbou Ovesa nungar seropovëhepirā opacatu ava angaipa mocañi āgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’

ahe acoi cuese. ³¹ Che rumo yipindar ndaicuai ahe yande remiaro ou vaheã. Sese niha aporoãpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espíritu Santo ogüeyise íva sui inungar apicasu, opita tupri iharive” ehi.
³³ “Yipindar rumo ndaicuai eté. Tüpa che cuai vahe rumo che poroãpiramo ãgua i pipe, aipo ehi cheu: ‘Acoi eresepia Espíritu Santo ogüeyise, opitase mbia harive, ahe mbia oporoãpiramora Espíritu Santo pipe’ ehi. ³⁴ Che niha asepia ité. Sese, ‘Co Tüpa Rahir ité secói’ ahe pëu” ehi.

Yipindar vahe Jesús remimbohe

³⁵ Ahere ayihive Juan secói aheve avei ore ñuvirío mbia oroico vahe reseve. ³⁶ Jesús ore cuãse, Juan aipo ehi oreu:

—jPesepia, ndo co mbia Tüpa remimbou Ovesa nungar seropovêhepirã! —ehi oreu.

³⁷ Aipo ihe ramoseve, oroguata voi eté supi. ³⁸ Evocoiyase omahe guaquicuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pïtu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropisirosar —ehi (‘Cristo’ oyapave).

⁴² Ipare voi, viraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguã rumo Cefas —ehi (‘Pedro’ oyapave).

Jesús oñehe Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepia Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Betsaida pendar secói. ⁴⁵ Ipare oso Natanael reca, aipo ehi chupe:

—Orosepia Poropisirosar, sesendar acoi Moisés oicuachía cuachiar porocuita resendar pipe aracahe, oicuachía avei sesendar Tüpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pïha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secói judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higuerravive ereicose —ehi Natanael upe.

⁴⁹ —Porombohesar, jnde niha Tüpa Rahir ereico, Israel iguar rerecuar guasu! —ehi Natanael chupe.

⁵⁰ —jChe reroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviye catu vahe —ehi.

⁵¹ Iyavei aipo ehi opacatu upe:

—Supi eté pesepiara íva oyemboi tuprise iyavei Tüpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

¹ Ipare imombosapisa arí pipe, oime mendasa tecua Caná ve, Galilea ivi rupi. Jesús sí avei secói aheve, ² iyavei Jesús ore semimbohe oroico vahe reseve ore soho avei yuvireco aheve.

³ Ègüe ehi rumo opa tēi uva ricuer. Evocoiyase Jesús sí,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo arí ndoyepota vitei cheu —ehi osi upe.

⁵ Ichí rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepi-peí cambuchi pipe oique cincuenta litro, amove oique setenta litro i ipipe. Ahe judío oiporu pietase oyepoi ãgua

yuvireco Tūpa porocuita mboaviye āgua yepi. ⁷ Evocoyase ahe ava igua rese ihañeco vahe upe aipo ehi:

—Pemboapipopa co cambuchi i pipe —ehi.

Ombaoipopa tupri yuvireco. ⁸ Evocoyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ēgüe ehi eté yuvireco. ⁹ Ihañeco vahe pieta rese osāha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoyase pieta rese hañecosar oñehe cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviye catu vahe yipindar. Ipape acoi ava hitaropase yuvireco, omondo ndasepi vahe. Nde rumo ereyapocatupaño aviye catu vahe, ahe cūrítei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco pīratasa. Sese semimbohe viroya ité yuvireco.

¹² Ipape oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipape judío upendar Pascua pieta yepota senise, Jesús oso Jerusalén ve. ¹⁴ Aheve osepiā tūparo guasu pipe corero ivipi rupi guarepochi rese mbahe mimba eta mondosar; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otīapi-apīi iguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cūrítei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapri arachendar aipo ehi vahe rese: “Nde rēta rese che recatēhisa sui che mocañira” ehi vahe.

¹⁸ Evocoyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporēhi āgua oreu cūrítei? —ehi yuvireco chupe.

¹⁹ Evocoyase,

—Pemondurupa co tūparo, che evocoyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis araviter rupi, ¿ereicatura pīha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi. ²² Ocuereyevise rumo manosa sui, ore oroyemomahenduha ñehe agüer rese. Sese oroviroya sesendar ñehesa icuachiapri pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco. ²⁴ Ndoyeroyai eté rumo ahe ava eta rese. Esepia, opacatu ité ava recocuer oicua. ²⁵ Ndipoi eté que ambuae ava pihañemoñeta mombehu āgua chupe. Esepia, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pāhuve secoi vahe. ² Ahe oso Jesús piri pītu pipe, aipo ehi chupe:

—Porombohesar, oroicua ité Tūpa nde mbose ore mbohe āgua —ehi—. Esepia, ndipoi eté que ava oicatu vahe evocoi nungar poromondiisa apo Tūpa oyese secoñehise —ehi.

³ Evocoyase,

—Supi eté aipo ahe ndeu: acoi ava ndoyesu piasu iri vahe, ndoiiquei chietera Tūpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña? —ehi—. ¿Oicatu irira pīha osi aviterve oique oyesu iri āgua? —ehi Jesús upe.

⁵ Jesús omboyeví chupe:

—Supi eté aipo ahe ndeu: acoi ava i pipe iyavei Espiritu pipe ndoyesui vahe, evocoi nungar ndoyuviroiquei chira Tūpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espiritu pipe oyesu vahe rumo, ahe espíritu. ⁷ Ereyepihamondií

rene, ‘Peyesu piasu irira’ ahesse ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ēgüe ehi avei ava oyesu vahe Espiritu pipe —ehi Jesús chupe.

⁹—¿Mara ehi pīha aipo evocoiyase? —ehi Jesús upe.

¹⁰—ñde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: nderesenducuai eté rumo co nungar mbahe! orosepia vahe ité. Pe rumo ndaperoyai eté ereo remimombehu. ¹² Añehe tēi niha mbahe co ivi pipendar rese pēu; ndache reroyai eté rumo peye. Tahetru revo mbahe iva pendar amombehuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Riquehir, iva sui agüeyi vahe pēu. ¹⁴ Inungar Moisés osupi ivate mboi rahanga ivi iporupirēhisa rupi aracahe. Ēgüe ehi aveira che, Ava Riquehir, rerecosa ivate che rupira yuvireco ¹⁵ opacatu ava che reroyasar tecovesa apirēhi rereco āgua yuvireco” ehi Jesús Nicodemo upe.

Tüpa poroaisusa ava upe nara

¹⁶ “Supi eté Tüpa osaisü iteanga opacatu ava. Sese ombou Guahir ñepe vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nombou Tüpa Guahir co ivi pipe ava mocañi tēi āgua; ahe rumo ombou ava pīsiro āgua.

¹⁸ “Ava viroya vahe Tüpa Rahir, ndahei eté ocañi tēi vaherā; acoi ava ndoviroyai vahe rumo, oipisi itera cañisa yuvireco Tüpa Rahir ñepe vahe reroayēhisa pipe. ¹⁹ Ēgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Carugar suindar pītumimbi vahesave güeco āgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa, iyavei ndoyemboyai tesapesa rese yuvireco oangaipa mboyecua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboya tesapesa rese yuvireco mbahe Tüpa remimbotar oyapo vahe cua uca āgua opacatu ambuae ava upe —ehi.

Juan Oporoāpiramo vahe oñehe iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secui pucu raimi oporoāpiramo. ²³ Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñeapiramo uca āgua. ²⁴ Co rumo mbahe yaposā Juan roquendaēhi viteseve.

²⁵ Evocoiyase Juan remimbohe omboipi ambuae omu judío rese oyecopi-copi vaherā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secui vahe nde rese iai Jordán rovai, sese acoi ereñehe oreu, cūrítei ahe oporoāpiramoño tēi iyavei opacatu yuviraso supi —ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatu mbahe apo Tüpa nombouise chupe. ²⁸ Pesendu tupri ité che ñehe cuese: “Che ndahei Poropisirosar aico, che rumo senonde imboupi tēi aico” ahesse pēu. ²⁹ Esepia, acoi mendasa oimese, vireco vahe güembirecovi ahe imevi, osenduse rumo imboripar iñehe yivii ohā, oyemboviharete sese. Ēgüe ahe avei che cūrítei, ayemboviharete Jesús rese. ³⁰ Ahe niha seco ivate catu-catuño itera ari rupi oico; che rumo ivi coti catu aicora ichui —ehi Juan güemimbohe upe.

Iva suindar ou vahe

³¹ Iva suindar ou vahe ivate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñehe. Acoi ou vahe rumo iva sui, ivate catu ité opacatu sui. ³² Iyavei mbahe güembiepia osendu vahe reseño ité oñehe. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tüpa omombehu mbahe” ehi. ³⁴ Co Tüpa remimbou niha omombehu Tüpa ñehe. Esepia, Tüpa omondo ité oEspiritu sese. ³⁵ Tüpa osaisu Guahir iyavei opacatu mbahe omondo ipove. ³⁶ Opacatu ava viroya vahe Tüpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tüpa ñemoirosa ipirata vahe ité yuvireco.

4

Jesús oñehe Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui ² (ndahei eté rumo Jesús oporoāpiramo; semimbohe tēi rumo Ēgüe ehi yuvireco). ³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe,

“Jacob iguagüer” ehi yuvireco. Ahe igua rembe rese Jesús oguapi mbiter ari potase ocueraise oï. ⁷⁻⁸ Semimbohe eta rumo opacatu yuviraso tecuave mbahe tembihu erocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chíhi nde i taihu —ehi.

⁹ Cuña, Samaria pendar, rumo omboyeví chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehei vahe ité ava Samaria pendar upe yuvireco yepi.)

¹⁰ Evocoyase omboyeví cuña upe:

—Ereicuase Tüpa porerecosa ndeundar viña iyavei ereicuase ahe ava ndeu i rese oporandu vahe, nde evocoyase ereporandura sese chupe. Ahe evocoyase omondora i ndopai vahe ndeu viña —ehi cuña upe.

¹¹ —Ndererecoi rumo i renose água. Esepia, co igua ipicucú ité. ¿Que sui vo aipo evocoyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suño ité niha ahe oihu, tahir avei oihu yuvireco ichui iyavei opacatu seimba. ¿Nde pïha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseño itera yepi, —ehi cuña upe—. ¹⁴ Acoi ava oihu vahe rumo i che remimondo, ndihusei iri chietera. Esepia, che amondo vahe i ndopai vaheñá ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriñhi água, tanose iri eme i cohava sui —ehi.

¹⁶ —Eso rane nde mer reca, seseve peyu cohava —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cüritei erereco vahe nde resendar téi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tüpa ñehe mombehúsar ereico cheu —ehi—. ²⁰ Ore ramoi eta omboetei Tüpa co ivitri rese yuvireco. Pe rumo, judío peico vahe, “Jerusalén ve yamboeteira Tüpa yepi” peye —ehi.

²¹ —Che reroya eve cuña, virovi ari pëu peso iriñhi água Tüpa mboetei co ivitri rese iyavei Jerusalén ve. ²² Pe Samaria pendar peico vahe pemboetei téi pe rembiguañhi. Ore rumo oroicua oromboetei vahe. Esepia, ñepisiroso ou judío sui. ²³ Oyepota rumo ari cute, ahe ité co cüritei co pipe suive supi eté Tüpa omboetei vahe, Tüpa Espiritu pipe omboeteira yuvireco. Supi eté Tüpa, “Égüe tehi che mboetei yuvireco” ehi. ²⁴ Esepia, Tüpa niha Espiritu secoi. Sese acoi omboetei vahe oyapora Espiritu pipe supi tupri vahe ité yuvireco —ehi cuña upe.

²⁵ Cuña evocoyase aipo ehi chupe:

—Che aicua Poropísirósar yu água (ahe ‘Cristo’). Acoi ahe ouse, omombehu tuprira opacatu mbahe yandeu —ehi cuña chupe.

²⁶ —Che niha ahe aico añehe vahe ndeu —ehi cuña upe.

²⁷ Aheseve semimbohe eta oyeví yuvireco, nombovihaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pïha ahe Poropísirósar? —ehi omu eta upe.

³⁰ Evocoyase ava rehii yuvinose tecua sui, yuviraso Jesús recosave sepia. ³¹ Ava yepotañhi viteseve, semimbohe eta,

—Ore mbohesar, ecarumi —ehi téi yuvireco chupe.

³² —Oimera rumo ambuae mbahe cheu che moviracua água. Ahe ndapeicuai vahe —ehi güemimbohe eta upe.

³³ Semimbohe aipo hese oporandu-randu téi oyeupe yuvireco:

—¿Oime pïha que ava güeru vahe mbahe semihura? —ehi téi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuaíta, ahe ayapora iyavei amboaviye rane itera iporaviqui —ehi—. ³⁵ Esepia, pe aipo peye: ‘Ipane vite irungatu yasi mbahe miti ha monuha água’ peye yepi; che rumo aipo ahe pëu: pemahe pe ivirindar ava eta rese. Opa ité opiha omoingatu yuvireco, ahe inungar mbahe miti ha yaviye vahe. ³⁶ Acoi oporaviqui vahe Tüpa upe ava hã pisi água rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoyase ava upe oñehe vahe iyavei oipisi vahe ava hã ivave nara, oyoya guasu oviharetera ipisipri rese yuvireco. ³⁷ Supi eté co ñehesa aipo ehi vahe: ‘Ñepeí eté omaheti vahe; imonuhasar rumo ambuae ité’ ehi. ³⁸ Che opocuai ava hã pisi água ambuae ava poraviquisave; yipindar rumo ambuae oporaviqui ité yuvireco sese. Pe evocoyase peique iporaviqui agüer rupi —ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoiyase ava rehii Samaria pendar yuviraso chupe ‘epítami ore pirí’ oya. Evocoiyase opíta ipirí ñuvirío ari rupi. ⁴¹ Setá catu iri ava viroya yuvireco ñehe ité renduse. ⁴² Evocoiyase ava eta aipo ehi cuña upe yuvireco:

—Cūrítei oroviroya ité cute, ndahei nde ñehe suiño oroviroya. Esepia, ore ité orosendu ñehe cute, oroicua avei ahe supí eté opacatu ava písirosar ou vahe —ehi ava eta cuña upe yuvireco.

Jesús ombogüera mborerecuar rahir

⁴³ Ñuvirío ari pare, Jesús osé ivi Samaria sui, osoño ivi Galilea ve. ⁴⁴ Ahe ae ité aipo ehi: “Tüpa ñehe mombehusar ndasaisusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoiyase oyeví iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rētave, tombogüerami che rahir omano pota vahe cheu’ oya. ⁴⁸ Evocoiyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo —ehi.

⁴⁹ —Che Yar, eyu poyavañomi tēi che rahir mano viteñiseve —ehi mborerecuar chupe.

⁵⁰ —Eyeví nde rētave; nde rahir oicove —ehi mborerecuar upe.

Ahese viroya voi oyeupe ñehesa. Sese oyeví voi eté güetave. ⁵¹ Amombri seco vitesese, yuvinoña voi sovañchi sembiguai imombehu:

—¡Nde rahir oicove! —ehi yuvireco chupe.

⁵² Evocoiyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahir oicove’ ehi” ehi. Evocoiyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca água ivi Judea sui oyevise Galilea ve.

5

Jesús ombogüera ava ndoguatai vahe tecua Betzata pendar

¹ Ipore oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe päve. ³ Aheve ava eta imbaheasi vahe oñeno yugüeru ivi rupi: ndasesapisoí vahe, ndoguatai vahe, ndipindugüei vahe avei i ñemomiisa osáro yuvireco yepi. ⁴ Esepia, amove tēi Tüpa rembiguai ogüeyi ahe ivicuarve i momii água, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiaise Jesús, oicua voi eté vireco pucuse ombaherasisa. Evocoiyase oporandu chupe:

—¿Ereipota vo nde cuera água? —ehi chupe.

⁷ Imbaheasi vahe omboyevi:

—Nde mbia, ndipoi eté que ava che mongui vaheñā i pipe i ñemomiise. Asāha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoiyase,

—Epüha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo egüe ehi. ¹⁰ Evocoiyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevosii água —ehi yuvireco chupe.

¹¹ Ahe mbia evocoiyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatuí imboyevi água. Esepia, Jesús aviyeteramo tēi ndoyecua iri ava rehii pähuve. ¹⁴ Coiye rumo Jesús osepia iri tüparove ahe mbia, aipo ehi chupe:

—Ereicua co nde cuerasa cūrítei, aní ereyemboangaipa iri mbahe tēi catu reime iri água ndeu —ehi chupe.

¹⁵ Ahe mbia evocoiyase oso voi eté judío eta rerecuar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbítuhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporaviquiño ité co ari rupi iyavei che aporaviquiño avei —ehiño judío upe.

¹⁸ Aipo hese, judío, “Yayuca ité” ehi. “Esepia, ndahei mbítuhusa ari güeraño nomboyeroyai, ahe rumo oyeapo Tüpa nungar, Tüpa uve ‘che Ru’ ohe angahu tēisa pipe” ehi yuvireco chupe.

Tüpa Rahir mborerecuasa

¹⁹ Evocoiyase Jesús aipo ehi judío upe: “Supi eté aipo ahe: Tüpa Rahir ndoicatuí eté mbahe apo oyesui tēi, Vu rembiapo mbahe oicua; aheño tupri avei oyapo yepi. ²⁰ Esepia, Tu Guahir raisupave omboyecua opacatu mbahe güembiapo chupe iyavei omboyecuaño vite itera mbahe poromondiisa tuvicha catu vahe sembiaporã, ‘¡Mara ehi rutei col!’ pehe tēi água chupe. ²¹ Esepia, che Ru ombogüerayevi omano vahe iyavei omondo tecovesa chupe. Ëgüe ehi avei Tahir omondo tecovesa ava upe güemibotar rupi. ²² Iyavei Tu nomondo iri ava upe sembiapo repri. Esepia, ombou Guahir upe opacatu pĩratasa ava upe sembiapo repri mondo água. ²³ Ëgüe ehi Guahir upe opacatu ava imboetei água yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapısaca vahe che ñehe rese, viroya vahe avei che mbousar, ahe virecora tecovesa apirēhi vahe; ndahei chietera imocafipri. Esepia, osé manosa sui oipisi tecovesa. ²⁵ Supi eté aicua uca pēu: oura ari imombehupri, cūrítei eté co ari oyepota, ava eta omano vahecuer osendura Tüpa Rahir ñehe. Acoi osendu vahe, oicoveño itera. ²⁶ Esepia, Tu vireco tecovesa oyese. Ëgüe ehi avei Guahir upe imondo tecovesa rereco água. ²⁷ Ombou avei imborerecuasa água chupe ava recocuer rese iporandu água. Esepia, ahe Ava Riquehir secói. ²⁸ Peyepihamondi rene aipo che hesa sui. Esepia, oyepotara ari imombehupri, ahe opacatu ava omano vahecuer osendura ñehe. ²⁹ Ahesa yuvinosera vuvipa sui. Oyapo vahe mbahe tupri, ocuerayevira yuvireco tecovesa apirēhi rereco água; acoi oyapo vahe rumo mbahe naporai vahe, ocuerayevira yuvireco Tüpa ñemoirosa pisi água” ehi Jesús judío rerecuar upe.

Jesús omboyecua tupri omborecuasa

³⁰ “Che ndaicatuí mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepia, che ndaipotai che remimbotar tēi mbahe apo água. Che Ru, che mbousar remimbotar rumo ayapo. ³¹ Que cheyese ae tēi añehese, ahesa ndache reroyai chira peye viña. ³² Oime rumo ambuae che mombehusar. Ahe supi eté che mombehu pe seroya água; ahe Juan. ³³ Pe niha, pemondo ava chupe imborporandu mbahe rese. Ahe semimombehu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipotai peñepisiro água. Sese aipo ahe pēu. ³⁵ Juan niha inungar tataendi, Ëgüe ehi omboyecua mbahe supi eté vahe. Sese pe peyembovıha raimi tēi iporombohosa tesapesa nungar pipe peico. ³⁶ Che rumo arco che yecua ucasar aviye catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo água. Co mbahe ayapo vahe, ahe ité omboyecua che Ru Tüpa che mbousar. ³⁷ Iyavei che Ru avei eté che cua ucasar. Ahe ñehe rumo ndapesendui vahe ité, iyavei ahe ndapesepiai eté. ³⁸ Ñehengagüer icuachiapri avei ndoiquei eté pe rese. Ipıe niha ndache reroyai eté peye che Ru che mbose. ³⁹ Pe peicua tupri pota icuachiapri ‘icuapa tupri pipe revo tecovesa apirēhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirēhi rereco água.

⁴¹ “Ndaipisii eté ava che mboeteisa tēi. ⁴² Iyavei opocua Tüpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evocoi nungar tēi peroyara. ⁴⁴ Ndapeicatuí eté che reroya água peye. Esepia, pe ae tēi peyemboetei; ndapesecai eté Tüpa ñepei vahe suindar yemboeteisa. ⁴⁵ Ndapepıhañemoñetai chira che pe recocuer mombehu água rese che Ru rovai. Moisés peroya vahe ité niha oicuachıa pe Tüpa reroyaēhısa chupe imombehu água. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachıa che resendar ñehesa. ⁴⁷ Ndaperoyaise ahe sembicuachıa, evocoiyase ndapeicatuí chietera che remimombehu reroya água” ehi Jesús oamotarēhimbar upe.

6

Jesús oyopoi cinco mil ava

¹⁻⁴ Ipape Pascua pieta ĩpĩmi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerese. Oyepotase ivi rese yuviraso, evocoiyase oyeupi ivitri rese. Aheve oguapi opacatu güemimbohe eta reseve yuvinoi. ⁵⁻⁶ Omahese ava rehii oyeupindar rese, ahease aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoãhasave.

Ahe rumo oicua ité mbahe güembiaporã. ⁷ Evocoiyase Felipe omboyevi chupe:

—Dosciento denario pan ndosupitii chietera que chíhi-chĩhimi ava retacuer viña —ehi.

⁸ Aipo hese, ñepe semimbohe pãhu pendar, Simón Pedro rivri, Andrés aipo ehi chupe:

⁹ —Co chíhivahe vireco cinco pan, iyavei ñuvirio pira, ¿iyacatura vo co ava retacuer? —ehi.

¹⁰ Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava. ¹¹ Evocoiyase oipisi cinco vahe pan, “Aviye ndeu” ohe pare Vu Tũpa upe, opa ombohi-mbohi imondo ava rehii upe. Ĕgũe ehi avei pira upe, imondopa semimbotar rupi-rupi yuvireco. ¹² Opase ava ihĩtaro,

—Pemonuhapa sumbirer iyemombucaẽhi ãgua —ehi güemimbohe upe.

¹³ Evocoiyase omonuha doce iruova sumbirer yuvireco pan cincomi vahe sui. ¹⁴ Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Oura Tũpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opĩratasa pipe tẽi güeraso pota ãgua mborerecuar guasu vireco ãgua oyeupe nara yuvireco, ahease oyeupi iri oso ivate catu. Aheve ahe ae güeco ãgua.

Jesús oguata i hari rupi

¹⁶ Pĩtu ramose ogüeyi yuviraso Jesús remimbohe ipave, ¹⁷ yuviroha carite pipe sasa ãgua yuvireco tecua Capernaum ve yuviraso. Ahease pĩtu ité. Jesús rumo ndoyevi vitei eté.

¹⁸ Ahease oipeyu pĩrata ivitu, i avei ohitu pĩrata. ¹⁹ Yuviraso pucumi tẽi cinco, anise seis kilómetro rupi. Ahease osepia Jesús yuvireco osupiti senise carite. Ahe i hari rupi oguata oso chupe. Evocoiyase osiquiye ité yuvireco ichui. ²⁰ Ahe rumo aipo ehi güemimbohe upe:

—¿Che Jesús aico, pesiquiyei rene! —ehi.

²¹ Evocoiyase sorivete yuvireco carite pipe seroha. Iparemi tẽi oyepota yuviraso oyuvirasosave.

Ava eta oseca Jesús

²² Ahere ayihive ava rehii opita vahe sovai yuvireco, “Semimbohe año rumo yuviraso ñepe vahe carite pipe. Jesús rumo ndosoi eté güemimbohe rupi” ehi tẽi yuvireco. ²³ Aheveve rumo ambuae carite viroyepota seru yuvireco tecua Tiberias pendar, acoi Jesús ava remihura pan reroyeroqui agüer rerovicave. ²⁴ Evocoiyase ava rehii oicuase Jesús semimbohe reseve iporẽhise yuvireco, yuviroha yuviraso ãgua co ambuae carite pipe tecua Capernaum ve seca.

Jesús, pan nungar, tecovesa apirẽhi vahe secoi

²⁵ Oyepotase ava rehii ipa rovai, aheve osepia Jesús yuvireco.

—Ore mbohesar, ¿marase vo ereyepota cohave? —ehi yuvireco chupe.

²⁶ Evocoiyase aipo ehi chupe:

—Supi eté aipo ahe pẽu. Pe rumo che reca peye che pe mbocarusa rese tẽi, ndahei co che poromondiisa reroyasave ité peico pota che rupi. ²⁷ Peoporaviqui eme catu tembihu ndasecosei vahe rese; iyacatu rumo peoporaviqui tembihu secose vahe rese omondo vahe tecovesa apirẽhi. Co tembihu che, Ava Riquehir, amondora pẽu. Esepia, che Ru Tũpa omboyecua ité che ichuindar aicose —ehi.

²⁸ Aipo hese,

—¿Mbahe mboraviqui vo oroyapora Tũpa upe? —ehi yuvireco.

²⁹ —Tũpa oipota pe che reroyara peye che semimbou che recose —ehi ava eta upe.

³⁰ Evocoiyase,

—¿Mbahe poromondiisa vo eremboyecua irimira oreu orosepia vahe rã nde reroya tupri catu ãgua? ³¹ Esepia, aracahe ore ramoi eta yuvirohu ivi iporupirẽhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pẽu: ndahei Moisés omondo pan iva pendar chupe, che Ru rumo omondo chupe. Cũritei che Ru ombou pẽu pan supi eté vahe iva sui. ³³ Esepia, co pan ombou vahe Tũpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoiyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mondo ãgua. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira. ³⁶ Aipo ahe niha acoi pëu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui ìva sui mbahe che remimbotar apo ãgua tēi; ayu rumo che mbousar porocuaita apo ãgua. ³⁹ Che Ru che mbousar ndoipotai que ñepeï ava ombou vahe cheu amocañira. Ahe semimbotar rumo che ambogüerayevira ahe ari ipa vahe pipe. ⁴⁰ Che Ru oipota avei opacatu ava oyeroya vaherã che, Tüpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira ari ipa vahe pipe curi — ehi ava eta upe.

⁴¹ Evocoyase judío eta oñehe-ñehe tēi sese yuvireco, “Che pan aico, agüeyi vahe ìva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe ìva sui” ehi no? —ehi yuvireco chupe.

⁴³ Evocoyase judío eta upe aipo ehi:

—Pepoiño che reroirosa sui. ⁴⁴ Ndipoi chietera que oicatu vahe ou cheu, nomonguerēhiise che Ru che mbousar; omonguerēhi vahe rumo oicatu yugüeru cheu. Ahe ambogüerayevira ari ipa vahe pipe. ⁴⁵ Tüpa ñehe mombehusar cuachiar pipe aipo ehi: ‘Tüpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepeï ava osepia vahe che Ru; acoi ichui ou vaneño ité, ahe güeraño tupri ité osepia. ⁴⁷ Supi eté aipo ahe pëu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoï eta niha yuvirohu ité tembihu maná serer vahe ìvi iporupirēhisa rupi. Ahe rumo opa iriño ité omano yuvireco. ⁵⁰ Che rumo añehe pan ìva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico ìva sui ogüeyi vahe; acoi ohu vahe co pan, oicovera apirēhi vaherã ité. Co pan amondo vaherã, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rerecar oyeecopi-copi yuvireco aipo ehi:

—¿Mara ehira vo aipo co imbou tēi güete yande tohu viña? —ehi yuvireco.

⁵³ —Supi eté aipo ahe pëu: ndapehuisse Ava Riquehir rete, ndapehuisse avei suvi, ndaperecoi chietera tecovesa. ⁵⁴ Acoi ohu vahe che rete, oiñu vahe avei che ruvi, vireco tecovesa apirēhi iyavei che ambogüerayevira ari ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oiñu vahe avei che ruvi, secói che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ãgüe ehi aveira che husar che sui yuvirecovera. ⁵⁸ Añehe pan ìva sui ogüeyi vahe rese. Co pan ndahei maná pe ramoï eta yuvirohu vahe nungar. Esepia, yande ramoï opaño ité omano yuvireco. Acoi ohu vahe rumo co che rete, oicovera apirēhi vaherã ité —ehi ava eta upe.

⁵⁹ Jesús oporombohe co mbahe rese judío ñemonhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesús rupi oguata vahe aipo ehi oyeupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹ Jesús rumo oicua voi eté iñehe-ñehe tēise co mbahe rese yuvireco, evocoyase oporandu: —¿Pemoasiño tie che ñehe? ⁶² ¿Mara peyera pñha che repiase peye che, Ava Riquehir, ayeupise che reco agüerve vicho viña? ⁶³ Espíritu ité niha omondo tecovesa; yande retecuer rumo ãgüe ehi tēi vahe. Co amombehu vahe pëu ahe espíritu iyavei tecovesa. ⁶⁴ Oime vite rumo amove pe pãhuve ndache reroyai vahe —ehi ava rehii upe.

Esepia, Jesús oicua ité yipisuive uma ndoviroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pëu: “Ndipoi chietera que ava ou vaherã cheu che Ru nomonguerēhiise imbou” ahe —ehi.

⁶⁶ Ichuive tupri Jesús rupi oguata vahe setá oseya yuvireco; ndoguata iri eté yuvireco supi. ⁶⁷ Evocoyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboveyi chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tüpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepeï rumo pe pãhu pendar carugar ité —ehi Simón upe.

⁷¹ Jesús oñehe Simón Iscariote rahir; Judas, rese. Yepe doce semimbohe pāhu pendar viña, ahe rumo omondora aya yamotarēhimbar upe.

7

Jesús ndoviroyai tivri yuvireco

¹ Ipape Jesús oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité 'yayuca' oya yuvireco. ²⁻³ Virovise judío pieta guasu teyupa apo āgua yuvireco, ahese tivri aipo ehi yuvireco chupe:

—Erepiata eme cohave. Eso ivi Judea ve; ahe pendar nde rupi oguata vahe avei tosepia poromondiisa nde rembiapo yuvireco. ⁴ Esepia, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivri yuvireco chupe.

⁵ Seroyaēhisave tēi avei tivri aipo ehi yuvireco chupe. ⁶ Evocoiyase vivri upe aipo ehi:

—Ndehi vitei rumo ari che so āgua. Pe guata āgua rumo opacatu ariño tēi aviye. ⁷ Esepia, pe ndape amotarēhii eté aha co ivi pipendar; che rumo che amotarēhi ité yuvireco. Esepia, che amboyecua ité mbahe sembiapo naporai vahe chupe. ⁸ Pesoño pe pieta repia; che rumo ndaso vitei chira. Esepia, ndosupiti vitei ari cheundar —ehi vivri upe.

⁹ Evocoiyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pīha acoi mbia? —ehi tēi yuvireco.

¹² Ava rehii pāhuve setá iteanga oñehe yuvireco sese. Amove aipo ehi yuvireco: “Ahe mbia aviye vahe”; ambuae rumo aipo ehi: “Ndahei aviye vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oi que ava pāhuve tūparo pipe ava mbohe. ¹⁵ Judío eta rerecuar evocoiyase,

—¡Too, mara ehi rute! —ehi tēi—. ¿Mara ehi vo co mbahecua iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei chyesuindar tēi, ahe rumo che mbousar suindar —ehi—

¹⁷ Que ñepepe pe pāhu pendar oyapo potase Tūpa remimbotar, oicua che porombohesa ndahei vahe che suindar, ahe Tūpa suindar ité. ¹⁸ Esepia, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ēgüe ehi. Co ava rumo ‘tombotei che mbousar’ ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuita pēu. Que ñepepe pe pāhu pendar rumo ndipoi eté omboyeroya vahe. ¿Mahera ru che yuca pota peye?” ehi.

²⁰ —¡Nde erereco carugar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgüe ehi!” peyeño acoi cheu. ²² Pe avei rumo amove peporaviqui mbituhusa ari pipe peporombocircuncidase porocuita Moisés omondo vahē rerozasave. (Ahe circuncisión rumo ndahei Moisés suindar, ahe rumo yipive vahe pe ramo suindar ité.) ²³ Oyepotase rumo chihivahe mbo-circuncida āgua mbituhusa ari pipe tupri pēu, peyapoño rane ité mborocuita mboaviye āgua. ¿Mahera ru cheuño pemboasi ñepepe mbia mbituhusa ari pipe ambogüera tupri vahe rese? ²⁴ “Oyavi evocoi” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñehe güecocuer Tūpa suindar rese

²⁵ Evocoiyase amove Jerusalén pendar mbia aipo ehi oyeupe yuvireco:

—¿Ndahei vo acoi co oseca tēi yuca āgua yuvireco? —ehi—. ²⁶ Ahe ité co niha co ava pāhuve oñehe oico, ndipoi eté que mara ehi vahe yuvireco chupe. ¿Omoha pīha mborerecuar co mbia Poropisirozar seco āgua yuvireco? ²⁷ Yande rumo yaicua que sui turi. Acoi ouse rumo Poropisirozar ité coiye, ndipoi chietera que ava oicua vahe iyusa —ehi yuvireco.

²⁸ Evocoiyase aipo renduse oporombohe viteseve tūparove, oñehe pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda āgua viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropĩsirosar, ¿oyapo catura pĩha mbahe poromondiisa co mbia sui? —ehi yuvireco.

Fariseo oyocuai sundao tũparo rãrosareta Jesús pisi ãgua

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecurar omondo sundao tũparo rãrosar Jesús pisi ãgua yuvireco. ³³ Jesús rumo aipo ehi:

—Aicove vitemira pe rese chíhi rupive. Ipare voi ayevira che mbousar piri vicho —ehi—. ³⁴ Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheřã che recosave —ehi ava eta upe.

³⁵ Evocoyase judío oporandu-randu oyeupe yuvireco:

—¿Que pĩha aipo osora yande sui seca iriẽhi ãgua? ¿Osora tie que amombri yande mu oñemosai vahe pãhu rupi ambuae ava ndahei vahe yande mu mbohe ãgua? ³⁶ ¿Mara oya pĩha evocoyase aipo, ‘Che reca tẽira peye, ndapeicatui chietera rumo che reca. Esepia, ndapeicatui chiaveira peso vaheřã che recosave’ ehi yandeu? —ehi-ehi tẽi oyeupe yuvireco.

Espĩritu iai ndopai vahe nungar

³⁷ Pieta ipa, ahe imboeteisa catu vahe, ahe arĩ pipe Jesús oñehe pĩrata ohã aipo ehi:

—Acoi que ava ihusei vahe, toyugũeru cheu. Che evocoyase tamboihu —ehi—, ³⁸ Esepia, inungar aipo ehi vahe icuachiapri pipe, che reroyasar pĩha sui osẽra iai ndopai vahe nungar —ehi.

³⁹ ‘Che reroyasar oipisira Espĩritu curi’ ohesave aipo ehi. Espĩritu rumo ndou vitei ahese. Esepia, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tũpa ñehe mombehugar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropĩsirosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropĩsirosar viña? —ehi—. ⁴² Icuachiapri pipe rumo aipo ehi Poropĩsirosar oyesura mborerecurar guasu David sui iyavei ahera Belén pendar, David recua pendar itera —ehi.

⁴³ Evocoyase ava oyemboyaho-yaho yuvireco Jesús recocuer sui tẽi. ⁴⁴ Amove ava viraso pota tẽi yuvireco soquenda; ndipoi eté rumo ãgũe ehi vahe yuvireco chupe.

Judío rerecurar ndoviroyai Jesús yuvireco

⁴⁵ Sundao tũparo rãrosar oyeve yuvireco Jesús recosa sui. Fariseo eta iyavei pahi eta rerecurar evocoyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tũparo rãrosar evocoyase aipo ehi:

—¿Ndi poi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoyase aipo ehi yuvireco:

—¿Pe avei eté rumo peyembopa uca chupe? —ehi—. ⁴⁸ Ndi poi eté niha ore mboetasa mborerecurar iyavei fariseo viroya vahe yuvireco. ⁴⁹ Co ava rehii tẽi ãgũe ehi yuvireco. Ahe rumo ndoicuai vahe Tũpa porocuita yuvireco, sese iñemoirosavrive ité yuvirecoi —ehi sundao tũparo rãrosar upe yuvireco.

⁵⁰ Evocoyase Nicodemo, acoi oso vahe pĩtu pipe Jesús piri, ahe avei eté fariseo pãhuve secoi, ahe aipo ehi:

⁵¹ —Yandeundar porocuita mboaviye ãgua ndiyai, “Ereyavi mbahe” vahe voiño tẽi que ava mbahe sembiapocuaẽhi viteseve —ehi.

⁵² Evocoyase omboyeve yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipipe eresepiara ndi poi eté que ñepei ou vahe Galilea sui Tũpa ñehe mombehugar —ehi mborerecuareta Nicodemo upe yuvireco.

Cuña oyemboaguasa tẽi vahe resendar

⁵³ Ipare opa yuviraso ñepei-pei güeta rupi.

8

¹ Jesús rumo oso ivitri Olivo ve. ² Ahere ayihive cõhese, oyeve tũparove. Ahese opacatu ava oyemboya yuvireco sese. Ahe evocoyase oguapi oĩ oporombohe.

³ Evocoyase Moisés porocuita rese oporombohe vahe, fariseo eta avei güeru Jesús upe cuña oyemboaguasa tẽi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepei ava. ⁵ Moisés porocuaita rumo ore cuai co nungar cuña yuca água ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoãhasave tēi aipo ehi yuvireco ‘toyavi angahu oñehe yandeu’ oya tēi. Ahe rumo oyaivi, ombahecuachía ocuã pipe ivi rese. ⁷ Evocoiyase oporandu vitesse ava yuvireco, opũha aipo ehi:

—Que ñepei pe pãhu pendar ndoyemboangaipai vahe, ahe rane toyapi ita pipe —ehi.

⁸ Oyaivi iri, ombahecuachía ivi rese. ⁹ Osenduse rumo judío rerecuareta, omboipi ñepei-pe yuvínose yuvireco, cuacua catu vahe sui rane yuvínose. Opacatu yuvínosepase, Jesús güerañomi cuña rese opita yuvireco. ¹⁰ Evocoiyase opũhase, ahese aipo ehi chupe:

—Cuña, ¿que que ru ava? ¿Ndi poi eté que ñepei opita vahe nde mocañi água? —ehi

¹¹ —Aní eté, che Yar, ndi poi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūrítei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei ndaseco iri chietera pítumimbisa nungar mbahe-mbahe tēi vahe pipe —ehi.

¹³ Evocoiyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroyaprii eté —ehi yuvireco chupe.

¹⁴ —Che ñehe rumo supi vahe ité. Yepe cheyese ae añehe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri água ava tēi pihañemoñeta rupi. Che rumo ndayui evocoi nungar mbahe apo. ¹⁶ Asecase ava rembiapo cua tupri água, ahe supi tupri vahe ité. Esepia, ndahei che ae tēi ēgüe ahe, che Ru, che mbousar rumo secoi che rese. ¹⁷ Porocuaita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añehe cheyese viña, che Ru, che mbousar, reseve rumo oyoya tupri oroñehe —ehi.

¹⁹ Aipo ihese, oporandu yuvireco chupe:

—¿Que vo aipo nde Ru? —ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña —ehi fariseo eta upe.

²⁰ Jesús aipo ehi tũparo pipe, guarepochi monuhapri riru ipive oporombohe ohã. Ndi poi eté rumo ahese osoquenda vaheerã. Esepia, ndoyepota vitei eté ahese ihari chupe.

Jesús, “Che sosave pe ndapeicatu chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemanu pe angaipa reseve. Che sosave ndapeicatu chietera peso vaheerã —ehi.

²² Aipo ihese, judío eta aipo ehi yuvireco:

—¿Oyeyucara pĩha ahe ae; ayeve pĩha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaño itera pe angaipa reseve” ahe. Esepia, ndache reroyaise peye, pe angaipa reseve ité pemañoñora —ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setã iteanga areco che ñehe água pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe —ehi fariseo eta upe.

²⁷ Ahe rumo ndosenducuai eté Vu rese iñehese yuvireco. ²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyese tēi mbahe ndayapaise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setã iteanga ava viroya yuvireco.

Ava Tũpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoiyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoyase pe renosera mbiguai nungar pe recosa sui —ehi.

³³ Judío evocoyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ēgüe ehi oangaipa rereco yuvireco. ³⁵ Mbiguai tēi ndahei güerecuar rēta pipe nara ité; tahir rumo opitaño itera güēta pipe nara. ³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeño ité ore yesupa, ahe Tūpa! —ehiño yuvireco.

⁴² Evocoyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cūrteitēi cohava aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua catui eté mbahe che remimombehu? Esepia, ndapeyapisaca potai eté che ñehe rese. ⁴⁴ Peyesupa niha Carugar ité, sese niha pe ahe tupri avei peico. Peyapo pota mbahe semibotar tēi. Esepia, Carugar yipisuive ité oporoyuca serai vahe. Ndayapoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepia, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Ani eté! Che añehe mbahe supi eté vahe rese pēu, ¿mahera ru evocoyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Poropīsīrosar yipive catu vahe Abraham sui

⁴⁸ Evocoyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, carugar ité erereco ndeyese —ehi yuvireco chupe.

⁴⁹ —Che ndarecoi eté carugar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei āgua. Oime rumo ñepeī oipota vahe. Ahe niha omondora ava rembiapo reprī chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoyase judío omboyevī yuvireco chupe aipo ehi:

—Cūrteitēi oroicua ité cute nde ererecose carugar ndeyese. Esepia, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoī Abraham sui? Esepia, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoyase semirañete ai vahe aicora viña inungar pe peico. Che rumo supi eté aicua. Sese niha omboyeroya iñehe. ⁵⁶ Esepia, pe ramoī Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoyase judío eta:

—¿Mara erera vo aipo Abraham repia ndererecomi viteise cincuenta araviter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi viteiseve —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoi vahe

¹ Jesús oguatase ocar rupi, osepia mbia ohasa suive ndasesapisoi vahe. ² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoi eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgüe ehi Tūpa mbahe sese mboyecua āgua. ⁴ Sese oime vītese ari yandeu che mbousar poraviqūisa apo āgua, iya ité ahe yayapo. Esepia, pītura, ahese ndayaicatui chīetera mbahe apo. ⁵ Co ivi pipe che recove vītese rumo, che aico ava upe tesapesa nungar —ehi oreu.

⁶ Aipo ohe pare, ondivi ivive, güendi pipe omoaqui vahe ivi omondo ndasesapisoi vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoi vahe evocoiyase oso, oyovai. Oyevise ichui, omahe tupri ité. ⁸ Evocoiyase sēta ivirindar iyavei ava oicua vahe sesapisoēhise oporanduse guarepochi rese aipo ehi yuvireco:

—¿Ndahei vo acoi co oguapi oī guarepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Aviye tupri ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoiyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesús serer vahe, ahe omoaquimi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoiyase aso, ayovaise, ahese amahe tupri ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güeta cotindar uve.

Fariseo oporandu ndasesapisoi vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapisoi vahe mbogüera āgua. Sese vīraso ndasesapisoi vahēcuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqui vahe che resa rese. Ichui ayovai. Ipare voi asareco —ehi.

¹⁶ Evocoiyase ambuae aipo ehi yuvireco chupe:

—Aipo mbia ndahei eté revo Tūpa suindar. Esepia niha, nombotei eté mbituhusa ari —ehi yuvireco.

Ambuae evocoiyase aipo ehi yuvireco:

—¿Mara ehira aipo poromondiisa apo ava yangaipa vahe viña? —ehiño yuvireco.

Oyevavirati tēi ipihañemoñetasa. ¹⁷ Sese oporandu iri ndasesapisoi vahēcuer upe yuvireco aipo ehi:

—Nde no, ¿mara ehi nde pīhañemoñeta co mbia rese? —ehi.

Ahe evocoiyase aipo ehi:

—Che amoha ité Tūpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichoho uca rane ité iyepi yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapisoi oha? ¿Mara ehi vo co cūrītei osareco no? —ehi iyepi upe yuvireco.

²⁰ —Ore rahir ité niha co, ndasesapisoi oha. ²¹ ¿Mara ehi vo catu co cūrītei osareco? iyavei ¿ava vo catu ombogüera? ¡Ndroicuai eté! Peporandu chupe. Ocuacua niha; ahe ae oicua ucara pēu —ehiño iyepi yuvireco fariseo upe.

²² Iyepi rumo osiquiyepave tēi aipo ehiño yuvireco. Esepia, fariseo opa ité oye-moingatu yuvireco ava “Jesús Poropisrosar secoi” ehi vahe oñemonuhasa sui ñepeí reseve imombo āgua. ²³ Sese niha iyepi aipo ehiño yuvireco: “Peporandu chupe. Ocuacua niha” ehiño.

²⁴ Evocoiyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tūpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoiyase omboyeveí chupe:

—Che ndaicuai eté angaipa viyar tie revo. Co güeraño catu che aicua: che ndachere-sapisoi vahecuer aico; cūrítei rumo asareco —ehi.

²⁶ Evocoiyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pëu. Pe rumo ndache reroyai eté peye. ¿Mahera vo peipota amombehu vite vaheṛã pëu? ¿Pe avei tie peguata pota supi? —ehi fariseo eta upe.

²⁸ Ahese oñehe rai tēi yuvireco chupe:

—Nde ahe mbia rupindar tēi ereico. Ore rumo yande ramoí aracahendar Moisés rupi oroguata vahe. ²⁹ Esepia, oroicua ité Tūpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

³⁰ —¡Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tūpa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu. ³² Esepia, ndipoi eté que avaño tēi ava oyesu sui ndasesapisoi vahe ombogüera vahe. ³³ Ahe rumo ndaheise Tūpa suindar ou vahe viña, ndoicatuí chietera revo mbahe apo viña —ehi fariseo eta upe.

³⁴ Evocoiyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi. Ipare omose ñepeí reseve oñemonuhasa sui yuvireco.

Jesús reroyasarēhi ndasesapisoi vahe nungar tēi

³⁵ Jesús oicua ndasesapisoi vahecuer mombosa. Vupitise aipo ehi chupe:

—¿Ereyeroya nde Ava Riquehír rese? —ehi.

³⁶ Mbia evocoiyase aipo ehi chupe:

—Che mbohesar, emombehumí cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoi vahecuer upe.

³⁸ Evocoiyase mbia oñenopiha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo ñgua; ava ndasesapisoi vahe nungar upe mbahe supi eté vahe che Ru suindar mboyecua ñgua iyavei ava oicua tēi vahe mbahe Tūpa suindar mboesapisoēhi iri ñgua —ehi.

⁴⁰ Evocoiyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoi vahe nungar oroico? —ehi.

⁴¹ Evocoiyase omboyeveí ahe fariseo upe:

—Peicose ndasesapisoi vahe nungar viña, “Peyavi mbahe” ndehi chietera Tūpa pe angaipa rese pëu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pëu —ehi Jesús fariseo eta upe.

10

Jesús ovesa rãrosar nungar

¹ “Supi eté aipo ahe pëu: acoi ava co coti rupi tēi yuviroique vahe ovesa rēta pipe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sãrosar ité secoi. ³ Oquendipi rãrosar omboi chupe. Evocoiyase ovesa rãrosar oñehe serer rupi güeimba ovesa upe senose ñgua sēta sui. Ahe evocoiyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoiyase oguata saquicuerive. Esepia, oicua ité iñehe yuvireco. ⁵ Ndoguatai eté rumo oyarēhi rupi yuvireco; yuvinoña-noñaño ichui. Esepia, ndoicuai eté iñehe” ehi ⁶ omboyoya güecocuer ovesa rãrosar rese. Ava rumo ndosenducuai eté yuvireco.

Jesús ava rãrosar aviye vahe

⁷ Evocoiyase Jesús aipo ehi iri: “Supi eté, aipo ahe pëu: che año ité oquendipi nungar aico ovesa upe. ⁸ Opatatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipisíropirã yuvirecoi. Iyavei inungar acoi ovesa oique vahe güeta pipe, ichui osē capihí reca ñgua igua yepi, ñgüe ehira che reroyasar yuvireco.

¹⁰ “Imonda rai vahe rumo omonda ñgua tēi ou, oporoyuca ñgua, mbahe mocañi ñgua tēi avei. Che rumo ayu ‘tovireco ava tecovesa ndopai vaheṛã ité yuvireco’ viya. ¹¹ Che ité ava rãrosar aviye vahe aico. Sese ayemoingatu tupri che recocuer mondo ñgua ava cheundar repirã; ¹² acoi guarepochi repirã tēi oporaviqui vahe rumo, osepiase mahembiar oñaro ai vahe, oseyapaño güemiaro, oña oso. Esepia niha, ovesa ndahei eté seimba, ndahei avei eté ahe sãrosar ité secoi. Evocoiyase mahembiar oñaro ai vahe omondi-mondii eté ipisi ñgua.

¹³ Evocoi mbia oñaño. Esepia, guarepochi repirã tēi oporaviqui. Sese niha ndosaisui eté güemiaro ovesa.

¹⁴⁻¹⁵ “Che rumo ava rãrosar aviye vahe ité aico; che Ru che cua ité. Che evocoyase aicua avei che Ru. Sese che avei aicua che reimba ovesa eta. Ahe avei che cua yuvireco. Che niha amondo che recocuer sepirã yuvireco. ¹⁶ Areco avei ambuae ité che reimba ovesa. Ahe avei aru pota che mboyeroya vahe rã yuvireco. Ahe ñepeí reseve guasu che remiaro yuvirecoira.

¹⁷ “Che Ru niha che raisu ité. Esepia, amondo itera che recocuer manosave. Ipore rumo acuerayevira. ¹⁸ Ndoicatui chira ava ahe ae tēi che yuca ãgua; che teieté rumo amondora che recocuer che remimbotar rupi eté. Che areco ité pĩratasa imondo ãgua, che cuerayevi iri ãgua avei. Sese ité niha che Ru che cuai” ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipãhu pendar aipo ehi:

—¿Mahera vo co pemboyeroya? Vireco ité caruguar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe carugar rerecosar. ¿Omboesapiso tie carugar rerecosar ava? —ehi amove judío yuvireco Jesús upe.

Judío rerecar ndoyambotai Jesús yuvireco

²² Ari sôhisa vahe pipe tecua Jerusalén ve tũparo rovasagüer pieta oyepota. ²³ Ahese Jesús oguata oico tũparo Salomón oyapo vahecuer rocupe ivi rupi. ²⁴ Evocoyase judío rerecuareta oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropĩsiosar nde recosa oreu? Emombehu tupri catu ñepeí reseve oreu —ehi yuvireco chupe.

²⁵—Amombehu niha acoi pēu, ndache roroyai eté rumo peye. Mbahe ayapo vahe che Ru mborerecuasa pipe omboyecua ité Poropĩsiosar che recosa; ²⁶ pe rumo ndache roroyai eté peye. Esepia, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoyase che rupi oguata yuvireco. ²⁸ Amondo avei tecovesa apirēhi yuvireco chupe icañiēhi ãgua; ndipoi chietera que ava virocua iri vahe rã che sui. ²⁹ Che Ru niha ombou cheu. Esepia, ahe ipĩrata catu opacatu ava sui. Ndipoi chietera que ñepeí ava oicatu vahe serocua che Ru sui. ³⁰ Che Ru iyavei che oroico ñepeñiño ité —ehi judío rerecuareta upe.

³¹ Aipo ihese, judío rerecuareta osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru pĩratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuareta upe.

³³ Judío rerecuareta omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo egüe orohera ndeu. Esepia, nde ereñehe rai tēi Tũpa rese. Nde moco ava tēi ereico. Nde rumo ereyeapo Tũpa ndeyeupe ae —ehi yuvireco chupe.

³⁴ Evocoyase aipo ehi ahe ava upe:

—Pēundar mborocuaita icuachiapri pipe niha aipo ehi: ‘Che aipo ahe pēu: pe tũpa pãve ité peico’ ehi. ³⁵ Yaicua niha icuachiapri pipendar ndiyai yayamotarēhi. Esepia, Tũpa aipo ehi: ‘Pe tũpa pãve ité peico’ ehi evocoi ava oñehe pisisar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoyase, ‘Nde ereñehe rai tēi Tũpa rese’ peye cheu, ‘Che Tũpa Rahir aico’ ahe pēu? ³⁷ Esepia, acoi ndayapoise mbahe che Ru remimbotar; ahe ndache roroyai chietera peye viña. ³⁸ Yepe ndache roroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepeí reseve che Ru secoise che rese iyavei che sese che recosa —ehi oamotarēhimbareta upe.

³⁹ Osoquenda pota iri yuvireco viña; Jesús rumo osoño ipãhu sui.

⁴⁰ Oyevi iai Jordán rovai. Aheve acoi Juan yipindar oporoãpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe siacua vahe yande Yar pi rese. Ipore oiquiti oha pipe. ³ Ahe seindri omondo oñehe Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ãgua ité. Ëgüe ehi rumo Tüpa reco porañetesa mboyecua ãgua iyavei Tahir reco porañetesa mboyecua ãgua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaheerasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cūrítei co ereso pota iri aheve? —orohe chupe.

⁹ Ore rumo aipo ehi:

—Ñepeí ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pítu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esepia, ãgüe ehise ité aviye catura pēu pe che reroya ãgua. Yaso ru catu sepia —ehi oreu.

¹⁶ Evocoyase Tomás, Gemelo serosa vahe, aipo ehi ore imboetasa oroico vahe upe:

—Yaso avei ru yande yamano vaheerã supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoyase ore oroyepota senise ahe tecuave, orosendu “cūrítei irungatu ari opa Lázaro tñre” ehi vahe. ¹⁹ Setã judío yuviraso Marta iyavei María piri iquivri mano agüer sui imboviha ãgua. ²⁰ Oicuae Marta Jesús yepota seni, oso voi eté sapeve; María rumo opitaño oi pipe. ²¹ Evocoyase Marta aipo ehi voi chupe:

—Che Yar, ehi cohava ereicose, nomanoi chietera revo ore quivri viña. ²² Che rumo aicua Tüpa omboura opacatu nde porandusa ndeu —ehi Marta chupe.

²³ —Nde quivri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo. ²⁶ Acoi che reroya vahe güecovesave, nomanoi chietera. ¿Eeroya aipo che hesa? —ehi Marta upe.

²⁷ —Oroviroya ité, che Yar. Nde niha Poropísirosar ereico Tüpa Rahir, ore remiaro ereyu vaheerã co ivi pipe oreu nara —ehi Marta Jesús upe.

Jesús oyaseho Lázaro ruvipa rovai

²⁸ Aipo ohe pare, Marta oso ocupihir María reca, chupeñomi aipo ehi:

—Porombohesar oicove cohava, “Tou” ehi ndeu —ehi chupe.

²⁹ Evocoyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoepiasave viteño ité secoi. ³¹ Osepíase María sē poyava, judío eta sētave yuvirecoi vahe imbovihasar yuviraso voi saquicuerive, “Oquivri ruvipave revo osora oyaseho” ehi yuvireco viña.

³² Evocoyase María oyepotase chupe, oñenopiha sovai aipo ehi:

—Che Yar, ehi revo ereicoveño itese cohava, che quivri nomanoi chietera viña —ehi María chupe.

³³ Osepíase María yaseho iyavei judío eta yuviraso vahe supi, opíha pipe oyandu ité oviharēhisa. ³⁴ Evocoyase oporandu:

—¿Que vo peñoti? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoyase aipo ehi yuvireco:

—¡Esepia, osaisu ité! —ehi oyeupe yuvireco.

³⁷ Ambuae rumo ipáhu pendar aipo ehi yuvireco:

—Co mbia omomahe vahe acoi mbia ndasesapisoi vahe, ¿ndoicatui chira píha Lázaro manoēhi ãgua mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvípave oviharêhisa pípe; ahe suvípa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepia, opa niha irungatu ari imanore —ehi.

⁴⁰ —¿“Che roroyase eve, Tüpa pírataa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoiyase omahe íva rese aipo ehi:

—Che Ru, “Avíye ndeu” ahe ndeu. Esepia, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ívi pípe yuvireco’ che yapave —ehi.

⁴³ Aipo ohe pare, oñehe pírata aipo ehi:

—¡Lázaro, esê eipeve sui! —ehi.

⁴⁴ Omano vahe evocoiyase osê voi opacatu turucuar omamasa reseve. Jesús evocoiyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pisi água yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipáhu pendar rumo moviro yuviraso voi ava fariseo rerecuareta uve sembiapo gomasu água. ⁴⁷ Evocoiyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu tiête ava viroyara yuvireco víña iyavei aviyeteramo mborerecuar Roma íguar yanduse, yugüerura yande tüparo mondurupa iyavei omocañi tēi uca aveira yande recua yande sui —ehi oyeupe yuvireco.

⁴⁹ Ñepeí rumo mbia ipáhu pendar Caifás serer vahe, ahe ité pahi eta rerecuar ívate catu vahe ahe araviter pípe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; avíye catura ñepeí mbia omanose yande recocuer rese, ndahei que opacatu yande mocañi tēi água —ehi omboetasa eta upe.

⁵¹ Ahe rumo ndahei oyesui tēi aipo ehi; Tüpa ité aipo ombohe uca. Esepia, ahe ité mborerecuar guasu chiní ahese. Sese aipo ehi: “Jesús omanora yande recocuer rese” ehi.

⁵² Iyavei ndahei chira ahe ava reseño, omanora opacatu ava Tüpa Rahír oñemosai tēi vahe ñepeí reseve imonuha água. ⁵³ Êgüe ehi ahe ari pípeve judío eta rerecuar oyemoingatupa voi yuca água yuvireco.

⁵⁴ Sese ndoguata iri ava judío eta páhu rupi. Ahe rumo osê ívi Judea sui, oso ívi iporupirēhi vahe rorovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo água, setá iteanga ava ambuae tecua rupindar yuviraso tecua Jerusalén ve oyeecocuer moatiro ahe pieta mboetei água renondeve. ⁵⁶ Oseca tēi Jesús yuvireco. Ipare tüparove yuviroiqueuse, oporandu-randu oyeupe yuvireco:

—¿Mara peye pe, oura píha pieta repia, aní chira tie? —ehi-ehi oyeupe yuvireco.

⁵⁷ Yípive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ípisi água” ehi yuvireco chupe.

12

Ñepeí cuña omondo Jesús rese mbahe síacua vahe

¹ Seis ari ipane vitese Pascua pieta água, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoiyase ocaru yuvinoi mesave ipiri. ³ Evocoiyase María güeru medio litro mbahe síacua vahe nardo, sepí iteanga vahe. Omondo ípi rese. Ipare oíquti ohavapri pípe ichui. Síacua iteanga evocoiyase opacatu oi pípe. ⁴ Evocoiyase ore mboetasa Judas Iscariote, ahe acoi omondo vaheerá ava yamotarēhimbar uve, aipo ehi:

⁵ —¿Mahera vo ndimondosai co mbahe síacua vahe tresciento denario rupi ava iparaisu vahe pítivii água? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporugá tēi. ⁷ Evocoiyase Jesús aipo ehi:

—Toyapoño cheu. Esepia, ahe che mano água renonde êgüe ehi cheu. ⁸ Yuvirecoveño itera ava iparaisu vahe pe páhuve yepi; che rumo ndaico pucu iri chira pe páhuve —ehi Judas upe.

Pahi rerecuar oyamotarēhi Lázaro yuvireco

⁹ Setá iteanga ava judío oyandu yuvireco Jesús rerãcua Betania ve secoise. Sese yuviraso aheve; ndahei Jesús repia güeraño yuviraso, êgüe ehi rumo imbogüerayevipri Lázaro repia avei. ¹⁰ Evocoyase pahí rerecuar, “Yayuca avei Lázaro” ehi yuvireco oyeupe. ¹¹ Esepia, ahe ichui tēi niha setá iteanga judío oyepepi pahí rerecuar sui Jesús roroya ägua yuvireco.

Jesús oi que Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota ägua ahe tecuave yuvireco. ¹³ Ahe se oyasia pindo yuvireco. Oyacatu viraso Jesús rovaichi ägua, osapucaí yuvireco chupe:

—¡Imboeteipri, sovasapri secoi ou vahe yande Yar Tüpa rer pipe! ¡Tüpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumí. Ipare oyeupi sese icuachiapri arachendar rupi tupri ité aipo ehi vahe:

¹⁵ “Pesiqüivei rene, Sión pendar; pesepia, pe rerecuar guasu guaricumí harive ou pēu” ehi.

¹⁶ Yipindar, ore semimbohe eta, ndorosenducuai eté co arachendar imombehupri. Ipare rumo oyevise güecosá porañetesave, ahe se oremahenduha arachendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayevisa osepia vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvínose voi sovaichi ipisi ägua. Esepia, oicua ité ahe mbahe poromondiisa guasu yapose yuvireco. ¹⁹ Evocoyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava uguata cūrítei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pähuve yuviraso vahe pieta repia Tüpa mboetei ägua tecua Jerusalén ve. ²¹ Ahe oyomboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoyase chupe aipo ehi:

—Oyepota ari cheundar che, Ava Riquehir, che yevi iri ägua che recua porañetesave.

²⁴ Supi eté aipo ahe pēu: inungar acoi trigo rãhii nañotisaise, ahe se ndihai chietera; ñotise rumo, ahe se iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evocoi nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroysar yuvirecoi vahe, ahe avei yuvirecoira che piri ivave. Che Ru Tüpa evocoyase omboeteira ahe sereco —ehi chupe.

Jesús omombehu omano ägua

²⁷ “¡Cūrítei ayandu ité mbahe-mbahe tēi oime vahe rã cheu! ‘¿Mara ahera pãha?’ ahe tēi. ¿Aipo ahera: ‘Che Ru, che pãsiro eve cūrítei cheu oime vahe rã mbahe tēi sui’ ahera viña? ¿Che rumo aicua evocoi nungarã ité ayu! ²⁸ Che Ru, emboyecua nde pãratasa nde rer porañetesava mboetei ägua” ehi oyeróqui.

Ichui oyeendu íva sui ñehesa aipo ehi vahe: “Êgüe ahe niha amboyecua che pãratasa vichico, êgüe ahe iri aveira” ehi.

²⁹ Aheve ava yuvirecoi vahe, “Osunu revo” ehi yuvireco viña; ambuae ava,

—Tüpa rembiguai revo oñehe Jesús upe —ehi yuvireco.

³⁰ Evocoyase aipo ehi ava eta upe:

—Ndahei cheundar ñehesa pesendu, ahe rumo pēundar. ³¹ Cūrítei oimera ñemoirosa co ivi pipendar ndache reroyai vahe upe, cūrítei avei imombosara Carugar co ivi pipendar imborerecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa pipe omboyecua tupri ité mara ehira omano. ³⁴ Aipo ihese ava eta aipo ehi: —Ore rumo orosendu mborocuaíta icuachiapri pipe aipo ehi vahe: “Poropãsirosar apirēhi vahe rã ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoyase aipo ehi ava upe:

—Pe pereco vitemira chíhi rupive tesapesa pe pähuve. Peguata catu supi seime viteseve. Aviyeteramo pe resapiha tēira pitumimbí vahe. Esepia, acoi uguata vahe pitumimbisa rupi, ndoicuai que güecosá. ³⁶ Peroya co tesapesa cūrítei pereco viteseve, ipipe ité pe reco ägua —ehi.

Aipo ohe pare, Jesús osé ava rehii pähu sui; ndoyemboyecua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tüpa ñehe mombehusar Isaiás rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde pîratasa eremboye-cuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaiás aipo ehi:

⁴⁰ “Tüpa nomboesapisoí ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera ägua” ehi.

⁴¹ Isaiás aipo ehi. Esepia, osepia ité Jesús reco porañetes. Evocoyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepi reseve yuvireco’ oya. ⁴³ Esepia, ahe oipota catu ava tēi suindar yemboeteisa Tüpa suindar yemboeteisa sui yuvireco.

Jesús ñehe reroyasa rese porandusara

⁴⁴ Yipindar rumo, Jesús oñehe vitese ava rehii upe, oñehe pîrata aipo ehi: “Acoi che reroyasa vahe ava, ndahei che güeraño che roroya, ahe rumo che Ru avei, che mbousar, viroya yuvireco. ⁴⁵ Iyavei acói che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar pîtumimbisave yuvirecoiñhi ägua. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi ägua, che rumo ayu ipisiro ägua. ⁴⁸ Acoi ava che reroiro vahe, ndoviroyai vahe avei che ñehe, oime rumo imocañi ägua: Co che ñehesa supi eté vahe reroyañehisa pipe oyemocañi ucara ari ipa vahe pipe. ⁴⁹ Esepia, che nañehei eté cheyusui tēi; che Ru, che mbousar rumo che cuai che ñehe ägua, che porombohe ägua avei. ⁵⁰ Che aicua co cheundar porocuaita güeru tecovesa apirñhi ava upe. Sese niha amombehu che Ru che cuaisa” ehi Jesús ava rehii upe.

13

Jesús oyosei güemimbohe pi

¹ Pascua pieta renonde Jesús oicua ité ohari yepota co ivi reya ägua oso vaheñä Vu piri. Ahe osaisu vahe ité ava oyeupendar co ivi pipe yepi. Ëgüe ehi saisu ari ipa vahe rupi.

²⁻⁴ Carugar oique ité Simón rahir, Judas Iscariote, piha pipe imondo ägua yamotarñimbar uve. Jesús rumo oicua ité Vu Tüpa sui ousa, oicua avei oyevi iri ägua Vu Tüpa piri iyavei Tu omondo opacatu omborecuasa chupe. Sese ocaruse güemimbohe eta reseve, mesa sui opüha, osequi oturucuar yohasa. Ipare omunde ambuae turucuar vumbicuasa rese. ⁵ Evocoyase imondo i yepoisa riru pipe, oyosei güemimbohe pi, omombiru turucuar vumbicuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cûritei. Ipare rumo eresenducua —ehi Pedro upe.

⁸ Pedro rumo aipo ehi chupe:

—¿Che pi rumo ndereyosei chietera! —ehi.

—Ndayoseise rumo nde pi, ndahei chietera evocoyase che rupindar ereico —ehi Pedro upe.

⁹ Pedro evocoyase aipo ehi:

—¿Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndayui oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatu rumo ëgüe peye —ehi.

¹¹ Ahe aipo ehi: “Ndaopacatu rumo ëgüe peye” ehi. Esepia, oicua ité uma omondora yamotarñimbar upe.

¹² Güemimbohe pi sei pare, omunde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepi-peí peyacatu peyosei aveira pe pi. ¹⁵ Che niha ‘na tēhi avei yuvireco’ viya opombohe pe rereco, ëgüe ahe pēu. ¹⁶ Supi eté aipo ahe pēu: ava mbuguai tēi, ahe ndahei ivate catu güerecuar sui; ëgüe ehi avei imboupri ndahei ivate catu secoi ombousar sui. ¹⁷ Pesenducua co nungar mbahe, peyapo tuprise, ahes peviharete catura peico —ehi.

¹⁸ “Che nañehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarñi’ ehi vahe.

¹⁹ Senondeve amombehu pëu. Evocoyase êgüe ehise ité cheu, che reroyara peye che ité niha aipo ahe vahe vichico. ²⁰ Supi eté aipo ahe pëu: acoi che remimondo oipisi tupri vahe, ahe che pisi tupri avei; acoi ava che pisi vahe, oipisi tupri avei che Ru yuvireco” ehi.

Jesús omombehu: “Ñepei pe pãhu pendar che mondora che amotarêhimbar upe” ehi

²¹ Aipo ohe pare, Jesús ndoyembovîhai eté iyavei mbahe oime vaherã omboyecua tupri ité,

—Supi eté aipo ahe pëu: ñepei pe pãhu pendar che mondora che amotarêhimbar upe — ehi.

²² Evocoyase ore oromahe-mahe tēi oreyses, “¿Ava upe pãha aipo ehi?” orohe tēi oreyeupe. ²³ Che sembiaisu catu yípive acaru vîte. ²⁴ Ipare Pedro oyaiti-iti ‘¿Ava upe vo aipo ere? tehi chupe’ oyapave cheu. ²⁵ Evocoyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶ Ahe aipo ehi cheu:

—Cūrîtei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscariote rahir, Judas, upe. ²⁷ Judas oipisise pan, oguapi voi eté Carugar sese. Evocoyase aipo ehi Judas upe:

—Evocoi ereyapo pota vahe, eyapo voñño ité ru —ehi chupe.

²⁸ Que ñepei rumo mesave orocarú vahe, ndorosenducuai eté aipo ihesa. ²⁹ Esepia, Judas guarepochi riru rãrosar secói yepi. Sese amove ore pãhu pendar ipihañemoñeta: “Tererocua mbahe pietase nara” anise, ‘emondo mbahe ava iparaisu vahe upe nara’ aipo oya revo omose imondo” ehi yuvireco chupe viña.

³⁰ Pan pisi pare, Judas osē voi eté oso pītuse.

Porocuita ipiasu vahe

³¹ Judas sē pare, Jesús aipo ehi:

—Cūrîtei oyecuará che, Ava Riquehir, reco porañetesa. Che Ru Tūpa reco porañetesa avei oyecuará che rese. ³² Acoi amboyecuase che Ru Tūpa reco porañetesa, ahe avei omboyecuará che reco porañetesa, êgüe ehira imboyecua pãhaivi. ³³ Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴ Sese co amondo porocuita ipiasu vahe pëu ñepei-peí peyeaisu água inungar che opoaisu. ³⁵ Peyeaisuse ñepei-peí, opacatu tupri ité ava oicuará yuvireco che remimbohe supi eté pe recosa —ehi.

Jesús, “Ndaicuai eté co mbia’ erera cheu” ehi Pedro upe

³⁶ Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyevî Pedro upe:

—Cūrîtei ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cūrîtei voi ndiyai nde rupi che so água? ¿Ayemoingatu ité amano vaherã nde rese! —ehi Pedro chupe.

³⁸ —¿Supi eté pãha ereyemoingatu ité che rese nde mano água? Nde rumo cōhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tūpa raper yandeu

¹ Ipare Jesús aipo ehi opacatu oreu: “Pepihañemoñeta atí rene; peyeroya Tūpa rese, che rese avei peyeroya. ² Esepia, che Ru rêtave setá oime pe reco água; êgüe ndehise rumo, namombehui chira aipo pëu viña. Sese che asora pe recuarã moingatu. ³ Imoingatu pare ayevíra pe reca che recosave pe reraso água cheyepiri. ⁴ Pe peicua que vo asora iyavei peicua mara peyera pe yepota água che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so água? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cūrítei suive rumo peicua, pesepia avei cute —ehi oreu.

⁸ Evocoyase Felipe aipo ehi chupe:

—Che Yar, torosepia ité ru aipo nde Ru. Ahese aviýera oreu —ehi.

⁹ —Felipe, setá ari aico pe rese, ¿ndapeicua vîtei eté vo che recocuer? Acoi ava che repia vahe, ahe osepia ité che Ru; ¿mahera ru evocoyase, “Torosepia rane ité nde Ru” ere vîte cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise?

Opacatu mbahe amombehu vahe pëu, ndahei cheyesui tēi amombehu. Che Ru seci vahe che rese, ahe ité oyapo güemimbotar che recocuer rese —ehi—. ¹¹ Che roroya peye che Ru rese che recose, ahe avei secoise che rese. Anise, che reroyañomi tēi catu peye mbahe che rembiapo rese —ehi—. ¹² Supi eté aipo ahe pëu: acoi ava che roroya vahe, ahe avei oyapora mbahe che rembiapo nungar, tuvicha catura rumo. Esepia, che asora che Ru piri —ehi—. ¹³ Acoi peporanduse que mbahe rese che rer pipe, che amondoño itera pëu. Ipípe che amboyecuara che Ru reco pīratasa. ¹⁴ Che ayapora que mbahe che rer pipe pe porandusa —ehi oreu.

Jesús, “Che amboura Espíritu Santo pëu” ehi viroyasar upe

¹⁵ “Che raisuse ité peye, pemboyeroya catu che porocuita. ¹⁶ Che aporandura che Ru upe ombou vaheerā Espíritu supi eté vahe pe pītívii āgua, ahe seci vaheerā ité pe rese. ¹⁷ Ava Tūpa ndoicuai vahe rumo, ndoicatu chietera ipisi. Esepia, ndosepia, ndoicuai avei yuvireco. Pe rumo peicua ité. Esepia, ahe ité seci pe rese. Ipape oi que itera pe piha pipe.

¹⁸ “Ndopoyai chira pe güeraño tēi; ayevira niha pe rese aico vaheerā. ¹⁹ Chīhi tēi oime vite ari che reroyasarēhi che repia vite vaheerā yuvireco. Ipape rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰ Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹ Acoi oicua vahe che porocuita, omboyeroya vahe avei, ahe omboyecua ité che raisusa yuvireco. Che Ru osaisura che raisusar; che avei asaisura, ayemboyecua aveira chupe” ehi.

²² Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboyecuara; mahera ru ndereyemboyecua iri chira ava nde reroyasarēhi upe? —ehi chupe.

²³ Evocoiyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoiyase osaisura iyavei che Ru reseve oroyura oroico vaheerā sese. ²⁴ Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵ “Pe rese che reco vītese, opa co mbahe amombehu vichico pëu. ²⁶ Espíritu Santo rumo, Poropītíviasar, che Ru ombou vahe che rer pipe, ahe pe mbohera opacatu mbahe aviye vahe rese. Pe momahenduha aveira opacatu pëu che ñehe agüer rese.

²⁷ “Aseyateco tuprisa pëu, ahe che reco tuprisa; ndahei rumo avañi tēi rembiapo nungar amondo pëu. Aní, ¿Mara yahera piha? peyera; aní chiveira pesiquiye. ²⁸ Pesendupa niha acoi, ‘Asora, ipape ayevi irira pe rese aico vaheerā’ che hesa. Supi eté che raisuse peye, pevihaterera peicuase che Ru piri che sosa. Esepia, ahe ivate catu vahe ité che sui. ²⁹ Sese amombehu va voico mbahe tenondeve pëu, ēgüe ehise ité, ahese peroyara.

³⁰ “Namombehu pucu iri chira mbahe pëu. Esepia, ou ité co ivi pipe oporocuai tēi vahe. Ahe rumo ndahei ivate catu vahe che sui ³¹ ‘toicua ava che reroyasarēhi che Ru raisusa yuvireco’ che hesa pipe. Ayapoño ité che Ru che cuaita.

“Pepūha. Yaso cohava sui” ehi güemimbohe eta upe.

15

Jesús uva hi nungar

¹ Ipape Jesús oñehe iri oreu aipo ehi: “Che aico inungar uva hi supi eté vahe; che Ru evocoiyase inungar sese ihañeco vahe seci. ² Ahe oyasia sāca ndihai vahe ichui yepi; iha vahe rumo omoatiro tupri iha catu āgua. ³ Pe pe recocuer imoatiropri ité che pe mbohese pipe. ⁴ Peicoño ité catu che rese inungar che aicoño ité avei pe rese. Uva rāca oise ohí sui, ndiha iri ahe ae tēi; pe avei ēgüe peyera peyepépise che sui” ehi oreu.

⁵ “Che niha uva hi nungar aico; pe evocoiyase sāca nungar peico. Acoi seci vahe che rese, che avei aico sese. Inungar mbahe miti iha ati vahe, ēgüe ehira ahe. Supi eté ndapeicatu chietera che porēhi mbahe apo. ⁶ Acoi ndasecoi vahe che rese, ahe imombosara inungar acoi uva rāca yipi vahe. Ipape imonuhasa sapi āgua” ehi oreu.

⁷ “Pe peicoñose ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoiyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroysa che porocuita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pëu ‘tovireco che vihasa oyese yuvireco’ viya; ‘toyemboviharere catu yuvireco’ che hesa pipe. ¹² Co che porocuita: Peyeaisu ñepeipei, inungar che opoaisu.

¹³ Ndipoi eté que poroaisusa ivate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemofñetasa. Sese, ‘Che mboripar’ ahe pëu. Esepia, aicua ucapa ñehesa che Ru cheu omombehu vahe pëu. ¹⁶ Pe niha ndache poravoi peye. Che rumo opoporavo iyavei opocuai peporaviqui vaherã ava reru ãgua cheu ‘che rese ité toyuvirecoi’ che yapave. Evocoyase che Ru omboura mbahe pe porandusa che rer pipe pëu. ¹⁷ Co rese opocuai: Peyeaisu catu ñepepe-peyacatu” ehi Jesús güemimbohe upe.

Jesús amotarëhimbar; supindar amotarëhimbar avei

¹⁸ “Acoi ava ndoicuai vahe Tüpa pe amotarëhise, peicuaño che rane che amotarëhi yuvireco yipindar. ¹⁹ Pe peico vitese ava Tüpa ndoicuai vahe pähuve, evocoyase pe raisu aira yuvireco viña. Che rumo opoporavo ipähu sui yuvireco. Sese tēi ndape ambota iri yuvireco. Esepia, pe ndahe iri ipähu pendar peico. ²⁰ Peyemomahenduha pëu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarëhimbari aico, pe avei pe amotarëhira yuvireco. Acoi omboyeroya vahe rumo che porombohesa, pe porombohesa avei omboyeroya yuvireco. ²¹ Co opacatu mbahe che recocuer sui tēi ãgüe ehira pëu. Esepia, ndoicuai niha che mbousar yuvireco.

²²⁻²⁴ “Che ndayuisse ahe ava upe mbahe sembiavi mombehu viña, evocoyase, ‘Peyavi mbahe’ ndehi chira Tüpa chupe yuvireco viña. Che rumo ayu ité, amombehu mbahe sembiavi yuvireco chupe, ayapo avei mbahe ava ndoyapoi vahe yuvireco ipähuve; ahe rumo yepe osepia co mbahe yuvireco viña, che amotarëhiño, che Ru avei oyamotarëhi yuvireco. Sese, ‘Pereco ité mbahe pe rembiavi peyese’ ehi Tüpa chupe. Esepia, acoi che amotarëhi vahe, che Ru avei oyamotarëhi yuvireco. ²⁵ Co rumo ãgüe ehi. Esepia, imboaviyesa rane itera ñehesa sendar icuachiapri pipe aipo ehi vahe: ‘Mbahe apoñhi pipe sui tēi che amotarëhi yuvireco’ ehi vahe.

²⁶ “Acoi ambouse rumo Poropitiviisar, Espiritu supi eté vahe che Ru sui pëu, ahe omombehura che recocuer. ²⁷ Pe avei pemombehura che recocuer. Esepia, yipisuive ité peico che rupi” ehi.

16

¹⁻² “Pe mocañehi ãgua che rese pe yeroyasa aipo ahe opacatu co mbahe imombehu pëu: pe mombora judío rerecuar ofñemonuhasa sui yuvireco, pe yuca aveira yuvireco. Ahe rumo omohara, ‘Tüpa uve nara revo na yahe’ ehira yuvireco viña. ³ Evocoi rumo ãgüe ehira yuvireco che Ru cuañhi pipe iyavei che cuañhi pipe yuvireco. ⁴ Amombehu aipo pëu acoi ãgüe ehise, peyemomahenduhara che remimombehugüer rese.

Espiritu Santo rembiapo

“Yipisuive rumo namombehui co mbahe pëu. Esepia, aicoveño ité pe rese. ⁵ Cüritei rumo asora che mbousar piri iyavei ndipoi que ñepepe pe pähu pendar ‘¿que vo aipo eresora?’ ehi vahe cüritei cheu. ⁶ Pe rumo ndapeyembovihaiño aipo mbahe amombehuse pëu. ⁷ Supi eté rumo aipo ahe pëu: aviye catura pëu che asose. Esepia, ndasoise viña, ndou chietera pe rese Poropitiviisar. Asose rumo, che amboura pëu. ⁸ Ouse ahe, oicua ucara ava che cuañhisar upe yangaipa, oicua uca aveira tecocuer ñvisa iyavei cañisa ndaseco pōrai vahe upendar. ⁹ Oicua ucara yangaipa chupe ndache reroyaise yuvireco; ¹⁰ oicua rumo che reco ihñi tupri vahe yuvireco. Esepia, asora che Ru recosave, ahese pe ndache repia iri chietera peye; ¹¹ iyavei oicua Tüpa poromocañisa. Esepia niha, Carugar, ahe co ivi pipendar rerecuar oipisira che Ru Tüpa ñemoirosa.

¹² “Setá iteanga mbahe oime amombehu vaherã pëu. Pe rumo ndapeicatu chira cüritei senducua. ¹³ Ouse rumo Espiritu supi eté vahe, ahe pe mbohera mbahe supi eté vahe rese. Esepia, noñehi chira oyesui tēi, ahe rumo omombehura mbahe osendu vahe güeraño, oicua uca aveira mbahe coipe oime vaherã. ¹⁴ Ahe che mboeteira. Esepia, oicua ucara opacatu mbahe cheundar pëu. ¹⁵ Opacatu mbahe che Ru vireco vahe, che mbahe. Sese niha, ‘Espiritu oipisira opacatu mbahe cheundar, oicua uca aveira pëu’ ahe.

¹⁶ “Aviyeteramo tēi ndache repia iri chira peye. Ipare rumo coipe catumi che repia irira peye” ehi oreu.

Yepe semimbohe ndovihai chira viña, coipe catu rumo oviharetera yuvireco

¹⁷ Evocoyase ore oroporandu-randu tēi oreyeupe aipo orohé:

—¿Mara oya pñha: ‘Aviyeteramo tēi ndache repia iri chira peye’ ehi yandeu; ipare rumo aipo coipe catumi yasepiara iyavei aipo osora Vu piri no? ¹⁸ ¿Mara oya vo aipo: ‘Aviyeteramo tēi’ ehi? Ndayasenducuai mo aipo ñehesa —orohé oreyeupe.

¹⁹ Ipare rumo ‘oporandura co mbahe rese yuvireco cheu’ oya aipo ehi voi oreu:

—¿Ipare rumo coixe catumi che repia irira peye’ che he agüer rese co pe porandu vite peyeupe? —ehi—. ²⁰ Supi eté aipo ahe pëu: peyasehora pe viharêhisa pipe, ava angaipa viyar rumo ovihareteñora yuvireco. Yepe pe, ndapevîhai chira viña, coixe catu rumo pevîharetera. ²¹ Inungar acoi que cuña imembîra potase, tasi chupe oyepotase ari imembîra âgua; pîtani oha pare rumo, nimahenduha iri tasicuer rese; soriveteño omembri rese. ²² Êgüe peye avei; pe cûritei tasi avei pëu, avevi irira rumo pe repia âgua, ahese pevîharetera. Ahe viharetesa ndipoi chietera que ava viroca vaheerâ pe sui.

²³ “Ahe ari pipe, ndapeporandu iri chietera mbahe rese cheu. Supi eté aipo ahe pëu: che Ru omboura opacatu mbahe pëu che rer pipe peporanduse. ²⁴ Cûritei rumo ndapeporandu vitei mbahe rese che rer pipe. Peporandu catu sese, ahese peipisira. Ipipe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pëu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pëu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayerquirâ pe rese che Ru upe’ ndahei pëu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tûpa sui che yuse peye. ²⁸ Asê che Ru sui co ivi pipe vîtu; cûritei rumo asepara co ivi, avevira che Ru upe” ehi oreu.

²⁹ Evocoyase ore aipo oroho chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoyase ndiya iri ore porandu âgua mbahe rese ndeu. Sese oroviroya Tûpa sui nde yusa —oroho chupe.

³¹ —¿Evocoyase che reroya ité peye? —ehi—. ³² Supi eté oyepota ari cute, co pipe ité peyemosaipara che sui; che reyara che aemi peye. Ndahei rumo che ae aico. Esepia, che Ru seci che rese. ³³ Amombehu co opacatu pëu che rese mbahe tupri pipe pe reco âgua. Peparaisu itera co ivi pipe; peyemonguerêhi catura rumo. Esepia, che opa ité asecoi co ivi pipendar mbahe tēi —ehi.

17

Jesús oyerokuî güemimbohe rese

¹ Aipo ohe pare, Jesús omahe iva rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mboreteña âgua opacatu ava ivi pipendar harive iyavei tecovesa apirêhi mondo âgua opacatu ava nde cheu erembou vahe upe. ³ Co niha tecovesa apirêhi, tandê cua nde Tûpa ñepi supi eté vahe nde recose yuvireco, tache cua avei nde che mbouse yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cûritei che reco porañete âgua, inungar acoi yipendar areco vahe nde rese ivi apohiseve.

⁶ “Co nde rembiporavo ava co ivi pipendar pãhu sui erembou vahe cheu; orocua ucapa chupe. Yipendar ndeundar yuvireco. Ipare nde erembou cheu. Ahe viroya ité nde ñehe yuvireco. ⁷ Cûritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

⁹ “Che ayeroqui cheu nde remimbou rese ndeu. Esepia, ndeundar ité yuvireco; ndayeroqui rumo ambuae ava che reroyasarêhi rese. ¹⁰ Opacatu ava cheundar, ndeundar avei; ndeundar evocoyase cheundar. Ahe sese che reco porañetesâ oyecua.

¹¹ “Che ndapitai chira co ivi pipe; ahe rumo opitara cohave yuvireco. Che evocoyase asora nde piri. Che Ru, seco maranehi vahe, esâro nde pîratasa pipe nde remimbou cheu oyese yuvirecoi tupri âgua inungar yande yaico. ¹² Aicose co ivi pipe, asâro tupri nde rer pîratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepi ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité êgüe ehi.

¹³ “Cûritei asora nde recosave. Co ivi pipe che reco vîtese rumo, amombehu co mbahe chupe ‘tovireco che viharetesa yuvireco’ che yapave. ¹⁴ Che niha amombehu nde ñehe yuvireco chupe. Ava che reroyasarêhi rumo oyamotarêhiño yuvireco. Esepia niha, ndahe iri Carugar povri pendar yuvirecoi inungar che ndahei ipovri pendar aico. ¹⁵ ‘Enose ava Carugar povri pendar pãhu sui’ ndahei ndeu, che rumo aipota eresepira Carugar sui. ¹⁶ Inungar che ndahei Carugar povri pendar aico, êgüe ehi avei ahe yuvireco. ¹⁷ Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. ¹⁸ Inungar nde che mbou eve ava co ivi pipendar pãhuve, êgüe ahe avei

che imondo ava pãhuve yuvireco. ¹⁹ Amondo ité che recocuer ndeu nara ‘toyemondo catu yuvireco chupe co ñehesa supi tupri vahe reroya pipe’ viya.

²⁰ “Ndayeroqui co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherã rese. ²¹ Aporandu avei ndeu toyuvirecoi tupri ité yuvireco oyese inungar ñepe vahe, êgüe tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. ²² Che reco porañetesa nde erembou vahe cheu, ahe tupri avei amondo yuvireco chupe ñepe vahe nungar yuvirecoi ãgua, inungar yande ñepe vahe yaico. ²³ Che aico yuvireco sese, nde evocoyase ereico che rese ahe yuvirecoi tupri ãgua inungar ñepe vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

²⁴ “Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherã teco porañetesa cheu erembou vahe yuvireco. Nde niha yipive ité che raisu eve ivi apõhiseve. ²⁵ Che Ru, seco catupri vahe, ava co ivi pipendar tẽi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoyase nde che raisusa toviroco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rãta, ipipe Jesús ore reroi que ore reraso. ² Iyavei Judas omondo vaherã yamotarẽhimbar upe oicua avei aheve secosa. Esepia, setã rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tũparo rãrosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuvirasos. ⁴ Yipive ité rumo oicua oyeupe mbahe oime vaherã. Sese osẽ voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipãhuve secos imondo ãgua yamotarẽhimbar upe. ⁶ “Che niha ahe aico” ehise ava upe; guaquicuei coti pãve opa oviapi yuvireco. ⁷ Evocoyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pẽu —ehi—. Che che recase peye, pepocoi rene catu co ambuae rese, toyuvirasosapaño —ehi.

⁹ Co rumo iñehẽ mboaviye ãgua êgüe ehi: “Acoi che Ru ombou vahe cheu, nocañi eté que ñepe che sui” ehi. ¹⁰ Evocoyase Simón Pedro vireco vahe quise, vinose, oyasia Malco serer vahe nambi yasú cotindar, ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosañi itera chupe —ehi.

Jesús serasosa mborerecuar Anás rovai

¹² Evocoyase sundao rerecuar, osundao eta reseve iyavei judío tũparo rãrosar oipisi Jesús yuvireco, oipocua. ¹³ Yipindar viraso Anás rãtave yuvireco. Esepia, ahe Caifás rovayar. Ahe araviter pipe aipo Caifás pahi eta rerecuar ivate catu vahe secos. ¹⁴ Caifás ité aipo ehi omboetasa upe: “Yandeu aviye catu itera que ñepe mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rãta pipendar opa ité che cua yuvireco. Sese aiqueño ité Jesús raquicuei mborerecuar rãtave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoyase asẽ, aporandu oquendipi rãrosar uve Pedro reique ãgua rese. ¹⁷ Evocoyase oquendipi rãrosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rãrosar upe.

¹⁸ Sõhisã iteanga ahe pĩtu pipe. Evocoyase mborerecuar rembiguai iyavei sundao eta oyatapĩ yuvireco oyepehe ãgua. Pedro avei aheve ipãhuve oyepehe tata ipive ohã.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tũparo guasu pipe avei. Indó, che nañemi eté añehe vaherã. ²¹ ¿Mahera vo evocoyase cheu tẽi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoyase omboyevi ahe mbia upe:

—Añehese mbahe tẽi rese, emombehu che ñehe raisa; che rumo añehe tupri ité, ¿mahera vo evocoyase che rovapete eve? —ehi.

²⁴ Evocoyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepheño vite ohã tata ipive. Aheve aipo ehi yuvireco chupe:

—¿Ndahei vo nde ité evocoi ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipape mbia pahi rerecuar ivate catu vahe rembiguai, inambi asiapri mu aipo ehi chupe:

—¡Aviye acoi nde ité oroepia vahe mbahe miti rëta pipe supi! —ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoyase viraso Jesús Caifás rëta sui Roma pendar mborerecuar guasu recosave yuvireco. Cõhe potase ëgüe ehi. Judío rumo ndoyuviroiquei eté mborerecuar recosave oyemboangaipaëhi ãgua. Esepia, ahe icuaita yuviroiqueese, ndiyai chietera Pascua resendar ovesa roho hu ãgua yuvireco chupe viña. ²⁹ Sese Pilato osẽ ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoyase aipo ehi ava upe:

—Peraso, pe ae peyapo mbahe pẽundar ité porocuita rupi sese —ehi.

Judío rerecuar evocoyase omboyevi yuvireco:

—Ore judío oroico vahe upe rumo ndipotasai oroyuca vaherã que ava —ehi.

³² Ëgüe ehi Jesús ñehe imano ãgua resendar yaviye. ³³ Ahese Pilato oi que iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarẽhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherã niha che aha co ivi pipe mbahe supi eté vahe mombehu ãgua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo õhe pare, Pilato osẽ iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepei ava soquendapri Pascua pieta pipe yepi; ¿peipota amose vaherã judío rerecuar? —ehi.

⁴⁰ Aipo ihese, opacatu osapucaí piratá yuvireco aipo ehi:

—¡Evocoi aní! ¡Barrabás catu emose! —ehiño yuvireco.

Barrabás rumo imonda rai vahe secoci.

19

¹ Evocoyase Pilato oporocuai Jesús nupa água. ² Sundao eta omonde ñaca rese yu piapri iyavei omboyemonde turucuar pĩraumbi vahe pipe yuvireco. ³ Ipare oyemboya sese aipo ehi:

—¡Imboeteipri judío Rerecuar tasecoi! —ehi angahu sovapete-pete yuvireco.

⁴ Pilato evocoyase osê iri ava upe aipo ehi:

—Pesepia, anose pẽu pe icua água che ndayosui eté mbahe sembiavi —ehi.

⁵ Evocoyase vinose yu piapri oãca rese turucuar pĩraumbi vahe reseve senoha ava upe. Aheve Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucái:

—¡Tayaticasa! ¡Tayaticasa! —ehi pãve voi yuvireco chupe.

Pilato evocoyase aipo ehi ava upe:

—Peraso, peyatica pe ae. Esepia, che ndayosui eté mbahe sembiavi —ehi.

⁷ Judío rerecuar rumo omboyevi yuvireco:

—Ore rumo orovireco mborocuaíta. Ipipe omanoño itera. Esepia, oyeapo tẽi Tũpa Rahir —ehi yuvireco.

⁸ Aipo ñehesa renduse, Pilato oyembosiquiyé catu. ⁹ Viroique iri oi pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté ñehhe chupe. ¹⁰ Evocoyase Pilato aipo ehi chupe:

—¡Mahera ndereñehi eté cheu! ¿Ndereicuai vo che mborerecuar aico nde atica uca água, mbahe tẽi sui nde renose água avei? —ehi Pilato chupe.

¹¹ —¡Aní! Ndererecoi chietera nde mborerecuasa che harive Tũpa nombouise ndeu viña. Sese niha ava che mondosar ndeu oyemboangaipa catu nde sui yuvireco —ehi Pilato upe.

¹² Ahe ramoseve, Pilato osãha iri tẽi Jesús renose água; judío rerecuar rumo osapucái volño yuvireco chupe:

—¡Acoi eremosese co mbia, ndahei chietera nde mborerecuar ivate catu vahe mboripar ereico! ¡Opacatu oyemborerecua tẽi vahe, ahe evocoyase mborerecuar ivate catu vahe amotarẽhimbar tẽi yuvirecoi! —ehiño yuvireco chupe.

¹³ Evocoyase Pilato osenduse aipo ihesa, vinose uca Jesús ocarve, oguapi mborerecuar guasu renda harive. Ahe mbahe rese porandusa rer hebreo ñehhe pipe Gabata ‘ita apopri’ oya. ¹⁴ Mbit̃er arí Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucái pĩratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.

Pilato rumo aipo ehi chupe:

—¿Evocoyase ayatica ucara pe rerecuar? —ehi.

Pahi eta rerecuar rumo omboyevi yuvireco chupe:

—¡Ore ndorovireco iri ambuae mborerecuar, Roma pendar mborerecuar ivate catu vahe güeraño ité orovireco! —ehi yuvireco.

¹⁶ Ipare Pilato omondo sundao upe yatica uca água. Ichui viraso yuvireco.

Jesús yaticasa curusu rese

¹⁷ Evocoyase Jesús vinose curusu seraso “Ava Ñcagüer” serer vahesave (ahe serer hebreo ñehhe pipe Gólgota). ¹⁸ Aheve oyatica yuvireco. Seseve avei oyatica ñuvirío ava yuvireco, ñepeí-peí yique ivíi. ¹⁹ Pilato oicuachía uca omondo curusu rese aipo ehi vahe: “Co Jesús, Nazaret pendar, judío Rerecuar guasu” ehi. ²⁰ Setá iteanga ava oyoerqui co icuachiapri rese yuvireco. Esepia, icuachiasa hebreo, latín iyavei griego ñehhe pipe. Iyavei yaticasa namombriimi eté tecua sui. ²¹ Sese pahi eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo, ‘Oyeapo pota tẽi vahe judío Rerecuar guasu’ erera icuachía imoi —ehi yuvireco chupe.

²² Pilato rumo omboyevi:

—Co aicuachía vahe, ãgüe ehiño itera oĩ —ehi.

²³ Jesús atica pare evocoi irungatu sundao, omonuha iturucuar oyeupe imboyaho água yuvireco. Oipisi avei iturucuar ivri pendar nimbovisai vahe, ñepeí reseve pucuño tẽi vahe. ²⁴ Sundao eta aipo ehi oyeupe yuvireco:

—Yamondoro eme; aviye catu yandeguayíño sese, ¿ava ité pĩha oipisira? —ehi yuvireco.

Ègüe ehi icuachiapirer imboaviye yuvireco aipo ehi vahe: “Omboyaho-yaho ava che turucuar iyavei iguayí yuvireco sese” ehi vahe. Supi tupri ité ègüe ehi sundao yuvireco.

²⁵ Curusu ivipive yuvirecoi ichi, ichi cupihir, María Cleofas rembireco, María Magdalena avei. ²⁶ Osepiase osi iyavei che repiase yipive, che güembiaisu, aipo ehi osi upe:

—Che si, evocoi nde membirã ererecora —ehi chupe.

²⁷ Ipare voi aipo ehi cheu:

—Evocoi nde si —ehi.

Ichuive tupri amoingue ichi che rêtave asãro vaherã.

Jesús mano agüer

²⁸ Ipare Jesús oicua ité Vu remibotar yaviyepa iyavei icuachiapirer mboaviye ãgua aipo ehi:

—Che husei —ehi.

²⁹ Aheve oime mbahe riru. Ipipe savapipo vinagre oĩ. Co vinagre pipe omoaqui mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepeí ari Pascua pieta uve ipane vahe pipe aipo ãgüe ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rêtima mope ãgua ‘tomano’ oyapave curusu sui setecuer reroyipa ãgua yuvireco. ³² Evocoyase sundao yuvirasopa ñuvirío mbia Jesús rese yaticasa vahe yuvireco. Ahe sêtima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sêtima yuvireco.

³⁴ Ñepeí sundao rumo oicutu yiqueve lanza pipe. Ahe ramoseve voi osẽ suví, i reseve. ³⁵ Che asepia vahe ité; supi eté aipo ahe. Evocoyase amombehu pëu pe seroya ãgua. ³⁶ Esepia, co mbahe ãgüe ehi icuachiapirer mboaviye ãgua aipo ehi vahe: “Ndimopesai chietera que ñepeí icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögüer reraso ãgua rese. José aipo Jesús rupindar. Ndoyecua ucai rumo omboetasajudío eta upe pahí rereciar sui osiquiyepave. Pilato evocoyase, “Aviye, eraso” ehi chupe. Evocoyase José oso viraso sehögüer. ³⁹ Nicodemo avei oipitívii, acói oso vahe Jesús upe pituse. Ahe güeru mbahe siacua vahe mirra, ãloe rese oyeseha vahe, treinta kilo, sehögüer rese nara. ⁴⁰ Ëgüe ehi José, Nicodemo reseve viraso sehögüer yuvireco iyavei oimama tupri turucuar secose vahe imoiacuapri pipe yuvireco. Ëgüe ehi judío oyapo ava omano vahe tí ãgua yuvireco yepi. ⁴¹ Namombrii Jesús aticasa sui oime mbia remiti rëta. Aheve ité oime tuvipa ita hopri, ipiasu vahe iporupirëhi. ⁴² Ipipe omoingue Jesús rehögüer yuvireco. Esepia, ahe tuvipa cõimi eté ichui iyavei vïrovi ité judío pituhusa ari.

20

Jesús cuerayevisa

¹ Domingu pipe María Magdalena oso tuvipave pïtu vitemiseve. Ahe osepia ita tuvipa rovapisa ndahe irise güendave ihãi. ² Evocoyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoyase Pedro rese oroña oroso tuvipave. ⁴ Che rumo aña catu Pedro sui. Che rane evocoyase ayepota tuvipave. ⁵ Aiviro tõi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tõi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoyase che avei aique; asepia ãgüe ehi vahe. Ahe se aroya voi eté. ⁹ Ore rumo ndorosenducua vitei eté icuachiapri: “Ocuereyevira omano vahe pãhu sui” ehi vahe. ¹⁰ Ipare oroyevipa oroso ore rêtave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tüpa rembiguai iturucuar morochí vahe oguapi yuvinoi sehögüer rupagüerve. Ñepeí oguapi oĩ ñaca rupagüer coti, ambuae ipi rupagüer coti. ¹³ Ahe Tüpa rembiguai oporandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögüer viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoiyase oporandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti rēta rārosar revo’ oya viña, aipo ehi chupe:

—Nde ererasose sehögüer, emombehuñomi tēi cheu que vo eremondo. Aheve taso seca —ehi chupe.

¹⁶ Evocoiyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoiyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyeupira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoiyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboyecua güemimbohe upe

¹⁹ Ahe ari pipeve, domingu pipe, pütuse, ore ore ñemonuhasave oroyeoquenda tupri judío rerecuareta sui ore siquiypave. Ahese Jesús oi que ore pāhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboyecua opo, oi que avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ēgüe ahe aveira co che pēu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisii chira ñeroisa —ehi oreu.

Tomás osepia yande Yar icuerayevise

²⁴ Ñepeí ore mboetasa rumo Tomás icōi vahe, ndipoi eté ore pāhuve Jesús oyemboyecua oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuã quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho ari pare, ore oroñemonuha iri oi pipe oroico. Aheve ramo Tomás secoi ore pāhuve. Yepe oroyeoquenda tupri ité viña, Jesús rumo oi queño ité ou ore pāhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoiingue nde cuã quiravo cuarerve; embou ave nde po, emoiingue avei che ique cutu agüerve. “Tachequerēhi eme seroya āgua” nderei chira cheu; ¡che roroya eve! —ehi.

²⁸ Evocoiyase Tomás aipo ehi:

—¡Che Yar Tūpa! —ehi chupe.

²⁹ Ahese aipo ehi Tomás upe:

—¿Cūritei che roroya che repiase eve cute? ¡Aviye catu ava che repiaēhi pipe che roroya vahe! —ehi chupe.

Co icuachiapri Jesús roroya āgua

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘toviroya Jesús, Poropisirosar, Tūpa Rahir secosa; ipipe tovirico tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahir oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pĩtu pipe rumo ndorombohai eté pira. ⁴ Cõhe potase rumo, Jesús oyemboyecua imbehĩ ivĩ. Ore rumo ndoroicuai eté Jesús secose. ⁵ Evocoiyase aipo ehi oreu:

—Mbia chĩhivahe, ¿ndapembohaimi eté pira? —ehi.

—Aní eté —orohe chupe.

⁶ Evocoiyase aipo ehi:

—Pemondo pira mbohassa ive pe asu coti. Ahese pembohara —ehi.

Ēgũe orohe, ipare voi, “¡Too!” orohe, ndorovinose catui eté ipi sui pira mbohassa oroico. Esepia, savapipo tupri ité pira ipipe. ⁷ Evocoiyase che, sembiaisu, aipo ahe Pedro upe:

—¡Yande Yar niha evocoi! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. ⁸ Ore evocoiyase oroviroyepota ité carite ndatipiĩmisave, oroichoho pira rehĩ imbohassa pipe seraso, cien metro tẽi oroico imbehĩ sui. ⁹ Orovinosese ivi ãtasave, orosepia tãtãpiĩ harive pira, pan reseve.

¹⁰ —Peru moviro evocoi pira penose ramo vahe —ehi oreu.

¹¹ Evocoiyase Simón Pedro oha carite pipe, oichoho ndatipiĩsive pira guasu rehĩ imbohassa pipe, ciento cincuenta y tres tupri; yepe setá viña, imbohassa rumo ndosoroĩ eté.

¹² Evocoiyase aipo ehi:

—Perio, tapecarumi rane —ehi oreu.

Ndipoi eté que ñepeĩ ore pãhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, ěgũe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuerayevire.

Jesús osecoãha Pedro

¹⁵ Ore caru pare, Jesús oporandu Simón Pedro upe:

—Simón, Juan rahĩ, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroia ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahĩ, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esãro tupri che reroiyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahĩ, ¿che raisu vo eve? —ehi.

Aipo oyeupe hese, Pedro ndoyembovĩhai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tupri catu che reroiyasar rese —ehi—. ¹⁸ Supi eté aipo ahe ndeu: nde chĩhivahe catu vitesse, ereyemonde vite nde ae, ereguata vite avei nde remimbotar rupi; nde cuacua catuse rumo, ereyeyivamoatara, ambuae evocoiyase nde mboyemondera, nde reraso aveira nde so potaẽhisave —ehi.

¹⁹ Jesús rumo omboyecua aipo ohe pipe mara ehira Pedro omano Tũpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yĩpive aĩ acoi aporandu chupe: “Che Yar, ¿ava vo nde mondora nde amotarẽhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evocoi no, ¿mbahe oimera chupe? —ehi cheu.

²² Evocoiyase omboyevĩ Pedro upe:

—Che aipotase secove vite ãgua che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroiyasar ipihañemoñeta tẽi aipo che namanoi chivaherã ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite ãgua che yevise nara, ¿mara vo nde ererecora viña?” ehi.

²⁴ Che ité amombehu co mbahe, che avei aicuachía iyavei yaicua supi tupri vahe ité che remimombehu.

²⁵ Oime avei ambuae mbahe setá Jesús rembiapo, que opacatũ icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tüpa omboura Espiritu Santo viroyasar upe

¹ Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ² Ocuerayevire, ivave oso renondeve, Jesús omombehu oporocuaíta Espiritu Santo pīratasa pipe güembiporavo apóstol upe sembiaporā. ³ Oyemboyecua güembiporavo upe omanore. Setā rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tüpa mborerecuasa resendar güemimbohe upe.

⁴⁻⁵ Oicove vitesse yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tüpa güemimombehu, ahe acoi amombehu pēu. Juan niha pe āpiramo i pipe tēi; Tüpa rumo Espiritu Santo pipe pe āpiramora. Moviroimi tēi ari ipane vite imondo āgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pīratasa iyeyecuai āgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua āgua pēu. Esepia, Tüpa año ité vireco omborerecuasa ahe mbahe apo āgua. ⁸ Peipisira rumo Tüpa pīratasa oiquese Espiritu Santo pe piha pipe. Ahese pemombehu tupri che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tüpa vīraso ivave. Ichui Jesús oiique iba quiha pāhuve. Evocoyase ndosepia iri eté yuvireco cute. ¹⁰ Omahe vitesse yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vite iva rese pehā? Evocoi Jesús, inungar Tüpa vīraso ivave pe sui, ēgüe ehi aveira niha ogüeyi ou co ivi pipe coipe —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoyase apóstol oveyi yuviraso Jerusalén ve ivitri Olivo sui, ahe ihamombrigüer ñepeí kilómetro tēi. Supivemí imombehusa judío guata āgua mbituhusa ari pipe yepi. ¹³ Yuviroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahir, Simón ahe Zelote iyavei Judas, Santiago rahir yuvirecoi. ¹⁴ Co opacatu ari yacatu rupi oñemonuha oyoya guasu oyeroqui āgua yuvireco yepi Jesús rivri, ichi, ambuae cuña reseve avei.

¹⁵ Evocoyase ñepeí ari pipe oñemonuha guasu ciento veinte ava yuvireco. Ipāhuve Pedro opūha aipo ehi ava upe: ¹⁶ “Che mu eta Jesucristo reroyasar, iya ité co imboaviyesa Tüpa Ñehengagüer Judas recocuer resendar. Ahe imombehupri David upe Espiritu Santo pipe aracahe. Evocoi Judas vīraso vahe Jesús amotarēhimbar ipisi uca āgua. ¹⁷ Ahe acoi secoi yande pāhuve co mboraviquisa rese yande pītivii āgua avei viña. ¹⁸ Evocoi güembiaipo ai repri pipe omboepi ivi. Ipape ñaca iviso oviapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuví resendar’ oyapave. ²⁰ Esepia, icuachiapri Salmo pipe aipo ehi:

‘Taseyasa sēta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rāgüer pisi āgua’ ehi vahe.

²¹ “Evocoyase cohava oime ava yande Yar Jesús secoi vitesse yande pāhuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tipravosa ñepeí ipāhu pendar yande rupi icuerayevi agüer mombehu āgua” ehi omboetasa upe.

²³ Evocoyase oiporavo ñuvirío mbia yuvireco: ahe José Barsabás, serosa Justo; ambuae rer Matías. ²⁴ Ipape oyeroqui yuvireco aipo ehi: “Nde, ore Yar, opacatu ava piha ereicua. Emboyecua cohava nde rembiporavo oreu; ¿uma vo ereipota ²⁵ eremondo vaheerā icuaitarā apóstol seco āgua Judas recuñara? Ahe oangaipa pipe oyemocañi uca tēi vahe oico” ehi Tüpa upe yuvireco.

²⁶ Evocoyase osāha iporavo yuvireco. Matías ité vīnos iporavopri sui yuvireco. Ichui tupri ité oiique once apóstol pāhuve.

2

Espíritu Santo güeyi agüer

¹ Oyepotase Pentecostés pieta, opacatu Jesús reroyasar oñemonuha oi guasu pipe yuvireco. ² Aheve oi pipe aviyeteramo tēi ivitu ipirata vahe nungar siapu guasu ou iva sui. Ahe siapugüer oyendupa tupri oi pipe. ³ Ahese oyecua tata rendigüer nungar opacatu aheve yuvirecoi vahe harive. ⁴ Ahese avei Tüpa omoingue evocoi ava pïha pipe oEspíritu Santo. Ichui ahe Espiritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén ve omboaviye vahe ocuaita Tüpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoymboaracuai tēi yuvireco ambuae ava oñehe pipe ñehese. ⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahe vo acoi co ava Galilea iguar oñehe vahe yuvireco? ⁸ ¿Mahera pïha co ñepeipei oñehe yande ñehe pipe yuvireco? —ehi tēi oyeupe yuvireco—. ⁹ Esepia, cohava yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tüpa rembiapo icatupri vahe! —ehi.

¹² Opacatu oyepihamondii, ndoicuai opihañemofieta água yuvireco.

—¿Mara ehi pïha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroïrosa pipe aipo ehiño yuvireco:

—¡Osavaipo mo evocoi yuvireco! —ehi.

Pedro oñehe ava upe

¹⁴ Evocoiyase Pedro opüha opacatu once vahe apóstol pãhuve, oñehe pïrata aipo ehi: “Che mu judio eta, opacatu Jerusalén pendar avei, peicua co mbahe amombehu vaherã pëu; peyapisaca tupri che ñehe rese: ¹⁵ ndosavaipoï moco co mbia yuvireco. ¿Ndapeseipai vo añihivei vite cüritei? ¹⁶ Co niha Tüpa ñehe mombehusar Joel oicuachía vahe aracahe:

¹⁷ Tüpa aipo ehi:

Coiye, ari cañi renonde, amondora che Espiritu Santo opacatu ava upe.

Ipïratasa pipe pe rahir, pe rayri oñehera yuvireco.

Mbia chihivahe osepiara oquer pendar nungar mbahe yuvireco.

Oime aveira queraisa supí eté vahe cuacua vahe upe.

¹⁸ Supí eté ahe ari pipe amondora che Espiritu che rembiguai cuimbahe upe, che rembiguai cuña upe avei.

Ipape oñehera yuvireco che rese ipïratasa pipe.

¹⁹ Amboyecuaa poromondiisa iva rese.

Ëgüe ahe aveira poromondiisa mboyecua ivi pipe: tuvi, tata iyavei tãtachi.

²⁰ Yande Yar ari tuvichá vahe imboeteipri renonde ohara pïtu, yasi oyeapora tuvi nungar.

²¹ Opacatu ava, che Yar che pïtiví eve, ehi vahe, ahe oñepisïrora yuvireco’ ehi Joel icuachía aracahe.

²² “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tüpa pïratasa pipe pe pãhuve güeco maranehi mboyecua água. Ahe niha peicua opacatu. ²³ Ipape rumo evocoi Jesús imondosa pëu yuca água. Ahe rumo Tüpa remimbotar rupi. Esepia, yipive ité Tüpa oicua pe peipisira yuca uca água curusu rese ava naporai vahe upe. ²⁴ Tüpa rumo ombogüerayevi manosa sui. Esepia, manosa ndoicatui sereco água. ²⁵ Supí eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese secoi che acato coti mbahe tēi pipe che viapiëhi água yepi.

²⁶ Sese avihaño ité vichico, asapucaí avei che rorivetesá pipe.

Iyavei che yeroya tuprisave asãrora mbahe aviye vahe che recove iri água.

²⁷ Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe retecuer.

²⁸ Co tecovesa ereicua uca cheu.

Che mbovihara eve nde rese che recose’ ehi David aracahe.

²⁹ “Che mu eta, supí eté yande ramoí David omano, ñotisa ita hopri pipe aracahe. Ahe suvipa ouve vite cohava yande pãhuve. ³⁰ David rumo Tüpa ñehe mombehusar, oicua Tüpa oyeupe aipo ehi vahe: ‘Supí eté aipo ahe ndeu: nde suindar oimera mborerecuar guasu nde recuñara’ ehi vahe. ³¹ Ahe ndoyavii osepia vahe ité Poropisïrosar cuerayevisa. Evocoiyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira’ ehi aracahe. ³² Evocoi Jesús, Tüpa remimbogüerayevi secói. Ahe imombehusar opacatu ore

oroico. ³³ Ipare Tūpa víraso oacato coti imboguapi. Ahe oipisi imombehupri Espíritu Santo Vu sui. Evocoiyase ahe opa omondo co ava yuvirecoi vahe upe. Ahe pesepia, pesendu avei cūrítei peico. ³⁴ Esepia, evocoi oso vahe ivave ndahei David. Ahe ae rumo aipo ehi aracahe: ‘Yar aipo ehi che Yar upe:

Eguapi cohawe che acato coti che piri.

³⁵ Asecopipa uca ranera nde amotarēhimbar ndeu, ehi Yar che Yar upe’ ehi David aracahe.

³⁶ “Pe tapecuasapa, ticuasapa avei opacatu Israel recua rupi, supi eté evocoi Jesús curusu rese peyatica vahecuer, ahe Tūpa omoingo opacatu yande Yarā iyavei yande písiro āgua” ehi Pedro ava rehii upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemoasi pe angaipa; peyevi Tūpa upe. Iyavei peñeapiramo opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espíritu Santo pēu. ³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ēgüe ehi oñehe vite ava mboaracua aipo ehi:

—¡Peyepipi co ava secocuer co coti tēi vahe sui! —ehi chupe.

⁴¹ Acoi ava víroya vahe co ñehesa, oñeapiramo uca yuvireco. Ahe ari pipe oyemboeta iri tres mil ava yuvireco Jesús víroya vahe rese. ⁴² Opacatu víroya tupri ité apóstol porombohesa. Opacatu guasu avei oyeaisu tupri yuvireco, oyerogui iyavei oñemonuha oyeupe pan mboyaho-yaho āgua yuvireco yepi.

Yipindar vahe Jesús reroyasar recocuer

⁴³ Opacatu oyembosiquíye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho āgua. Ipare oyoya guasu ocaru yuvireco oyembovihasa pipe, ophihañemoñeta tuprisa pipe avei. ⁴⁷ Osapucái yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi ombota catu ava iñepísiro āgua Jesucristo víroya vahe pāhuve.

3

Ndoguatai vahe cuerasa

¹ Ñepi ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyerogui yuvireco yepi. ² Ahe tūparo roquendipi rer Porañete. Aheve ari yacatu rupi víraso ñepi ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave. ³ Ahe ndoguatai vahe omahe Pedro, Juan rese tūparove seique potase, oporandu guarepochi rese chupe. ⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramosave opa tupri ipi, ipiñuha avei ovíracua. ⁸ Evocoiyase opūha, opo, oguata; oi que oso tūparove supi. Opo-opo vorivetesave iyavei osapucái Tūpa upe. ⁹ Opacatu ava osepia yuvireco iquatase iyavei Tūpa upe isapucaise. ¹⁰ Omahecuaese sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehii upe tūparo Corero Salomón serer vahevriave

¹¹ Ndoguatai vahecuer ndoyeepi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. ¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pīratasa pipe tēi iyavei Tūpa rese ore pihañemoñeta tuprisa pipe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob víroya yuvireco aracahe

iyavei opacatu yande ramoi eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoyase ndapeipotaiño imose āgua chupe. ¹⁴ Ahe seco maranehi vahe, seco īvi vahe renose rāgüer pipe, peporandu: ‘Tosē oporapichi vahe’ peye. ¹⁵ Ēgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu. ¹⁶ Co Jesús rer rese yeroya pipe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pipe ité niha co pe rembiepiave ocuera tupri?” ehi ava upe.

¹⁷ “Che mu eta, che aicua acoi pe peipitivi vahe pe rerecuar Jesús yuca uca āgua pe icua tupriēhi pipe cuese. ¹⁸ Ēgüe ehi Tūpa imboaviye aracahendar opacatu oñehe mombehusar upe güemimombegüer: ‘Che Rembiporavo Poropisirosar oiporarara mbahe-mbahe tēi rasicuer omano’ ehi vahe. ¹⁹ Sese pemboasi pe angaipa; peyevi Tūpa upe. Ipīpe sui tomocañi pe angaipa pe sui. Aviyeteramo co sui omboura yande Yar pe reco morohisa āgua, ²⁰ ombou aveira Jesús, ahe yipisui iporavopri pe písiro āgua. ²¹ Cūrītei rumo Jesucristo ivave vite secói acói Tūpa opase voi omingatu opacatu mbahe iyevi āgua. Aipo ehi acoi imoñehe uca aracahendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepei oñehe mombehusar pe pāhuve che nungar. Ahe iñehe pesendura, pemboyeroya catu aveira. ²³ Opacatu ndoviroyai vahe iñehe Tūpa omocañira güembiporavo pāhu sui’ ehi.

²⁴ “Ēgüe ehi opacatu Tūpa ñehe mombehusar Samuel suive aracahe omombehu avei co ari cūrītei yasepia vahe yuvireco. ²⁵ Pēu nara niha Tūpa ñehe mombehusar remimombegüer aracahendar. Pēu nara avei acoi Tūpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co īvi pipendar ahe sovasapri yuvirecoira nde suindar sui’ ehi. ²⁶ Acoi Tūpa Guahir ombogüerayevise, pēu rane ombou pe rovasa āgua ‘toseyapa ñepei-pe güecocuerai yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñehe vitesese ava rehii upe, ahese oñemoirosa pipe pahi eta, tūparo rārosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu āgua’ ohesa pipe. Esepia, caharuse tēi osoquenda yuvireco. ⁴ Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecureta oñemonuha yuvireco Jerusalén ve: judío rerecuar, pahi eta rerecuar, Moisés porocuaite rese oporombohe vahe, ⁶ pahi rerecuar ivate catu vahe Anás, Caifás, Juan, Alejandro, opacatu omu reseve. ⁷ Evocoyase güeru ucasa Pedro iyavei Juan opāhuve yuvireco, oporandu yuvireco chupe:

—¿Ava pe cauita pipe vo, ava rer pipe avei vo co mbahe peyapo? —ehi.

⁸ Evocoyase Pedro, Espíritu Santo pīratasa pipe, aipo ehi chupe:

—Pe, mborerecureta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tūpa rumo ombogüerayevi iri omano vahe pāhu sui. ¹¹ Co Jesús pe remieroño, ahe rumo yande vīracuasa. Pe evocoyase inungar oi mopuhasar omomboño vahe ita aviye catu vahe oi moviracuasa rāgüer yepi. ¹² Ndipoí que ambuae ava sui poropisirosa, Jesús güeraño ité oicatu oporopisiro. Esepia, Tūpa nomboui ambuae ava tēi co īvi pipe yande písiro āgua —ehi.

¹³ Mborerecuar osepiase iyembosiquiyeeñisa yuvireco, “¿Mara ehi pīha co mbia? ¿Ava tēi, ndoyembohe vahe niha!” ehi tēi yuvireco chupe. Ichui oicua Jesús remimombegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatu chupe oñehe mara āgua yuvireco. ¹⁵ Ipape, “Pesē ocarve” ehi mborerecureta yuvireco chupe. Ahe güeraño evocoyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ēgüe ndehi” yahe chupe. ¹⁷ Yambosiquiye ava upe Jesús rer rese iñehe iriēhi āgua yuvireco. Ipīpe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñehe iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyevíño rumo oñehe yuvireco chupe:

—¿Mara ehi pe pihave? ¿Uma pīha aviye catu Tūpa rovai? ¡Pe porocuita tie oroviroya catura Tūpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehuēhi āgua oreu —ehi.

²¹ Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tūpa yuvireco co imbaheasi vahe mbogüera repiase. Sese ndoicatu eté mbahe apo yuvireco chupe. ²² Evocoi ava oipisi vahe Tūpa poromondiisa ocuera āgua, ahe otiaro catu cuarenta araviter vireco vahe sui.

Jesús reroyasar oporandu Tūpa upe siquiyeēhisa rese yuvireco

²³ Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco. ²⁴ Aipo rendu pare, oyoya guasu oyerocui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico. ²⁵ Nde Espiritu Santo pipe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

²⁶ Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi āgua’ ehi aracahe.

²⁷ “Ēgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropisirosar Jesús, seco maranehi vahe, amotarēhi āgua.

²⁸ Ēgüe ehi yapo opacatu nde pihañemoñeta aracahendar rupi tupri ité yuvireco. ²⁹ Iyavei cūrteite, ore Yar, emaha ore amotarēhisar rese. Embou nde pīratasa nde rembiguai oroico vahe upe siquiyeēhisa pipe nde ñehengagüer mombehu vite āgua. ³⁰ Ipape, nde pīratasa pipe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pipe” ehi yuvireco oyerocui.

³¹ Iyerocui pare, Tūpa omboririi opacatu mbahe iñemonuhasave yuvireco chupe. Ahesa Espiritu Santo opa oique yuvireco sese. Sese osiquiyeēhisa pipe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

³² Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndiipo eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³ Jesucristo apóstol omombehu vite ipīratasa pipe icuerayevi agüer yuvireco. Ipipe Tūpa osovasa catu vite opacatu yuvireco. ³⁴ Ndiipo eté ipāhu pendar mbahe ndovirecoi vahe. Esepia, opacatu ivi vireco vahe iyavei oi omondo, ³⁵ ahe sepri omondo apóstol upe yuvireco yepi. Ahe evocoyase omboyaho-yaho opacatu upe mbahe ipane vahe rupi-rupi yuvireco. ³⁶ Ēgüe ehi ava judío ramoi Levi suindar, Chipre pendar, José serer vahe, apóstol osero, “Bernabé” ehi yuvireco chupe (“poromboviharar’ oya aipo ehi), ³⁷ ahe mbia omondo oivi, güeru sepri apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho sepri, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoyase Pedro aipo ehi chupe:

—Ananías, ¡mahera ereroya Caruguar nde piha pipe Espiritu Santo mbopa āgua, eremboyahoño tēi nde ivi repri guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögüer oso sovai. Ahesa opacatu oyandu vahe osiquiye tēi yuvireco. ⁶ Ipape mbia chīhivahe yugüeru, osupi sehögüer, oipoque seraso yuvireco ñoti āgua.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahesa Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoi rupive ité niha oromondo —ehiño avei cuña chupe.

⁹ Evocoyase aipo ehi ahe cuña upe:

—¡Mahera peyemboyoya pe pihañemoñetasa rese pe secoña āgua yande Yar Espiritu! Coi yugüeru nde mer tísarer. Nde avei nde reraso āgua yuvireco eipeve —ehi chupe.

¹⁰ Ahe ramoseve avei oviapi sehögüer Pedro rovai. Mbia chihivahe yuviroique, oipoque voíño ité sehögüer seraso imer iviñi ñoti água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoyase apóstol pipe Tüpa omboyecua uca setá poromondiisa ava pãhve yuvireco. Opacatu Jesús reroyasar ofemonuha judío tüparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiyepave. Ava rehü rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehü vinose yuvireco imbaheasi vahe supa reseve-seve Pedro renonera, “Ofocuaese Pedro, aviyeteramo omohara ihägüer. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe, caruguar rese yuvirecoi vahe apóstol upe imbogüerapirã. Ahe evocoyase opacatu ombogüera yuvireco.

Apóstol yamotarëhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe ofemoiro yuvireco apóstol upe ava rese güecatëhisave. ¹⁸ Sese oipisi osoquendapa uca yuvireco. ¹⁹ Ipare rumo, pítu pipe, Tüpa rembiguai iva pendar ou omboi oquenda, vinose ichui, aipo ehi chupe: ²⁰ “Peso tüparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cõhe ramoseve yuviraso judío tüparo guasuve ava mbohe água.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha água ivate catu vahesave; omondo yuvireco güembiguai apóstol reru água soquendasa sui aheve nara viña. ²² Oyepotase rumo sembiguai yuvireco, osera tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tüparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepeí mbia oyepota imombehu:

—Evocoi pesoquenda vahecuer, ahe mbia cüritei oporombohe tüparove yuvireco —ehi chupe.

²⁶ Evocoyase tüparo rãrosar rerecuar, sembiguai avei yuviraso seru água mbahe tupri pipe, “Aviyeteramo yande api-api tiëtera ava yuvireco yaru raise” ehi yuvireco. ²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehü upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetasa reseve, omboyevi pahi rerecuar ivate catu vahe upe yuvireco: —Ore cwaita ité Tüpa mboyeroya, ndahei chira rumo ava tēi rane oromboyeroyara —ehi yuvireco chupe—. ³⁰ Yepe peyatica, peyuca uca Jesús curusu rese viña, yande Ru Tüpa rumo acoi yande ramoí eta viroya vahe, ahe ité ombogüerayevi. ³¹ Ipare osecomboivate ivave oacato coti imboguapi imoi. Ahe niha Mborerecuar guasu, Poropisirsar avei ‘tomboasi oangaipa, toyeveí cheu, toipisi angaipa resendar ñeroisa yuvireco’ oya Tüpa Israel suindar upe. ³² Ore Tüpa rembiapo repiasarer imombehu água oroico, Espiritu Santo avei ofehe ore ñehe rupi ava upe, ahe acoi Tüpa ombou vahe viroyasar upe —ehi.

³³ Osenduse mborerecuar aipo ñehesa, ofemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pãhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opüha oporocuai, “Toyvinose raimi ocarve apóstol” ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo água renondeve co mbia upe yuvireco —ehi—. ³⁶ Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa ofemosai tēi yuvireco. Ahe peve secocuer opa. ³⁷ Coiye catu, omombehuse mborerecuar Roma pendar ava retacuer cua água, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar ofemosai tēi yuvireco —ehi—. ³⁸ Sese cüritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopii

chira oyapose opīratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotarēhi Tūpa ipipe —ehi omboetasa upe.

Aipo ihese, opacatu imboetasa viroya yuvireco. ⁴⁰ Ichui rumo güero iri apóstol inupa uca āgua iñehe iriēhi āgua Jesucristo rese yuvireco. Inupa pare opa omose yuvireco. ⁴¹ Ipipe apóstol oviharetē iteanga yuvireco. Esepia, Tūpa ombou chupe iparaisu āgua yuvireco Jesús rer rese iyeroyasa sui tēi. ⁴² Ipare ndopoi eté ari yacatu Poropísiosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pītīvī āgua yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropītiviisa imondosase chupe” ehi oñehe yuvireco. ² Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropītiviisa mondo āgua rese tēi —ehi yuvireco—. ³ Sese ore rivireta, peiporavo siete mbia seco aviye vahe pe pāhu sui, yaracua vahe iyavei Espiritu Santo viroya vahe ité opiha pipe. Ahe mbia tilhañeco co mboraviquisa rese yuvireco. ⁴ Ore evocoiyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espiritu Santo opiha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyerocuqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahí viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoiyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oñehepoeipi-epi Esteban yuvireco. ¹⁰ Ndoicatuí rumo iñehe recopi āgua yuvireco. Esepia, ahe oñehe mbahecuaasa Espiritu Santo omondo vahe pipe. ¹¹ Evocoiyase yamotarēhimbar omboepi ambuae ava upe semira tēi āgua sese yuvireco. “‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe. ¹² Evocoiyase ahe ava oyamotarēhi uca opacatu ava mborerecuar reseve iyavei judío porocuaite rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaherā sese yuvireco. Ahe aipo ehi:

—Co mbia oñehe-ñehe tēi yande tūparo guasu imaranehi vahe amotarēhisave, Moisés porocuaite amotarēhisave avei. ¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohese avei aipo osecañarora” ehi —ehi yuvireco chupe.

¹⁵ Aheve opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai íva pendar rova.

7

Esteban oñehe oyeepisa pipe

¹ Evocoiyase pahí rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyeveí chupe: “Che mu eta, peyapisaca che ñehe rese: Tūpa imboeteipri oyemboyecua yande ramoí Abraham upe aracahe. Mesopotamia ve secoi vitesa, icho renondeve Harán ve seco āgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuarā ndeu’ ehi Tūpa chupe. ⁴ Evocoiyase osé Caldea ivi sui oso tecua Harán ve güeco āgua. Omano pare tu Harán ve, Tūpa ombou cohava yande recosave. ⁵ Yepe oyepota tēi cohava aracahe, Tūpa rumo nomondoimi eté que chíhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vitei ahese). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguaiirā

semimombaraisuguã tēi avei yuvirecoira cuatrociento araviter rupi' ehi. ⁷Tūpa rumo aipo ehi avei Abraham upe: 'Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri āgua cohava yuvireco' ehi Tūpa chupe aracahe. ⁸Tūpa oyocuai güemimbotar pipe Abraham guahir mbocircuncida āgua rese. Sese Abraham ombocircuncida guahir Isaac iha pare ocho ari pipe. Isaac ēgüe ehi avei guahir Jacob upe. Jacob ēgüe ehi avei guahireta upe, ahe doce vahe Israel suindar" ehi.

⁹"Ipare yuvirecoi vahe yande ramoi Jacob rahir omondo vivri guarepochi repirā yamotarēhisa pipe yuvireco. Ahe tivri rer José omondo vahe Egipto pendar upe yuvireco. Tūpa rumo secoiño ité sese. ¹⁰Ichui vinose opacatu iparaisusa sui. Omondo ombahecuasa chupe iyavei seco aviye tupri āgua Egipto pendar mborerecuar guasu faraón upe. Evocoiyase faraón ipotasa pipe moingue mborerecuar seco āgua opacatu ava ivi Egipto pendar cuai āgua iyavei güeta pipendar cuai āgua avei.

¹¹"Ipare ou tavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹²Oyanduse rumo Jacob Egipto ve oime vitese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³Ichui yuviraso yupagüe irise Egipto ve, ahese José oyecua uca viquehir upe. ēgüe ehi faraón upe oicua uca uma sui oyesu. ¹⁴Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ēgüe ehi Jacob yuviraso Egipto ve yuvirecoi āgua opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶Imano pare rumo, suminogüer viraso icangüer yuvireco tecua Siquem ve. Aheve oñoti yuvireco. Aheve acoi Abraham vircua tuvipa Hamor rahir sui aracahe" ehi mborerecuar upe.

¹⁷"Ipare, virovise ari ipapapri Tūpa Ñhengagüer Abraham upendar, ahese yande ramoi setá catu-catu iri oyesu Egipto ve yuvireco aracahe. ¹⁸Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹Evocoi mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pītani. Ahe oyocuai iyepusa aipo ehi: 'Peseya pe rahir oha ramomi vahe, tomanoño' ehi yande ramoi upe aracahe. ²⁰Aheveve avei aipo Moisés oha. Ahe pītani aviye ité Tūpa uve. Ihare, iyepusa mbosapi yasimi rupive vireco oyese güetave yuvireco. ²¹Oseyase rumo iyepusa ive yuvireco, ahese faraón rayri oseca ahe i rupi sui. Ichui vinose seraso güetave, omboacua omembri nungar ité sereco. ²²Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipirata ité oñehese iyavei oyapose mbahe.

²³"Virecose rumo Moisés cuarenta araviter, ipihañemoñeta: 'Tasepia rane che mu israelita cohava yuvirecoi vahe' ehi. ²⁴Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. ²⁵Ahe rumo, 'Oicua reva che mu Tūpa vinose uca āgua Egipto sui yuvireco cheu' ehi viña. Imu rumo nomohai eté Moisés vinose āgua yuvireco evocoi ava po sui. ²⁶Ahere ayihive oso omu pāhuvé. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: 'Che mu, oñemu mo peico, ¿mahera vo pevava peyese ae?' ehi tēi chupe. ²⁷Oyemoviracua catu vahe rumo omombo oyesui. Ichui ahe aipo ehi chupe: '¿Ava vo nde moingue ore pāhuvé ore rerecuarā ore recocuer moingatu āgua?' ehi chupe. ²⁸¿Che yuca pota avei tie eve inungar ereyuca evocoi Egipto pendar irapipe!' ehi chupe. ²⁹Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰"Omboaviyese cuarenta araviter Madián ve, Tūpa rembiguai oyemboyecua ivitri Sinaí rerovicave ivi iporupirēhisave caha rese tata rendigüer pāhuvé chupe. ³¹Osepiase mbahe sendi vahe oyepihamondii, oyemboya catu sese sepia tupri āgua viña. Ahese osendu Yar ñehe aipo ehi vahe: ³²'Che nde ramoi Tūpa aico. Nde ramoi Abraham, Isaac iyavei Jacob che reroya vahecuer yuvireco' ehi. Evocoiyase Moisés oririri osiquiyesa pipe nomahe pota iri sese. ³³Evocoiyase Yar aipo ehi chupe: 'Esequi nde pitaqui. Esepia, ivi nimarai vahesave ereico' ehi chupe. ³⁴'Che asepia tupri ité Egipto ve nde mu che remboravirar paraisuse; asendu avei ipoāse tēisa yuvireco yepi. Sese agüeyi ndeu nde oromondora aheve senosepa āgua' ehi Tūpa Moisés upe aracahe.

³⁵"Yepe yande ramoi ndoviroya potaiño ité yuvireco, '¿Ava vo nde moingue ore rerecuarā ore recocuer moingatu āgua?' ehiño yuvireco chupe, Tūpa ité rumo oyocuai güemibiguai imbogüeyi tata rendigüer pāhuvé imoñehe Moisés upe iporocuai āgua, ava renosepa āgua avei ivi Egipto pendar mborerecuar povri sui. ³⁶Ipare ahe ité vinose yande ramoi eta Egipto sui, oyapo avei mbahe poromondiisa aheve 'toicua Tūpa yuvireco' oya, para guasu Pira vaheve avei oyapo poromondiisa iyavei ivi iporupirēhisa rupi avei cuarenta araviter rupi. ³⁷Ahe avei aipo ehi israelita upe: 'Tūpa vinosera pe pāhu sui ñepeí oñehe mombehar che

nungar' ehi. ³⁸ Ahe avei acoi ivi iporupirēhisa rupi ava pāhu rupi secoi. Chupe avei oñehe Tūpa rembiguai ivitri Sinái ve yande ramoí rese; ahe avei oipisi ñehesa tecovesa resendar yandeu imbou āgua.

³⁹ “Yande ramoí eta rumo nomboyeroya potai eté Moisés yuvireco. Ipihañemoñetaño ité Egipto ve oyevi āgua rese yuvireco. ⁴⁰ Evocoiyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui, secoi?’ Omano tie revó’ ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaheṛā yuvireco iyavei oyemboviha pieta apo yuvireco güembiape ucagüer rese tēi. ⁴² Sese Tūpa opoñño ahe ava sui, ‘Toyerure evocoiyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

⁴³ Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguā.

Sese che opovinosera pe recua sui pe mondo Babilonia cupe coi coti’ ehi Tūpa chupe aracahe.

⁴⁴ “Ivi iporupirēhisa rupi yande ramoí eta vireco Tūpa porocuita rēta oyeupive yuvireco aracahe mbahe mimba pírer apopri. ‘Na peyera yapo’ ehi Moisés upe. Evocoiyase iñehe rupi tupri oyapo uca. ⁴⁵ Ahese coiye catu yande ramoí eta vireco co oi Tūpa rēta mbahe pírer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ēgüe ehiño vite ité ahe seroco yuvireco mborerecuar guasu, David, secoise aracahe. ⁴⁶ Ahe David aviye ité Tūpa upe, oyapo pota setarā ‘toime tūparoguā yande ramoí Jacob rembieroya upe’ oya. ⁴⁷ Tahir Salomón rumo omopuha ité ahe tūparo. ⁴⁸ Tūpa rumo, seco ivate vahe, ndasecoi vahe tūparo ava tēi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ Iva che renda iyavei ivi che pírunga.

¿Mbahe nungar oi vo peyapora cheu? ehi yande Yar.

¿Que vo evocoiyase che pituhu āgua?

⁵⁰ Che niha opacatu co mbahe aposar aico’ ehi Tūpa icuachiapri pipe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe piha avei, ipipe rumo ndapeicuai eté Tūpa. Peico Espiritu Santo amotarēhimbar tēi inungar pe ramoí aracahe yuvirecoi. ⁵² ¡Uma profeta revo ndovireco meguai pe ramoí yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cūritei ou ndaseco marai vahe cute. Pe avei evocoiyase ahe yuca uca āgua peporocuai. ⁵³ Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco. ⁵⁵ Esteban rumo vireco ité Espiritu Santo oyese. Evocoiyase iva rese omahese, osepia Tūpa porañetesa. Osepia avei Jesús opūha ohā Tūpa acato coti. ⁵⁶ Evocoiyase aipo ehi:

—¡Pesepia! Asepia inungar iva imboipri. Aheve asepia Ava Riquehir Vu acato coti ihā —ehi.

⁵⁷ Mborerecuaeta rumo osapucaí pírata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivii yuvireco. Aheve oseya oyeaosa Saulo pive ‘tosāro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tūpa upe: “Che Yar Jesús, eipisi che hā” ehi. ⁶⁰ Ipare oñenopiha, oñehe pírata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohā.

Saulo oseca Jesús reroyasar mocañipa āgua oico

Ahe ari pipeve omboipi Jesús amotarēhimbar seroyasar reca mara-mara tēi catu seroco āgua yuvireco Jerusalén ve. Evocoiyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa

mboetisar yuvirecoi vahe, ahe víraso Esteban rehögüer ñoti yuvireco. Ití pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucañhi água viña. Yuviroique-iqueño tēi aipo sēta rupi cuimbahe, cuña mbotiriri senese soquenda água yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa písirosa resendar que yuvirasosa rupi yuvireco. ⁵ Felipe oso Samaria rupi. Aheve omombehu ava upe: “Evocoi Jesús Tūpa Rembiporavo ava písiro água” ehi. ⁶ Aheve ava rehii oñemonuha Felipe ñehere rendu água yuvireco. Oyapisaca tupri ñehere rese yuvireco. Esepia, osepia mbahe sembiapo poromondiisa. ⁷ Iyavei setá ava carugar rerecosar sui omose carugar. Osēse ava sui, sāsese yuvireco. Iyavei setá ava nomii vahe, ndogutai vahe avei ombogüera. ⁸ Evocoiyase oviharete ahe tecua pipendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquiye-quiyē ava Samaria pendar. “Che seco ivate vahe aico” ehi angahu ava mbopa. ¹⁰ Evocoiyase opacatu ava, cuacua vahe iyavei chíhivahe catu vahe oyapisaca tupri ñehere rese, aipo ehi yuvireco: “Co niha Tūpa píratasa tuvicha vahe” ehi oyeupe yuvireco.

¹¹ Omboyeroya pucu ité yuvireco. Esepia, opayesa pipe ava ombosiquiye etepri oico yepi. ¹² Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Aheve ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoiyase omondo aheve omboetasa Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco. ¹⁷ Pedro iyavei Juan oyerurese, omondo opo iharive yuvireco. Aheve Espíritu Santo ogüeyi yuvireco sese.

¹⁸ Ahe osepiase, Simón omondo pota guarepochi chupe, ¹⁹ aipo ehi:
—Cheu avei pemboumi tēi evocoi píratasa, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:
—¡Tocañipa nde guarepochi nde reseve! Esepia, ndepihañemoñeta co Tūpa ombou vahe oreu, ererocua vaheñā nde guarepochi pipe viña —ehi chupe—. ²¹ Ndeu ndiyai co nungar mbahe apo água. Esepia, nde pihañemoñetasa ndahei ihivi vahe Tūpa rovaque. ²² Sese epi nde pihañemoñeta raisa sui, eyerure Tūpa upe. Aviyeteramo iñerora ndeu —ehi—. ²³ Aicua nde piha naporai vite iyavei nde pihañemoñeta raisa pipe vite ereico —ehi chupe.

²⁴ Evocoiyase Simón omboyevi chupe:
—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pipendar tecua rupi yuvireco. Ēgüe ehi oyepota yuviroyevi Jerusalén ve yugüeru.

Felipe omombehu Jesucristo recocuer Etiopía pendar upe

²⁶ Ipare Tūpa rembiguai oyemboycua Felipe upe aipo ehi chupe: “Epūha, eso irohi coti nde yepota água evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso. ²⁷ Evocoiyase opūha oso peri rupi. Aheve osovaichi ñepei ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tūpa mboetei água. ²⁸ Oyevise ocāreto pipe, oyerocui Tūpa ñehere mombehusar Isaías rembicuachiagüer rese ou.

²⁹ Evocoiyase Espíritu aipo ehi Felipe upe: “Eyemboya cāretomi rese” ehi. ³⁰ Evocoiyase virovise ahe ava, osendu iyeroqui Isaías rembicuachiagüer pipe oī. Aheve oporandu chupe:
—¿Eresenducua aipo Tūpa Ñehengagüer nde yeroquisai eī? —ehi chupe.

³¹ Etiopía pendar mbia omboyevi chupe:
—¿Mara ahera vo che senducua viña ndipoise imombehu tuprisar cheu? —ehi chupe.
Ipare, “Erio, eyeupi, tereguapi cohove che piri” ehi Etiopía pendar chupe. ³² Ahe Isaías rembicuachia oyerocui vahe pipe aipo ehi:

“Inungar ava viraso ovesa yuca água, Ēgüe ehi avei ahe mbia seraso yuca água yuvireco. Iyavei inungar ovesa nasasei eté guagüer rerocua, Ēgüe ehi avei ahe mbia noñehi eté.

³³ Osecomomini yuvireco, ndipoi ava sepiar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

³⁴ Oyeroqui pare ahe Etiopía pendar oporandu chupe:

—Emobehumi cheu: ¿Ava rese pîha aipo Isaías oñehe: oyese ae pîha, ambuae ava rese tie? —ehi.

³⁵ Evocoiyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipape oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohawe che ãpiramomi tõi eve viña? —ehi.

³⁷ Aheve omboyeve chupe:

—Ereroya itese opacatu nde pîha pipe, iya ité ndeu —ehi.

—Aroya ité niha Jesucristo ahe Tûpa Rahir seci —ehi.

³⁸ Evocoiyase omombita uca ocãreto, ichui ogüeyi ive yuviraso. Aheve Etiopía pendar Felipe oñapiramo. ³⁹ Yuvinosese i sui, yande Yar Espiritu viraso ahe Etiopía pendar sui. Aheve ndosepia iri; ãgüe ehiño vorivete oso peri rupi. ⁴⁰ Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahí rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohawe nde rer pipe” ehi, “evocoiyase eremombehura cuachiar pipe Damasco pendar tûparo rerecuar upe” ehi pahí rerecuar ivate catu vahe upe. ³ ãgüe ehi yuvinosé Jerusalén sui, yuviraso Damasco ve ambuae ava reseve. Virovi potase rumo Damasco yuviraso, avieteramo tõi osesape guasu iva sui chupe. ⁴ Evocoiyase oviapi oso ivive. Osendu iva pendar ñehesa aipo ehi vahe: “Saulo, Saulo, ¿mahera vo che moña-moña eve?” ehi chupe.

⁵ Evocoiyase oporandu chupe: “¿Ava vo nde ereico, nde mbia?” ehi. “Che Jesús, che niha co che moña che rereco eve” ehi chupe. ⁶ “Epûha, eique Damasco ve. Aheve amombehu ucara mbahe nde rembiapoguã ndeu” ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepia, ndosepiai eté ivate oñehe vahe yuvireco. ⁸ Ipape Saulo opûha, omahe tõi; ndoicatu rumo mbahe repia. Ichui supindar oipisi iyiva rese seraso Damasco ve yuvireco. ⁹ Aheve mbosapi ari ndasesapiso, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe seci. Ahe iquer nungarve oyemboyecua yande Yar aipo ehi chupe: “¡Ananías!” ehi. “Co aico, che Yar” ehi imboyeve chupe.

¹¹ Evocoiyase yande Yar aipo ehi chupe: “Epûha, eso calle Ihivi serer vahe rupi. Eporandu Judas rêtave Saulo, tecua Tarso pendar, rese. Ahe oyeroqui cüritei. ¹² Oquerve angahu osepia mbia Ananías serer vahe omondose opo iharive ombosapiso iri” ehi.

¹³ Evocoiyase omboyeve chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tõi oyapo vahe nde reroyasar reco maranehi upe Jerusalén ve. ¹⁴ Cüritei ou rutei ahe mbia pahí rerecuar porocuita rupi opacatu nde rer rese oyeroya vahe roquendapa água” ehi.

¹⁵ Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheerã ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecua setá mbahe tõi chupe oiporara vaheerã che remimbotar mboaviye água” ehi yande Yar chupe.

¹⁷ Evocoiyase oso secosave. Oique se ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espiritu Santo nde rese —ehi Saulo upe.

¹⁸ Aheve voi eté pira pিরer nungar mbahe oviapipa sesa sui. Aheve voi sesapiso iri. Ichui opûha. Ipape voi Ananías oñapiramo. ¹⁹ Ipape Saulo ocaruse, ipirata catu iri. Moviro ari tõi opita iri Jesús reroyasar piri Damasco ve.

Saulo omombehu Jesús recocuer Damasco ve

²⁰ Ipape voi oso oñehe judío tûparo yacatu rupi Damasco ve aipo ehi: “Jesús Tûpa Rahir ité seci” ehi ahe pendar ava upe. ²¹ Ava opacatu osendu vahe ñehe,

—¿Mara ehi pīha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco vahe? ¿Ndahei vo acoi co avei ou cohava ava Jesús reroyasar ha pendar pisi āgua serasopa āgua avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tūpa Rembiporavo ava pīsiro āgua secosa. Sese ndoicatu judío iñehe mboyevi yuvireco.

Saulo oñemi omu sui oamotarēhise

²³ Setá ari pare judío ahe pendar omboguai yuca āgua Saulo yuvireco viña. ²⁴ Ahe rumo oyandu omboguaisa judío osārose tecua āchisa roquendipive ari, pītu momba yuvireco yuca āgua viña. ²⁵ Jesús reroyasar rumo pītu pipe tecua tapia āchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tēi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tēira yandeu” ehiño oyeupe yuvireco. ²⁷ Ipare rumo Bernabé viraso Saulo apóstol yuvirecoi vahe upe. Aheve Bernabé omombehupa chupe aipo ehi: “Co mbia Saulo osepia yande Yar perī rupi iyavei yande Yar oñehe chupe. Ichui co oñehe osiquiyēhisa pipe Damasco ve Jesús recocuer rese” ehi. ²⁸ Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyēhise. ²⁹ Oiñehopepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

³¹ Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espiritu Santo oipitiviñi iyemboeta catu āgua yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar. ³³ Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcac cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitiviñi yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoyase oyanduse Jesús reroyasar Jope pendar Pedro Lida ve secoise, aheve omondo ñuvirio mbia seru poyava āgua Jope ve yuvireco.

³⁹ Evocoyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro iviñi yuvireco. Omboyecua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Aheve ahe ae oñenopiha, oyerure Tūpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oi. ⁴¹ Aheve oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Serācua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoyase Pedro opita setá ari aheve, mbia mbahe pিরer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tūpa opacatu guahir, güembireco reseve yepi. Iyavei omondoño ité judío pītiviñi āgua guarepochi, oyerocui avei Tūpa upe yepi. ³ Ñepeñi ari, caharuse las tres rupi, osepia oquer nungar pipe Tūpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tūpa rembiguai

rumo omboyevevi chupe: “Tūpa oipisi nde yeruresa; osepia avei nde poroparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pিরer mopítasar píri. Ahe sêta para guasu popíve chini” ehi chupe.

⁷ Osose Tūpa rembiguai ichui, Cornelio oñehe ñuvirio güembiguai upe iyavei ñepeí sundao Tūpa mboeteisar upe, sese acoi oyeroya vahe yepi. ⁸ Opatatu Tūpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe harive mbiter ari senise oyeróqui água. ¹⁰ Vieporêhise ocaru pota viña. Omoingatu viteseve rumo semi-hura yuvireco, aviyeteramo tēi osepia mbahe oquer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbri ipopi yacatu ou chupe. ¹² Ahe turucuar pipe, osepia opacatu mahembiar vai, mboi, vírai vai tēi avei. ¹³ Ahese osendu ñehesa aipo ehi vahe: “Pedro, epūha, eyuca, ichui ehui” ehi chupe.

¹⁴ Pedro rumo omboyevevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe. ¹⁵ Osendu iri ñehesa aipo ehi vahe chupe: “Tūpa remimbotatupri upe, ‘Ava remimbotarēhi, ndihusai vahe’ nderei chira” ehi.

¹⁶ Êgüe ehi mbosapi oyupagüer rupi chupe. Ipare turucuar oyeve ivave oso. ¹⁷ Pedro ipihañemoñeta viteseve mbahe osepia vahecuer rese oquer nungar pipe: “¿Mbahe rese pīha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rêta roquendipive yuvireco. ¹⁸ Oñehe pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta viteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ‘¿Asora pīha?’ erei rene. Esepia, che ambou evocoi mbia nde reca” ehi Espiritu Santo Pedro upe.

²¹ Evocoyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoyase omboyevevi ñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ívi vahe, Tūpa mboeteisar opacatu judío osaisu, oipotata rai yuvireco. Tūpa rembiguai oyocuai nde rese ereso vaheerā sêtave, ahe osendu vaheerā nde ñehesa —ehi yuvireco Pedro upe.

²³ Evocoyase omoingupa, omombitapa oyepiri ñepeí pítu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sêtave. Cornelio rumo osãro opacatu omu eta rese yuvireco iyavei omboriparete güembisoho reseve avei. ²⁵ Oyepotase sêtave oso, Cornelio rane osê voi, osovaichi, oñenopiha sovai imboeteisa pipe. ²⁶ Pedro rumo aipo ehi chupe:

—Epūha, che niha nde nungar avei aico —ehi chupe.

²⁷ Evocoyase ahe omoñeta seroique seraso oi pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuaíta aipo ehi vahe: “Peiquei rene ndahei vahe judío píri. Aní chiaveira pembori evocoi ava peico” ehi acoi —ehi Cornelio rêta pipendar upe—. Tūpa rumo omombehu cheu che quer nungar pipe: “ ‘Ava remimbotarēhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoyase nacheatēhi che yu água pēu. Sese che aicua pota, ¿mahera vo che reru uca peye? —ehi.

³⁰ Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohava che rêtave aicose, ndacarui eté che yerure água Tūpa upe. Aheseve oyemboyecua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rêtave, ahe mbahe pিরer mopítasar. Ahe sêta para guasu popíve chini” ehi cheu. ³³ Sese amondo voi eté nde reca água. Aviye nde erey cohava. Cüritei co opacatu yaico cohava Tūpa rovaque. Orosendu pota opacatu nde ñehe yande Yar nde cuai vahe nde ñehe água oreu —ehi Cornelio chupe.

Pedro oñehe Cornelio rêtave

³⁴ Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ívi pipendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñehesa tupri yeamotarēhiñehisa resendar Jesucristo rembiaporá sui, ahe opacatu ava co ívi pipendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ívi rupi. Ahe ombopi Galilea ve Juan ñeapiramosa mombehu pare. ³⁸ Peicua revu Tūpa omondo Jesús Nazaret pendar upe

opīratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe caruguar povrive yuvirecoi vahe. Esepia, Tüpa seci sese. ³⁹ Ore orosepia opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tüpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai rumo opacatu ava upe, omboyecua ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tüpa Rembiporavo, aico opacatu ava recocuer rese porandu ägua oicove vite vahe, omano vahe avei” ehi oreu. ⁴³ Ahe secocuer avei opacatu Tüpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecra Tüpa ñeroisa serer pipe angaipa rese yuvireco” ehi —ehi Pedro Cornelio rêta pipe yuvinoi vahe upe.

Espíritu Santo oique ava ndahei vahe judío pīha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoyase ndahei vahe judío upe avei Tüpa omondo Espiritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tüpa upe. ⁴⁷ Evocoyase aipo ehi vupindar upe:

—¿Oime pīha ndoipotai vahe co ava ñeapiramo ägua yande pāhu pendar? Esepia, co oipisi Espiritu Santo yuvireco inungar yande —ehi vupindar upe.

⁴⁸ Sese,

—Yañapiramopa Jesucristo rer pipe yuvireco —ehi.

Ipare Cornelio rêta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tüpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroiro sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuv yuvireco no —ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵—Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembar ihupirēhi, mbahe mimba, mboi, vírai vai tēi avei —ehi—. ⁷ Iyavei ahese asendu ñehesa aipo ehi cheu: “Pedro, epüha, eyuca, ehü” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe. ⁹ Ichui asendu iri ñehesa: “Tüpa remimbocatupri upe, ‘Ava remimbotarēhi’ erei rene” ehi cheu. ¹⁰ Ēgüe ehi mbosapi oyupagüer rupi cheu. Ipare opacatu oyeve iri ivave oso. ¹¹ Aheseve avei mbosapi mbia imboupri Cesarea sui oyepota yuvireco che recosave che reca. ¹² Espiritu Santo che cuai che so ägua che atēhiñehisa pipe supi yuvireco. Co seis mbia Tüpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rêtave. ¹³ Ahe omombehu oreu osepia vahecuer güētave Tüpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru ägua. ¹⁴ Ahe omombehura ndeu nde ñepisiro ägua iyavei opacatu nde rêta pendar ñepisiro ägua avei” ehi Tüpa rembiguai Cornelio upe —ehi—. ¹⁵ Añehe ramosave chupe, Espiritu Santo ou sese yuvireco inungar yande rese ou aracaco. ¹⁶ Evocoyase che chemahenduha voi eté yande Yar ñehengagüer rese aipo ehi vahecuer: “Supi eté i pipe Juan oporoāpiramo, pe rumo Espiritu Santo pipe peñeapiramora” ehi vahe. ¹⁷ Tüpa Espiritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tüpa ayamotarēhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tüpa ombou avei ndahei vahe judío upe secocuer recuñaro ägua, tecovesa apirēhi vahe rereco ägua! —ehi Tüpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño

ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquia ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar piratasa vireco yuvireco. Evocoiyase setá ava viroya; oseya ité yipindar güembieroya yuvireco yande Yar reroya água.

²² Serácua oyepotase Jesús reroyasar upe Jerusalén ve, ahese omondo Bernabé yuvireco Antioquia ve. ²³ Oyepotase aheve, osepia Tüpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco. ²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

²⁵ Ipore oso Tarso ve Saulo reca. ²⁶ Oyosuse, güeru Antioquia ve. Aheve oyemboya yuvireco ambuae viroya vahe rese imbohe água ñepe araviter rupi. Setá ava oyembohe ipiri yuvireco. Ahese Jesús reroyasar Antioquia pendar upe yipindar, “Cristo reroyasar” ehi yuvireco.

²⁷ Aheseve Tüpa ñehese mombehusar yugüeru Antioquia ve Jerusalén sui. ²⁸ Ñepe ipáhu pendar, Agabo serer vahe, opüha aipo ehi Espíritu Santo piratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose). ²⁹ Evocoiyase Jesús reroyasar Antioquia pendar omondo pota voi guarepochi Jesús reroyasar Judea pendar pitivii água yuvireco ocatugüer rupi. ³⁰ Égüe ehi yande Yar reroyasar rãrosar Judea pendar upe porrecosa mondo. Bernabé, Saulo ahe porrecosa viraso yuvireco.

12

Santiago mano agüer iyavei Pedro roquenda agüer

¹ Ahe araviter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riquehir. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omondo irungatu imar sui irungatu-ngatu sundao omondo sãro água yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña. ⁵ Evocoiyase Pedro opita voquendasave sãrombri tupri chini. Jesús reroyasar rumo oyerocui pirata Tüpa upe yuvireco sese.

Tüpa omose uca Pedro soquendasa sui

⁶ Ahe ari vinose potase Herodes Pedro soquendasa sui, ahe pítu pipe Pedro oque ñuvirio sundao guãrosar rese. Ñapichisa ñuvirio carena pipe ou, ñuvinohambe avei sãrosar soquendasa roquendipive. ⁷ Aviyeteramo tẽi Tüpa rembiguai oyemboyecua ique vitesese chupe. Ahese sendi guasú iteanga soquendasa pipe. Ahe oñatoi Pedro iqueve imomahe: “¡Epüha poyava!” ehi chupe. Ipühase, opa voi oyerã carena ipo sui. ⁸ Ahese Tüpa rembiguai aipo ehi chupe: “Eyemonde, emonde nde pitaqui” ehi. Evocoiyase Pedro omonde. Ipore aipo ehi iri: “Emonde avei nde yeoasa, eyu che raquicuei” ehi chupe.

⁹ Égüe ehi oso saquicuei. Ahe rumo ndoicuai Tüpa rembiguai oyeupe égüe ehise. Ndoyavii iquerve tẽi égüe ehi vahe chupe. ¹⁰ Ichui yuvinose, oñocua yipindar guãrosar yuvireco. Ipore yuviraso catumi ambuae imoñuviriosa guãrosar oñocua avei. Oyepota oquenda guasu guarepochi apoprive ocarve yuvinose água yuvireco. Ahe oquenda oyemboi ahe ae ité chupe yuvireco. Ipore yuvinose yuviraso pucumi ocarusu rupi. Aviyeteramo tẽi Tüpa rembiguai ndoyecua iri chupe.

¹¹ Evocoiyase Pedro aipo ehi oyeupe: “¡Too! Supi eté Tüpa ombou cheu güembigui che renose água Herodes povri sui. Tüpa che písiro judío rerecuar che yuca rãgüer sui” ehi oyeupe.

¹² Oyese opihañemoñeta pare, oso, oyepota Juan Marcos si María rêtave oso. Aheve setá ava oñemonuha oyerocui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osé imboi água chupe. ¹⁴ Osenduse rumo Pedro ñehese, oquenda omboi rãgüer sui, oña oique oi pipe vorivetesave, omombehu: “Pe Pedro ihãi oquendipive” ehi oi pipendar upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tüpa rembiguai mo aipo sãrosar —ehiño yuvireco chupe.

¹⁶ Aheseve Pedro oñehese viteño ité oquendipive ohã. Ichui omboise oquenda yuvireco chupe cute, oyembosiquiye iriño tẽi sepiase yuvireco. ¹⁷ Pedro rumo opo omopuha imonguiriri água. Ichui opa omombehu yande Yar opisiro agüer voquendasa sui chupe yuvireco. Ipore aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

¹⁸ Cõhese sundao oyepihamondii eteanga yuvireco. “¿Que p̄ha Pedro?” ehi t̄ei oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoiyase Herodes porocuita rupi oporandu tupri s̄arosar upe: “¿Que vo secoi?” ehi t̄ei chupe. Sese oyocuai ambuae sundao opacatu ahe s̄arosar yucapa āgua. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasorii eté ava Tiro pendar upe, Sidón pendar upe avei. Evocoiyase ahe pendar oyoya ipihañemoñeta yuviraso vaheṛā mborerecuar rovai. Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca āgua rese yuvireco. Esepia, Herodes porocuita sui oip̄isi mbahe güemihura yuvireco. ²¹ Herodes evocoiyase omombehu ari oñehe vaheṛā chupe. Osupitise ahe ari, omonde sese iturucuar mborerecuar secosa resendar yivirindar yuvireco. Ipare güenda imboeteipri harive oguapi oī. Aheve oñehe ava rehii upe. ²² Evocoiyase ava rehii osapucai p̄rata yuvireco aipo ehi: “¿Co mbia oñehe vahe ndaheii ava t̄ei, T̄upa it̄e!” ehi yuvireco Herodes upe imboeteisave. ²³ Ava aipo iheseve voi, ñepei T̄upa rembiguai oyapo mbaherasi guasu chupe. Ichui mbahe rasoī ocaru yav̄iter rupi yuvireco. Esepia, nombotei eté T̄upa. Sese omano.

²⁴ T̄upa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

13

T̄upa oiporavo Bernabé, Saulo oyeupe mboraviqui apo āgua

¹ Evocoiyase Jesús reroyasar Antioquía pendar p̄ahuve oime T̄upa Ñehengagüer mombehusa, sese oporombohe vahe avei. Ahe Bernabé, Simón (chupe, “Avaü” ehi yuvireco), Lucio evocoi Cirene pendar, Manaén (ahe mbia oyoya ocuacia mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemomuhase yande Yar mboetei āgua, oyecuacu avei, ahese Esp̄ritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Esp̄ritu Santo yuvireco chupe.

³ Evocoiyase oyerocui pare, omondo opo yuvireco iporavopri āca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

Apóstol yuvirecoi Chipre rupi

⁴ Evocoiyase Bernabé, Saulo Esp̄ritu Santo remimondo yuviraso Seleucia ve. Ichui yuviraso carite pipe caha p̄ahu Chipre ve. ⁵ Oyepota yemboyasa Salamina ve yuviraso. Aheve omombehu T̄upa Ñehengagüer judío t̄uparo rupi yuvireco. Juan avei oso supi ip̄itivii āgua.

⁶ Opase ité oguata caha p̄ahu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepia yuvireco. Ahe oporombohe t̄ei: “Che añehe T̄upa Ñehengagüer rese” ehi tupri t̄ei vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei T̄upa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoiyase Saulo, Pablo serer vahe, vireco ité vahe Esp̄ritu Santo op̄iha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndip̄ihai vahe, Carugar rahir t̄ei ereico! Opacatu mbahe av̄iye vahe amotar̄ehisar t̄ei avei ereico no. ¡Mahera nderepoi potai yande Yar porombohesa supi eté vahe reroirosa sui. ¹¹ Eyapisaca, cūritei yande Yar nde mombaraisura. Nandē mboesapisoi chira moviro ari rupi. Ichui ndereicatu iri chietera ari rendigüer repia āgua —ehi Pablo chupe.

Aipo ehi ramoseve voi, opacatu p̄itumimbi chupe. Oñehe t̄ei ava güeraso āgua upe. ¹² Ahe mbahe repiase, mborerecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío t̄uparove oguapi

yuvinoi. ¹⁵ Oyeroqui pare Tüpa porocuaita resendar oüachiar pipe, Tüpa ñehe mombehusar cuachiar pipe avei, tûparo pendar rerecuar omondo oñehe Pablo upe:

—Ore mu, perecose mbahe pemombehu vaherã co ava monguerêhi ãgua, pemombehumu yandeu cûritei —ehi.

¹⁶ Evocoyase Pablo opûha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tüpa mboeteisar, pensendu che ñehe —ehi—. ¹⁷ Israel iguar Tüpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opîratasa pipe vinosepa ahe ivi sui aracahe. ¹⁸ Ipare Tüpa oñemosañi yande ramoi reco ai upe cuarenta araviter rupi, oguatase yuvireco ivi iporupirêhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara. ²⁰ Ëgüe ehi cuatrocientos cincuenta araviter rupi yapo yuvireco —ehi.

“Ipare Tüpa ombou ava recocuer moingatusar oporocuai vaherã. Ipa vahe ipãhu pendar serer Samuel aracahe. Ahe Tüpa ñehe mombehusar avei. ²¹ Ahese yande ramoi eta oporandu yuvireco Tüpa upe mborerecuar guasu rese. Evocoyase Tüpa omondo Saül chupe, ahe Cis rahir, ahe yande ramoi Benjamín suindar seci. Oporocuai cuarenta araviter rupi oico. ²² Ipare Tüpa virocua imborerecuasa ichui; omondo David upe yande ramoi cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuaita’ ehi Tüpa. ²³ Ahe David suindar sui, Tüpa ombou Jesús Israel iguar písiro ãgua. Aracaheve Tüpa omombehu co yande ramoi upe. ²⁴ Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tüpa upe pe ñeapiramo ãgua’ ehi chupe. ²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande písirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ãgua ipi sui’ ehi Juan” ehi judío tûparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tüpa mboeteisar, opacatu yandeu nara ombou Tüpa co ñehesa písirosa resendar. ²⁷ Jerusalén pendar rerecuar avei ndoicuai evocoi Jesús Tüpa remimbou secoise yuvireco. Iyavei ndosenducuai Tüpa ñehe mombehusar cuachiar pipe oyerocuise mbituhusa ari yacatu yuvireco. Ichui ahe ae oyuca uca yuvireco. Ëgüe ehi imboaviye Jesús rese Tüpa ñehe mombehusar rembicuachiagüer pipendar yuvireco. ²⁸ Yepe ndoyosui mbahe sembiapo rai yuca uca ãgua yuvireco viña, ahe rumo oporanduño Pilato upe yuca uca ãgua rese yuvireco” ehi. ²⁹ “Ichui omboaviyese opacatu icuachiapri pipendar yuvireco, oviroyi uca curusu sui ñoti ãgua yuvireco. ³⁰ Tüpa rumo ombogüerayevi iri. ³¹ Setã ari rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cûritei ahe ava ité omombehu Jesús recocuer ava upe yuvireco” ehi tûparo pendar upe.

³² “Sese che mu eta, cûritei oromombehu pëu evocoi ñehesa aviye vahe Tüpa omondo vahe yande ramoi upe aracahe. ³³ Tüpa omboaviye ramo güemimombegüer yande Israel suindar yaico vahe upe, ombogüerayevise Jesús. Evocoi güemimombegu oicuachia uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tüpa chupe. ³⁴ Tüpa omombehu avei güemimobogüerayevi sete tuyuêhi ãgua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye ãgua’ ehi. ³⁵ Sese omombehu avei ambuae icuachiapri pipe: ‘Nde, Tüpa, ndereseyai chira nde rembiguai Ava seco maranehi vahe rete ituyupa ãgua’ ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoyase oyapocatu tuvipave imu pãhuve yuvireco. Ahe setecuer rumo opaño ité ituyu” ehi. ³⁷ “Acoi Tüpa ombogüerayevi vahe retecuer rumo ndituyui eté” ehi tûparo pendar upe imombehu. ³⁸ “Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumu pëu. Moisés porocuaita sui ndipoi ñeroisa angaipa rese yandé reco mohivi ãgua. ³⁹ Jesús recocuer sui rumo oime ñeroisa ñepeí-peí viroya vahe upe” ehi. ⁴⁰ “Peicua catu co mbahe sui, toviapi eme pe harive acoi Tüpa ñehe mombehusar rembicuachiagüer pipe aipo ehi vahe:

⁴¹ ‘Esepia, pe seroïrosar peico vahe. Peyepihamondii, ipare pecañi tẽira. Esepia, che ayapora mbahe pe recovesave. Yepe ambuae omombehu tupri itera pëu che rembiaporã viña, pe rumo ndaperoyai chietera’ ehi Tüpa” ehi Pablo tûparo pendar upe.

⁴² Yuvinose potase tûparo sui, omombita Pablo yuvireco: “Teremombehu irimi erombehu vahe ñehesa ambuae mbituhusa ari pipe oreu” ehi yuvireco chupe. ⁴³ Yuvinosese ava rehii tûparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, “Peico tupri catu Tüpa pe rovasasa pipe” ehi ava upe yuvireco.

⁴⁴ Ambuae mbituhusa ari pipe seni opacatu ava ahe pendar oñemonuha yuvireco Tüpa Ñehengagüer rendu ägua. ⁴⁵ Osepiase ava rehii, judío rerecuar oñemoiró iteanga Pablo upe, supindar upe avei yuvireco. Viroiro Pablo ñehe ava upe yuvireco. ⁴⁶ Evocoyase Pablo, Bernabé reseve oñehe yuvireco judío upe osiquiyeeñisave:

—Tüpa ore cuai pëu rane ore ñehe ägua. Pe rumo ndapeyapisaca potai iñehengagüer rese. Ipipe sui ndiyai peipisi tecovesa apirëhi vahe. Evocoyase orosora, oroñehe ava ndahei vahe judío upe. ⁴⁷ Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco ägua ndahei vahe judío yuvirecoi vahe upe písirosa roguata ägua opacatu ivi rupi’ ehi.

⁴⁸ Ava ndahei vahe judío osenduse co ñehesa, oviharete yuvireco, omboetei avei Tüpa Ñehengagüer. Opacatu ava iporavopri tecovesa apirëhi vahe pisi ägua, ahe viroya yuvireco.

⁴⁹ Evocoyase Tüpa Ñehengagüer omombehu opacatu ahe ivi rupi yuvireco. ⁵⁰ Judío rumo omonguerëhi cuña imboyeroyapri Tüpa mboeteisar iyavei mbia seco ivate vahe Pablo, Bernabé mose uca ägua güecua sui yuvireco yamotarëhisave. ⁵¹ Ahese Pablo, Bernabé oipipete opitaqui ivi sui yuvireco ‘Tüpa toicua mbahe sembiapo ai rese yuvireco chupe’ oya. Ichui yuviraso Iconio ve. ⁵² Jesús reroyasar rumo oviharete yuvireco, vireco ité Espíritu Santo oyese yuvireco.

14

Pablo, Bernabé reseve omombehu Tüpa Ñehengagüer Iconio ve yuvireco

¹ Pablo, Bernabé oyepota Iconio ve yuviraso. Aheve yuviroique judío tüparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío. ² Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarëhi ägua. ³ Ahe rumo opita pucu yuvireco Iconio ve, omombehuñe yande Yar recocuer osiquiyeeñisave yuvireco. Aheve Tüpa ombou opíratasa mbahe yavai vahe apo ägua chupe ‘ichui toicua yuvireco Pablo, Bernabé che poroaisusa mombehuse’ oyapave. ⁴ Ahe tecua pendar rumo ipihañemoñeta yoivi yuvireco: ñepej judío pihañemoñetasa rupindar; ambuae evocoyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco ägua yuvireco, “Ita pipe avei yayapi-yapi” ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa avíye vahe Jesús resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oí ⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tüpa rese ocuera ägua. ¹⁰ Evocoyase aipo ehi pírata chupe:

—¡Epüha! —ehi.

Ahese opo, opüha, oguata voi. ¹¹ Osepiase ava rehii mbahe sembiapo yuvireco, osapucai pírata Licaonia ñehe pipe yuvireco:

—¡Tüpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihñemoñeta yuvireco Bernabé ahe tüpa Zeus iyavei Pablo ahe tüpa Hermes viña. Esepia, Pablo oñehe vahe. ¹³ Ahese co tüpa Zeus pahí güeru tivi, mbahe potri avei. Ahe tecua tapia roquendave, ahe Zeus tüparo tecua pipe ava reiquesa rupi chini. Oyuca pota tivi Pablo, Bernabé mboetei ägua yuvireco viña. ¹⁴ Oicuae rumo Bernabé, Pablo, ahese omondo oturucuar yuvinoña ava pãhuve; oñehe pírata yuvireco:

¹⁵ —Mbia, ¿mahera ëgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ëgüe ehi tēi vahe mboeteisa sui; peroya Tüpa supi eté vahe” orohe pëu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tüpa, “Ëgüe tehi oguata ndahei vahe judío opihañemoñetasa rupi yuvireco” ehi viña. ¹⁷ Tüpa rumo ndasesarai ava upe mbahe tupri apo ägua sui. Ahe ombou amar pëu mbahe miti ha avíye ägua yepi. Ëgüe ehi mbahe tembihu imbou iyavei viharetasa pëu —ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei ägua viña.

¹⁹ Ahese oyepota moviro judío Antioquia sui, Iconio sui avei. Oipihñemoñeta rerova ava rehii yuvireco. Ichui oyapi-yapi ita pipe Pablo yuvireco. Ipare ombotíriri seraso yuvireco tecua ivi. Ipihñemoñeta: “Yayuca ité” ehi yuvireco chupe viña. ²⁰ Oyere tupri Pablo rese

Jesús reroyasar yuvireco. Ahe rumo oñarapuha, oiqhe iri oso tecua pipe. Ahere ayihive yuvinose oyeví yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipape oyeví yugüeru Lистра rupi, Iconio rupi avei, oyepota Antioquia ve yuvireco. ²² Ahe supi omonguerêhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroñaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe têi pipe yande recose Tüpa mborerecuasave yande reique água” ehi yuvireco Jesús reroyasar upe. ²³ Ipape oiporavo ava Jesús reroyasar rãro água ñepei-peí ñemonuhasa rupi. Oyeroqui iyavei oyecuacu. Ipape viropovêhe yande Yar upe iporaviqui água yuvireco.

Pablo, Bernabé oyeví yuvireco Antioquia ve Siria ivi rese

²⁴ Ipape yuviraso Pisidia rupi, oyepota Panfilia ivi rese. ²⁵ Omombehu Tüpa Ñehengagüer yuvireco Perge ve. Ipape yuviraso Atalia ve. ²⁶ Ahe ichui yuviraso carite pipe Antioquia ve, ahe tecua pipe yipindar imondopri Tüpa upe sovasapri yuvirecoi mboraviqui apo água. Aheve tupri avei imboaviye pare oyeví yuvireco. ²⁷ Oyepotase Antioquia ve yugüeru, omonuha opacatu Jesús reroyasar yuvireco. Aheve omombehu opacatu Tüpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya água yuvireco” ehi yuvireco omboetasa upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoyase moviro mbia Jesús reroyasar judío yugüeru Judea sui Antioquia ve. Ahe ombohe Jesús reroyasar yuvireco aipo ehi: “Aracahe Tüpa oyocuai Moisés yande ramoi cuai água: ‘Pembocircuncida opacatu pe mu cuimbahe cheu nara’ ehi Tüpa aracahe” ehi yuvireco. “Cüritei acoi êgüe ndapeyese Jesús reroyasar upe, noñepisiroi chietera yuvireco” ehi Antioquia pendar upe yuvireco. ² Pablo, Bernabé reseve rumo oñeha pírata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu água yuvireco.

³ Êgüe ehi Jesús reroyasar Antioquia pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tüpa rupi oguata água yuvireco” ehi. Ahese opacatu Jesús reroyasar oyembóharetse yuvireco senduse.

⁴ Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tüpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opüha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaíta mboaviye água yuvireco —ehiño ité yuvireco.

⁶ Ahese apóstol, Jesús reroyasar rãrosar avei oñemonuha oyemomborandu água aipo mbahe rese yuvireco. ⁷ Yemomborandu viteseve, Pedro opüha ipãhuve aipo ehi:

—Che mu, peicua niha aracaco Tüpa che poravo pe pãhu sui co ñehesa poropisirosa resendar mombehu água ava ndahei vahe judío upe ‘toviroya yuvireco’ oyapave. ⁸ Tüpa oicua ité opacatu ava pihañemoñetasa. Chupe avei omondo Espíritu Santo inungar yandeu. Ipape sui yaicua Tüpa oipisi avei ahe ava oyeupe nara —ehi—. ⁹ Evocoyase, “Judío aviye catu vahe ava ndahei vahe judío sui” ndehi Tüpa. Esepia, opacatu oyoya pãve Tüpa upe yaico. Sese omoatiro ipihañemoñeta rai sui oyese yeroyasa pipe. ¹⁰ ¡Pe tie pesecoãha pota Tüpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatui Tüpa porocuaíta mboaviye água yuvireco, yande avei êgüe yahe —ehi—. ¹¹ Co rumo, yarayase yande Yar Jesucristo, yande písirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondisa Tüpa oyapo uca ava ndahei vahe judío pãhuve yuvireco chupe. ¹³ Osendupase iñeha yuvireco, ahese Santiago aipo ehi:

—Che mu, Jesús reroiyasar, peyapisacami che ñehe rese: ¹⁴ Simón omombehu yandeu Tüpa osaisu avei ava ndahei vahe judío. Sese oiporavo ahe ava oyeupe nara —ehi— . ¹⁵ Oyoya tupri Tüpa ñehe mombehúsar rembicuachiagüer rese. Ñepeí ipáhu pendar oicuachía aracahe aipo ehi:

¹⁶ ‘Coiye catu ayevíra vitu. Ahese ayapo piásu irira che rëta David oyapo uca vahecuer, ahe oi imocañipírer. Ambopiasu irira oitípa vahecuer yuvireco.

¹⁷ Ëgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ípehaprí reseve.

¹⁸ Evocoi yande Yar rembiaporá icuaprí aracahe suive’ ehi Tüpa ñehe mombehúsar aracahe.

¹⁹ ‘Sese chepihañemoñeta iya ndayayocuai chira Moisés porocuita rupi oñecuñaro va-herã ndahei vahe judío Tüpa rupi oguata água yuvireco” ehi. ²⁰ ‘Aviye rumo yaicuachiasé chupe co mbahe resendar güeraño: Pehui rene mbahe mímba yucaprí mbahe rahanga tēi upe seropovēheprí iyavei ndapeaguasai chira, pehui rene mbahe mímba yucaprí suví renosepirēhi, mbahe ruví avei” ehi. ²¹ ‘Esepia, opacatu tecua rupi yuvirecoi ava omombehu vahe Moisés porocuita ñepeí-peí mbitúhúsa ari pipe judío tūparo pipe aracahe suive. Aipo rupive” ehi Santiago.

Icuachiaprí ndahei vahe judío upe nara

²² Ahese apóstol, Jesús reroiyasar rārosar, ambuae Jesús reroiyasar avei omondo pota opáhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbía, ahe Judas Barsabás iyavei Silas. Ahe imboyeroyaprí omboetasa páhuve yuvireco. ²³ Ahe supí aipo ehi icuachía imondo yuvireco:

“Ore apóstol, Jesús reroiyasar rārosar, pe mboetasa oroico vahe. Pe mboaviravesa, ndapemarái revo pe ndahei vahe judío Antioquía pendar, Siria pendar, Cilicia pendar avei. ²⁴ Orayandu amove ava ore páhu pendar pe mañeco tēi aipo oporombohesa pipe yuvireco. Ahe ava ndahei ore ocuaita pipe yuviraso pēu pe píhañemoñeta rerova. ²⁵ Sese oyoya orepihañemoñeta oroiporavo ñuvirío mbía ore rembiásu ore rivri Bernabé, Pablo rupi imondo eipeve pēu. ²⁶ Ahe acoi oyemondo vahe mbahe-mbahe tēi povrive yande Yar Jesucristo recocuer rese yuvireco. ²⁷ Oromondo Judas, Silas avei pēu: ahe teieté omombehura opacatu cuachiar pípendar pēu yuvireco. ²⁸ Aviye Espiritu Santo upe, oreu avei co porocuita güeraño oromondo vahe rese pēu. Ndape cuaisa pota iri rumo ambuae mborocuita rese. ²⁹ Pehui rene mbahe mímba yucaprí seropovēheprí mbahe rahanga tēi upendar, ndapehui chiaveira mbahe ruví, mbahe mímba yucaprí suví renosepirēhi vahe iyavei ndapeaguasai chira. Pepoise evocoi mbahe naporái vahe sui, oimera mbahe tuprí pēu. Aipo rupive. Peico tuprí” ehi.

³⁰ ‘Aviye” ohe pare, yuviraso, oyepota Antioquía ve. Aheve opase omonuha Jesús reroiyasar yuvirecoi vahe omondo cuachiar yuvireco chupe. ³¹ Ahe cuachiar rese oyeróquise, oyemboviharéte yuvireco. ³² Judas, Silas Tüpa suindar ñehesa mombehúsar avei yuvirecoi. Sese omboviharéte catu iyavei omonguerēhi catu avei ahe ava yuvireco oñehe pipe. ³³ Opítase moviro ari aheve, Jesús reroiyasar Antioquía pendar aipo ehi: ‘Aviye. Peyeví tuprí pe mbousar upe” ehi yuvireco chupe. ³⁴ Silas rumo opíta potaño ité aheve. ³⁵ Pablo, Bernabé avei opíta viteño ité aheve yuvireco, ahe setá ambuae Jesús reroiyasar reseve imbohe vite água yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu água

³⁶ Coiye Pablo aipo ehi Bernabé upe:

—Yaso, yasepia iri Jesús reroiyasar opacatu yande Yar ñehengagüer yamombehu vahecuer rupi, ¿mara ehi píha ahe yuvireco? —ehi.

³⁷ Ahese Bernabé víraso pota Juan Marcos oyeupi viña. ³⁸ Nomboyoyai rumo Pablo ípihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipítiviño íporavíquisa rese” ndehi chupe. ³⁹ Nomoingatuise mbahe oyeupe yuvireco, oyepepiño yuvireco oyesui. Ahese Bernabé víraso Marcos oyeupi carite pipe Chipre ve. ⁴⁰ Pablo rumo oiporavo Silas oyeupi icho água. Yuvínose água Antioquía sui, Jesús reroiyasar ahe pendar aipo ehi yuvireco chupe: “Tape rovasa Tüpa oporoaisusa pipe” ehi yuvireco imondo. ⁴¹ Ipare yuviraso Siria, Cilicia rupi Jesús reroiyasar monguerēhi catu água yuvireco.

16

Timoteo oso Silas ndugüerã Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroiyasar, Timoteo serer vahe, judía, Jesús reroiyasar membri. Iyesupa rumo griego. ² ‘Evocoi Timoteo aviye etepri” ehi Jesús reroiyasar Listra pendar, Iconio pendar avei yuvireco chupe.

³ Pablo viroguata potaño ité Timoteo oyeupi. Sese seroguata renondeve, ombocircuncida uca seroïroëhi ägua judío yuvirecoi vahe upe. Esepia, opacatu oicua Timoteo ru griego secose yuvireco. ⁴ Evocoyase opacatu tecua iguatagüer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tüpa omondo uca Pablo Macedonia ve iquer nungar pipe

⁶ Espiritu Santo ndoipotai Asia rupi yuviraso vaheã Tüpa Ñehengagüer mombehu ägua. Sese oyahuva yuviraso Frigia rupi, Galacia rupi avei. ⁷ Ëgüe ehi oyepota Misia popïve yuvireco. Ichui yuviraso pota tã Bitinia ve. Jesús Espiritu rumo ndoipotai icho ägua supï. ⁸ Ahese osasaviño yuviraso Misia sui carite guasu yemboyasa Troas ve oyepota ägua yuvireco. ⁹ Oyepotase aheve, ahe pïtu pipe Pablo oquer nungar pipe osepia mbïa, Macedonia pendar, “Ereyumira Macedonia ve ore pïtivïi ägua viña” ehi ohã chupe. ¹⁰ Ipare ore oroyemoingatu voi eté Macedonia ve ore so ägua. Esepia, ore orocua ité Tüpa aheve ore mondora ñehesa písïrosa resendar mombehu ägua.

Pablo, Silas Filipino ve yuvirecoi

¹¹ Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyapri catu vahe ambuae tecua sui, ahe ivi Macedonia rupindar. Aheve Roma iguar oyecuai, oyocuai avei opacatu tecua ivirindar ava yuvireco. Aheve moviro ari tã oroco. ¹³ Mbituhusa ari pipe orosë evocoi tecua sui iai popïve. “Aheve oñemonuhara judío oyoeroqui ägua” orohé. Aheve cuña oñemonuha yugüeru. Aheve oroyepota chupe, orogupï ipãhuve. Ipare oromombehu co ñehesa písïrosa resendar yuvireco chupe. ¹⁴ Ñepeï imboetasa, Lidia serer vahe, Tiatira pendar, oyapisaca ore ñehé rese oï. Ahe Tüpa mboeteisar secoi, turucuar suendi vahe mbovendasar avei secoi. Yande Yar omohivi ipihañemoñetasa iyapisaca ägua Pablo remimombehu rese. ¹⁵ Sese ñapiramosa, opacatu sêta pendar reseve. Ipare ore mombita pota güëtave.

—Che reroyase peye yande Yar reroyasar che recose, pepitara che rêtave —ehi oreu.

Ëgüe ehi ore monguerëhi. Sese oropita sêtave ipiri.

¹⁶ Ipare ambuae ari oroso irise oroyeroqui ägua, cuñatai ore rovaïchi, ahe cuñatai caruguar pïratasa pipe mbahe mombehusar. Oïcua ava upe mbahe oime vaheã mombehu. Omombehuse mbahe, setã oipisi seprï guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tüpa ivate catu vahe upendar oporaviqui yuvireco omombehu: “Na ehira Tüpa yande písïro” ehi yuvireco! —ehi pucu-pucu ore mombehu ava upe.

¹⁸ Setã ari ëgüe ehi oico oreu. Omañeco tãise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esë co cuñatai sui —ehi.

Aheveve voi caruguar osë ichui.

¹⁹ Evocoyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbïa orogüeru vahe peu, judío tã yuvirecoi. Aheve omboaiyu guasu tã yuvireco yande recua pipe. ²¹ Oporombohe güecocuer rese yuvireco. Secocuer rumo naporai oreu. Ore Roma iguar oroco, sese ndoroicatu secocuer moña ägua —ehi yuvireco mborerecuar upe.

²² Evocoyase ava eta oyamotarëhi Pablo iyavei Silas yuvireco iyavei mborerecuar, “Pe-sequi iturucuar ichui. Ipare peinupara ivira pipe” ehi. ²³ Inupã iteanga pare, osoquenda yuvireco. Oyocuai pïrata soquendapri rãrosar yuvireco, “Esãro tupri” ehi yuvireco chupe. ²⁴ Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

²⁵ Ahe pïtu mbiter rupi rumo Pablo, Silas oyeroqui, osapucaï Tüpa mboeteisave yuvireco. Ambuae ava soquendapri evocoyase osenduño tã yuvireco isapucaï. ²⁶ Ahese aviyeteramo tã ivi orirïi eteanga. Opa omomara ava roquendasa moviracuasa, opacatu oquenda oyemboï iyavei opacatu carena oyera soquendapri sui. ²⁷ Ahese soquendapri rãrosar omahe yesapiha. Osepïase oquenda imboipri, aheve vinose oquise pucu siru sui oyeyuca ägua viña. Esepia niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tã ndeyeupe! ¡Esepia, opacatu orociveño cohave! —ehi pucu soquendapri rãrosar upe.

²⁹ Evocoiyase soquendapri rārosar, “Emboumi tataendi” ehi ondugüer upe. Ichui oña oique, orirri, osiquiyepave oñenopiha Pablo, Silas rovai oso. ³⁰ Vinose pare soquendasa sui oporandu chupe:

—Mbia, ¿mara ahera vo che ñepisiro āgua vichico? —ehi chupe.

³¹ —Eroya yande Yar Jesucristo. Ichui ahe nde pīsiora, nde rēta pendar avei —ehi yuvireco chupe.

³² Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei. ³³ Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco. ³⁴ Viraso pare sārosar güētave, ombocarú. Ahe sēta pendar avei oviharete ité yuvireco Tūpa reroyasa rese.

³⁵ Cōhese mborerecuareta omondo sundao ava rese icuaiipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi. ³⁶ Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose āgua. Peso tupriño peico —ehi chupe.

³⁷ Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose āgua —ehi soquendapri rārosar upe.

³⁸ Ipare sundao ava rese icuaiipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero āgua rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasa sui, yuviraso iri Lidia rēta. Oñemonuha irise ambuae Jesús reroyasar pāhuve, omonguerēhi catu yuvireco. Ipare yuviraso ichui.

17

Ava yaivu guasu tēi Tesalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ēgüe ehi oyepota tecua Tesalónica ve yuvireco. Aheve oime judío tūparo. ² Secocuer rupi eté mbituhusa ari pipe Pablo oique judío tūparove, oñemoñeta ava eta upe mbosapi mbituhusa ari rupi Tūpa Ñehengagüer rese. ³ Omboyecua tupri imombehu Tūpa Rembiporavo ava pīsiro āgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, accoi amombehu vahe pēu, ahe ité niha Tūpa Rembiporavo ava pīsiro āgua —ehi.

⁴ Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco. ⁵ Judío rumo ndoviroyai vahe oñemoirombave secatēhi ava rese yuvireco. Sese omonuha ava yuvireco tēi vahe, ndipihai vahe yuvireco. Imonuha pare, ahe omboaivu guasu uca tēi ahe ava upe opacatu güecua pipe yuvireco. Yuviraso Jasón rētave Pablo, Silas reca, vinose pota ava rehii pāhuve yuvireco viña. ⁶ Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroāse guasu seroco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrítei oyepotapa yuvireco cohave! ⁷ Co Jasón omombituhu güētave. ¡Opacatu co yuvirecoi vahe ndoviroyai Cesar porocuita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

⁸ Aipo ñehesa renduse, oyepihamondii guasu ava eta, mborerecuar avei tecua pipendar yuvireco. ⁹ Mborerecuar rumo oipisipase guarepochi Jasón sui, ambuae Jesús reroyasar sui avei, aheve opa omose.

Pablo, Silas omombehu Tūpa Ñehengagüer Berea ve yuvireco

¹⁰ Ahe pītu pipeve voi ava Jesús reroyasar omondo Pablo, Silas tecua Berea ve yuvireco. Oyepotase aheve, yuviroique judío tūparo pipe. ¹¹ Berea pendar ava aviye catu ava Tesalónica pendar sui. Ēgüe ehi ipisi ohāpisiēhisa pipe ñehesa yuvireco iyavei ari yacatu rupi oseca Tūpa Ñehengagüer pipe ‘¿supi eté pīha Pablo ñehesa?’ oyapave yuvireco. ¹² Evocoiyase setá avei Pablo ñehe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaivu guasu tēi uca āgua ava upe yuvireco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve

yuvireco. ¹⁵ Evocoiyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvireco yuviraso voi água Pablo piri ahe tecuave yuvireco.

Pablo Atenas ve secói

¹⁶ Pablo osãro viteseve Silas iyavei Timoteo Atenas ve oico, ndoyembovihai osepiase opacatu rupi tũpa rahanga-anga tẽi. ¹⁷ Sese judío tũparo pipe omombehu Jesús recocuer judío eta upe iyavei ambuae Tũpa mboeteisar upe avei. Iyavei ari yacatu omofieta ava osepia vahe ocarusu rupi ava ñemonuhasave ahe tecua pipe. ¹⁸ Evocoiyase amove mbia oyembohe vahe epicũreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pĩha co mbia ñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia oñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuerayevisa resendar. ¹⁹ Evocoiyase ahe oyembohe vahe viroyepi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña?

²⁰ Supi eté niha erembobehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugũeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

²²⁻²³ Evocoiyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepeí tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

²⁴ “Evocoi Tũpa oyapo vahe co ivi, opacatu mbahe ipor avei. Ahe niha ivi, iva Yar secói. Sese ndasecói tũparo ava tẽi rembiapo pipe. ²⁵ Ndahei ava rembiapo pipe sui tẽi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pituhesa iyavei opacatu mbahe oime vahe ivi, ivave” ehi.

²⁶ “Tũpa oyapo opacatu-catu tẽi ava ñepeí ava sui ava yesu água opacatu ivi rupi. Omondo ivi ava yemboerecua água ñepeí-peí upe. Ari avei omondo co ivi pipe iyemboerecua água yuvireco chupe. ²⁷ Ègũe ehi ava upe ‘tache reca yuvireco’ oya, ‘pipe sui aviyeteramo che reroyara yuvireco’ oyapave. Ègũe ehi rumo Tũpa yande resevemí tẽi. ²⁸ Esepia niha, Tũpa sui yaicove, ipĩratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tũpa suindar’ ehi yuvireco.

²⁹ Sese yande Tũpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tũpa’ ndayahei chira. Esepia, mbahe rahanga ava rembiapo tẽi, ndahei Tũpa” ehi. ³⁰ “Pe ramoí ndoicua tupriase yuvireco aracahe, Tũpa oñemosañõ mbahe sembiapo rese chupe. Cũritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya. ³¹ Esepia, ahe oiporavo ari opacatu ava recocuer rese porandu uca água güecocuer ivi tupriasa pipe ñepeí güembiporavo upe. Ahe ombogũerayevi güembiporavo omano vahe pãhu sui ‘toicua opacatu ava güecocuer rese iporandu água’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroĩrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osẽ ipãhu sui oso. ³⁴ Moviro rumo mbia oyemboya sese, viroya ité vahe ñehesa yuvireco. Ahe ipãhuve secói mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secói

¹ Coiye catu Pablo osẽ Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugũeru ramo rumo Italia sui güembireco Priscila reseve. Yuvĩnose ñepeí tecua Italia rupindar Roma sui oyocuaise mborerecuar guasu Claudio: “Toyuvĩnose ité opacatu judío Roma sui” ehise. Pablo oso, ³ opita Aquila piri oporaviqui água. Esepia, Pablo, Aquila avei ahe mbahe pírer mbovĩvisar pãve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toivroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu água rese güeraño judío eta upe aipo ehi: “Jesús niha Tüpa Rembiporavo ava písiro água secoi” ehi. ⁶ Ñehe-ñehe tēi rumo seroĩrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tüpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoyase Pablo osē judío tūparo sui, oique mbia Ticio Justo serer vahe rētave, ahe Tüpa mboeteisar avei secoi. Ahe sēta judío tūparo iqueve. ⁸ Crispo, ahe judío tūparo rerecuar viroya avei yande Yar, opacatu sēta pendar avei viroya yuvireco. Setá ambuae Corinto pendar avei viroya osenduse ñehesa yuvireco. Seroya pare, oñeapiramopa uca yuvireco. ⁹ Ñepepi pītu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepia, che nde reseve aico. Sese ndiyai ava upe nde momara uca água. Supi eté che arco setá che rahirā co tecua pipe” ehi yande Yar chupe. ¹¹ Evocoyase opita ñepepi araviter yemombitesa rupi Corinto ve oico. Aheve ombohe Tüpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarēhisave. Ichui vıraso ahe mborerecuar upe porandusa ivate catusave yuvireco, ¹³ aipo ehi yuvireco chupe:

—Co mbia oipihañemoñeta roerva tēi ava oTüpa mboetei água. Ndahei rumo Roma pendar porocuaita rupi egüe ehi yuvireco —ehi yuvireco seroĩrosave chupe.

¹⁴ Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca água pe remimombehu rese viña. ¹⁵ Pe rumo peporandu cheu mbahe pe yembohese resendar, pe Tüpa rer resendar iyavei pe Tüpa porocuaita resendar rese tēi. Pemoingatu pe ae pe recocuer; ndaipotai aipo nungar mbahe moingatu água —ehi Galión ahe ava upe.

¹⁶ İpare opa omboyepipi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. İpare yuvırocua-rocua Galión rovai ahe peve yuvireco sese. Galión rumo, “Mara etemo che arco viña” ehiño chupe.

Pablo yevi irisa Antioquia ve

¹⁸ Pablo secoi pucu vite pare Corinto ve, “Asora vichico cute” ehi Jesús reroyasar upe. İpare yuvıraso Aquila, Priscila reseve. Oyepotase Cencrea ve yuvireco para guasu popıve, ahese Pablo oñeapipa tupri oñehe mboaviye água. İpare yuvıraso carite pipe Siria ve. ¹⁹ Siria piar rupi yuvıraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu água chupe yuvireco. ²⁰ Ahe pendar ombõta pota vite tēi yuvireco viña, Pablo rumo ndopita potai aheve. ²¹ Evocoyase, “Avıye, taso rane” ehiño chupe yuvireco. “Tüpa oipotase cheu, avevi irira vitu pe piri” ehi.

İpare oso Efeso sui carite pipe. ²² Oyepotase Cesarea ve, oso Jerusalén ve “avırave” apo água Jesús reroyasar upe. İpare oso Antioquia ve. ²³ Opita pucu pare aheve, osē, oguata İri Galacia rupi, Frigia rupi opacatu Jesús reroyasar monguerēhi catu água.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tüpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oápiramo agüer güeraño tēi. ²⁶ Ahe osiquiyēhisave judío tūparo pipe omombehu Tüpa Ñehengagüer. Osenduse Aquila, Priscila ñehesa, ombõta yuvireco oyepiri. Ahese omombehu tupri catu Tüpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri água. İpare oyepota oso Acaya ve. Aheve oime ava Tüpa guaisusa pipe sui viroya vahe Jesús yuvireco. Ahe ava Apolos oipitıvi seroya tupri catu água yuvireco. ²⁸ Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tüpa Ñehengagüer pipe omboyecua ité: “Jesús Tüpa Rembiporavo ava písiro água secoi” ehi eté judío eta upe.

¹ Evocoiyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroiyasar. ² Evocoiyase oporandu ahe ava upe:

—¿Peipisi vo Espiritu Santo pe piha pipe peroyase Jesús? —ehi chupe.

—Ore ndorosendui eté aipo Espiritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoiyase, ¿mibahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoiyase aipo ehi ahe ava upe:

—Juan niha oñapiramo acoi omboasi vahe oangaipa oyevisé Túpa upe. Ipare rumo omombehu ava upe: “Peroya ahe eté vahe ou vaheṛá che raquicuei” ehi. Ahe ou vaheṛá, “Jesús upe” aipo ehi —ehi Pablo chupe.

⁵ Osenduse Pablo ñehé, opacatu oñepiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espiritu Santo, oiQue ipiha pipe yuvireco. Ipare aviyeteramo tēi oñehé ambuae ñehesa pipe iyavei omombehu Túpa suindar ñehesa yuvireco. ⁷ Ēgüe ehi Túpa ahe doce mbia yuvirecoi vahe upe.

⁸ Mbosapi yasi rupi Pablo oiQue omombehu Túpa Ñehengagüer judío upe osiquiyeehisave itüparo pipe ipihañemoñeta rerova água Túpa mborerecuasa resendar reroya água rese. ⁹ Amove rumo judío ipihaviracua ité seroyaehi água yuvireco. Ipipe iñehé-ñehé tēiño co tecocuer ipiasu vahe mombehusa rese yuvireco ava rehii rovaque. Evocoiyase Pablo oyepepi ichui, vinosepa oyeupi Jesús reroiyasar yeroquisa Tirano serer vahesave seraso. Aheve ari yacatu rupi oñehé yepi. ¹⁰ Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Túpa omondo güeco pīratasa Pablo upe poromondiisa apo água. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera água. Carugar avei opa yuvinose yuvireco ichui.

¹³ Amove oime judío oguata vahe ocar rupi carugar mose água ava sui. Sese nara oiporu pota yande Yar Jesús rer yuvireco.

¹⁴ Evocoiyase aipo ehi carugar upe: “Pablo Jesús recocuer omombehu vahe rer pipe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyesupa judío pahi rereciar seci. ¹⁵ Carugar rumo omboyevi chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

¹⁶ Aheseve ahe cuimbahe carugar vireco vahe opo ipáhuve oso. Opacatu opīratasa pipe opa ité osecopi siete mbia yuvirecoi vahe. Omomara-mara tēi oguayihisa pipe imonanipa tupri imondo. ¹⁷ Co mbahe sembiambe rēracua opa oyepota opacatu Efeso pendar upe, judío upe, ava ndahei vahe judío upe avei. Evocoiyase oyembosiquiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús viroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo viroyase, omonuhapa ocuachiar ombopayesa resendar sapi água opacatu ava rovaque yuvireco. Sapi pare, opa ahe cuachiar repri vinose yuvireco. Ahe sepri cincuenta mil tupri ari mboraviqui repri. ²⁰ Ēgüe ehi Túpa opīratasa pipe ombouvicha oñehengagüer iyavei iñehé pīratasa oyecua catu ava rese.

²¹ Ipare Pablo ipihañemoñeta Jerusalén ve oso água ivi Macedonia, Acaya rupi. “Coiyé catu aheve che reco viteseve, ichuive che asora Roma ve” ehi. ²² Evocoiyase omondo ñuvirío opitiviisar Timoteo, Erasto Macedonia ve güenonera. Ahe rumo opita vitemi Asia rupi oico.

Ava Efeso pendar yaivu guasu yuvireco

²³ Ahe ari pipe Efeso pendar yaivu guasu yuvireco co tecocuer ipiasu vahe rese. ²⁴ Aheve mbia Demetrio serer vahe seci. Ahe oyapo Artemisa rēta rahanga guarepochi apopri guarepochi pisi água. Ambuae ava mbahe rahanga aposar oipisi tupri avei oporaviqui repri ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboavivu guasu uca água. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Túpa ité’ ohesa pipe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu. ²⁷ Aviyeteramo mbahe tēi oimera yandeu yande poraviquisa mocañi tēi água, túparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroirora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucaí aipo ehi yuvireco: “¡mboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaívu guasu tēi. Osapucaí vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oi que pota tēi ava rehii pãhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucaí pĩrata ñepei mbahe rese, amove osapucaí ambuae mbahe rese. Esepia, yaívu tēi yuvireco. “¿Mahera vo evocoiyase yañemonuha?” ehi tēi setá ipãhu pendar yuvireco. ³³ Amove rumo ava rehii pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehii rovaque yuvireco. Alejandro evocoiyase omopuha tēi opo ava monguiriri ãgua viña. Osepi pota omu judío ava rehii rovaque viña. ³⁴ Ava rehii rumo oicuaase Alejandro judío secose yuvireco. Opacatu guasu osapucaí pĩrata yuvireco. “¡mboeteipri catu Artemisa yande recua pendar tasecoi!” ehi pucu-pucu yuvireco. Ëgüe ehi ahe osapucaí ñuvirío hora rupi rutei yuvireco.

³⁵ Evocoiyase tecua pipendar mbahe cuachiasar oicatusa ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga íva sui oviapi vahe rese avei hañecosa. ³⁶ Ndi poi niha ava, ‘Aní’ ehi vahe rã che remimombehu rese. Sese peyemonguiririño, peyapoi rene mbahe pe yapisacañisave. ³⁷ Peruño tēi eté co ñuvirío mbia cohave, ndoyapoi rumo mbahe tēi Artemisa upe yuvireco. Nimondai mbahe rese itũparove, ndoviroĩroi avei serer yuvireco. ³⁸ Sese Demetrio iyavei oporaviqui vahe supi ahe oñemoirose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusaave imoingatu ãgua. ⁴⁰ Mborerrecuar revo oyandura yande rembiapo co pipe, ‘¿Mahera peavívu guasu tēi? ¿Che amotarẽhimhave tie ëgüe peye?’ ehi tiẽtera yandeu. Oporanduse yandeu, ndayaicatui chitiẽtera imboyeví ãgua iñehe chupe. Esepia niha, co yañemonuha yande remimbotar tēi cohave” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyeypota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyeví iri oso Macedonia ve ívi rupi. ⁴ Yuviraso moviro mbia supi, ipãhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tiquico, Tróximo. Timoteo oso avei supi. ⁵ Evocoiyase yuviraso Pablo rnondeve sãro ãgua Troas ve. ⁶ Pieta pan ndayapepoi vahe hu pare, orosẽ tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingo pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osẽ pota ahere ayihive voi ichui. ⁸ Ahe oi ivate vahesave ñemonuhasa pipe setá tataendi. ⁹ Mbia chíhivahe, Eutico serer vahe, metanave uguapi oĩ. Pablo rumo oñehe pucú iteanga. Evocoiyase omboopesii ahe chíhivahe. Ipare oque; aviyeteramo tēi oviapi oi ivate vahe mbosapisa sui. Ahese ava ogüeyi sehõgüer rupi ívi sui yuvireco. ¹⁰ Evocoiyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe: —Pesiquíeyi rene; nomanoi moco —ehi.

¹¹ Ipare oyeupi iri oso ombóhi pan igua. Ichui oñehe pucu vite. Omomba cõhe senise; ipare oso cute. ¹² Evocoiyase co mbia chíhivahe viroyevise secosave, opacatu oyemboviha guasu catu yuvireco. Esepia, nomanoi eté.

Pablo yuviraso Troas sui Mileto ve

¹³ Pablo oso pota ívi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepia, oipota Jerusalén ve Pentecostés pieta pipe tupri güeco ãgua. Sese Efeso oroñacuasaño oroso.

Pablo ñehesa Jesús reroyasar rãrosareta Efeso pendar upe

¹⁷ Mileto ve ore recose, Pablo omondo oñeha Efeso ve 'toyugüeru Jesús reroyasar rãrosar cheu' oya. ¹⁸ Oyepotase yuvireco chupe, aipo ehi: "Peicua niha che recocuer aviye ité yipisuive ari che reique ramosa resendar co Asia ve. ¹⁹ Ari yacatu rupi aporaviqui yande Yar upe pe pâhuve vichico che reco asihisave che yasehosa pipe. Yepe judío che mboguai etepri che recoãhasave pe recuave yuvireco viña, ²⁰ che rumo ndaicitatu ñehesa aviye vahe mombehuñi pëu mbahe aviye água yepi. Che opombohe ava rehii rovaque, opombohe avei ñepeipei pe rêta rupi yepi" ehi. ²¹ "Amombehu ñehesa judío upe, ava ndahei vahe judío upe avei aipo ahe: 'Pemboasi pe angaipa; peyevi Tüpa upe, peroya avei yande Yar Jesús' ahe" ehi. ²² "Cüritei asora Jerusalén ve vichico. Aheve che so água Espiritu che cuai che piha pipe. '¿Mara ehira piha yuvireco peve cheu?' aipo ahe. ²³ Co güeraño che aicua: opacatu tecua che sosa rupi Espiritu Santo aipo ehi cheu che roquenda água iyavei che mombaraisu água yuvireco yepi" ehi. ²⁴ "Ndacherecatëhii rumo cheyese che mano água. Che rumo amboaviye potaño ité che poraviquisa Tüpa upe, ahe yande Yar Jesucristo che cuai vahe co ñehesa icatupri vahe mombehu água. Co Tüpa oporoaisusa pipe ombou ñepeipei vahe Guahir ava pisiro água" ehi.

²⁵ "Opa niha Tüpa mborerecuasa amombehu pëu. Che rumo aicua ndache repia iri chira peye. ²⁶ Sese tapeicua cüritei: ndayavii eté che cuaita mboaviye água co tecocuer aviye vahe mombehu pipe pëu. ²⁷ Esepia, ndaicuacui eté Tüpa Ñehengüer mombehu; che rumo amombehuñi ité opacatu Tüpa recocuer pëu. ²⁸ Sese peñearo tupri, pesãro avei opacatu Jesús reroyasar Espiritu Santo porocuita rupi. Inungar ovesa rãrosar, êgüe peye tuprira sãro. Ahe Tüpa remimboepi yuvirecoi. Esepia, Jesús oipiyere vuvi opacatu ava angaipa repirã. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pâhuve opacatu Jesús reroyasar mocañipa pota água. ³⁰ Oime aveira que ava pe pâhu pendar pe mbopa pota aveira yuvireco pe reraso água oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pïtu, ari yacatu rupi avei che yasehosa pipe pe rereco" ehi.

³² "Sese, che rivireta, opoeyara Tüpa povrive iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pëu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pâhuve. ³⁴ Peicua niha acoi che po pipe ité aporaviqui che recove água, che rupindar recove água avei. ³⁵ Êgüe ahe amboyecua che recocuer pëu. Supi avei êgüe peyera; yaporaviqui tupri iparaisu vahe rese hañeco água. Pepihañemoñeta acoi yande Yar Jesús remimombehu rese: 'Sorivete catu ava iporereco vahe, mbahe oipisi vahe sui' ehi aracahe" ehi Efeso pendar Jesús reroyasar rãrosar upe.

³⁶ Oñeha pare, oñenopiha oyerure água opacatu omboripar reseve. ³⁷⁻³⁸ Ndoyembovihai eté, "Ndache repia iri chira peye" oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipape yuvirasofño ité yuvireco supi carite yemboyasave.

21

Pablo so agüer Jerusalén ve

¹ Evocoiyase oroseyase ore rivireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepia carite oso vaheerã Fenicia ve, ahe ipipe oroha, oroso. ³ Orosasase para guasu oroso, orosepia caha pâhu guasu Chipre serer vahe. Ahe oroñocua yande mbahe rese pocoñehisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya água. ⁴ Aheve orosepia Jesús reroyasar yuvirecoi vahe. Aheve oropita siete ari ipiri. Yepe ahe Jesús reroyasar aipo ehi Pablo upe yuvireco: "Espiritu Santo oñeha oreu. Evocoiyase eresoi rene Jerusalén ve" ehi yuvireco chupe viña, ⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure água. ⁶ "Aviye, toroso rane" ore he pare chupe yuvireco, oroha carite pipe. Ahe evocoiyase oyevi yuviraso güetave.

⁷ Tiro sui oroso Tolemaida ve. Oroyepotase, oroso Jesús reroyasar repia água. Aheve oropita ñepeipei ari. ⁸ Ahere ayihive oroso Cesarea ve. Aheve oroique, oropita Felipe rêta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pâhuve. ⁹ Evocoi Felipe vireco irungatu guayri ndomendai vahe. Tayri Tüpa ñeha mombehusar pâve yuvirecoi. ¹⁰ Oropitase setá arimi ipiri, aheve oyepota Judea sui mbia Agabo serer vahe oreu. Ahe avei Tüpa ñeha mombehusar secoi. ¹¹ Ouse ore pâhuve, virocua Pablo rumbicuasa ichui. Ipape oñapichii opi, opo avei. Aheve aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuaa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tēi chupe. ¹³ Omboyevi rumo oreu:

—¡Mahera peyaseho che rese, ndache mbovihai peye! Che rumo ayemoingatu voi che ãpichi uca ãgua, che mano ãgua rese avei Jerusalén ve yande Yar Jesús recocuer rese —ehi oreu.

¹⁴ Ndorocaituse ipihañemoñetasa rerova ãgua, oropoiño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so ãgua Jerusalén ve. ¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rētave. Ahe oremoiñgue oyeperi. Ahe yipive ité viroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisi ore pisi yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rãrosar Jerusalén pendar. ¹⁹ Pablo, “Avirave” ehi opacatu oñemonuha vahe upe. Ipare omombehu tupri yipisuive oyeupe Tūpa mbahe oyapo uca vahe ava ndahei vahe judío pãhu rupi. ²⁰ Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuita aracahendar mboaviye ãgua yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “Peseya Moisés porocuita. Pembocircuncida iri rene pe rahir. Peico iri rene yande recocuer aracahendar pipe’ aipo ehi tēi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepia, oyandura nde yepotasa cohava yuvireco. ²³ Aviye catu ereyapora ore porocuita oromombehu vahe ndeu. Oime irungatu mbia ore pãhuve. Ahe mbia omboaviyera güemimombehu Tūpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuita, opacatu judío nde reroyara, oicua ara va semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mimba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mimba yucapri suvi renosepirēhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoiyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahí upe: “Oroñemoatiro ramo. Sese oroyevira siete ari pipe oromombase ore ñemoatiro. Ahese oromondo pota ndeu porerecosa Tūpa porocuita rupi icuavēhepirã” ehi yuvireco pahí upe.

²⁷ Opa potase evocoi siete ari, judío Asia pendar osepia Pablo tūparo pipe yuvireco. Ahese omoñemoiro uca opacatu ava rehí tūparo pendar. Ipare ipisise, ²⁸ sãse yuvireco: “¡Ore mu, ore pitivíi peye co mbia oroipisi vahe rese! Esepia, oguata opacatu rupi. Oñehe tēi yande rese, Moisés porocuita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepia, cuese osepia Pablo viroguatase Tróximo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasori yuvireco. Cūrteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guacucuei tūparo roquenda yuvireco. ³¹ Oyuca potase yuvireco, ahese yaivu rēracua oyeputa sundao rereciar guasu upe. ³² Cūrteimi sereciar viraso sundao, yuvinoña yaivu vahe upe yuviraso. Osepiase ava sundao rereciar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rereciar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirio carena pipe” ehi. Evocoiyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepeí mbahe rese oñehe, ambuae, ambuae mbahe rese tēi yuvireco. Evocoiyase sundao rereciar ndoicatui supi eté vahe mbahe rendu ãgua yaivu guasu vahe pãhuve. Sese, “Peraso cuartelve” ehi. ³⁵ Viroyepotase yeupisave, ichui osupi sundao oachihive seraso yuvireco

ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboyeve mborere cupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahe-cuer ereico? Nde revo acoi ereraso oporoyuca vahe pãve cuatro mil tupri ivi iporupirêhisa rupi —ehi sundao rerecuar chupe.

³⁹ Evocoyase,

—Che judío, tecua Tarso pendar aico. Ahe tecua Cilicia pipendar imboeteipri vahe secói. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoyase mborere cuar, “Aviye” ehi chupe. Ipare opũha yeupisa harive, omopuha opo ava eta monguiriri ãgua. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi ãgua pẽu cūrítei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacua, Jerusalén pipe, Gamaliel che mbohe oyerokisave. Aheve ayembohe tupri yande ramoi porocuita rese. Ahe che mbohesa pipe avei ayembohe Tũpa mboetei ãgua rese vichico inungar pe peico cūrítei. ⁴ Che yipindar aseca-seca catu ava co Tecocuer Piasu rupi uguata vahe yamotarêhise. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahĩ rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vajerã yande mu tũparo rerecuar Damasco pendar upe, ‘Taso Damasco ve pahĩ rerecuar rer pipe ava Jesús reroyasar pisi ãgua. Ichui tarupa cohove imombaraisu ãgua’ ahe viña.

Pablo omombehu oñecuñaro agũer

⁶ “Evocoyase aso Damasco ve. Ahe ipiar rupi arovisé vicho mbiter ari rupi, avieteramo tẽi osesape guasu iva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarêhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbía?’ ahe chupe. ‘Che Jesús, Nazaret pendar aico. Che niha che amotarêhi etepri che rereco eve’ ehi cheu. ⁹ Che rupindar osepia sendigũer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epũha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendĩ iteanga vahe, ndache mboesapisoise, ahe che rupindar che po pisi che reraso Damasco ve yuvireco” ehi.

¹² “Aheve mbía, Ananías serer vahe, ou cheu. Ahe Tũpa mboyeroyasar ité, viroya tupri vahe avei iporocuita; sese opacatu judío secua pendar: ‘Co mbía aviye vahe ité’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporêhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tũpa, nde poravo güemimbotar cua ãgua. Oipota avei eresepia vajerã ichuindar ava seco ivi vahe, eresendu aveira iñehe’ ehi. ¹⁵ Nde evocoyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ Evocoyase, cūrítei ndiia iri eresãro’ ehi. ‘Epũha, toroãpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tũpa che mondo ava ndahei vahe judío upe” ehi Pablo

¹⁷ “Coiye catu, ayevi irise Jerusalén ve, ayerure tũparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che cua nde reroyasar roquenda-quendase, ainupa-nupa ucase avei aguatase judío tũparo yacatu rupi’ ahe. ²⁰ Aipo ahe avei chupe: ‘Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeño oyucase yuvireco. Sese asãro yucasar yeosa vihã’ ahe chupe. ²¹ Che Yar rumo omboyeve cheu: ‘Eso, oromondora coi rupi ava ndahei vahe judío pãhuve’ ehi che Yar cheu” ehi Pablo ava rehii upe.

Pablo sundao rerecuar guasu povrive secói

²² Aipo rupi osendu ifehe yuvireco. Ahese rumo osapucái pĩrata yuvireco chupe: “¡Tomano co mbia! ¡Toicove vite iri eme co ivi pipe!” ehi yuvireco chupe. ²³ Osapucapucái, osequiipa oyeaosa ofñemoirombave yuvireco iyavei omombo-mombo ivi cuhi ivate coti yuvireco yamotarẽhimbave. ²⁴ Ahese sundao rerecur guasu omoingue uca cuartelwe, aipo ehi osundao upe: “Peinupa, ahese revo omombehura mbahe sui vo sãse atĩ yamotarẽhimbave ava yuvireco chupe” ehi osundao upe. ²⁵ Ofñapichise rumo inupa ãgua yuvireco, Pablo omombehu ñepei sundao rerecur upe:

—Yepe che judío, che rumo romano avei aico. ¿Iyacatu pĩha peinupara romano chupe mbahe rese poranduẽhiseve? —ehi mborerecur upe.

²⁶ Osenduse ifehe, oso voi omombehu güerecur upe.

—Eicua catu, aipo mbia romano secoi —ehi.

²⁷ Evocoyase sundao rerecur guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

²⁸ Ahese sundao rerecur guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecur upe.

²⁹ Ahese oinupa pota vahe osiquiyepave oyepepi yuvireco ichui; sundao rerecur guasu avei oicuae Pablo romano secosa rese, osiquiye ñapichi ucasa.

Pablo oyoepi judío porandusa ivate catu vahesave

³⁰ Ahere ayihive sundao rerecur guasu oicua tupri pota: ¿Mbahe sui pĩha judío oyamotarẽhi Pablo yuvireco? Evocoyase oyora. Ahese oyocuai porandusa pendar ivate catu vahe ahe opacatu judío pahi rerecur, opacatu ambuae judío rerecur ifñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava ofñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque arco yepi che pihañemoñeta tupriasa pipe —ehi.

² Ahese Ananías, ahe pahi rerecur ivate catu vahe, yipi pendar uve, “Peiyurupete” ehi.

³ Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuaita rupi ereĩ. Evocoyase, ¿mahera ereporocuai che yurupete ãgua mborocuaita mboyeroyaẽhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecur ivate catu vahe upe! —ehi yuvireco.

⁵ Ahese omboyevi chupe:

—Che mu, ndaicuai co ofñehe vahe pahi rerecur ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecur upe’ ehi —ehi.

⁶ Ahese oicuae ofñemonuha vahe pãhuvẽ amove oime saduceo, amove fariseo. Ahese ofñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherã curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo ofñeñehopepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tũpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco.

⁹ Sese sãse guasu yuvireco. Ahese oime amove opũha vahe Moisés porocuaita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tẽi. Aviyeteramo espíritu que Tũpa rembiguai revo oyemboyecua mbahe mombehu ãgua chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecur guasu aipo ehi: “Aviyeteramo ombõhi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

¹¹ Ahe pitu pipe, yande Yar oyemboyecua chupe aipo ehi: “Eyemonguerẽhi catu, Pablo, inungar che mombehu nde siquiyeẽhisa pipe cohavẽ Jerusalén ve, ãgũe ere aveira che mombehu Roma ve” ehi.

Omboguai Pablo yuca ãgua yuvireco

¹² Ahere ayihive setá judío ofñemonuha, omboguai Pablo yuca ãgua yuvireco: “Tũpa rovaque ndayayucase Pablo, ndayacarui chira, ndayaihui chiaveira; yayucase voi,

yacarura, yaihura” ehi yuvireco. ¹³ Ahe ava aipo ehi vahe retacuer setá catu cuarenta sui. ¹⁴ Ichui yuviraso pahí rerecuar upe, tecua pendar rerecuar upe avei aipo ehi:

—Oromboguai Tüpa rovaque Pablo; ndorocarui chira ndoroyucaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osése, oroqueñtiora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sêracua, oso cuartelve chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chñivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar viraso ahe chñivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chñivahe sundao rerecuar guasu upe” ehi. Co chñivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri ñemonuhasa ivate catu vahesave ayihive yuvireco. “Oporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquēñtiro vaheñā yuvireco sese. Omboguai eté yuca ñgua yuvireco. Ndocarui, ndoihui chira aipo ndoyucaise yuvireco. Cñritei oyemoingatu, osāro viteño nde porocuita yuvireco —ehi mbia chñivahe chupe.

²² Ipore sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirio opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheñā opi rese, ambuae setenta sundao cavayu harive iyavei doscientos tupri toguata lanza resendar yuvireco. Ipore pesopara pituse las nueve pipe” ehi. ²⁴ “Pemoingatu uca avei cavayu Pablo yeupi ñgua. Ñgüe peye pesāro tuprira seraso yande rerecuar Félix upe” ehi. ²⁵ Evocoiyase sundao rerecuar guasu ocuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu.

²⁷ Iyavei co amombehu pota ndeu: judío oipisi co mbia yuvireco yuca ñgua viña. Che rumo aicua romano seco rese, ahese araso sundao sepi ñgua judío eta sui ²⁸ ‘¿mbahe rese pñha ndoyambotai yuvireco?’ viya. Sese araso judío porandusa ivate catu vahe pendar upe ñemonuhasave yuvireco. ²⁹ Ahese aicua yamotarēñisa judío porocuita sui tēi iyavei ndoyapoi mbahe tēi oreu. Sese ndiyai yuca ñgua oreu, soquenda ñgua avei. ³⁰ Ayanduse rumo judío oquēñtiro sese yuvireco, amondo voi evocoi mbia ndeu. Ipore amombehu yamotarēñisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoiyase ahe pitu pipe sundao viroguata Pablo ocuaita rupi yuvireco, viraso Antipatris ve yuvireco. ³² Ahere ayihive sundao yuviraso vahe opi rese oyevi yugüeru cuartelve. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oporandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarēñisar yuvireco, asendura nde yoepisa —ehi Félix chupe.

Evocoiyase oyocuai opñiviisar Pablo rāro ñgua güētave Herodes rembiapogñer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahí rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pñiviisar oñehe vaheñā Pablo amotarēñi uca ñgua, ahe serer Tértulo. Ahe yugüeru Pablo recocuer mombehu ñgua mborerecuar Félix upe. ² Evocoiyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñeñe pipe. Sese eyapisaca

raimi tēi catu che ñehe rese —ehi—. ⁵ Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca āgua, ahe Jesús, Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oróipisi —ehi—. ⁷ Evocoi sundao rerecuar guasu Lisias rumo oyepota ore pāhuve. Ahe opīratasa pipe vinose ore po sui, ⁸ aipo ehiño oreu: “Peso, tapemombehu co mbahe semiapió Félix upe” ehi. Nde avei ereporandura semiapió rese mbahe sui eté vo ēgüe oröhe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetes pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua. ¹² Co judío oicua yuvireco nañehengatai ava upe tūparo guasu pipe, namboaiyu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatu eté mbahe che rembiavi mombehu seroya tupri āgua yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembiroya Tecocuer Piasu pihañemoñetas rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuita pipendar iyavei Tūpa ñehe mombehusar rembiacuachigüer avei —ehi—. ¹⁵ Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye. ¹⁶ Sese ayemoviracua tupri che pihañemoñetas rereco tupri catu āgua yepi Tūpa rovaque, ava rovaque avei.

¹⁷ “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua. ¹⁸⁻¹⁹ Evocoiyase moviro judío Asia pendar che repia yuvireco Jerusalén ve tūparo pipe judío porocuita rupi che ñemoatiro pare. Ndi poi ahese ava rehi che rupi, namboaiyu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa yuvireco viña. ²⁰ Anise, avieteramo co oyepota vahe cohawe yugüeru, omombehura ndeu que mbahe che rembiavi yuvireco pahí rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe pīratase ipāhuve: ‘Che aroya ava ocuerayevira coiye. Sese che reraso pe rovai co pipe che recoāha āgua yuvireco’ ahese” ehi Félix upe.

²² Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe semiapió —ehi Félix upe upe.

²³ Evocoiyase oyocuai sundao rerecuar Pablo rāro āgua: “Eremondomira rumo que mbahe semimbotar apo āgua chupe iyavei imboripar yugüeruse, tihañecoño yuvireco sese. Ēgüe ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. ²⁵ Pablo rumo omombehuse chupe teco ivisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri āgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepochi cheu osē āgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta āgua sese. ²⁷ Ñuvirío araviter pare rumo, Porcio Festo oique Félix recuñara. Ahese Félix judío mboviha āgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve. ² Aheve oyepotase, pahí rerecuareta, judío rerecuareta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohawe oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendas oico iyavei che ayevi piaivira vicho aheve” ehi.

⁵—Sese pemondo pe rerecuar che rupi. Naporaise co mbia semiapió, aheve tomombehu yuvireco cheu semiapocuerai sereco mara āgua —ehi Festo chupe.

⁶ Evocoiyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu āgua oī. Ahese oyocuai Pablo reru āgua. ⁷ Oyepotase Pablo oso, ahese judío yugüeru vahe Festo rupi, oyemboya yuvireco

sese. Ahese omombehu-mbehu tēi Festo upe Pablo rembiapo yuvireco, ndoicatu été rumo seroya uca āgua yuvireco. ⁸Esepia, Pablo aipo ehi oyoepisave:

—Ndayemboangaipai judío porocuaita rese, judío tūparo rese, yande rerecuar guasu Roma pendar Cesar rese avei —ehi.

⁹Festo rumo omboviha pota judío, sese oporandu Pablo upe:

—¿Ndequerēhi vo Jerusalén ve ereso vaheṛā? Aheve co mbahe nde rembiapo rese aporandura ndeu —ehi chupe.

¹⁰Ahe rumo omboyeṛi chupe:

—Cūrtei aico cohawe romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi été mbahe tēi ayapo judío amotarēhisave —ehi—. ¹¹Ayapose que mbahe naporai vahe, aviyeño che yuca uca āgua eve; ndayapoise rumo co judío omombehu vahe yuvireco ndeu, ndiyai che mondo āgua evocoi ava povrive eve. Che rumo aso pota mborerecuar Cesar ivate catu vahe upe cheu mbahe rese porandu āgua —ehi.

¹²Ahese Festo oñemoñeta opitiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoyase —ehi chupe.

Pablo mborerecuar Agripa rovai

¹³Evocoyase moviro ari pare, evocoi mborerecuar guasu Agripa, cuña Berenice rese, oyepota Cesarea ve “avirave” apo āgua Festo upe yuvireco. ¹⁴Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeí mbia soquendapri oseya vahe Félix cheu —ehi—. ¹⁵Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶Ahese aipo ahe yuvireco chupe: “Ndiyai été romano mborerecuar omondo vaheṛā que ava uve sese oñemoñeta vahe rese mbahe moingatuēhi renondeve. Toyoeṛi rane omombehusar rovai, tomombehu tupri rane opacatu güecocuer” ahe judío upe —ehi—. ¹⁷Sese yugüeruse cohawe yuvireco, aporandu voi pota secocuer rese chupe. Evocoyase ñepeí ari pare aguapi che rendave porandusave. Ahese ayocuai che pitiviisar evocoi mbia reru āgua —ehi—. ¹⁸Evocoyase opūha sese oñemoñeta vahe sembiapo ai mombehu āgua. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi été rumo mbahe sembiapo —ehi—. ¹⁹Mbahe sembieroya tēi omombehu yuvireco. “Evocoi Jesús omano” ehi ava yuvireco. Pablo rumo aipo ehi mombehu: “Jesús oicoveño ité” ehi. ²⁰“¿Mara ahera pīha co sembiapo moingatu?” ahe tēi. Sese aporandu chupe: “¿Ndequerēhi vo Jerusalén ve mbahe nde rembiapo rese porandu āgua ndeu?” ahe chupe —ehi—. ²¹Pablo rumo oporandu cheu Cesar upe oso āgua. Oipota mborerecuar ivate catu vahe oyeupe mbahe güembiapo rese porandu āgua. Sese asoquenda ucaño vite sereco imondo āgua Cesar upe —ehi Agripa upe.

²²Evocoyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

²³Ahere ayihive, Agripa oyepota, Berenice rese yugüeru chupe inungar opivondi vahe, ēgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitiviisar Pablo reru āgua yuvireco, ²⁴aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohawe Cesarea ve. Osapucaí pīrata tēi yuvireco ‘itomano ité evocoi!’ oya yuvireco cheu —ehi—. ²⁵Ndayosui rumo mbahe sembiapo yuca uca āgua iyavei oporandu oso āgua mborerecuar ivate catu vahe Cesar upe. Sese che ayemoingatu ité imondo āgua chupe. ²⁶Ndarecoi rumo mbahe naporai vahe aicuachía vaheṛā imondo āgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeleramo oimera mbahe icuachiapirā sesendar Cesar upe nara —ehi—. ²⁷Chepihñemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñehe ãgua aipo ehi: ² “Ore rerecuar Agripa, ayoepera che rorivetesave judío che rese ñemoñeta-ñeta tẽisa sui mbahe che rembiapoẽhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

Pablo omombehura güecocuer oñecuñaro viteẽhisendar

⁴ “Opacatu judío che cua vahe yuvireco, oicua tupri che recocuer che chĩhivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cüritei che reru nde rovai yuvireco che recocuer rese nde porandu ãgua. Esepia, aroya Tüpa remimombehugüer ore ramoi uve omombehu vahe aracahe” ehi. ⁷ “Doce ore ramoi suindar opacatu judío yuvirecoi, osãro vite evocoi Tüpa remimombehugüer aviye vahe yuvireco. Sese yuviroique tüparove ari, pĩtu pipe avei Tüpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tüpa remimombehugüer reroyasa sui judío eta semira-mira tẽi che amotarẽhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tüpa porombogüeravevisa?” ehi.

Pablo omombehu yipindar Jesús reroyasar amotarẽhi agüer

⁹ “Yipindar che avei che pihañemoñeta rai aracaco mbahe tẽi apo ãgua rese ava Jesús, Nazaret pendar, rer amotarẽhisave. ¹⁰ Ëgüe ahe Jerusalén ve. Ombouse pahi rerecuar oporocuaita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voĩño ité che” ehi. ¹¹ “Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tẽi. Ëgüe ahe aguata opacatu tüparo rupi, ambuae tecua rupi avei yamotarẽhisa pipe” ehi.

Pablo omombehu güeco recuñaro agüer

¹² “Evocoiyase aso avei Damasco ve Jesús reroyasar mombaraisu ãgua, pahi rerecuar ombouse oporocuaita apo ãgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. ¹⁴ Orovaiyipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tẽi cheu? Ereyapose evocoi mbahe tẽi, nde ae ereyemombaraisu’ ehi cheu. ¹⁵ Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarẽhi eve. ¹⁶ Epüha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vahe rã chupe curi, viya ndeu’ ehi. ¹⁷ ‘Oropisiora judío sui iyavei oromondora ava ndahei vahe judío upe. Ereguatase ipãhuve, oropisiora aveira’ ehi cheu. ¹⁸ ‘Oromondora, tache cua yuvireco, che yapave iyavei toguata iri eme pĩtumimbi vahe nungar rupi; toguata catu tesapasa rupi yuvireco. Ipipe sui toyuvireco iri eme caruguar povrive yuvireco; toguata catu Tüpa rupi; ãgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tüpa porerecosa oime vahe rã opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rerecuar Agripa, che quer nungarve asepia vahe iva pendar, aroya ité. ²⁰ Aipo ahe ava upe: ‘Pemboasi pe angaipa; peyevi Tüpa upe. Peicove tupri, ipipe sui toicua ava yuvireco pe ñecuñaros’ ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tẽi judío che pisi tüparo pipe che yuca pota yuvireco” ehi. ²² “Tüpa che pĩtivisa pipe rumo aicoveño ité supi, amombehu-mbehu vite Tüpa recocuer opacatu ava seco ivi coti catu vahe upe, seco ivate catu vahe upe avei. Namombehu eté que mbahe co coti tẽi Tüpa ñehe mombehusar iyavei Moisés, ‘Oimera mbahe aviye vahe’ ihe agüer sui. ²³ Aracahe omombehu yuvireco: ‘Tüpa Rembiporavo Poropisiorar omano ranera’ ehi. Ahe rumo yipindar ocueravevi vahe rã omano vahe pãhu sui. Omombehu aveira tesapasa ñepisiora resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

Pablo osecuñaro pota tẽi Agripa recocuer

²⁴ Aipo ehise Pablo oñehe oyoepisave, Festo oñehengataño chupe aipo ehi:

—¿Nande mboaracuai moco nde mbahecua vaisa! —ehiñi chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaẽhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquivei opacatu co mbahe mombehu ãgua chupe.

Esepia, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoi Tūpa ñehe mombehugar rembicuachía? Che aicua ereroya ité —ehi Agripa upe.

²⁸ Ahe se Agripa omboyeví chupe:

—Moviro tēi ñehesa ipane cheu Jesús reroya āgua —ehi chupe.

²⁹ Ahe omboyeví Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehe co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

³⁰ Aipo ihe pare, mborecuar guasu iyavei ambuae mborecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co coti aipo ehi yuvireco:

—Evocoi mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³² Ahe se Agripa aipo ehi:

—Ahe ndoporanduse Cesar upe oso āgua rese, yamoseño itera niha viña —ehi Festo upe.

27

Pablo imondosa Roma ve

¹ Evocoiyase mborecuar opihañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehi rerecuar secoi, ahe yuvirecoi vahe rer Mborecuar upendar. ² Oroha carite pipe, ahe Adramitio sui yuviraso pota vahe Asia ve. Mbia Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri āgua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñemoha āgua. Oroso pota tēi ari sosa coti rupi, ndoroicatu rumo. Esepia, oipeyu pīrata ivitu icoti sui. ⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherā Italia ve. Evocoiyase ahe ipipe opa voi ore mboha. ⁷ Ichui oroguata mbegüe setá ari. Oroporaviquí iteanga oreyepota āgua Gnido rovai. Ivitu oipeyu pīrata vite. Sese oroyahuva Creta coti, oroñocua tecua Salmón rovai rupi. Ēgüe orohe oroso Creta cupe rupi. ⁸ Supi yayai rai ore guata āgua, ipare oroyepota yemboyasa Yemboyasa Aviye vahe serer vahesave. Ahe ichui namobrūi tecua Lasea.

⁹ Ore yepota āgua aheve, setá ari oromocañi. Aheve ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰ —Mbia, naporai iri chira revo yande guata vite āgua. Yaguata vitese, yamocañira carite, ivosita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasa, carite yar avei. ¹² Ahe yemboyasa naporai ivitu ai rāro āgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegüemise ivitu irohi coti sui, opihañemoñeta yuvireco, “Yaicatuño ité yande yepota āgua” ehi yuvireco viña. Aheve orosirise ore yemboyasa sui, oroso Creta ivi rupi.

¹⁴ Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui. ¹⁵ Oyepotase oreu, ndoroicatu iri eté sovaichi. Evocoiyase, “Tayande rerasoño” orohe chupe. ¹⁶ Oroñocua caha pāhumi serer Cauda. Ahe oroñocuasave oroviroha sari ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare opihañemoñeta yuvireco ‘carite oyeupi tiētera ivi cuhi Sirte serer vahe harive’ oya. Sese opa viroyi imombitasa yuvireco. Aheve ivitu ore reroguatasa. ¹⁸ Ivitu rumo ombohitū iteanga para guasu. Sese ahere ayihive oporaviquí vahe ombopi carite vosita mombo yuvireco. ¹⁹ Imombosapisa ari pipe, omombo vite mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore opihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruēhi pare, Pablo opūha aipo ehi carite pipendar upe:

—Mbia, ehi acoi che reroya voirā peye viña, nayasēise Creta sui, aheve ndipoi chira co mbahe yandeu cūritei viña —ehi—. ²² Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira. ²³ Ayihi pisa oyemoporēhi cheu Tūpa rembiguai semimbou, chupendar che aico, chupe avei aporaviqui. ²⁴ Ahe aipo

ehi cheu: “Pablo, eresiquiei rene. Ereyepotaño itera Cesar upe. Tūpa oipīsiro aveira opacatu nde rupindar carite pipendar” ehi cheu. ²⁵ Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—, ²⁶ Yande moñañira rumo imbehi coti caha pāhumi rese yande mondo —ehi.

²⁷ Ñuvirio semana ivitu ore reroguata pare ahe pītu mbiter pipe para guasu Adriático rupi oroicose, carite pipe oporaviqui vahe ipihañemoñeta yuvireco ‘yarovi revo ivi yaico’ oya. ²⁸ Sese osāha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco. “¡Omocohe voi tarahu Tūpa yandeu viña!” orohe tēi. ³⁰ Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sā oiti ive imondo yuvireco.

³³ Cōhe ramose Pablo aipo ehi opacatu upe:

—Cūrtei ñuvirio semana pemomba pecaruēhi peico ‘¿mara yahera pīha co yaico?’ pe hesa pipe. ³⁴ Evocoyase pehuñomi mbahe cute pe ñepisiro āgua. Acoi ocañise carite, yande rumo nayacañi chira iyavei que ñepepe pe ha nocañi chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tūpa upe ihu āgua. Ahe imbohi pare, ohu.

³⁶ Evocoyase opacatu ava oyemonguerēhi yuvireco ocaru āgua. ³⁷ Ore retacuer doscientos setenta y seis tupri. ³⁸ Ore caru pare, oporaviqui vahe opa omombo trigo carite vosiita para guasu pipe iposiēhi āgua yuvireco.

Carite ocañi

³⁹ Cōhese, osepiase ivi, “¿Que pīha yaico?” ehi tēi yuvireco. Oyosuse rumo yācua vahe, ipipe oime ivi cuhi ipiru vahe. Aheve yuviroique pota tēi yuvireco viña. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoyase oroique oroso yācua vahe pipe. ⁴¹ Oroguatase rumo, oroyapi ivi cuhi. Aheve carite opāha ité sese. Ndoicatu eté seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña. ⁴³ Sundao rerecuar rumo ndoipotai Pablo mano āgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuinose ivi rese yuvireco” ehi. ⁴⁴ “Ambuae evocoyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

28

Caha pāhu Malta ve Pablo secoi

¹ Ore ñepisiropare, ahese ramo oroicua caha pāhu rer Malta revo rahe. ² Ahe pendar ava nihapisii ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyepemi” ehi yuvireco oreu. ³ Evocoyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomarañiño ité. ⁶ Ahe pendar opacatu osāro tēi yuvireco, “Irrurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimarañiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoyase mbia Publio serer vahe, ahe opacatu caha pāhu Malta pendar ava rerecuar secoi. Ivi namombriimi ichui. Ahe nihapisii ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuvi avei. Evocoyase Pablo oique chupe. Ahese oyeroqui Tūpa upe sese, omondo opo iharive. Ēgüe ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha āgua ambuae carite pipe, opacatu mbahe ore guatasa rupi ipaneñi āgua ogüeru yuvireco oreu.

Pablo oyepota Roma ve

¹¹ Co carite mbosapí yasi osáro vahe arí mbahe tēi vahe pituhu āgua. Ipípe oroso. Ahe carite yugūeru Alejandria sui. Ahe ichī rese ñuvirío itūpa rahanga yuvireco: ñepeí rer Cástor, ambuae evocoiyase Pólux. ¹² Ahe se oroso oroyepota yemboyasa Siracusa ve. Aheve oropíta mbosapí ari. ¹³ Ichui orosē oroso oroyepota Regio ve. Ahere ayihive ivitu oipeyu irohí coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güétave yuvireco ñepeí semana. Ipape oroso Roma ve iví rupi. ¹⁵ Jesús reroyasar Roma pendar yípive ore andu yuvireco. Sese moviro yugūeru Foro de Apio ve, ambuae yugūeru Tres Tabernas ve ore rape penda āgua yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rerecuar co coti omondo Pablo ñepeí sundao upe sáro uca āgua.

Pablo omombehu Roma ve Tūpa Ñehengagüer

¹⁷ Mbosapí ari pare Pablo omonuha opacatu judío rerecuar Roma pendar. Ahe se oñehe chupe:

—Che mu eta, ndayapoi mbahe tēi judío Jerusalén pendar upe, narioíroi avei yande ramoí recocuer viña. Che roquendasa rumo iyavei imondopri aico Romano sundao rerecuar povrive. ¹⁸ Ahe mborerecuar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca āgua yuvireco. ¹⁹ Evocoli judío rumo ndoipotaiño ité chupe. Ahe se ayu pota cohava Cesar upe che yoepi āgua. Nayamotarēhi uca potai rumo che mu Jerusalén pendar Cesar upe —ehi—. ²⁰ Che yoepi āgua oposoho uca. Opomoñeta pota yande remiario rese. Co Tūpa Rembiporavo ava písiro āgua resendar reroyasa rese carena pipe ñapichimbri aico —ehi.

²¹ Ahe se ahe ava omboyevi yuvireco chupe:

—Ndoropisii eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava viroíro pe rembieroya piasu yuvireco. Sese orosendu pota nde pihañemoñetasa —ehi yuvireco chupe.

²³ Oporavo ari iñehe āgua yuvireco. Osupitise ari chupe, setá catu ava oñemonuha yuvireco secosave. Ahe se omombehu Tūpa mborerecuasa resendar iyavei Jesús recocuer Moisés porocuaíta icuachiapri pipe sui iyavei Tūpa ñehe mombehúsar rembicuachía pipe avei ‘toviroya yuvireco’ oyapave. Ēgüe ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai eté yuvireco. ²⁵ Opihañemoñetasa nomboyoyaise yuvireco, yuvinosépa pota. Ahe se aipo ehi ahe ava upe:

—Supi eté Isaías omombehu Espíritu remimombehu pe recocuer resendar pe ramoí upe aracahe aipo ehi:

²⁶ “Eso nde mu pāhuve.

Emombehu aipo ere:

“Yepe pesendu tēira mbahe viña,

ndapesenducuai chira rumo.

Iyavei pesepia tēira mbahe viña,

ndapemahecuai chira rumo sese’ ere chupe.

²⁷ Esepia, co ava ipiharátá iteanga seroyaēhisave.

Ndoyemboapisaiño yuvireco.

Iyavei osapívií tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe.

Evocoiyase ndoyevi potai cheu güecocuer moingatu yuvireco” ehi Espíritu Santo

remimombehu chupe aracahe —ehi—. ²⁸ Sese tapeicua co pipe suive Tūpa omboyecua ucara oporopisirosa ava ndahei vahe judío upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, judío yuvinosé iñehe rese oyecopi-copi yuviraso.

³⁰ Ipape Pablo opíta ambuae ava rētake ñuvirío araviter rupi omboepi oque āgua oico. Aheve nihapisii opacatu ava rese oyepiri oyepotase yepi. ³¹ Omombehu Tūpa mborerecuasa resendar iyavei oporombohe opacatu yande Yar Jesucristo recocuer resendar osiquiyēhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesús reroyasar upe

¹ Che Pablo, Jesucristo rembiguai, aicuachía co che ñehes pëu. Tüpa che poravo apóstol che reco água ñehesa poropísirosa resendar mombehu água.

² Tüpa niha yipisuiwe omombehu uca co ñehesa ava oñehes mombehusar upe icuachiapri maranehi pipe aracahe. ³ Ahe ñehesa Tüpa Rahir Jesucristo resendar. Ahe ava güecosa pipe ité oyese uo mborerecar guasu David suindar sui; ⁴ ocuerayevise oespíritu maranehi pipe, ahese opíratasa pipe omboyecua tupri ité Tüpa Rahir güecosa. Ahe niha yande Yar Jesucristo.

⁵ Ahe ichui Tüpa ombou cheu oporopitiviisa apóstol che reco água, che cuai avei ava ndahei vahe judío upe Guahir recocuer mombehu água opacatu ivi rupi sese yeroya uca água 'ipipe sui toviroya che Rahir yuvireco' oya. ⁶⁻⁷ Pe Roma pendar peico vahe, pe avei senoipri ipáhuve peico Jesucristo rese peico vahe. Pe niha Tüpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tüpa suindar, yande Yar Jesucristo suindar avei.

Pablo oso pota Jesús reroyasar repia Roma ve

⁸ Che yipindar yande Yar Jesucristo rer pipe, "Aviye ndeu" ahe Tüpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tüpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahir resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espíritu suindar mbahecuaa mondo pëu pe pitivií água 'toyomoviracua tupri catu Cristo rese yuvireco' che yapave. ¹² Che aipota ité yande ñepei-peí yañepitivií catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūrítei rumo ndaicatuño vite ité. Che rumo aipota, "Toime que che poraviquisa sui Cristo rese oyemoviracua catu vahe yuvireco ipáhuve" ahe pëu, inungar opacatu ambuae ivi rupi egüe ahe ava ndahei vahe judío upe vichico. ¹⁴ Che cuaita ité niha opacatu ava upe che ñehes água, tecua pipendar yuvirecoi vahe upe iyavei ndayaracua vitei vahe upe, imbahecua vahe upe, nimbahecua vahe upe avei no. ¹⁵ Sese pe Roma ve peico vahe upe avei ayemonguerēhi voi eté co ñehesa písirosa resendar mombehu água.

Ñehesa písirosa resendar píratasa

¹⁶ Che nachí eté co ñehesa písirosa resendar aviye vahe sui. Esepia, ahe Tüpa píratasa opacatu viroyasar písiro água, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tüpa ava reco mbocatuprisa. Oyese yande yeroyasa pipeño ité egüe ehi yandeu. Esepia, icuachiapri arachendar aipo ehi: "Acoi ava seco catupri vahe Tüpa rese oyeroyasa pipe sui oicoveño itera apirēhi" ehi.

Opacatu ava rembiavi resendar

¹⁸ Supi eté niha yande Aposar oñemoirosa ipírata vahe ombou itera iva sui opacatu ava viroyasarēhi upe, ndaseco pōrai vahe upe avei, mbahe güembiao ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tüpa suindar yuvireco. Esepia, Tüpa ité niha omboyecua chupe. ²⁰ Egüe ehi eté Tüpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tüpa ité secoi iyavei ipíratasa apirēhi vahe. Sese ava angaiya viyar ndiyai, "Eñemosañe tēi rane oreu" ehi vahe rā yuvireco chupe. ²¹ Esepia, yepe ahe oicua tēi Tüpa yuvireco viña, nomboetei rumo Tüpa secosa rese. "Aviye ndeu" ndehi avei yuvireco chupe. Iyavei ipihañemoñeta mbahe egüe ehi tēi vahe rese. Ipipe sui mbahe ndosenducua catu iri eté yuvireco. ²² Yepe, "Ore mbahecua vai" ehi tēi viña, ndoicuai eté rumo mbahe ipipe yuvireco. ²³ Esepia, ahe Tüpa nomanoi vahe seco porañete vahe mboetei rāgüer sui, omboetei ava ocañi tēi vahe rā rahanga yuvireco iyavei vírai, opacatu mbahe mimba, mboi tēi avei omboetei yuvireco.

²⁴ Sese Tüpa, "Toyapoño ité mbahe güemimbotarai yuvireco" ehi chupe. Ichui oyapo ité mbahe poromochisa guasu oyeupe oyemboeteiñehisa pipe yuvireco. ²⁵ Esepia, mbahe supi vahe reroya rāgüer sui temira tēi viroya catu yuvireco. Iyavei Tüpa ité mboyeroya rāgüer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tüpa opoi eté ichui, "Toyapoño poromochisa mbahe tēi güemimbotarai pipe yuvireco" ehi chupe. Evocoiyase cuña avei cuimbahe rese güeco rāgüer sui yuvirecoi oyese

ae. ²⁷ Cuimbahe avei cuña rese güeco rãgüer sui yuvirecoiño avei oyese ae iyavei oipota raiño ité evocoi güeco raisa yuvireco. Evocoi nungar aposa sui oyemomara ahe ae yuvireco.

²⁸ Iyavei, “Tüpa supi eté vahe” ndehise seroyaëhisa pipe yuvireco, Tüpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. ²⁹ Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara ägua tēi iyavei imahechoiroi ai ipipe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tüpa amotarëhisar yuvirecoi, viroiro avei ava, oyemboivate ai, oyeecomboivate ai tēi avei oñehe pipe yepi, oseca-seca tēi mbahe naporai vahe güembiaporã, nomboyeroyai avei oyesupa yuvireco, ³¹ ndoyapisaca potai eté Tüpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tēi Tüpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tüpa omondo ava upe sembiapogüer rupi tupri ité

¹ Oimese que pe pãhu pendar ‘co oyapo mbahe tēi; tocañi’ ohesave ambuae upe, ahesa ahe ae oyemocañi tēi uca. Esepia, ahe inungar tupri avei. ² Yaicua rumo Tüpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. ³ Pe opase ava recocuer pesenoi, pe avei rumo ëgüe peye tupri peico. Pe avei eté evocoiyase ndapeñemi chietera Tüpa ñemoirosa sui. ⁴ ¿Peroiro tie Tüpa oyapo vitese mbahe aviye vahe oñemosase, seco mbegüe tupri ai vitese avei pëu? ‘Tosecuñaro güecocuer yuvireco’ oyapave rumo ëgüe ehi pëu. ⁵ Pe rumo pepiharãta viteño ité Tüpa upe pe yevi potaëhi ägua. Sese pereco catu viteño ité Tüpa ñemoirosa peyese, acoi ari oyepotase Tüpa güeco tuprisa pipe yande renoipara yande mocañi ägua, anise yande písiro ägua curi. ⁶ Ahesa opara omboepi ñepi-pei yande rembiapogüer rupi yandeu. ⁷ Omboura tecovesa apirëhi vahe yandeu yasecase teco ori, Tüpa suindar poromboeteisa iyavei mbahe apirëhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rãgüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiporarara mbahe rasicuer yuvireco, iparera ndahei vahe avei judío. ¹⁰ Tüpa rumo opacatu seco catupri vahe upe omondora imboetei ägua ‘toipisi teco ori iyavei toyuvirecoi mbahe tupri pipe’ oya chupe. Yipindar rumo judío eta upe rane omondora, iparera ndahei vahe judío upe.

¹¹ Esepia, Tüpa ndayande mboyoaviratii yande rereco. ¹² Ëgüe ehi eté, opacatu oyemboangaipa vahe Moisés porocuita porëhi oyemocañi tēira yuvireco. Acoi oyemboangaipa vahe Moisés porocuita rereco pipe yuvireco, ahe porocuita pipe avei opara ocañi tēi porandusave yuvireco coiye. ¹³ Esepia, osenduño tēi vahe porocuita ndahei seco catupri vahe yuvireco. Viroya vahe ité rumo porocuita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepi ndovirecoi co porocuita yuvireco viña, ahe rumo co porocuita rupi tupri oyapose mbahe, ahe evocoiyase inungar porocuita vireco vahe yuvireco. ¹⁵ Esepia, güembiapo catupri pipe omboyecua porocuita virecose opiha pipe. Opihañemoñeta pipe avei oyandu porocuita mboaviyesa. Ahe ipipe avei oyandu mbahe güembiavi, ichui avei oyemonguerëhi mbahe aviye vahe apose. ¹⁶ Ahe ari cañi pipe Tüpa oyocuai ucara opacatu ava rembiapo cuaëhisa repri písi ägua Jesucristo upe, co ñehesa písirosa resendar amombehu vahecuer rupi tupri ëgüe ehira curi.

Ñehesa judío resendar; Moisés porocuita resendar avei

¹⁷ Pe rumo, “Judío aico” peye vahe, peyeroya opacatu Moisés porocuita mboaviyesa pipe pe reco catupri ägua Tüpa rovaque viña. Iyavei ipipe peyeecomboivate ai Tüpa rese peicose. ¹⁸ Peicua semimbotar. Ahe porocuita pe mbohe avei mbahe aviye catu vahe poravo ägua. ¹⁹ Pe, “Aicatu ité ndasesapisoi vahe nungar ava ndayaracuai vahe mboaracua iyavei ava angaipa viyar pítumimbi vahe nungarsave tēi resape ägua” peye tēi. ²⁰ “Aicatu avei ava mbahe ndosenducuai vahe mboaracua iyavei ava chíhivahemi nungar mbohe ägua. Esepia, areco co mborocuita vireco vahe opacatu mbahecuaa iyavei mbahe supi tupri vahe ité” peye tēi avei. ²¹ Pe pembohe vahe ambuae avei, ¿mahera ru ndapeyembohei pe ae? Pe pemombehu vahe ambuae ava mondaëhi ägua, ¿mahera ru pe ae avei pemonda no? ²² Pe, “Ndiyai pe aguasa” peye; pe teieté avei rumo ëgüe peye. Ndapesepia potai eté mbahe rahanga; pe avei rumo opa peñomi mbahe sepi vahe itüparo pipe sui. ²³ Peyeecomboivate ai co mborocuita rerecosa rese; ndapemboetei rumo Tüpa

ipipe ahe mborocuita mboaviyēhi pipe. ²⁴ Supi eté icuachiapri arachendar pipe aipo ehi: “Pe sui tēi ava ndoicuai vahe Tūpa ñehe-ñehe tēi serer maranehi rese yuvireco” ehi.

²⁵ Supi eté co tecocuer cuacua circuncisión resendar ahe aviyere angara pēu, peroaya tupri itese Moisés porocuita viña. Ndateroya tupriise rumo, pe evocoyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuita yuvireco, ahe evocoyase omombehura pe cañi āgua yuvireco. Esepia, yepe pereco Tūpa porocuita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ēgüe yahera. Iyavei circuncisión supi eté vahe ndahei yande retecuer rese güeraño tēi avei no. ²⁹ Judío ete ité rumo opihá pipe ité viroya Tūpa. Iyavei circuncisión supi eté vahe, Espiritu rembiapo yande piha pipe, ndahei porocuita icuachiapri rembiapo tēi. Evocoyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoyase, ¿mabahe vo co aviye judío yande reco āgua? ¿Yande yembocircuncidasa piha aviyera? ² Supi eté. Esepia, yipindar Tūpa omondo ñehe judío eta upe imboaviye āgua. ³ Amove yepe ipāhu pendar nomboaviyese ocuita viña, ¿Tūpa avei tie ēgüe ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esepia, icuachiapri arachendar pipe aipo ehi:

“‘Supi tupri vahe Tūpa’ ehira nde ñehe rese yuvireco.

Sese ereiquese ava porandusave, eresé tupriñora eso ichui” ehi.

⁵ Yande reco rai pipe tēi yamboycuase Tūpa reco tupriisa, ¿mara yahera vo evocoyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pindar tēi viña.) ⁶ ¡Aní eté! Esepia, Tūpa ndaheise supi tupri vahe viña, ndiyai chietera yande recocuer rese porandupa tupri āgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoyase angaipa viyar nungar yande rerecora viña?” ehi. ⁸ “Yayapora ayase mabahe naporai vahe mabahe tupri reime āgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esepia, opa amboycua Tūpa rovaque opacatu angaipa viyar yaico que judío, que ndahei vahe judío avei. ¹⁰ Supi eté icuachiapri arachendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe.

Ndipoi avei Tūpa oseca vahe yuvireco.

¹² Opacatu ava oguata mabahe tēi pipe yuvireco, co coti tēi avei secocuer yuvireco.

¡Ndipoi eté que ava mabahe tupri aposar, que ñepei angara viña!

¹³ Ñehesa mabahe tēi eté, inungar tuvipa ndasovapisai vahe.

Oñehesa pipe oporombopa yuvireco.

Ahe ñehesa evocoyase inungar mboi naporai vahe oporomocañi tēi vahe.

¹⁴ Ipipe ñehe rai opihaviracua iteangasa pipe yuvireco.

¹⁵ Ndayipitii oporapichi āgua yuvireco.

¹⁶ Setá ava omomara, omombaraisu avei oguatasa rupi yuvireco.

¹⁷ Iyavei ndoicuai eté güeco tupri āgua yuvireco.

¹⁸ Ndipihañemoñetai eté Tūpa sui osiquye āgua yuvireco” ehi.

¹⁹ Yande niha opa yaicua opacatu co mabahe omombehu vahe mborocuita arachendar pipe, omombehu co porocuita pipe yuvirecoi vahe upe ‘Che ndayapoi eté mabahe, tehi eme opacatu ava yuvireco’ oyapave, iyavei ‘toicua opacatu ivi rupindar ava Tūpa ñemoirosa piñi āgua yuvireco’ ohesave aipo ehi. ²⁰ Esepia, ndipoi chietera que ñepei seco aviye vahe Tūpa rovaque co porocuita mboaviye pipe. Ahe mborocuita rumo oicua uca yande angaipa viyar yande reco.

Cristo rese yande yeroya pipe Tūpa yande piñirora

²¹⁻²² Cūrítei rumo Tūpa oicua uca yandeu ndahei iri mborocuita mboaviye pipe seco catupri vahe nungar yande rerecora. Cristo rese yande yeroyasa pipe sui niha seco catupri vahe nungar yande rereco. Ahe niha ndayande mboyoavii eté. Yipive ité ahe imombehupri secoi porocuita arachendar pipe, ñehe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe

rumo oporoaisusa pipe, “Ereyavi mbahe che ñemoirosa pisi ãgua” ndehi iri yandeu. Esepia, ahe yande písiro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tüpa rumo ombou Guahir Cristo oipiyere vaheã vuvi yande angaipa rese ñero ãgua. Sese yande yeroya pipe oime ñeroisa yandeu. Ipipe omboyecua güeco ivi tuprisa. Yipisuve rumo güeco asiẽhisa pipe oñemosañ arachendar ava angaipa upe; cüritei rumo omboyecua ité güeco ivisa yandeu, seco iviño ité seco catupri vahe yande rerecose Tahir rese yande yeroya pipe.

²⁷ ¡Evocoyase ndiyai eté yande yeecomboivate ai ãgua sovaque! Esepia, ndahei porocuita mboaviye rese ãgüe ehi, ahe rumo Cristo rese yande yeroya pipe ãgüe ehi yandeu. ²⁸ Sese yaicua Tüpa, “Ereyavi mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuita mboaviyesa sui tẽi.

²⁹ ¡Tüpa niha opacatu ité ava Tüpa, ndahei ore judío oroico vahe Tüpa güeraño! ³⁰ ¡Supi eté ñepeiño ité secói: sese yayeroyase Cristo rese, oyoya guasuño ité, “Ereyavi mbahe che ñemoirosa pisi ãgua” ndehi chira yandeu, yepera imbocircuncidapri viña, anise che ndahei vahe imbocircuncidapri viña no! ³¹ Ndahei rumo, “Ëgüe ehi tẽi vahe” yahe evocoi mborocuita upe Jesucristo reroyasa pipe. Ipipe rumo yamboyecua evocoi mborocuita ãgüe ndehi tẽi vahe.

4

Abraham recocuer sui yembohesa

¹ Iyavei, ¿mara ehi pĩha yande ramoi Abraham recocuer aracahe? ² Acoi mbahe güembiapo pipe sui tẽi oipisise güeco tupri ãgua Tüpa sui, oyemboivate aira oico ipipe viña. Ndiyai eté rumo ãgüe ehi Tüpa rovaque. ³ Esepia, icuachiapri arachendar pipe aipo ehi: “Abraham oyeroya ité Tüpa rese. Sese Tüpa, ‘Co seco catupri vahe’ ehi chupe” ehi. ⁴ Co rumo yandé yayapose mboraviqui, ahe yaipisi vahe ndahei porerecosa tẽi, ahe rumo mboraviqui repri ité yaipisi. ⁵ Yande rumo, yayeroyase Tüpa rese, Tüpa evocoyase yande písira, ‘co seco catupri vahe’ ohesave. Esepia, ahe ãgüe ehi vahe ité oyese oyeroya vahe upe, yepe ndoyapoi chira mbahe aviye vahe chupe viña. ⁶ David mborerecuar arachendar avei oñehe ava rorivetesese rese Tüpa seco catupri vahe nungar písisa rese. Ahe rumo ndahei mbahe sembiapogüer rese tẽi oipisi. ⁷ Ahe aipo ehi aracahe: “¡Sorivete acoi ava Tüpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tüpa chupe!” ehi.

⁹ Co mbahe tupri rumo ndahei judío upeño, ahe rumo ava ndahei vahe judío upe avei. Supi eté Tüpa, “Co seco catupri vahe secói” ehi Abraham upe oyese iyeroyasa rese. ¹⁰ ¿Marase pĩha oipisi oyeupe nara sereco? ¿Oyembocircuncida renondeve pĩha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tüpa chupe. Sese imbocircuncidapri secói. Ëgüe ehi Abraham opacatu ava oyeroya vahe Tüpa rese, ndoyembocircuncidai vahe yesupa nungar secói. Ëgüe ehi Tüpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncida vahe, Tüpa rese oyeroya vahe yesupa avei secói. Abraham rumo oyeroya vahe Tüpa rese ndoyembocircuncida viteiseve.

Tüpa remimombehu imboaviyese sesa yeroyasa pipe

¹³ Esepia, aracahe Tüpa aipo ehi Abraham upe, ichuandar upe avei: “Peipsisira opacatu co ivi pe mahera” ehi. Ndahei Moisés porocuita mboyeroya pipe ãgüe ehi chupe, oyese yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuita mboyeroyasar güeraño oipisise co mbahe oime vaheã chupe viña, evocoyase yande yeroyasa Tüpa rese ãgüe ehi tẽi etera, Tüpa remimombehugüer evocoyase ãgüe ehi tẽi vahe aveira viña no. ¹⁵ Esepia, co mborocuita mboaviyeehisa pipe ñemoirosa oime ava upe. Ndipoise rumo mborocuita, ndipoi chietera ahe porocuita mboyeroyaẽhisa.

¹⁶ Sese mbahe Tüpa remimombehugüer porerecosa yaipsisira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuita mboyeroyasar upe güeraño, ahe rumo opacatu yande Abraham nungar Tüpa rese oyeroya vahe upe nara. Evocoyase ahe opacatu yande ramoi secói. ¹⁷ Icuachiapri arachendar pipe aipo ehi: “Orombou ava eta ivi rupindar ramoirã” ehi. Co Tüpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya ãgua viña, Abraham rumo oyeroya ité Tüpa oyeupe ñehesa rese; sese ava eta ivi rupindar ramoi eté secói Tüpa ñeha: “Setá oimera ava nde suindar” ehi vahe rupi tupri ité. ¹⁹ Abraham evocoyase ndasesarai eté oyeroya tuprisa sui, yepe vireco pota ité cien araviter viña. Iyavei oyoya güembireco reseve nañaroi eté guahi ãgua yuvireco

viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opíratasa opacatu oñehengagüer mboaviye água” ehiño ité opíha pipe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesús. ²⁵ Esepia, ahe imondopri secoi yande angaipa repirã. Ipare Tūpa ombogüerayevi yande pisi água seco catupri vahe nungar oyeupe.

5

Tūpa, “Peyavi mbahe” ndehi iri

¹ Sese yaico mbahe tupri pipe Tūpa, “Peyavi mbahe” ndehi irise yandeu yande Yar Jesucristo rembiapo sui sese yande yeroyasa pipe. ² Esepia, Jesucristo sui niha yareco co Tūpa suindar porovasasa yayeroyase sese. Ipipe avei yayemoviracuaño ité yaico, yayembovíha avei. Esepia, yaicua Tūpa piri yande reco água imborerecuasave. ³ Ndahei rumo sese güeraño yayembovíha, yande yemombaraisusa rese avei niha yayembovíha yaico. Esepia, yaicua ahe yande mbohe yande ñemosa água, ⁴ iyavei yañemosañose, yasē tupri yande recoáhasa sui, ahese yaicua yaipisi vaheerã mbahe aviye vahe Tūpa suindar yepi. ⁵ Iyavei ahe yande remiario nayamoha tēi chira seroco. Esepia, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatui yande ñepisiro água yande recocuerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepeí ava omano vaheerã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vaheerã chupe. ⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano água yande angaipa repirã. ⁹ Ipipe sui cūritei, “Peyavi mbahe” ndehi iri chira. Sese nomboui chietera oñemoirosa yandeu. ¹⁰ Esepia, yamotarēhimbar yaico vitesa, ahe Guahir manosa pipe sui yande reroeyevi iri oyeupe mbahe tupri pipe; ocuerayevisa pipe evocoiyase oicatu ité yande písiro. ¹¹ Ndahei co reseño ēgüe yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepia, opacatu ité oyapo angaipa yuvireco. ¹³ Ndipo vitesa Moisés porocuaíta, oime voi eté angaipa co ivi pipe. Yepe tie ndicuasa vitéi angaipa porocuaíta ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ēgüe ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaíta mboaviyēhisa resendar rese viña. Ahe Adán rese omboyecua mbia ou vaheerã.

¹⁵ Tūpa porerecosua ombou vahe rumo yandeu ndahoyoyai eté Adán angaipa rese. Esepia, Adán rembiavi sui setá ava omano; Jesucristo rembiapo sui rumo Tūpa ombou oporerecosua poropísirosa yandeu. Ahe rumo aviye catu vahe ava eta upe nara. ¹⁶ Ahe ñepeí ava angaipa rumo ndoyoyai eté Tūpa poropísirosa ombou vahe rese yandeu. Esepia, ñepeí ava angaipa sui ou Tūpa ñemoirosa; oporerecosua rumo Tūpa ombouño ité ava eta mbahe oyavi ati vahe upe nara yangaipa mocañi água. ¹⁷ Supi eté ñepeí ava angaipa sui oimeño ité manosa opacatu yandeu. Yande rumo yaipisi mbahe ipírata catu vahe ichui, ahe Tūpa porovasasa tuvichá vahe ité iyavei iporerecosua, “Peyavi mbahe” iheēhisa resendar. Sese yareco ité tecovesa apirēhi vahe yandeyeupe nara ñepeí ava sui, ahe Jesucristo.

¹⁸ Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiēhi água ‘tovireco tecovesa apirēhi yuvireco’ oya. ¹⁹ Esepia, ñepeí ava Tūpa reroyaēhisa sui setá oime ava angaipa viyar; ēgüe ehi aveira ñepeí ava mboyeroyasa sui setá aveira ava vireco güeco catupri Tūpa rese yuvireco.

²⁰ Supi eté porocuaíta ouse aracahe, ahese angaipa yaposa catu ité. Yepe ēgüe ehi viña, Tūpa porovasasa rumo ivate catu ité ichui. ²¹ Evocoiyase inungar angaipa ipírata yandeu yande mano água viña, ēgüe ehi avei rumo Tūpa oporovasasa ipírata vahe pipe yande pisi seco catupri vahe nungar yande rereco ‘toipisi tecovesa apirēhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoiyase, ziya iri píha yayapo vite angaipa yaico Tūpa yandeu oporovasasa mboyecua catu água? ² ¡Aní chietera! Esepia, yande niha senosepri angaipa sui. Evocoiyase ndiya

iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? ⁴ Yande ñeapiramose, aviye acoi ñotimbrí yaico Cristo rer pipe yande mbogüerayevi iri água iyavei yande recocuer mopiasu água avei, inungar acoi Cristo ocuerayevi Vu reco pīratasa pipe.

⁵ Yande omano vahe nungar yaicose supive, ěgüe yahe aveira yande yacuerayevi supi. ⁶ Yaicua avei niha yipindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoñi água. ⁷ Esepia, acoi omano vahe ndoyapo iri angaipa yuvireco. ⁸ Yande avei niha omano vahe nungar rese yaico. Evocoiyase yayeroya avei yaicove vaheṛā sese. ⁹ Yande niha yaicua, Cristo ñepeí reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepeí reseve opacatu angaipa mocañi água; cūrítei rumo oicove Tūpa upe nara. ¹¹ ěgüe peye avei pe, “Che omano vahe nungar aico angaipa upe” peyera; “Che rumo Tūpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vite angaipa pīratasavrive pe cuii água pe remimbotarai mboyeroyasa pipe. ¹³ Aní peyemondo angaipa upe mbahe tēi apo água. Peyemondo catu Tūpa upe. Esepia, pe inungar ava ocuerayevi iri vahe peico. Sese peyemondo tupri ité Tūpa upe mbahe tupri apo água. ¹⁴ Evocoiyase, pe angaipa ndape cuii iri chira pe rereco. Esepia, ndapeicoi Moisés porocuita pipe; pe rumo Tūpa porovasasa pipe peico.

Yembohesa mbiguai tēi recocuer sui

¹⁵ Ndayaico iri mborocuita pipe tēi, yaico rumo Tūpa porovasasa pipe. Evocoiyase, ¿“Tayapo vite angaipa” yahera pīha? ¡Aní chietera! ¹⁶ Pe niha peicua que ava pemboyeroyase, ipovri pendar evocoiyase peico. Pemboyeroyase Carugur angaipa apo água, ahe evocoiyase pe reco mocañi tēira. Tūpa pemboyeroyase rumo, ahe evocoiyase pe reco mohivira. ¹⁷ Aviye Tūpa upe. Esepia, pe yipindar mbiguai tēi nungar peico angaipa pipe viña, cūrítei rumo pemboyeroya pe pihave ité porombohesa peipisi vahe. ¹⁸ Ñepeí reseve pe angaipa sui Tūpa pe renosese, pe evocoiyase mbiguai nungar mbahe supi tupri vahe apo água peico. ¹⁹ (Che amboyoya tecocuer mbahe co ivi pipendar rese imombehu pēu. Esepia, yavai vite ité pēu co ñehesa renducua tupri água.) Yipindar pe retecuer pereco mbahe tēi pipe mbahe naporai vahe apo água. ěgüe peye rumo pe cūrítei pe reco mohivi água peico mbahe tupri pipe ñepeí reseve Tūpa upe pe reco água.

²⁰ Pe peico vitese mbiguai tēi nungar pe angaipa pipe, ahese ndapeyapo vitei mbahe supi tupri vahe; ²¹ cūrítei rumo pechī tēi ichui, ahe niha ndape pītivii eté pe recocuer rese, iyavei pe reraso pota manosa apirēhi vahesave yepi. ²² Cūrítei rumo angaipa sui senosepri peico Tūpa povrive pe reco água. Ichui mbahe tupri oime pēu. Ahe niha ombou oyeupe nara ité pe reco tupri água. Ipipe sui peicora apirēhi vaheṛā. ²³ Angaipa niha ombou manosa tēi yandeu, Tūpa rumo oporerocosa ombou tecovesa apirēhi vahe yandeu yande Yar Jesucristo rese yande recose.

7

Mendasa sui yembohesa

¹ Che rivireta, pe niha peicua tupri mborocuita, peicua avei ahe porocuita povriveño ité opacatu yaico yaicove vitese co ivi pipe. ² Esepia, inungar cuña omenda vahe, imer oicove vitese, iporocuitavrive viteño ité secoi yepi. Omanose rumo imer ichui, ahe cuña ndahe iri omer porocuitavrive secoi. ³ Acoi cuña omer recove viteseve, virecose ambuae cuimbahe, oyemboaguasa tēi evocoiyase; acoi omanose rumo imer ichui, ndaseco iri ipovrive. Ahe iyacatu ité omenda yupagüe iri; ahese ndahei yaguasa tēi cute.

⁴ Che rivireta, pe niha ěgüe peye avei Cristo rese peico vahe; Cristo manosa sui ndahe iri Moisés porocuitavrive peico Cristo rese peico água. Ahe niha acoi ocuerayevi vahe. Sese yande recocuer ěgüe ndehi tēi vahe Tūpa upe. ⁵ Esepia, yande yaicove vitese yande reco ai pipe, ahe porocuita renduse, yaipota catu mbahe tēi pipe yande reco água. Ipare rumo ahe manosave tēi yande reraso ucara viña. ⁶ Cūrítei rumo yande omano vahe nungar yaico acoi porocuita pipe yaico vahecuer sui. ěgüe yahe, yasē ichui Tūpa upe mbahe apo água Espiritu sui yande reco piasu pipe. Ndahe iri mborocuita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuita pipe, ahese ndaicuai chiveira che mbahe pota raisa viña. ⁸ Aicuase mborocuita, ahese angaipa ipirata catu

cheu. Ahe mborocuaita apo potaēhisa pipe che querēhi catu opacatu che remimbotarai tēi apo āgua. Esepia, mborocuaita porēhi angaipa aviye ndipoi vahe viña. ⁹ Yipindar Tūpa porocuaita ndaicua vīteise, ndoyavii aviye vahe ité che reco areco viña. Porocuaita aicuaase rumo, aipota rai angaipa apo āgua. ¹⁰ Che evocoiyase acañi tēi vaheṛā aico ipipe viña. Ahe porocuaita che recove apirēhi āgua mbou rāgüer sui, che mondo ucaño itera manosa apirēhi vahe pipe tēi viña. ¹¹ Esepia, angaipa ahe porocuaita pipe che mbopa ité. Ahe ipipe avei che mocañi tēira viña.

¹² Evocoiyase co porocuaita ndaseco marai vahe ité, supi tupri vahe ité, aviye vahe avei. ¹³ ¿Co porocuaita aviye vahe pīha che rereco che mano āgua tēi? ¡Aní eté! Angaipa tēi rumo ēgüe ehi che rereco. Evocoiyase co porocuaita cuasa sui oipota catu uca mbahe tēi apo āgua cheu. Ipipe aicua angaipa oime vahe che rese. Ēgüe ehi avei ahe porocuaita omboyecua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar, che tēi rumo imondopri aico angaipa mboyeroya āgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita aviye vahe. ¹⁷ Evocoiyase ndahei cheyesui eté ēgüe ahe, angaipa tēi rumo ēgüe ehi che mbohe uca. ¹⁸⁻¹⁹ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatu eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo vīteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voño ité mbahe naporai vahe cheu yepi. ²² Che piha pipe rumo Tūpa porocuaita aipotá iteanga tēi, ²³ che rumo aicua che piha pipe oime ambuae mbahe, mbahe tupri apo potaēhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraisu ité!, ndaicatu iri eté, ¿uma pīha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. Ēgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povrive.

8

Yaico vaheṛā Tūpa Espiritu rese

¹ Cūrítei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espiritu tecovesa mondosar yande renose angaipa povri sui, manosa sui avei. ³ Esepia, yande remimbotarai rese ndayaicatui Moisés porocuaita mboyeroya āgua, ahe avei evocoiyase ndoicatui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. Ēgüe ehi imocañi opacatu yande angaipa yande sui, yande remimbotarai avei. ⁴ Ahe ēgüe ehi yande yamboaviye vaheṛā mborocuaita. Esepia, ndayaico iri yande remimbotar tēi pipe. Yaico rumo Espiritu aviye vahe rese.

⁵ Esepia, acoi yuvirecoi vahe rumo güemimbotar tēi pipe, güecocueraí reseño tēi ipihañemoñeta yuvireco; Espiritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espiritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepia, acoi güecocueraí reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaita mboyeroya āgua yuvireco. ⁸ Ēgüe ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo āgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espiritu rese, ahe perecose peyese. Acoi ndovirecoi vahe rumo Espiritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaheṛā angaipa sui viña, pe espíritu rumo oicoveño ité. Esepia, Tūpa, “Peyavi mbahe” ndehi iri pēu. ¹¹ Acoi Tūpa Espiritu secoise pe rese, Tūpa evocoiyase omondora tecovesa piasu pe reteducer upe oEspiritu pe rese secoi vahe píratasa pipe. Esepia niha, ipipe ité ombogüerayevi Guahir Jesucristo.

¹² Ēgüe ehi che rivireta, yareco yande cuaita, ndahei rumo yande remimbotarai pipe yande reco āgua. ¹³ Esepia, pe peicoño itese pe remimbotarai pipe, ahese pecañi tēira; pemombopase rumo Espiritu pipe peyesui, ahese peicovera apirēhi vaheṛā.

¹⁴ Esepia, opacatu Tūpa Espiritu ombohe vahe, Tūpa rahir ité yuvirecoi. ¹⁵ Supi eté pe Espiritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco āgua. Ahe avei, “¡Che Ru!” pe mbohe uca chupe. ¹⁶ Co Espiritu avei oicua uca

yande espíritu upe Tūpa rahir yande recose. ¹⁷ Evocoiyase yaipisi aveira mbahe yande Ru Tūpa ombou vaheerā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaheerā teco porañetesa ipiri curi.

Teco porañetesa ou vaheerā curi

¹⁸ Cūrítei rumo yande paraisusa ndoyoyai eté teco porañetesa yande rese ou vaheerā rese. ¹⁹ Opacatu Tūpa rembiapocuer osāro vite ité opacatu oquerēhisa pipe, osepia pota ité teco porañete vahe tahir yuvirecoi vahe rese. ²⁰ Esepia, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ēgüe ehi, Tūpa ité, “Ēgüe tehi” ehi chupe, ombouse angaipa repri ava upe. Mbahe sembiapocuer rumo osāroño ité ²¹ güeco opa tēi vaheerā sui ñepisiro āgua teco porañete vahe Tūpa rahir vireco vahe rupiti āgua curi. ²² Yande niha yaicua aracahe suive opacatu mbahe Tūpa rembiapo oiporara mbahe rasi cuer yuvireco cuña imembi rasi vahe nungar. ²³ Ndahei rumo ahe güeraño ēgüe ehi yuvireco, yande avei ēgüe yahe. Yande yareco ité Espíritu, ahe yipindar vahe yaipisi vaheerā ichui curi. Yayemombaraisu, yasāro vite yande querēhisa pipe Tūpa guahir ité yande rereco āgua, yande retecuer recuñaro āgua avei. ²⁴ Esepia, yande niha yañepisiro ité yande remiario reroya pipe; sese acoi yasepia vahe mbahe yande remiario, nayasāro iri. Ndipoi ava osāro vite tēi vahe mbahe güembiepia. ²⁵ Acoi mbahe yande remiario ndayasepia viteise rumo, yasāro vite yande ñemosasa pipe sereco.

²⁶ Ēgüe ehi avei Espíritu yande pītivii ndayaicatu irise. Esepia, ndayaicuai eté mara yahera yayeroqui, co Espíritu Santo rumo oporandu ité Tūpa upe yande rese oyemopoasesa pipe. ²⁷ Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyeupe. Esepia, Espíritu oporandu chupe semimbotar rupi yande seroyasar yaico vahe rese.

Yasecopipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime āgua yande raisusave. ²⁹ Esepia, yipive Tūpa yande cua, yande poravo Guahir Jesucristo nungar ité yande reco āgua ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco āgua. Ipare, “Co seco catupri vahe” ehi chupe; ahe chupe avei omondo teco porañetesa.

³¹ ¿Mara yahe irira vo chupe? ¿Tūpa niha yande repisar secoi, sese ndoicatu iri eté yande amotarēhimbar yuvireco! ³² Tūpa niha ombou ité Guahir imano āgua opacatu yande rese. Sese yaicua ombou aveira opacatu mbahe yandeu yande pītivii āgua Tahir rese yande recose. ³³⁻³⁴ Sese ndiyai eté ava upe, “Pecañi tēira, peyavi pe recocuer” ihe āgua yande iporavopri yaico vahe upe yuvireco. Esepia, Tūpa opa omocañi yande angaipa yande sui Cristo omanose sepirā, iyavei ocuerayevise. Cūrítei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe piña yande mboyepepira Cristo yande raisusa sui viña? ¿Que yande paraisusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri arachendar pipe aipo ehi:

“Oyemoinngatu voi ari rupi yande yuca āgua yuvireco ndeundar yaicose, ovesa yucapirā nungar tēi yande rereco yuvireco” ehi aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tūpa yande raisu viteño itera yepi yepe que yamanora, anise que mbahe oime vahe yandeu yande recove viteise. Ndayande mboyepepii chiaveira ichui que Tūpa rembiguai, que seco ivate vahe, seco pirata vahe ndayasepia vahe, que cūrítei mbahe oime vahe yandeu, anise que mbahe oime vaheerā curi. ³⁹ ¿Ndayande mboyepepii chiaveira que iva pendar mbahe, anise que mbahe ivi pipendar, que ambuae mbahe Tūpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tūpa oiporavo Israel oyeupe nara aracahe

¹ Che Cristo reroyasar che reco pipe supi eté añehe, ndopombopai. Tūpa Espíritu oicua ité che pihañemoñetasa supi vahe. ² Ndavihai eté che piha pipe; oime mbahe tasi vahe cheu yepi. ³ Che aipota tēi opacatu che mu judío ñepisiro āgua yuvireco viña. “Tacañi tēi Cristo porēhi icañi tēiēhi āgua yuvireco” ahera viña. ⁴ Ahe niha Israel suindar yuvirecoi, aracahe Tūpa oiporavo vahe guahirguā. Ahe ipāhuve avei secoi güendigüer porañetesa pipe, iyavei omondo ité oñehe güemimbotar, oporocuaíta avei chupe nara viña ‘tache mboetei oyeruresa

pipe che rêtave yuvireco' oya, iyavei, "Amboaviye itera che ñehe pe rese" ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tüpa Rembiporavo Poropísirosar avei ahe ichuindar oyesu vahe. Ahe Poropísirosar niha Tüpa ité, ivate catu vahe secoi opacatu sui. Sese, ¡timboeteisa catu yepi! ¡Ëgüe tehi apirêhi!

⁶ "Tüpa nomboaviyei Israel upe oñehe imombehupri" ndapeyei chira. Esepia, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepia, Tüpa aipo ehi: "Nde rahir Isaac sui rumo oimera nde suindar sovasapri" ehi chupe. ⁸ Co rumo osenducua uca yandeu ndahei Abraham suindar yuvireco vaheño ité Tüpa rahir yuvirecoi, Tüpa remimombehu rupi yuviroha vahe güeraño rumo ichuindar ité yuvirecoi. ⁹ Esepia, Tüpa Abraham upe aipo ehi aracahe: "Co ari rupi avei ayevara curi, ahe oimera Sara membri ndeu" ehi.

¹⁰ Ndahei rumo co reseño, tahir Isaac rese avei. Esepia, ocuacuase sembireco Rebeca imembi cöi, ahe icöi vahe yesupa rumo ñepeño ité. ¹¹⁻¹³ Ahe ndoyuviroha viteise, ndoyapo viteise mbahe que aviye vahe, que naporai vahe yuvireco, Tüpa aipo ehi ichi Rebeca upe: "Yipindar oha vahe nde membri ahe omboyeroyara ipandar" ehi. Co oyoya ité icuachiapri rese acoi aipo ehi vahe: "Che asaisu ité Jacob, Esaú rumo ayamotarêhi" ehi. Sese yaicua iya ité Tüpa upe ava poravo güemimbotar rupi, ndahei seco aviye vahe rese.

¹⁴ Sese pïha Tüpa upe, "Ndaseco tuprii vahe" yahera? ¡Aní eté! ¹⁵ Esepia, acoi Moisés upe aipo ehi: "Aiparaisueredora ava, asaisu aveira che remimbotar rupi" ehi. ¹⁶ Supi eté ndahei yande remimbotar rupi tēi, ndahei avei yande pīratasa rupi Tüpa oyapo mbahe; ahe rumo oporoparaisueredora pipe mbahe oyapo yandeu. ¹⁷ Supi eté Tüpa aipo ehi mborerecuar guasu Egipto pendar upe aracahe: "Che oromoingue uca mborerecuar nde reco ñgua che pīratasa mboyecua ñgua nde sui, che rer mboetei ñgua avei opacatu ava upe co ivi pipe" ehi. ¹⁸ Ëgüe ehi oporoparaisuereco güemimbotar rupi. Güemimbotar rupi avei omboavai viroya ñgua ava upe.

¹⁹ Aviyeteramo oimera que amove pe pāhu pendar aipo ehi vahe, "Ndiyai evocoyase Tüpa upe, 'Pe peyavi mbahe' he ñgua yandeu. Esepia, ndipoi eté niha ava, '¡Aní!' ehi vaherā Tüpa remimbotar upe" ehira. ²⁰ "Ndiyai eté rumo Tüpa poepi ñgua ndeu" ahera aipo ehi vahe upe. Inungar ñaihu mbahemoinda ndiyai, "¿Mahera che apo rai tēi eve?" ihe ñgua oaposar upe. ²¹ Ñaihu rese oporaviqui vahe rumo güemimbotar rupi oyapora mbahe yuvireco sese. Oicatu ichui aviye catu vahe apo, oicatu avei ambuae iporupirā tēi apo ñgua.

²² Tüpa rumo oñemosā pare iya ité oñemoirora, opīratasa mboyecua ñgua ocañi tēi vaherā upe. ²³ Ëgüe ehi avei yapo güemimbotar rupi güeco porañetesa ivate vahe mboyecua ñgua yandeu. Esepia, yande paraisuereco iyavei yipisuive teco ori porañetesa omingatu yandeu aheve yande reique ñgua. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esepia, Oseas rembicuachiagüer pipe aipo ehi:

"Acoi ava ndahei vahe cheundar, chupe,

'Cheundar ité' ahera, iyavei acoi ava ndahei vahe saisupri yuvirecoi, chupe, 'Che rembiaisu ité' ahera" ehi.

²⁶ " 'Pe ndahei vahe cheundar peico' ehi vahesave, ahe chupe, 'Tüpa oicove vahe rahir ité' hesara" ehi.

²⁷ Isaías rumo aipo ehi israelita upe: "Yepe Israel suindar setā iteangara viña inungar ivi cuhi, moviro tēi rumo oñepisiora yuvireco. ²⁸ Esepia, yande Yar omboaviye vaira oñehe ava viroyasarêhi mocañi ñgua co ivi pipe" ehi. ²⁹ Oyoya avei ambuae Isaías remimombehugüer yipindar vahe rese:

"Yande Yar seco pīrata catu vahe noipísiroise que moviro yande ramoi yandeu, yacañipa tēira viña inungar tecua guasu Sodoma,

Gomorra reseve yuvireco" ehi.

Judío yuvirecoi vahe iyavei ñehesa pīsiosa resendar

³⁰ ¿Mara yahera vo evocoyase? Yaicua ava ndahei vahe judío, yepe ndahei osecā vahe güeco catupri ñgua yuvireco viña, Cristo rese oyeroyasa pipe rumo vireco ité güeco catupriisa Tüpa rovaque. ³¹ Judío yuvirecoi vahe rumo oipota tēi güeco tupri ñgua ité Tüpa porocuaita mboyeroya pipe viña, ndoicatu ité rumo supiti yuvireco. ³² Esepia niha, ndahei oyeroyasa pipe ité osecā oñepisiro ñgua, ahe rumo co mborocuaita mboyeroyasa sui tēi Tüpa rese yuvirecoi pota viña. Ahe evocoyase ndoyavi oyeipi vahe "ita yepiapisa" rese yuvireco. ³³ Aipo ehi tupri icuachiapri aracahendar pipe:

"Che amondo Sión ve ñepe ita yepiapisa, ahe oporoeti vahe.

Acoi sese oyeroyā vahe rumo, nomochi ucai chietera oyesui" ehi Jesús recocuer upe.

10

¹ Che rîvireta, che aipota che piha pipe ité iyavei ayerure Tûpa upe che mu judío recocuer rese 'toñepisiro yuvireco' che yapave. ² Supi eté iquerêhi ité Tûpa upe mboraviqui apo âgua yuvireco viña. Oquerêhisa sui rumo oyavi senducuaêhisa pipe yuvireco. ³ Esepia, ndoicua potai mara ehi Tûpa ava pisi oyeupe. Sese oyesui tēi oseca güecocuer tuprisa pipe 'tomoingatu Tûpa ophi yande pisi âgua' ohesave yuvireco viña. Ipipe sui nombroyoyai eté Tûpa remimbotar güeco mbocatupri âgua ité yuvireco. ⁴ Esepia, Cristo recocuer pipe imboaviyasa tupri Moisés porocuaita, "Peyavi mbahe che ñemoirosa pisi âgua" ehiêhi âgua Tûpa oyese oyeroya vahe upe.

⁵ Co yande reco catupri âgua porocuaita pipe sui, Moisés aipo ehi icuachía: "Acoi ava omboaviye tupri vahe opacatu co mborocuaita, ipipe sui yuvirecovera" ehi. ⁶ Tûpa, "Peyavi mbahe che ñemoirosa pisi âgua" heêhi âgua rumo yande yeroyasa pipe, "Ava vo oyeupira ivave Tûpa Rembiporavo reroyi âgua" ndapeyei chira. ⁷ Iyavei, "Ava vo ogüeyira omano vahe pâhuve Tûpa Rembiporavo mboyeupi uca âgua" ndapeyei chiveira. ⁸ ¿Mara peyera evocoiyase pe piha pipe? "Co ñehesa namombriveimi pe sui, pe yuru pipe ité, pe piha pipe avei secoi" peyera. ⁹ "Jesús, che Yar" peyese, pe piha pipe peyeroyase avei Tu imbogüerayevisa rese, ahese ipísiroproi peicora. ¹⁰ Esepia, yande piha pipe yayeroya Jesús rese. Ahese Tûpa, "Co seco catupri vahe" ehira yandeu. Iyavei yamombehuse sese yande yeroyasa, ahese ipísiroproi yaicora.

¹¹ Esepia, icuachiapri arachendar pipe Tûpa aipo ehi: "Acoi sese oyeroyá vahe rumo, nomochi ucai chintera oyesui" ehi. ¹² Sese oyoya tupri judío ndahei vahe judío recocuer rese. Esepia, ñepeñño ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. ¹³ Esepia, icuachiapri arachendar pipe aipo ehi: "Acoi opacatu osenoí vahe yande Yar rer, ipísiroproi yuvirecoira" ehi. ¹⁴ Ava rumo ndoporandui chira písirosa rese Jesús upe, sese ndoyeroyase yuvireco. Iyavei sese ndoyeroyai chira sesendar ñehesa ndosenduisse yuvireco. Iyavei ndosendui chira ndipoise ñehesa mombehusar yuvireco chupe. ¹⁵ Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri arachendar pipe: "¡Aviye ai eté acoi ava güeru vahe ñehesa aviye vahe písirosa resendar!" ehi.

¹⁶ Ndahei rumo opacatu che mu judío viroya co ñehesa písirosa resendar yuvireco. Isaías niha aipo ehi avei aracahe: "Che Yar, ¿uma piha viroya ore ñehe yuvireco?" ehi. ¹⁷ Sese yayeroya Jesucristo rese co ñehesa písirosa rendusa pipe.

¹⁸ ¿Osendu piha judío co ñehesa yuvireco? ¡Osendu ité! Esepia, aipo ehi avei acoi icuachiapri arachendar pipe:

"Sendusa niha opacatú ivi rupi ñehe" ehi.

¹⁹ Iyavei, ¿osenducua piha yuvireco? ¡Osenducuaño ité! Esepia, yipindar Moisés omombehu icuachiapri pipe aipo ehi:

"Perecatêhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe" ehi.

²⁰ Ipare omombehu tupri ité Isaías osiquiyeêhisave Tûpa ñehe aipo ehi vahe:

"Acoi ava ndache recai vahe, ahe che pisi ité yuvireco.

Iyavei ayembocueca acoi ava che rese ndoporandui vahe upe" ehi.

²¹ Judío recocuer rese avei rumo aipo ehi: "Arí rupi añehe tēi ava che reroyasarêhi ndiporeroyai vahe upe vichico" ehi aracahe.

11

Moviroya tēi ava Israel pendar Tûpa oiporavo oyeupe nara

¹ Evocoiyase, ¿omombo piha Tûpa ava Israel güembiporavo eta oyesui? ¡Aní eté! Esepia, che avei niha ichuindar aico. Abraham niha che ramoí eté, Benjamin suindar avei aico. ² Yipisuive ité niha Tûpa, "Co ava cheundar ité" ehi ore ramoí israelita upe. Sese cūrítei ndore momboí eté oyesui. Peicua niha acoi Elias resendar icuachiapri arachendar oyeroyoi tēise omu israelita rese aipo ehise Tûpa upe: ³ "Che Yar, nde ñehe mombehusareta opa oyuca yuvireco. Ndeu porerecosa reropovêhesa renda avei opa omombo yuvireco. Che güeraño aicove vitemi nde reroyasar. Che yuca potañño avei eté rumo yuvireco" ehi. ⁴ Tûpa rumo omboyeve chupe: "Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco" ehi. ⁵ Êgüe ehi avei cūrítei opita viteño moviroya judío, ahe niha Tûpa oiporavo oporoaisusa pipe. ⁶ Ipipe ité niha êgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoiyase judío eta ndosecai eté mbahe oipotá catu vahe Tûpa suindar yuvireco. Sembiporavo ete ité rumo oipisi yuvireco. Ambuae upe rumo Tûpa omboavai catu viroya

ãgua. ⁸Icuachiapri pipe aipo ehi aracahe: “Tûpa nomboyecua uca iri mbahe secocuer pipe. Cûritei êgüe ehiño vite ité yuvireco. Omondo têi sesarâ; ipipe rumo ndosepia ucai mbahe chupe. Omondo têi avei yapisaguã; ipipe ndosenducua ucai mbahe chupe” ehi. ⁹Iyavei David aipo ehi aracahe:

“Tpietasa ivonde nungar iyavei pira mbohasa nungar tasecoi chupe.

Ipipe sui toyuviroha mbahe têi pipe yuvireco, toyemombaraisu uca avei ipipe yuvireco.

¹⁰Toicua eme mbahe inungar ndasesapisoi vahe yuvireco.

Icuhapapri nungar ayase toyuvirecoi apirêhi vaheerã” ehi.

Ndahei vahe judío ñepisiro agüer

¹¹Evocoiyase areco iri che porandusa pëu: ¿Apirêhi vaheerã ité pîha judío eta ndoyeroyai Jesucristo rese oñepisiro ãgua yuvireco? ¡Aní eté! Ahe rumo êgüe ehi ava ndahei vahe judío písirosa pisi ãgua yuvireco. Ipipe sui oyemonguerêhi catura judío ipisi ãgua yuvireco curi. ¹²Evocoiyase judío eta rembiavi sui tuvichá Tûpa poroparaisuerecosa oime opacatu ava ndahei vahe judío upe. Coiye rumo tuvicha catu itera Tûpa poroparaisuerecosa opacatu ava upe oyevise yuvireco chupe.

¹³Che rumo areco che ñehesa pëu pe ndahei vahe judío. Tûpa niha che cui oñehe mombehu ãgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴Sendusa sui aviyeteramo oimera ipãhuve oyemonguerêhi vahe písirosa Tûpa suindar pisi ãgua oyeupe nara yuvireco. ¹⁵Esepia, judío mombosa pipe sui Tûpa omoime ñerosa opacatu ava co ivi pipendar upe. ¿Mara ehira pîha evocoiyase Tûpa ipisise? Ahe se oipísira tecovesa apirêhi vahe yuvireco, evocoiyase ndoyuvireco iri chira omano vahe nungar Tûpa upe. ¹⁶Esepia, yipindar panguã sui yapopri seropovêhese Tûpa upe, opacatu panvi evocoiyase sovasapri avei ichui. Iyavei inungar ivira rapo seropovêhese Tûpa upe viña, sãca avei evocoiyase opacatu êgüe ehi aveira viña.

¹⁷Amove che mu judío inungar Olivo rãca yasiapri. Pe evocoiyase ndahei vahe judío ivira caha pipendar rãca nungar peico vahe, peso yasiapri rendagüerve, ipipe sui peipisi viracuasa pe recove ãgua. ¹⁸Aní chira rumo, “Yande aviye catu vahe yaico ivira rãca nungar yipindar yuvirecoi vahe sui” peye pe yeecomboivate aisa pipe. Esepia, ndahei pe sui judío oipisi oyemoviracua ãgua yuvireco, pe rumo yipindar ichui eté peipisi pe yemoviracua ãgua.

¹⁹Iyavei, “Co judío rumo imombosa ité ivira rãca asiapri nungar yande sendagüerve yapita vaheerã” peye revo. ²⁰Supi eté, co rumo Tûpa reroyaêhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹Esepia, Tûpa oiporavo co judío oyeupe nara ité viña, ndoviroyaise rumo, ndoipisii eté. Pëu avei êgüe ehira ndapemboyeroyaise. ²²Peyapisaca tupri, Tûpa niha aviye vahe ité. Seco pírata vahe avei rumo ava viroyaêhisar upe. Pëu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar têi peicora. ²³Opoipase rumo judío eta Cristo reroyaêhisa sui, Tûpa evocoiyase viroyevi irira oyeupe nara. Esepia, chupe iya ité ipisi iri ãgua. ²⁴Pe ndahei vahe judío ivira caha pipendar rãca yasiapri nungar peico, Tûpa rumo pe mondo ivira aviye vahe nungar rese. ¡Evocoiyase judío ete ité inungar ahe ivira aviye vahe rãca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵Che rivireta, che aipota, “Toicua Tûpa remimbotar icuapirêhi oyemboivate aiêhi ãgua yuvireco” ahe pëu. Esepia, amove Tûpa judío upe omboavai viroya ãgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pëu, ²⁶ahese ramo opacatu ava judío yuvirecoi vahe Tûpa oipísirora. Esepia, icuachiapri arachendar pipe aipo ehi:

“Oura ava Písirosar judío recua Sión pãhu sui, ahe oipehara mbahe naporai vahe opacatu judío sui.

²⁷Evocoi niha che remimbotar chupe nara, amocañise yangaipagüer yuvireco ichui” ehi.

²⁸Êgüe ehi cûritei judío eta ndosendu potai ñehesa písirosa resendar yuvireco. Sese Tûpa amotarêhisar yuvirecoi. Pëu mbahe tupri ãgua rumo êgüe ehi. Tûpa rumo osaisu vite. Esepia, yipive ité oiporavo tamoi eta oyeupe. ²⁹Supi eté, Tûpa ndoviroyevi iri eté mbahe güemimondo iyavei ndovirova-rova têi vahe opihañemofetasa güembiporavo sui. ³⁰Yipindar niha pe ndapemboyeroyai eté Tûpa. Cûritei rumo judío eta ndoviroyaise yuvireco, pe paraisuereco Tûpa. ³¹Êgüe ehi avei judío eta cûritei ndoviroyai yuvireco. Tûpa pe paraisuereco uca ãgua rumo êgüe ehi yuvireco. Coiye inungar pe, judío avei osupitira Tûpa poroparaisuerecosa yuvireco. ³²Esepia, Tûpa ité, “Opacatú oyavi mbahe che reroyaêhisa pipe” ehi ‘oicuaase mbahe güembiavi, tiquerêhi opacatú che poroparaisuerecosa pisi ãgua yuvireco’ oya.

³³ ¿Mara ehi rutei Tūpa aracuasa, imbahecuaasa avei? Ndipoi chietera que ava yaracuasa mombehu tupri āgua. Ndayaicatui avei secocuer cuapa tupri āgua. ³⁴ Ndipoi eté que ava oicua vahe yande Yar pihañemoñetasa iyavei ndipoi eté que ambuae ava tēi ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepia, Tūpa suñiño ité niha opacatu mbahe oime, oyeupe nara avei mbahe oyapo opíratasa pipe. ¡Sese imboeteipri ité Tūpa tasecoi yepi! Ēgüe tehi apirēhi.

12

Yande recocuer imondopri Tūpa upe nara

¹ Sese che rivireta, che Tūpa poroparaisuerecosa pipe aipota pe yemondo ité pe recove-seve chupe nara, inungar mbahe Tūpa upe seropovēhepri ité, ahe aviye itera chupe. Ahe niha pe cuaita pe piha pipe sui eté peyapo vaheṛā chupe. ² Peico iri eme co ivi pipendar pihañemoñetasa tēi rupi. Iyacatu rumo pesecuñaro pe pihañemoñetasa. Ipipe sui opacatu pe recocuer ofeucuñarora. Ēgüe peyese, peicuara Tūpa remimbotar ahe mbahe aviye vahe, semimbotar supi tupri vahe ité.

³ Tūpa niha oporovasasa pipe che cuai, sese aipo ahe pēu: pepihañemoñeta eme pe yemboivate ai āgua rese. Iyacatu rumo peicua tupri pe pihañemoñetasa peyesendar Tūpa pēu mbahe imbougüer rupi sese pe yeroyasa pipe. ⁴ Inungar yande rete ñepeño ité, sesendar rumo setá, iyavei ndahoyoyai mbahe sembiapo. ⁵ Ēgüe vahe avei yande, yepe que yande retara viña, Cristo rese yayemboyase rumo, ñepe vahe nungar yaico. Evocoiyase yande ñepe-pe opacatu upendar yaico.

⁶ Tūpa niha omboyeavirati mbahecuaasa imbou oporoaisusa pipe ñepe-pe upe. Evocoiyase Tūpa ombouse ofehe mombehu āgua yandeu, yamombehura ñepe-pe iñehe sese yande yeroyagüer rupi. ⁷ Que ombouse mbahecuaasa ambuae ava pítivii āgua yandeu, yaipítivii tupri aveira. Ombouse yande porombohe āgua, yaporombohe tupriño itera. ⁸ Iyavei ombouse yandeu ambuae ava monguerēhi āgua, yaporomonguerēhiño itera. Ombouse yande poropítivii āgua ava mbahe ndovirecoi vahe upe, yamondoño itera mbahe chupe yande recatēhiñisave. Acoi oporocuai vahe, toyapoño oquerēhisa pipe; iparaisu vahe pítiviiisar, toipítiviiño avei vorivetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe aviye vahe pipe. ¹⁰ Peyeaisu catu ñepe-pe oyeivri nungar tupri pe recosa pipe. Pe ae peymboetei rāgüer sui pemboetei catura ambuae ava Jesús reroyasar.

¹¹ Peyemonguerēhi, aní ndapequerēhi chira iyavei peyapo yande Yar upe mbahe opacatu pe recoete pipe.

¹² Peicoño pe viharetesave mbahe iva péndar rārosa pipe; peñemosañi mbahe rasicuer peiporarase iyavei aní chira peseya pe yeruresa yepi.

¹³ Peipítivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotarēhimbar rese; peporandu Tūpa porovasasa rese ahe ava upe nara; aní pe avei peñehe mara chupe.

¹⁵ Peyemboviha acoi ava oyemboviha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepe-pe oyese pe yeaisusa pipe. Aní chira peyecomboivate ai. Iyacatu rumo peyemoingatu ava seco mbegüemi vahe mbori āgua. Aní peñemoha imbahecua vai vahe nungar.

¹⁷ Aní pēu mbahe tēi aposar upe pemboyevira mbahe tēi avei. Peyapo catu mbahe tupri opacatu ava rembiepiave. ¹⁸ Peicatu vahe rupi peseca pe reco tupri āgua opacatu ava upe.

¹⁹ Che rivireta, aní pe ae pemboyevi mbahe tēi pipe pe rereco momarasar upe. Peseyaño Tūpa upe. Ahe oicuara chupe. Esepia, icuachiapri pipe aipo ehi: “Che ité aicuara ava mbahe tēi aposar upe. Che amboepira” ehi yande Yar. ²⁰ Iyavei aipo ehi: “Acoi nde amotarēhimbar ndasiepoise, emondo mbahe itohu, iyavei acoi ihuseise, eremondora itoihu. Esepia, Ēgüe peyese pe amotarēhimbar upe, ochíra pe sui” ehi. ²¹ Aní mbahe tēi upe peyeecopi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pemboyeroyara. Esepia, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuita reroyañisar yuvirecoi. Ēgüe ehi vahe inupambri yuvirecoira. ³ Esepia, mborerecuar yuvirecoi vahe ndahei ava seco tupri vahe mbosiquiye āgua yuvirecoi, ahe rumo yuvirecoi ava mbahe tēi aposar mbosiquiye

água. Ndayasiquiye potaise mborerecuar sui, iya yaicora mbahe tupri pipe. Mborerecuar evocoiyase, “Aviye” ehira yande reco catuprisa rese yandeu. ⁴ Esepia, ahe Tüpa rembiguai mbahe tupri apo água yandeu. Acoi mbahe tēi yayapose rumo, yasiquiyera ichui. Esepia, ahese mborerecuar yande nupaño itera yuvireco. Ahe niha Tüpa remimbotar rupi eté icuaita ava mbahe tēi aposar nupa água yuvireco. ⁵ Sese iya yamboyeroya ité mborerecuar; ndahei rumo ahe yande nupañhi água reseño, yande pihañemoñeta momarañhi água rese avei. ⁶ Sese avei yamondora guarepochi mborerecuar upe yuvireco yandeu oporanduse. Esepia, ahe mborerecuar Tüpa rembiguai yuvirecoi. Evocoiyase aheño ité iporaviquisa yuvireco.

⁷ Yamondo ñepeí-peí ava upe mbahe chupendar. Iya ité yamondo mborerecuar upe guarepochi oporanduse sese, yamboetei avei ava imboyeroyapri.

⁸ Aní yandereve. Ahe yande cuaita. Yande cuaita avei yande yeaisu água, supi eté acoi ava osaisu vahe ambuae ava, omboaviye ité Tüpa porocuaíta. ⁹ Aipo ehi acoi Tüpa porocuaíta: “Ndapeyemboaguasai chira, ndapeporoyucaí chira, ndapemondai chira, ndaperemairai chira, ndapeipota rai chiaveira ambuae ava mbahe” ehi. Co iyavei opacatu ambuae Tüpa porocuaíta sendusa tupri ité co ambuae ñehesa rese: “Pesaisu ava pe yeaisu nungar” ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboaviyesa tupri ité porocuaíta.

¹¹ Iyavei peícua tupri co mbahe oime vahe yandeu. Cūríte ari osupití ité yandeu yande yemopoase água. Esepia, yande Yar yeví água cōimi catu yandeu iñehengagüer yipindar seroyasa sui. ¹² Supi eté osupití senimi ari yandeu; sese iyacatu yapoi pitumimbi vahe nungar mbahe-mbahe tēi aposa sui mbahe icatupri vahe pipe yande reco água. Evocoiyase tayaico sundao oyoepisa omonde vahe nungar. ¹³ Yande catu yaguata yande reco ívi tuprisa pipe, inungar yaguatase ari pipe. Aní catu yaico caguar pipe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pipe, ambuae ava mbahe pota raisa pipe avei no. ¹⁴ Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo água yande remimbotarai pipe.

14

Aní peroïro ambuae Jesús reroyasar

¹ Acoi ava ndoyeroya tupri vitēi vahe yande Yar rese que oiquese pe piri, peipisí tuprira; aní peñehepoepira ipihañemoñetasa ndahoyoyaise pe pihañemoñeta rese. ² Esepia, amove evocoi nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu água rese. ³ Acoi ava opacatu mbahe ohu vahe, toviroïro eme amove ndohui vahe mbahe iyavei acoi amove ndohui vahe mbahe, toviroïro eme acoi ohu vahe opacatu mbahe. Esepia, evocoi nungar ava Tüpa oipisí ité. ⁴ Supi eté pe ndiyai eté peroïro vaherā ambuae ava rembiguai. Esepia, ahe yande Yar povri pendar secoi. Yepe ndoyaviise mbahe ipipe, anise ichui oviapise mbahe tēi pipe, serecuar ité oicuaru chupe. Esepia, yande Yar opiratasa pipe osecomoingatuño itera.

⁵ Oime avei amove ava ñepeí ari omboetei catu yuvireco ambuae ari sui, iyavei ambuae oime aipo ehi: “Oyoya guasño ité niha ari” ehi vahe. Ñepeí-peí opihañemoñeta rupi, “Co supi tupri vahe” ehira opiha pipe yuvireco. ⁶ Acoi que ñepeí ari ava omboetei vahe, yande Yar mboeteisa pipe rumo ãgüe ehi. Iyavei ohu vahe opacatu mbahe, Yar mboeteisave avei ãgüe ehi. Esepia, ahe güembiapo rese, “Aviye ndeu” ehi Tüpa upe; iyavei acoi amove ndohui vahe mbahe, Yar mboeteisave ãgüe ehi, iyavei, “Aviye ndeu” ehi avei Tüpa upe.

⁷ Esepia, yande ñepeí-peí ndayaicoi yandeyupe nara tēi, ndayamanó avei yandeyupe nara. ⁸ Esepia, yaicove vitese, yaico yande Yar upe nara; yamanose, yamano yande Yar upe nara avei. ãgüe vahe yande yaicove vitese, anise yamanose, opacatu chupe nara ité yaico. ⁹ Sese niha Cristo omano, ipare ocuerayevi opacatu ava Yar güeco água que omano vahe, anise que oicove vite vahe upe avei.

¹⁰ ¿Mahera evocoiyase peroïro pe mboetasa Cristo reroyasar iyavei mahera ndapesepia potai? Esepia, supi eté niha yande opacatu yasora Tüpa rovai. Ahe evocoiyase opara oporandu yande recocuer rese yandeu. ¹¹ Esepia, icuachiapri aracahendar pipe omombehu: “Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco, ehi” ehi.

¹² Evocoiyase yande ñepeí-peí yamombehura yande recocuer Tüpa upe.

Aní pe rivireta mbahe tēi pipe pereco uca

¹³ Sese yande ndiyai yañeroïro. Iyacatu rumo ñepeí reseve pereco tupri ambuae pe rivri, angaipa pipe sereco ucañhi água, iyeroyasa momarañhi água avei. ¹⁴ Che yande Yar

reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoyase mbahe tēi, ndiyai eté ihu āgua. ¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoyase yande poroaisusa pipe ité ěgüe yahe. ¡Aní ahe yamocañi tēi uca Cristo sui evocoi nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviñera yande uve viña, ndayayapoi chira rumo evocoi nungar yande rembiapo rese ava ñehe-ñehe tēiēhi āgua. ¹⁷ Esepia, ndahei ivate catu vahe Tūpa upe yande carusa, yande igua avei ipovrive yande recose. Ěgüe ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pāhuve iyavei yande rorivetes va yareco vahe Espiritu Santo sui. ¹⁸ Ěgüe yahese Cristo mboeteisave, aviye aira Tūpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri vaheṛā yandeyeupe. Ipipe sui yande yaicatura yañepitivii yande yemoviracua tupri āgua yande Yar rese. ²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviye aiño ité; ndiyai eté rumo yahu que tembihu ambuae ava Cristo reroyasar pihañemoñetasa momara āgua. ²¹ Aviye catu ndayahuisse mbahe roho, que ndayahuisse uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seiti uca iriēhi āgua. ²² Yande pihañemoñetasa yareco vahe rumo yarecoñi itera yandeyeupe ité Tūpa rovaque. ¡Aviye ai catuño ité ava acoi, “Aviye yayapose evocoi nungar mbahe” he pare, “¿Mara ehi pīha?” ndehi irise opihañemoñetasa pipe! ²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitese que mbahe upe, ipare oyapose ité, ahe angaipa.

15

Yambovihara ava yande cotindar, ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañora ava Tūpa rese ndipihañemoñeta tupri vitei vahe rese. Ndahei chira rumo yande ae tēi yayemboviha. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye āgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe āgua, yande yasāro vaheṛā Tūpa reco porañetesa yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pītivii oyoya guasu pe reco tupri āgua ñepeí-peí peyese Jesucristo recocuer rupi. ⁶ Ipipe sui pe opacatu oyoya guasu ñepeí pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepeí-peí, inungar Cristo pe pisi tupri oyeupe nara Vu mboetei āgua. ⁸ Che rumo aipo ahe pēu: Jesucristo ou judío pītivii Tūpa remimombegüer mboaviye āgua judío ramoi aracahendar upe. Ěgüe ehi Tūpa oñehe mboaviyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparisuerecosa rese yuvireco’ oyapave. Ahe ěgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapuairā ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no:

“¡Peyemboviha catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ¡pembotei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira.

Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipipe sui tombou yasāro vaheṛā ahe mbahe aviye vahe Espiritu Santo pīratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepeí-peí peyeupe pe yemboaracua āgua. ¹⁵ Co tecocuer rese rumo aicuachía

opacatu che siquiyeēhisa pipe pēu pe resaraiēhi āgua ichui. Esepia, ayapo Tūpa che cuaita ombou vahe che raisusa pipe cheu ¹⁶ Jesucristo rese che poraviqūi āgua ava ndahei vahe judío recocuer aviye āgua. Evocoyase judío pahī nungar che cuaisa pipe amombehu co ñehesa Tūpa ombou vahe písirosa resendar yuvireco chupe imoporēhi āgua Tūpa rovai inungar mbahe seropovēhepi aviye vahe Tūpa upe Espiritu Santo pipe yepi.

¹⁷ Supi eté che Jesucristo rerozasar che recosa pipe aviharete Tūpa che cuaita rese. ¹⁸ Esepia, cheu ndiyai añehe vaheṛā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añehe vaheṛā. Esepia, amonguerēhi Tūpa reroya āgua yuvireco che ñehe rese, che rembiapo sui avei. ¹⁹ Ēgüe ahe poromondiisa mbahe yavai vahe apo Tūpa pīratasa pipe. Ahe ayapo Espiritu Tūpa suindar pīratasa pipe. Ipīpe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequerēhi avei co ñehesa písirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicatui aso pe piri, yepe setá rupi aso pota tēi viña. ²³ Cūrīte rumo opa amboaviye che poraviqūi co ivi rupi, iyavei opa tēi setá araviter pe piri che sosa rāgüer. ²⁴ España ve che soseve, apīta pucumira vicho pe piri yande yemboviha āgua. Iyavei pe sui che sē potase, che pītivimira peye aheve che so āgua. ²⁵ Cūrīte rumo che asora Jerusalén ve. Arasora porerecosa ahe pendar yande mboetasa Jesús rerozasar pītivii āgua. ²⁶ Esepia, ivi Macedonia pendar iyavei Acaya pendar Jesús rerozasar, ahe omonuha guarepochi yuvireco Jerusalén ve yande rivri iparaisu vahe pītivii āgua yuvireco. ²⁷ Ahe ēgüe ehi güemimbotar rupi yuvireco iyavei iya ité imboeyevī āgua yuvireco chupe ahe mbahe tupri oyeupe apo agüer rese. Esepia, yipindar Jesús rerozasar judío yuvireco vahe oicua uca co tecocuer Tūpa suindar ahe ava ndahei vahe judío yuvirecoi vahe upe. Sese iya ité imboeyevī āgua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahesa apitara vicho pe piri. ²⁹ Che amoha voi eté asose eipeve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeaísusa Espiritu ombou vahe pipe avei aporandu pēu opacatu che rese peyerōqui pīrata vaheṛā Tūpa upe che pītivii āgua co mboraviqūi rese. ³¹ Peporandu Tūpa upe, tache repi ava Jesús rerozasarēhi sui ivi Judea ve, iyavei Jerusalén pendar yande rivireta co porerecosa pisi tupri āgua avei. ³² Ahesē Tūpa oipotase, che aviharetera ayepotase pe repia, iyavei toime pītuhusa yandeu che pe piri che sose. ³³ Ēgüe tehi Tūpa güeco tupri pipe tasecoi opacatu pe rese.

16

Pablo mahenduhasa ñepeí-peí ava upe

¹ Co yande reindri Febe serer vahe, ahe oipītivii tecua Cencrea pendar Cristo rerozasar oico. ² Peipisi tupri catu yande Yar rer pipe; ahe niha yande cuaita Cristo rerozasar yande recose, iyavei peipītiviño que mbahe chupe ipane vahe rese. Esepia, ahe setá ité oporopītivii iyavei che avei eté che pītivii no.

³ Pemombehu che mahenduha Prisca upe, Aquila upe avei, ahe niha che pītivii mboraviqūi Jesucristo recocuer resendar rese yuvireco. ⁴ Ahe avei niha mbahe tēi pipe omondo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sētave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo rerozasar. ⁶ Pemombehu avei che mahenduha María upe. Ahe niha oporaviqūi iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo rerozasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei che mahenduha Urbano upe. Ahe niha yande ndugüer oporaviqūi vahe Cristo recocuer rese, che mboripar Estaquis upe avei. ¹⁰ Pemombehu avei che mahenduha Apeles upe. Ahe niha güecoñhasa sui osē tupri vahe Cristo rese oyeroyasa pipe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar rerozasar upe avei. ¹² Pemombehu avei che mahenduha Trifena

upe iyavei Trifosa upe. Ahe niha oporaviqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporaviqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asíncrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nereo upe iyavei seindri upe, Olimpás upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pipe che mahenduha mombehuse peyeupe. Opacatu Cristo reroyasar cohawe omondo avei omahenduhasa yuvireco pëu.

¹⁷ Che rivireta, peicua catu pe pãhu pendar omboyaho pota serai vahe sui. Oime ava ëgüe ehi vahe, oiti uca vahe ava mbahe tēi pipe. Esepia, ahe ndahei eté co ñehesa pe yembohesa rupi yuvirecoi. Sese evocoi nungar ava sui peyepipiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Ëgüe ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tuprii vahe; oñehe tupri ai angahu oporomohapisi aisa pipe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaheã pe mbahecuasa mbahe aviye vahe apo ãgua, ndahei mbahe tēi apo ãgua. ²⁰ Evocoiyase Tũpa güeco tupriisa pipe pihaivi Caruguar osecopipa tupri itera. Pe avei evocoiyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pëu. Ahe che pĩtivii che poraviquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pëu, che avei che mahenduhasa amondo yande Yar reroyasa pipe pëu.

²³ Omondo avei omahenduhasa Gayo pëu. Ahe sètave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu pëu, ahe tecua mbahe guarepochi apocatusar. Yande rivri Cuarto avei omondo omahenduhasa pëu.

²⁴ Aviye, yande Yar Jesucristo tape rovasa opacatu.

Pablo omboetei Tũpa

²⁵ ¡Yamboetei Tũpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tũpa omboyecua ramo vahe cheu co ivi apoëhi suive mbahe ndicuasai vahe rese. ²⁶ Cũritei rumo oyecua uca oñehe mombehúsar rembicuachía pipe Tũpa apirëhi vahe porocuaíta rupi cute. Ahe ñehesa ndicuasai vahe omboyecua uca opacatú ava upe 'toviroya sese oyeroyasa pipe yuvireco' oya.

²⁷ ¡Tũpa güeraño imbahecuá vahe yepi, ëgüe tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu p̄u. Tūpa niha, güemimbotar rupi, che poravo apóstol che reco āgua. ² Aicuachia co che ñeha p̄u, pe Jesús reroyasar peñemonuha vahe Tūpa upe tecua Corinto ve. Peicua niha pe iphapri peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri āgua, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tūpa, yande Yar Jesucristo tape rovasa pe reco tupri āgua.

Jesucristo suindar porovasasa seroyasar upe

⁴ Che, “Aviye ndeu” aheño ité Tūpa upe pe recocuer rese yepi. Esepia, Tūpa pe rovasa ité Jesucristo rese peicose. ⁵ Ēgüe ehi secocuer pipe sui Tūpa ombou opacatu pe reco tupri catu āgua, pemombehu tupri vaheṛā imbahecuasa, opacatu mbahe supi eté vahe cua tupri āgua avei. ⁶ Esepia niha, ore co ñehesa Jesucristo resendar p̄u imombehusa pipe sui pe recuñaro uca ité. ⁷ Sese ndipoi eté que porovasasa Tūpa Espiritu suindar ipane vahe p̄u yande Yar Jesucristo yevi āgua pesārose. ⁸ Tūpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe t̄i secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco āgua.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe p̄u yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe p̄u: pemboyoya catu pe pihañemoñetasa, ndapeyemboyahoi chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye t̄i; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye t̄i aipo peico. ¹³ ¡Cristo rumo vireco porombohesa ndoyaho-yaho t̄i vahe! ¿Che tie amano curusu rese pe angaipa repirā? anise, ¿che rer pipe tie peñeapiramo uca peico? ¹⁴ ¡Aviye Tūpa upe che ndopoāpiramoise! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanas r̄eta pndar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehu che poroāpiramo āgua. Ēgüe ehi rumo che cuaita ñehesa ñepisirosa resendar mombehu āgua t̄i. Iyavei ndahei ñehesa yavai catu vahe aiporu. Esepia, nañomi potai eté que chíhi co ñehesa p̄iratagüer Jesucristo curusu rese imano agüer resendar ava sui.

Cristo Tūpa p̄ratasa, imbahecuasa avei

¹⁸ Esepia, acoi ava ocañi t̄i vaheṛā upe co ñehesa curusu rese Cristo manosa resendar aviye ěgüe ehi t̄i vahe viña. Yande ip̄isiroproi yaico vaheṛā upe rumo co ñehesa vireco ité Tūpa p̄ratasa, ¹⁹ inungar Isaías rembicuachiagüer pipe aipo ehi: “Amocañira co ivi pipendar ava t̄i mbahecuasa iyavei arocuara ava yaracua vai t̄i vahe sui yaracua” ehi.

²⁰ ¿Mara ehi evocoyase co ivi pipendar ava imbahecuava vai vahe, ava-ava t̄i aracuasa cuapar avei, iyavei ñeha cua tupri ai vahe co ivi pipendar mbahe rese yuvireco? ¡Tūpa niha oseñarar evocoi nungar mbahecuasa ěgüe ehi t̄i vahe pipe! ²¹ Ēgüe ehi eté oaracuasa pipe ‘toicua eme che recocuer ava oaracuasa pipe t̄i’ oya. Yepe, “Co ñehesa Cristo resendar ěgüe ehi t̄i vahe” ehi t̄i vahe yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota t̄i mbahe poromondiisa ip̄iratá vahe iva pndar yuvireco. Griego evocoyase osendu pota t̄i ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe t̄i co ñehesa. Iyavei amove ndahei vahe judío, co ñehesa osenduse, aviye acoi ěgüe ehi t̄i vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa p̄ratasa ité, imbahecuasa avei. ²⁵ Esepia niha, ava upe, Tūpa suindar mbahe aviye acoi ěgüe ehi t̄i vahe viña. Co Tūpa suindar rumo mbahecuasa aviye catu vahe ité ava t̄i mbahecuasa sui iyavei acoi mbahe Tūpa suindar aviye nipiratai vahe ava upe viña, ahe rumo ip̄irata catu ité opacatu ava t̄i

pīratasa sui. ²⁶ Che rīvireta, peyemomahenduha catu co rese: Tūpa pe poravo, yepe pe pāhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evocoi ava imbahecua vai vahe mochi āgua. Iyavei oiporavo ava pe pāhu pendar ndoicatu tuprii vahe yuvireco ava ipīrata vahe Tūpa cuaparēhi mochi āgua. ²⁸ Oiporavo avei co ivi pipe ava remieroīro seco mbeġūemi vahe, ava seco ivi coti catu vahe pe pāhu pendar co ava seco ivaté vahe reroyi āgua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua āgua, yande reco mohivi āgua avei ‘toyuvirecoi cheu nara’ ohesave iyavei ‘ipīsiropri toyuvirecoi’ oya yandeu. ³¹ Sese inungar aipo ehi ñehesa icuachiapri arachendar pipe: “Acoi ava oyecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rīvireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañehi co ivi pipendar tēi ava mbahecua pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepiratai, aririri avei che siquiyepave pēu che sose. ⁴ Iyavei acoi añehese ñehesa pīsirosa resendar rese pēu, ndaiporui eté rumo ñehesa ivate ai vahe pe pihañemoñetasa rerova āgua. Che rumo Tūpa Espiritu pīratasa pipe añehi pēu ⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecua rese.

Tūpa oEspiritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecua ocañi tēi vahe. ⁷ Oroñehi catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vahe. ⁸ Co ivi pipendar ava mborerecua rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucui chira yande Yar seco ivate, porañete vahe curusu rese yuvireco viña. ⁹ Icuachiapri arachendar pipe aipo ehi:

“Tūpa omingatu mbahe ava guaisupar upe. Ahe rumo mbahe ndosepia vahe ité vahe yuvireco yepi, ndosendui vahe ité, iyavei ndoyemboihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ Ēġüe ehi eté, inungar opacatu ava pāhuve ndipoi eté que ñepe i vahe pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēġüe ehi avei Tūpa Espiritu güeraño ité oicua Tūpa pihañemoñetasa. ¹² Yande evocoiyase ndahei co ivi pipendar tēi espíritu yaipisi, ēġüe ehi rumo Espiritu Tūpa suindar yaipisi yaicua vahe iporerecua oporoaisusa pipe ombou vahe yandeu. ¹³ Ahe niha oromombehu Tūpa Espiritu ore mbohe vahe, ndahei ñehesa ava tēi aracuasa sui. Ēġüe orohe co supi eté vahe ñehesa Espiritu suindar oromombehu Espiritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espiritu opiha pipe, ndoipisi eté mbahe Tūpa Espiritu suindar yuvireco. Esepia, chupe evocoi mbahe aviye ēġüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducua Espiritu pipeño ité. ¹⁵ Acoi ava vireco vahe rumo Tūpa Espiritu opiha pipe oicatu opacatu mbahe cua āgua. Ndiipoi chira rumo ambuae ava ndovirecoi vahe Espiritu opiha pipe ahe va recocuer cua tupri āgua. ¹⁶ Esepia, icuachiapri arachendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rīvireta, ndapeguata tuprii Espiritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espiritu suindar pēu. Esepia, pe pītanimi nungar vite tēi pe pihañemoñetasa Cristo rese. ² Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi.

Cūrítei rumo ěgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pipendar pihañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar. ⁴ Esepia, aipo peyeño tēi, “Ore Pablo rupindar oroico”; ambuae evocoiyase, “Ore Apolos rupindar oroico” peyepye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepeí-peí mboraviqui yandeu chupe yayapo vahe. Tūpa upe ore poraviquisa pipe sui niha peroya yande Yar peico: ⁶ che rane inungar añoti vahe mbahe rāñi pe piha pipe; Apolos evocoiyase inungar imboihusar; Tūpa rumo inungar omboori vahe pēu. ⁷ Evocoiyase ndiyai peyeroya mbahe tisar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pēu nara. Sese ñepeí-peí Tūpa omboura porerecosa pe rese ore poraviquigüer rupi oreu. ⁹ Ore oroporaviqui vahe Tūpa upe. Pe evocoiyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi vīracua āgua, ěgüe ahe imombehu Cristo resendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoiyase inungar oi aposar omopuha vahe ivīracuasa harive, ěgüe ehi ahe pe monguerēhi catu pe mbohe co ñehesa rese. Evocoiyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihí, anise tacuar tēi oiguā yuvireco. ěgüe ehi aveira pe mbohesar yuvireco. Ahe ñepeí-peí rumo iya oicua tuprira pe mbohe āgua yuvireco. ¹³ Ahe iporaviqui agüer rumo ari cañise icuasa tuprira ñepeí-peí yuvireco. Esepia, ahe ari pipe yande Yar oura tata reseve ñepeí-peí pe mbohesar poraviqui agüer cua āgua. ¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoiyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? ¡Espíritu niha secoi eté yande piha pipe. ¹⁷ Oimese que ava yande pāhuve omomara vahe Tūpa rēta, Tūpa evocoiyase omboura oñemoirosa ahe ava upe. Esepia, Tūpa rēta nimarai vahe ité; yande teieté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua āgua. ¹⁹ Esepia, ava tēi aracuasa Tūpa upe ěgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ěgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pēundar ité: ²² ěgüe ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vahe, ahe niha opacatu pēu nara, ²³ pe niha Cristo pendar, Cristo evocoiyase Tūpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña. ² Acoi vireco vahe ocuaitarā, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecuara opacatu mbahe ndoyecuai vahe, iyavei omboyecuapara ñepeí-peí yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviye nde cuaita” ehira ñepeí-peí yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbatar icuachiapri rupi tupri yuvirecoi āgua’ ore yapave pēu. Pe evocoiyase, “Co mbia seco ivate catu vahe co ambuae mbia sui”

ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opatatu rumo mbahe pe rembiereco, ahe Tūpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborererucar guasu peico ore sui viña. ¡Ēgüe peye itera tarahu viña! Ahese, ore avei mborererucar oroicora pe pāhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi āgua. Sese seroïrombri oroico inungar ava imboguaiipri yucapirā. Ēgüe orohe oroico opacatu ava rovaque, Tūpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyepo imbahecua etepri vahe peico Cristo rese pe recosa pipe. Iyavei ore ndoyavii ndaseco pīratāi vahe oroico ava rembiepiave; aheseve avei rumo peyecomomirata tēi peico. Ore seroïrombri tēi oroico, pe evocoyase ava pe mboetel guasu pe rereco yuvireco. ¹¹ Cūritei ore oroicove vite ité ore rēporēhi pipe, ore husei tēi iyavei ndore turucuai eté. Ava rumo evocoyase mara-mara tēi ore rereco yuvireco. Iyavei ndorovirecoi ore rēta ité. ¹² Ore oroporaviquiño ité, oroyembogūerai tēi ipipe. Ava rumo iñehe mara-mara tēi eté yuvireco oreu; ore evocoyase oromboyevíño iñehe mbahe tupri pipe chupe. Ore reca-reca catuño ité ore momara āgua yuvireco; ore rumo oroñemosāño ité yuvireco chupe. ¹³ Iñehe-ñehe tēi ore rese yuvireco; ore rumo saisusa pipe oromboyeví iñehe yuvireco chupe. Ore rereco iti nungar tēi iyavei ore rereco inungar ava Ēgüe ehi tēi vahe yuvireco. Cūritei Ēgüe ehi viteño ité yuvireco oreu.

¹⁴ Ndahei pe mochi āgua aipo ahe icuachía pēu, Ēgüe ehi rumo pe mboaracua āgua tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pātivaisar Cristo rese pe reco āgua viña, ndaperecoi rumo setā pe yesupa. Esepia, che amombeuse niha ñehesa pīsirosa resendar pēu, ahese ramo peroya Jesucristo. Seroyasa pipe evocoyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe pāhuve oyecomboivate ai vahe. “Ndou iri chietera revo cohava yande repia” ehi yuvireco cheu viña; ¹⁹ aso pihaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pīratasa yuvireco. Ndahei chira iñehe güeraño tēi aicuara. ²⁰ Esepia, Tūpa omborererucasave, ndahei oñehe pipe tēi oporocuai, opīratasa pipe rumo Ēgüe ehi. ²¹ ¿Mbahe pīha peipota peico? ¿Peipota pīha che aso vaherā pēu che ñehe pīrata pe mboaracua āgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepeí Jesús reroyasar pāhu pendar oyemboaguasa vahe rese

¹ Ambuae mbahe, oroyand ñepeí mbahe tēi pe pāhu pendar rembiapo oroico: oime aipo osi recoyar rese secou vahe. Ahe angaipa guasu oyapo oico. Tūpa reroyasarēhi ité ndoyapoi evocoi nungar mbahe tēi yuvireco. ² ¡Pe rumo peyecomboivate ai peico! ¡Iyacatu rumo ndapeyembovihai chira evocoi nungar mbahe tēi repiase ndaí! Evocoi nungar ava iyacatu ité pemboyepēpira pe pāhu sui. ³ Yepe niha che teieté ndaicoi pe pāhuve viña, pe rese che mahenduhasa pipe rumo aicove ité pe pāhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pāhuve viña. ⁴ Acoi peñemonuhase, che avei niha aicora pe pāhuve che mahenduhasa pipe, yande Yar Jesucristo pīratasa avei secoira pe rese. ⁵ Evocoyase ahe ava timondosa Carugar povrīve secocuerai mocañi āgua. Ipipe sui iespīritu oñepisīrora yande Yar Jesucristo yevise curi.

⁶ Ndapeyecomboivate ai chira peico co mbahe tēi oimese pe pāhuve. Esepia, peicua niha co ñehesa aipo ehi vahe: “Yepe chíhimi imondosa pan mboapeposa panguā rese viña, ahe rumo oiquēpa tupri panguā rese” ehi. ⁷ Evocoi ava rembiapo ai inungar pan mboapeposa pe pāhuve. Sese pemombopa pe pāhu sui peicoēhi āgua angaipa pipe peico vaherā inungar panguā ipiasu vahe ndovirecoi vahe omboapeposa oyese. Ēgüe peye ité niha. Esepia, yande Yar Jesucristo iparaisu omano yande repirā. Ēgüe ehi ahe inungar ovesa yucapri angaipa mocañi āgua judío pieta Pascua pipe yepi. ⁸ Sese inungar judío omboetel vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco āgua, Ēgüe yahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapemborii chira ava oyemboaguasa-guasa tēi vahe, acoi ava oipotā rai vahe ambuae ava mbahe, imonda rai vahe, iyavei ava

mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua vīte vahe upendar. Esepia niha, pe yepepi āgua ñepeī reseve evocoi nungar ava sui, pesē itera co ivi pipe sui viña. ¹¹ Che niha aipo ahe icuachía pēu: ndapemborī chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyerōqui tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepeī yepe ndapecarui chietera. ¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu āgua. Tūpa ahe ava yuvirecoi vahe recocuer opara oicua coīye. Pe rumo pe cuaita ité Tūpa rese yuvirecoi vahe upe pe porandu āgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatuī pīha co tecocuer mbahe mī tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co ivi yipendar tecocuer rese peyeupe yepi! ⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua! ⁵ Che aipo ahe ité pēu pe chī āgua: ¿Ndipoimi eté vo pe pāhuve que ñepeī yaracua vahe oicatu vahe que mbahe tēi peyeupendar moingatu āgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoiya pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe raso rāgüer sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecua pipe curi! Peyembopa ucai rene chupe. Esepia, acoi ava oyemboaguasaguasa tēi vahe, mbahe rahanga upe tēi oyerōqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgüe ehi vahe yuvireco viña, cūrītei rumo opa pe angaipā imocañisa pe sui iyavei pe ipēhapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipēhapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vaherā” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. ¹³ Supi eté niha aipo ehi vahe: “Yande rembihu yande aviter upe nara, yande aviter evocoiyase yande rembihu upe nara” ehi. Coīye rumo Tūpa opara omocañi evocoi nungar mbahe. Yande retecuer rumo ndicuaītai yaguasa tēi vaherā, ahe rumo yande Yar upe nara. Yande Yar evocoiyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coīye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo āgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepeī vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirio ava yuvirecoi vahe viña, ñepeī vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoiyase ñepepiño ité.

¹⁸ Peyepepi voiño catu ava yemboaguasa-guasa tēisa sui. Opacatu ambuae angaipā ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembiapo pipe sui tēi. ¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tūpa mboetei āgua.

7

Poromboaracuasa mendasa resendar

¹ Cūrítei amboyevira pēu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rembireco, cuña avei evocoiyase tovireco oyacatu omer yuvireco. ³ Cuimbahe tomoaviye omendasa güembireco rese iyavei cuña omenda vahe, tomoaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahe avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe aviyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Caruguar pe ātoi tiētera.

⁶ Ndahe che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorā.

⁸ Iyavei ndomenda vītei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosā āgua, pemendaño. Esepia, aviye catu itera pemenda propota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahe cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahe vahe Jesús reroyasar, ahe cuña secoi potaño itese sese, evocoiyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahe vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahe vahe Jesús reroyasar, ndahe eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahe vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahe vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahe vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahe vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judíoño ité secoira. Acoi osenoise rumo, ndahe vahe judío, ahe ndoyembocircuncida ucai chira judío güeco āgua. ¹⁹ Esepia, ndahe chira que judío, anise que ndahe vahe judío yaicose aviye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve. ²¹ Pe mbiguai tēi peico vahe pe renoise Tūpa, pepihañemoñeta etepri eme evocoiya pe recosa sui pesē vahe rā rese. Peicatusé rumo, peyepipiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahe vahe mbiguai tēi peico vahe, yepe ēgüe peye viña, peroyase rumo Cristo, ahese sembiguai peico. ²³ Tūpa upe rumo perepi iteanga, sese ndiyai eté ambuae ava povrive tēi peico. ²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñatai ndomenda vītei vahe resendar rese rumo ndarecoi Yar suindar che ñehe āgua. Che rumo amondora che pihañemoñetasā yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu aviye catuño ité ndomendai vahe ēgüe ehiño tēise yuvireco viña. Esepia niha, tecocuer yavai eteanga cūrítei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahe angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vahe rā.

²⁹ Che rivireta, aipo mbahe amombehu pota pēu: ndipucuvei co ari naporai vahe yepota āgua yandeu. Sese co pipe suive tupri omenda vahe toyuvirecoi ndomendai vahe nungar yande Yar rese opihañemoñetasā pipe. ³⁰ Acoi ndovihai vahe, toyuvirecoi eme oviharēhisa pipe iyavei acoi oviharete vahe, ahe toyuvirecoi eme avei oviharetasa pipe, iyavei virocua

vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru ãgua, tipihañemoñeta eme evocoi nungar mbahe tẽi rese yuvireco. Esepia, co ivi pipendar mbahe yasepia vahe, ocañi tẽira.

³² Che ndaipotai co ivi pipendar recocuer rese tẽi pe pihañemoñeta etepri peico. Acoi mbia ndomendai vahe rumo, ipihañemoñeta catuño itẽ yande Yar rese imboviha ãgua; ³³ omenda vahe rumo ipihañemoñeta avei co ivi pipendar recocuer rese tẽi, güembireco mboviha ãgua rese avei. ³⁴ Evocoiyase ndahei ñepe opihañemoñetasa vireco. Ëgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri ãgua Tũpa upe. Cuña omenda vahe rumo ipihañemoñeta co ivi pipendar recocuer rese tẽi omer mboviha ãgua oico.

³⁵ Che aipo ahe pẽu ‘mbahe tupri pipe toyuvirecoi’ viya, ndahei mbahe yavai vahe pipe pe reco ãgua. Che aipota itẽ pe reco catuprisa pipe yande Yar upeño itẽ mbahe peyapo vaheerã pe recoetẽ pipe peico.

³⁶ Acoi ava ipihañemoñeta vahe güembirecovi rese omenda ãgua, “Aviyeteramo ayavira mbahe ichui iyavei niha osupiti itẽ imenda ãgua, sese aviye catu yamenda” ehise, toyapoño güemimbotar. Tomendaño itẽ güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda ãgua iyavei oicatu itẽ güemimbotar apo, ipihañemoñetase ñepe reseve güembirecovi rese omendaẽhi ãgua, ahe aviyeño itẽ. ³⁸ Evocoiyase acoi omenda vahe aviyeño; acoi ndomendai vahe rumo, aviye catuño itẽ.

³⁹ Iyavei acoi cuña omenda vahe, ahe ndiyai etẽ iyepepi ãgua omer sui imanõehi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tũpa Espiritu suindar.

8

Pablo õnehe tembihu mbahe rahanga upe tẽi seropovẽhepri rese

¹ Cũritei ambuae mbahe amombehura pẽu mbahe rahanga upe mbahe mimba yucapri seropovẽhepri rese. Supi etẽ aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayecomboivate ai tẽi! Yayeaisuse rumo, ahese yañepitivi catu Cristo reroya tupri ãgua. ² Supi etẽ yande, “Che aicua itẽ co mbahe” yahe tẽise que mbahe upe, ipane vite itẽ rumo icua tupri ãgua yandeu. ³ Yande rumo yasaisuse Tũpa, ahese Tũpa, “Co ava cheundar itẽ secoi” ehira yandeu.

⁴ Evocoiyase co mbahe rahanga upe tẽi seropovẽhepri mbahe mimba yucapri hu ãgua rese añehe. Yande niha yaicua co mbahe rahanga ãgüe ehi tẽi vahe co ivi pipe, iyavei oime ñepe güeraño itẽ Tũpa. ⁵ Esepia, yepe ava upe setã tũpa ivave, ivive avei viña (setã iteanga niha oime tũpa angahu tẽi, yar angahu tẽi avei). ⁶ Yande rumo yaicua ñepeño itẽ Tũpa oime, ahe niha yande Ru opacatu mbahe aposar. ¡Evocoiyase yande chupe nara itẽ yaico! Oime avei yande Yar ñepe vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipendar güecocuer vireco vahe sui ndasarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovẽhepri, ipihañemoñeta, “Co mbahe roho tũpa rahanga upe seropovẽhepri” ehi viteño yuvireco oyeupe. Ipipe sui omomara uca Tũpa rese opihañemoñetasa yuvireco. ⁸ Supi etẽ tembihu ndayande pitivi Tũpa rese yaico vaheerã. Ndahei mbahe roho husa pipe sui tẽi aviye catura yaico iyavei ndayahuse, ndahei chira mbahe tẽi catu yaico. ⁹ Pẽu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vite vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerẽhi aveira ihu uca ãgua chupe. ¹¹ Evocoiyase co pe mbahecuasa pipe pemocañi uca yande rivri Tũpa rese noviracua tupri vite vahe peico. ¡Cristo rumo omano ipisiro ãgua! ¹² Esepia, pemomarse Tũpa rese ipihañemoñetasa, ahese pe ae pemboangaipa uca Cristo amotarẽhisa pipe peico. ¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaẽhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi etẽ che aicatu avei apóstol upendar mbahe pisi ãgua viña. Esepia, che apóstol aico. Supi etẽ che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co

secoi” peye voño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pëu.

³ Ahe ñehesa amboyevi tupri ava che recoña potasar upe yuvireco yepi. ⁴ Iya ité che remihura pisi, che iguarã avei pe sui viña. ⁵ Iyavei inungar ambuae apóstol víraso ité güembireco oyeupi yuvireco yepi, Jesús rivireta avei ãgüe ehi yuvireco, ãgüe ehi avei Pedro, ãgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove ãgua? ⁷ Esepia, sundao nomboepii sundao güeco ãgua, ahe rumo oporaviquisa repri oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tã aipo ahe pëu. Esepia niha, Moisés porocuita pipe avei aipo ehi yandeu: ⁹ “Pemondo eme tivi yuru rese mbahe icaruëhisa mbahe rãhii oicambese yuvireco pëu” ehi. Supi eté co Tüpa aipo ehi vahe ndahei tivi upeño. ¹⁰ Yande reco tupri ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhii, oyoya osãro mbahe oipisi vaheã oporaviquisa sui oyeupe nara yuvireco yepi. ¹¹ Evocoiyase ore avei oroñoti Tüpa Ñhengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi ãgua oyeupe nara yuvireco pe sui. Evocoiyase ore avei niha orocaitu mbahe pisi ãgua pe sui ore poraviquisa pipe viña.

Ore rumo ãgüe ndorohei eté. Esepia, ore oroñemosaño ité ‘tiñhe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tüpa upe seropovëhepri tũparo rocarve yuvireco yepi. ¹⁴ ãgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pëu yepi. Ndahei ‘tombou mbahe yuvireco cheu’ che yapave aipo aicuachía imondo pëu. Che rumo evocoi nungar mbahe rese ayembovihanõ ité. ¡Yepe che yucapri tãira tieporëhi viña, ndaporandui chietera rumo mbahe rese pëu! Esepia, namocañi potai eté co che yembovihanõ cheyesui.

¹⁶ Che rumo amombehuse co ñehesa písirosa resendar ava upe, ndiyai ayecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña! ¹⁷ Tüpa ndache cuaise oñhe mombehu ãgua viña, che rumo che querëhisa pipe amombehuse, ahese apisira Tüpa suindar porerrecosa. ãgüe ndahei rumo. Esepia, Tüpa che cuaisa pipe niha amombehu. ¹⁸ Ndaporandui mbahe rese pëu amombehuse co ñehesa písirosa resendar, ipipe ayembovihanõ ahe che vihasa porerrecosa nungar cheu. Yepe aicatu mbahe rese che porandu ãgua viña, che rumo ãgüe ndahei eté.

¹⁹ Yepe che ndahei ava povrive tã aico viña, che rumo che remimbotar rupi opacatu ava rembiguai nungar ayeereco ‘tasetã catu ava iquerëhi vahe Cristo reroya ãgua’ che yapave. ²⁰ Esepia, aicose judío pãhuve, secocuer rupi aicoveño Yar upe imonguerëhi catu ãgua yuvireco. ãgüe ahe ité, aicose ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua. ²¹ Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, ãgüe ahe tupri avei imonguerëhi ãgua yande Yar upe vichico. Ndahei rumo Tüpa porocuita mboyeroyaëhisa pipe aico. Esepia, Cristo porocuitavrive che recocuer. ²² Iyavei no, aicose ava yande Yar ndoviroya tupri vitei vahe pãhuve, secocuer nungar tupri avei aico Yar upe imonguerëhi catu ãgua. ãgüe ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetã catu co ñehesa písirosa reroysar yuvireco’ che hesa pipe, ‘taipisi avei co porovasasa oime vahe co ñehesa reroysa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerrecosa yepi. Evocoiyase inungar co ivava catu vahe, ãgüe peye avei pe recocuer pipe Tüpa porerrecosa pisi ãgua peico. ²⁵ Iyavei opacatu oyemoingatu vahe oguayí ãgua oñearo tupri opacatu mbahe tã sui oyemomaraëhi ãgua yuvireco. Ahe ãgüe ehi porerrecosa ndipocopii vahe pisi ãgua tã yuvireco. Yande rumo yayemomborarar porerrecosa apirëhi vahe pisi ãgua yaico. ²⁶ Evocoiyase che avei, ndahei ava oyahuva-huva tã vahe nungar aico Tüpa remimbotar apo ãgua iyavei che ndaicoi ava iguayí tã vahe nungar. ²⁷ Che rumo mbiguai nungar che retecuer areco, amboyeroya uca pihanemoñeta tuprisa upe. Esepia, ndaipotai ambuae ava mbohe pare imombopri tã nungar guayisa sui che yereco ãgua.

10

Ndiyai aracadendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pitu Tüpa imboguata agüer rese. Iyavei para guasu Pira vahe

avei osasa opacatu yuvireco aracahe. ² Ēgüe ehi eté opacatu oguatase mbahe pítuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata āgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarā yuvireco. Ahe ita rumo inungar Cristo secoi opacatu iguasata rupi yuvireco. ⁵ Yepe Ēgüe ehi Tūpa opacatu yande ramoi judío upe viña, setá iteangar rumo ava ipāhu pendar ndahei aviye vahe ipiha rupi yuvireco. Ipipe sui opa omano ivi iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe āgua ‘toipota rai eme mbahe-mbahe tēi inungar ahe ava yuvirecoi’ oyapave yandeu. ⁷ Sese yande ndayamboetei chira mbahe rahanga tēi, inungar ahe ipāhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropūha, oyembovihanō pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove Ēgüe ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoāha-āha tēi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe Ēgüe ehi yuvireco. Ipipe sui Tūpa ombou güembiguai ava yucasar iya sui ahe ava yucapa āgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu. ¹² Sese yande “che aico tupri ité Tūpa rese” vahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoāhasa rumo oyoya tupri ité ambuae ava recoāhasa rese. Pe rumo peyeroyāñō itera Tūpa rese, ahe niha oicua pe yemoviracuasa, ñoñocuai chira tecoāhasa imbou pēu. Acoi mbahe tēi oimese pe recoāhase, Tūpa ombou voñora pīratasa evocoi mbahe tēi sui pe sē āgua, chupe pe ñemosa āgua.

¹⁴ Sese che rivireta, che rembiaisu, peyepēpi mbahe rahanga mboeteisa sui. ¹⁵ Ava niha peico pesenducua vaherā mbahe, evocoiyase peporandu co che remimombehugüer rese peyeupe icua tupri āgua. ¹⁶ Yaihuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suvi pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovēhepri, ahe evocoiyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuvēhe mbahe caruguar upe tēi yuvireco yepi. Ndahei rumo Tūpa upe nara ité Ēgüe ehi yuvireco. Che evocoiyase ndaipotai eté caruguar upe nara tēi Ēgüe peye vaherā peico. ²¹ Peihuse rumo yande Yar upendar igua, ndiyai peihu avei caruguar upendar igua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pítivii catu Cristo rese yande reco āgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasata momaraēhi āgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbocarū āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pīhañemoñetasata momaraēhi āgua. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehuhi chira ahe mbahe roho. Ēgüe peyera pēu inombehusar reroco meguāñēhi āgua, ava pīhañemoñetasata momaraēhi āgua avei. ²⁹ Supi eté che añehe co ambuae ava pīhañemoñetasata rese, ndahei pe pīhañemoñetasata rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava piha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reoñora yuvireco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo āgua opacatu ava upe nara.

Ndahei cheyeupeño mbahe tupri aseca, ambuae ava upe avei mbahe tupri aipota iñepisiro água yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroysar ñemonuhasave yuvireco yepi

² Che rivireta, che, “Aviye ité yuvirecoi” ahe pëu yepi che rese pemahenduha vitese iyavei peguataño vitese che opombohe vahe agüer rupi. ³ Che rumo aicua uca tupri pota pëu, Cristo niha secoi ñepepe-peu cuimbahe cuaisar, cuimbahe evocoyase güembireco cuaisar secoi. Ëgüe ehi avei Tüpa Guahir Cristo upe. ⁴ Acoi cuimbahe Cristo upe ñemonuhasave oäca ndrur ndosequiise oyerure água, anise Tüpa Ñehengagüer mombehu água, ahe Ëgüe ehi güerecar Cristo mboeteiëhisa pipe. ⁵ Iyavei acoi cuña ndoyopiise oäca oyerocuí água, anise Tüpa Ñehengagüer mombehu água, ahe Ëgüe ehi omer mboyeroyaëhisa pipe. Ahe cuña evocoyase ndoyavií oñeapipa tupri vahe. ⁶ Acoi cuña ndoyopi potaise oäca, tayapecãraisa tupri. Ochise rumo oapecãrai água, evocoyase toyopiño oäca sereco. ⁷ Cuimbahe rumo ndoyopi chira oäca sereco. Esepia, ahe Tüpa rahanga ité secoi iyavei iporañetesa omboyecua ité oyese. Cuña rumo omboyecua omer recouer oyese yuvireco. ⁸ Esepia, Tüpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tüpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oäcapisa omer mboyeroysa mboyecua água omahese Tüpa rembiguai eta yuvireco sese. ¹¹ Yande, yande Yar reroysar yaico vahe co tecouer rese, yañepitiví oyera yaico. Evocoyase cuimbahe ndoicatuí cuña porëhi; cuña avei ndoicatuí cuimbahe porëhi yuvireco. ¹² Esepia, yepi supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tüpa suindar yuvirecoi.

¹³ Evocoyase peyapisaca tupri co rese: ¿Iya pñha cuña noñeacapií vahe oyerure Tüpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi água. ¹⁶ Acoi ava iñehe-ñehe tēi pota vahe co tecouer rese, toicua ore ndoroicoi ambuae reco pipe. Iyavei opacatu ambuae Jesús reroysar Ëgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndoicatuí eté, “Aviye tupri yuvirecoi” che he água pëu. Esepia, aipo pe ñemonuhasave, mbahe tēi eté aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei água pe pihañemoñetasa ndahoyoyai pipe peico. Amove ayanduse pe rerãcua, aroya ité. ¹⁹ ¡Iya ité revo pihañemoñetasa ndahoyoyai vahe reime água pe pãhuve Jesús reroysar supí tupri vahe cua tupri água! ²⁰ Peñemonuhase pe pihañemoñetasa ndahoyoyai vahe pipe pe caru água, ndahei yande Yar rese pe yemomahenduhaseve Ëgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tēi yuvireco; ambuae rumo pe pãhu pendar aipo oyembosavaipoño yuvireco. ²² Pereco niha pe rēta aheve pe caru água iyavei pe ihu água. Pe rumo pe reco pipe opa peroïro ambuae Jesús reroysareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pëu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pëu: ahe pñtu pipe acoi Jesús mboguaisar opisi água renonde, ahe oipisi pan. ²⁴ “Aviye ndeu” ohe pare Vu upe, ombohimbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco água. Ëgüe peyera che rese pe mahenduhasa pipe peico” ehi. ²⁵ Ëgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pëu Tüpa oyapora mbahe ipiasu vahe pe recorã. Che ruví pipe rumo yaposara. Evocoyase co ari pipe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ëgüe peyera iyeví rãro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tēi vahe, yuviroiñuño tēi vahe avei Yar mboeteiëhiseve, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi. ²⁸ Sese tipihãñemoñeta rane oyacatu güecocuer rese ava co pan hu água renonde, oihu água renonde avei co uva ricuer yuvireco. ²⁹ Esepia, acoi pe yemomahenduhãhiseve co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setã pemaheasi, oime setã nipirata iri vahe avei pe

pāhuve, oime avei omano vahe pe pāhu pendar. ³¹ Yande pīhañemoñeta tuprise rumo yande reco āgua rese, yande Yar evocoiyase nomoime chira mbahe tēi yandeu evocoiya yande recosa pipe. ³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri āgua rumo ēgüe ehi yandeu, ndahei yande cañi āgua opacatu ava viroyasarēhi reseve.

³³ Sese, che rivireta, acoi peñemonuhase pe yemomahenduha āgua yande Yar rese, peñearo ranera oyoya guasu pe caru āgua. ³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhaseve, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pēu.

12

Mbahecuasa Tūpa Espiritu suindar

¹ Che rivireta, che aicua uca pota pēu co mbahecuasa resendar ñepeí-peí pēu Espiritu omondo vahe.

² Pe niha cūrítei peicua tupri ité yipindar Tūpa rese peicoēhi vitese, peyembopa uca mbahe rahanga ēgüe ehi tēi, noñehei vahe upe peico. ³ Sese, che aipotā peicua acoi ava iñehe mara Jesús ype ndahei Tūpa Espiritu pīratasa pipe ēgüe ehi. Iyavei ava ndoicatui chira, “¡Jesús che Yar secoi!” ohe āgua opiha pipe Espiritu Santo ndovirecoise.

⁴ Oime setā ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeíño ité imondosar secoi. ⁵ Setā mbahe avei oime mbahe yayapo vaherā yande Yar upe. Ahe yande Yar rumo ñepeíño ité secoi. ⁶ Iyavei setā oime ambuae mbahe Tūpa oyapo vahe yande rese opīratasa pipe, Tūpa rumo ñepeíño ité secoi. Ahe oyapo opacatu co mbahe ñepeí-peí yande rese. ⁷ Ahe omboyecua yande Espiritu rerecosa ñepeí-peí yandeu opacatu yande reco tupri āgua. ⁸ Espiritu pīratasa pipe Tūpa omondo ñepeí viroyasar upe iñehe āgua aracuasa rese iyavei ambuae upe omondo iprombohe tupri catu āgua ombahecuasa pipe. ⁹ Ambuae upe evocoiyase omondo oyese yeroya tupri catu āgua oEspiritu pipe sui avei. Iyavei ambuae upe omondo opīratasa imbaheasi vahe mbogüera āgua. ¹⁰ Ambuae oipisi pīratasa mbahe poromondiisa oyapo vaherā yuvireco. Ahe ichui avei vireco ambuae ava omombehu vaherā ñehesa Tūpa suindar yuvireco. Ambuae upe Tūpa omondo mbahecuasa espíritu naporai vahe iyavei Espiritu supi tupri vahe cua tupri āgua. Ambuae evocoiyase ichui avei oicatu ñehesa ndicuasai vahe Tūpa suindar pipe oñehe āgua. Ahe ichui avei ambuae oicatu ahe ñehesa ndicuasai vahe mombehu tupri āgua ava upe. ¹¹ ēgüe ehi Espiritu ñepeíño ité güemimbotar rupi omondo ñepeí-peí yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeíño ité yande recocuer

¹² Inungar yande retecuer resendar setā mbahe oime viña, ahe rumo ñepeíño ité; ēgüe ehi avei Cristo. ¹³ ēgüe yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeí vahe nungar yande reco āgua Espiritu ñepeí vahe pipe. Ahe ñepeí Espiritu avei opa yaipisi.

¹⁴ Supi eté yande rete resendar ndahei ñepeí mbahe, setā rumo mbahe. ¹⁵ Iyavei yepe que yande pí revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasandui chietera evocoiyase mbahe viña. Anise, yande rete yapisacuar pāve tēise, ndayasētui chietera evocoiyase mbahe viña. ¹⁸ Tūpa rumo ñepeí-peí yande rese mbahe omondo senara rupi tupri güemimbotar rupi. ¹⁹ Yande opacatu ñepeí ava rete resendar nungar pāve tēise, ndahei evocoiyase opacatu tupri ava rete nungar yaico. ²⁰ Supi eté yepe setā mbahe yande rete rese, ñepeíño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ēgüe ere tēi vahe eico!”; anise que yande āca avei, “¡Nde ēgüe ere tēi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboycuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopii vaherā. ēgüe ehi Tūpa yande rete resendar mbahe imoingatu tupri. Evocoiyase yande rete resendar mbahe ndayasaisu tuprii vahe imboeteipri catu secoi. ²⁵ Tipo eme pīhañemoñetasa ndoyoyai vahe pe pāhuve. Oyoya pehañeco tupri ñepeí-peí peyese peico. ²⁶ Evocoiyase que ñepeí yande pāhu pendar upe mbahe tasise, opacatu ambuae upe avei tasi; anise que ñepeí imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ēgüe peye ité ñepei-peí chupendar ité peico. ²⁸ Ēgüe ehi Tüpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu água, ichui ambuae upe iporombohe água, ipare ambuae mbahe ndayasepiai vahe apo água, iyavei ambuae ava imbaheasi vahe mbogüera água, ambuae ava pítiviásar tasecoi, ambuae ava recouer prerogata tupri água tasecoi, ambuae ava evocoiyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tüpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco, ³⁰ ndahei opacatu vireco pĩratasa oporombogüera água yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatui avei oicua evocoi ñehesa renducua uca água ambuae ava upe yuvireco. ³¹ Peseca ru Espĩritu suindar mbahecuasa aviye catu vahe peyeupe nara.

Yembohesa yande poroaisu água resendar

Che rumo amombehura tecocuer aviye catu vahe pëu.

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tüpa rembiguai ñehe pipe avei viña, ndayasaisuise rumo ava ipipe, yande evocoiyase ēgüe vahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ēgüe vahe tēi yaico. ² Iyavei yepe yamombehuño tēise Tüpa suindar ñehesa ou vahe yandeu viña, iyavei yepe yaicuae mbahe opacatu icuapirēhi Tüpa suindar yaico, yarecose avei yande aracuasa opacatu yandeyese, iyavei yepe yande Tüpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoiyase ēgüe vahe tupri tēira yaico. ³ Iyavei yande mbahe opacatu yareco vahe yamboyo-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipipe yaico, ndayande pítivi eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosano opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tüpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa. ⁹ Esepia niha, yaicua raimi tēi mbahe iyavei chíhi raimi tēi yamombehu Tüpa Ñehengagüer. ¹⁰ Acoi ouso rumo oicuapa tupri vahe mbahe, ahese ndahei iri chira yaicua raimi tēi vahe yaiporura.

¹¹ Esepia niha, chíhivahe vite yande recose, yañehe, yandepihañemoñeta, yasenducua mbahe chíhivahe nungar; yacuacuase ité rumo cute, yaseyapa chíhivahe yande reco agüer. ¹² Cūrítei yande ndayasenducua tuprii Tüpa resendar mbahe, inungar acoi yepiasa pipe yasepia hãvomi tēi que mbahe; oyeovai eté yaicose rumo, yasenducua tupri catu itera mbahe evocoiyase. Cūrítei rumo yaicua raimi tēi mbahe Tüpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vahe rã, ahe: Tüpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catu vahe ité ambuae sui yandeu, ahe yeaisusa.

14

Yaseca catura Tüpa suindar ñehesa mombehu água

¹ Peseca catu pe yeaisu tupri água peico; aheseve avei peipotara mbahecuasa Tüpa Espĩritu remimbou. Ichuindar ñehesa mombehu água rese catu ité rumo peicora. ² Esepia, acoi ava oñehe vahe ñehesa ndayaicuai vahe pipe, Tüpa upe ité evocoiyase oñehe; ndahei ava upe tēi oñehe. Esepia, ndipoi eté ava iñehe renducuar. Ahe rumo oñehe mbahe ndicuasai vahe rese oespĩritu pipe. ³ Acoi ava omombehu vahe rumo Tüpa suindar ñehesa yasenducua vahe pipe, ahe oipítivií ambuae ava Tüpa rese iyeroya água, oporomonguerēhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tüpa rese opihañemoñetas. Acoi ava omombehu vahe rumo Tüpa suindar ñehesa icuapri ité, ahe ombopihañemoñeta catu Tüpa rese Cristo reroyasar yuvirecoi vahe.

⁵ Yepe aipotara opacatu pe ñehe água ñehesa ndayaicuai vahe pipe pëu viña, aviye catu rumo pemombehura Tüpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri água, ahese aviyeño oñehe Jesús reroyasar rovaque. Ipipe sui ipihañemoñeta catura Tüpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pëu, ndapesenducuai chira che ñehe viña. Amombehuse rumo Tüpa oicua uca vahe cheu que mbahecuasa supi tupri vahe resendar, anise que ñehesa Tüpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbí, arpa avei. Esepia, ndoyoya tupriise iñehegüer yuvireco, ndayasenducuai eté evocoiyase mbahe-mbahe sapucaisa osáha yuvireco. ⁸ Anise co inungar mimbí nomoñehe tupriise vavasave nara yuvireco viña, ndipoi chietera que ava oyemoingatu voi vahe rá ovava água viña. ⁹ Egüe peye avei niha peico peñehese ava upe ñehesa ndayasenducuai vahe pipe, ahe evocoiyase osenduño tēi, ndosenducuai eté rumo pe ñehe yuvireco. ¡Evocoiyase peñeheso tēi eté! ¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoiyase inungar ambuae tecua pendar tēi yaico vahe chupe; yandeu avei evocoiyase ahe ava inungar ambuae tecua pendar tēi yuvirecoi vahe. ¹² Pe niha peipota ité pereco vahe rá mbahecuasa Tüpa Espíritu suindar yepi. Sese peporandu catu mbahecuasa Espíritu suindar rese opacatu Jesús reroyasar pítivi água Tüpa rese yuvirecoi tupri catu vahe rá.

¹³ Sese acoi ava oñehe vahe ñehesa ndayaicuai vahe pipe, toporandu rane Tüpa upe ambuae ava upe senducua uca tupri água rese. ¹⁴ Esepia, acoi yayeroquiño tēise Tüpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoiyase? Yayeroqui yande espíritu pipe, yande aracua pipe avei. Yasapucaira yande espíritu pipe, yande aracua pipe avei no. ¹⁶ Esepia, acoi Tüpa upe, “Aviye ndeu” yahese yande espíritu pipe güeraño, evocoiyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviye ra Tüpa upe viña, ambuae ava rumo osenduse, noipitivi chietera Tüpa rese imbopihañemoñeta catu água senducuañhi pipe. ¹⁸ “Aviye ndeu” ahe Tüpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vahe rá moviromi tēi ñehesa yasenducua vahe ava mbohe água setá ñehesa ndicuasai vahe pipe che ñehe rägüer sui.

²⁰ Che rivireta, pepihañemoñeta eme chñihvahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoñhi água. ²¹ Porocuaíta resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoiyase co ñehesa ndayaicuai vahe pipe oñehese ava Tüpa pīratasa pipe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he água. Ndahei rumo ava Jesús reroyasar yuvirecoi vahe upendar. Ñehesa Tüpa suindar senducupri yamombehuse rumo, ahe, “Co supi tupri vahe” he água Jesús reroyasar yuvirecoi vahe upe; ndahei ava seroyasarēhi yuvirecoi vahe upendar. ²³ Evocoiyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiques pe pāhuve Jesús reroyasarēhi ndosenducuai vahe Tüpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pëu. ²⁴ Opacatu rumo peñehese Tüpa suindar ñehesa yasenducua vahe pipe, yuviroiques evocoi nungar ava yuviraso pe pāhuve, ahe ae evocoiyase, “Supi eté ayavi che recocuer Tüpa rovaque” ehira pe ñehe renduse yuvireco. ²⁵ Egüe ehira opihañemoñeta rai ndoyecuai vahe imborpōrēhipa uca oyeupe pe ñehe rendu ramosa yuvireco. Ipipe sui omboeteira Tüpa yuvireco. Ahese, “Supi eté catu Tüpa ité pereco peyese” ehira yuvireco pëu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhasave, oime pe pāhu pendar osapucui pota vahe sapucaisa Tüpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tüpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu água yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirio

güeraño yuvireco, anise que mbosapi ñepepepe rupi; ñepepepe evocoiyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca água, ndiyai ahe oñehera yuvireco pe ñemonuhasave; oyeupeñomi evocoiyase ahe oñehera ipipe yuvireco Tüpa upe. ²⁹ Ègüe peye tupri aveira pemombehuse Tüpa suindar ñehesa ambuae ava upe, peñehera ñuviriomi, anise mbosapi. Ambuae evocoiyase pe pâhu pendar oyapisaca tupri sese yuvireco ‘¿supi eté pîha?’ ohesave. ³⁰ Que ñepepepe oñehere vites Tüpa oicua ucase mbahe ambuae ava upe, topituhuño yipindar oñehere vahe, ambuae evocoiyase toñehere pëu. ³¹ Evocoiyase ègüe peyera peñehere ñepepepe opacatu ambuae osendu vahe mbohe água iyavei imonguerêhi catu água. ³² Acoi omombehu vahe ñehesa Tüpa suindar, ahe oicatu oñehere mombituhu água. ³³⁻³⁴ Esepia, Tüpa seci mbahe aviye vahe aposar, ndahei ndoyembohe catui vahe.

Ndiyai cuña upe iñehere água pe ñemonuhasave. Esepia, ègüe ehi avei opacatu ambuae Jesús reroyasar ñemonuhasa rupi yuvireco. Evocoiyase ndiyai eté aheve iñehere água yuvireco chupe. Iyacatu rumo ahe imboyoyapri yuvirecoira omer upe Tüpa porocuita rupi. ³⁵ Oicua potase que mbahe, iya omer upe oporandura güëtave yuvireco. Esepia, cuña upe ndiyai eté iporandu água mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tüpa Ñhengagüer ava upe peico, ndahei avei pëuñomi ou Tüpa suindar ñehesa. ³⁷ Acoi que pe pâhuve oimese “che Tüpa Ñhengagüer mombehisar acoi” ehiño tēi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pëu, ahe yande Yar porocuita resendar. ³⁸ Ahe ndoyapisaca potaise rumo che ñehere rese, iñehere rese evocoiyase ndapeyapisacai chira.

³⁹ Sese, che rivireta, peyemonguerêhi catu Tüpa suindar ñehesa icuapri vahe mombehu água peico. Ndiyai rumo ndapeipotai ambuae ava upe ñehesa ndayaicuai vahe pipe iñehere água. ⁴⁰ Peyapora rumo opacatu mbahe ñepepepe pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa písirosa resendar pëu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisiro peico peyemoviracuase sese. Ègüe ndapeyese rumo, peroya tupri tēi.

³ Acoi ñehesa aipisi vahe, opa uca aicua pëu. Esepia, ahe aviye catu vahe: Cristo omano yande angaipa repirã Tüpa Ñhengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setã catu vahe viroyasar upe. Evocoiyase oyoya guasu osepia yuvireco. Setã vite rumo sepiasarer yuvirecove vite cüritei; amove rumo ambuae opa omano yuvireco. ⁷ Coiye oyemoporêhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoiyase che ipá oha vahe aico seroya água. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco água viña. Esepia, che yipindar seroyasar aseca-seca catu vahe maramara tēi sereco água. ¹⁰ Che rumo apóstol ité aico. Esepia, Tüpa oyapo mbahe aviye vahe ité cheu; che rovasa oico. Evocoiyase che recocuer osecuãro ité sereco. Ichui che aporaviqui catu ité opacatu ambuae apóstol sui. Ndahei rumo cheyusi tēi ègüe ahe vichico, Tüpa rumo oporovasasa pipe seci che rupi. ¹¹ Ndapepifañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñetai catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pëu. Oime rumo amove pe pâhu pendar, “¿Maha aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoiyase ndocuerayevii chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoiyase ègüe ehi tēi erista viña. Iyavei pe yeroyasa Cristo rese ègüe ehi tēi aveira viña. ¹⁵ Acoi ègüe ehise ité rumo viña, ore avei evocoiyase oroñeheno tēi etera Tüpa resendar ñehesa rese oroico viña. Esepia, “Tüpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tüpa nombogüerayevii chiaveira Cristo viña. ¹⁶ Ègüe ehi eté, acoi omano vahe ndocuerayeviise yuvireco viña, Cristo avei evocoiyase ndocuerayevii chietera viña; ¹⁷ Tüpa rese pe yeroyasa evocoiyase

ĕgũe ehi tēi vahe itera viña; angaipa pipe viteño tēi evocoiyase pe recocuer viña. ¹⁸ Iyavei acoi ĕgũe ehise ité viña, evocoiyase omano vahe Cristo reroyasar, ahe avei ocañi tēira viña. ¹⁹ Ndiipoise yasāro vaheṛā Cristo suindar mbahe yamanose, yande evocoiyase imboapari tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe. ²¹ Esepia, ñepei ava rembiapo sui oime manosa yandeu. Evocoiyase ñepei ava rembiapo sui avei yacuerayevira. ²² Esepia, inungar acoi Adán rembiapo ai sui ava opacatu omano yuvireco, ĕgũe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepei-pei yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. ²⁴ Ahese oura ari ipa vahe cute. Yipindar rumo Cristo omocañipara opacatu seco pīrata ĕgũe ehi tēi vahe. Ipare omondora opovri pendar Vu Tūpa upe. ²⁵ Ahe rane ité rumo opacatu oporocuaira oico acoi Tu opase voi eté omondo opacatu yamotarēhimbar ipovrive. ²⁶ Ahese ipa manosa opa itera. ²⁷ Esepia, Tūpa osecopi opacatu mbahe imondo ipovrive, “Opacatu ité mbahe secopipi?” ehise. Ndahei rumo Tu Tūpa avei secoi ipovrive. Esepia, Tu ité opacatu mbahe osecopi imondo ipovrive. ²⁸ Evocoiyase, opase mbahe imondosa ipovrive, ahe ae evocoiyase oyemondora Vu Tūpa povrive. Tu evocoiyase secoira ivate catu vahe opacatu mbahe sui.

²⁹ Ndiipoise omano vahe cuerayevi āgua yuvireco viña, ĩmbahe rese pīha evocoiyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayeviise yuvireco viña, ĩmahera ru evocoiyase ahe ava oñeapiramo uca chupe yuvireco? ³⁰ Iyavei ore no, ĩmahera ru evocoiyase oroyemondora mbahe tēi upe ari rupi viña? ³¹ Supi eté, che rivireta, ari yacatu aviye che amano vaheṛā opacatu co mbahe tēi sui. Ahe pipeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayeviise rumo yuvireco viña, evocoiyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe pī peicose, ahe evocoiyase virovava pe reco tuprisa” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pāhu pendar oime ndoicuai vahe ité Tūpa yuvireco. Che aipo ahe ité pēu ‘toyuvinochi che ñehese osenduse yuvireco’ viya.

Yande retecuer cuerayevisa resendar

³⁵ Aviyeteramo pe pāhu pendar oimera oporandu vahe: “ĩMara ehira pīha omano vahe ocuerayevi irise yuvireco coiyē? ĩMara ehi angahura pīha setecuer ahese yuvireco?” ehira yuvireco oyeupe. ³⁶ ĩPe aipo peye-peye tēi peico! Esepia, mbahe rāhii yañotise, ituyu rane ité sori āgua. ³⁷ Yañotise mbahe, sāhii rane ité yañoti; ndahei ihi opacatu reseve yañoti. ³⁸ Ipare rumo Tūpa omondo ahe mbahe rāhii upe ihiguā ĩgemimbotar rupi, iyavei ambuae mbahe rāhii yacatu omondo ihiguā. ³⁹ Ndahoyoyai rumo que ñepei mbahe miti hi ambuae mbahe miti hi rese. Ēgũe yahe avei yande yaico vahe ambuae ité yande rete mbahe mimba sui; vīrai rete ambuae ité iyavei pira rete ambuae tēi no. ⁴⁰ Ēgũe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese. ⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepei yasitata ambuae yasitata rese ndahoyoyai avei sendigüer yuvireco.

⁴² Ēgũe ehi aveira niha omano vahe cuerayevisa; yañotise sehögüer, ahe ituyu vaheṛā. Ocuerayevise rumo ndituyu iri chietera; apirēhi vaheṛā ité secoira. ⁴³ Tehögüer ñotimbrī nimomburusai vahe; coiyē ocuerayevise rumo, imboeteipri ité secoi. Acoi ava rehögüer oñoti vahe yuvireco, ñipirata iri eté oico, coiyē ocuerayevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co ivi pipendar tēi setecuer. Ocuerayevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri arachendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua. ⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu. ⁴⁷ Ēgũe ehi yipindar ava ivi sui yapopri, ivi rese nara ité icuaita oico; coiyē catu ava ou vahe evocoiyase iva pendar. ⁴⁸ Inungar yipindar ava ivi suindar, ĕgũe ehi avei opacatu ava ivi suindar tecovesa

rereco yuvireco. Iyavei inungar Jesús iva suindar; ěgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūrítei Adán nungar tupri yaico; ěgüe yahe aveira yande Jesucristo iva pendar nungar tupri yaico curi.

⁵⁰ Che rívreta, co mbahe amombehu potami pëu: acoi ava upe güetecuer reseve, ndiyai eté seique água ivave Tüpa mborerecuasave. Esepia, co yande rete ocañi tēi vaheřá, ndoipisii chira tecocuier apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbí moñehese voi yande resapihara inungar yande resapiqui vahe, ěgüe ehira secuñarosapa yande rete. Aheseve avei omano vahe ocuerayevipara apirēhi vaheřá ité yuvireco; yande evocoiyase nayamano vitei vahe, opaño tēira yande rete secuñarosa. ⁵³ Esepia, co yande rete ocañi tēi vaheřá, ahe yande rete niha opara oñecuñaro apirēhi vaheřá yuvireco. ⁵⁴ ěgüe ehise yandeu, ahese ramo osupitira Tüpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano água. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuaíta aracahendar evocoiyase ombou pírátasa angaipa upe angaipa aposar mocañi uca água. ⁵⁷ Che rumo, “¡Aviye ndeu!” ahe Tüpa upe. Esepia, ahe ombou angaipa recopi água yandeu yande Yar Jesucristo rembiapo sui.

⁵⁸ Sese, che rívreta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ěgüe ehi tēi vahe.

16

Porrecosa Jesús reroyasar pítivii água resendar

¹ Iyavei co guarepochi monuha água iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui repri sui yapocatu água. Eipeve che yepotase, ndapeyemañeco iri chira guarepochi monuha água rese peico. ³ Evocoiyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoiyase ahe yuvirasora che rupi.

Pablo ipihañemoñeta oguata água rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pírive ité mbahe porañehi che mombitañora. Ipare pe che pítiviñomira peipeve sui ambuae tecuave che so água rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cūrítei apitaño vitera cohave Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohave, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepepe yepe sepia potañehisar yuvireco, iya rumo peipítivii catura che piri iyepota tupri água rese. Esepia, che iyavei ambuae Jesús reroyasar rese orosáro ité iyepota água oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūrítei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosaño catu pe cuaita upe. Peicoveño itera Tüpa pírátasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rívreta, pe peicua Estéfnas opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoiyase che apita peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pāhu pendar Estéfnas, Fortunato iyavei Acaico cohavé oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco. ¹⁸ Ahe che monguerēhi catu yuvireco, ěgüe ehi avei revo pëu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pẽu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sêtave yuvireco, ahe avei ombou omahenduhasa yande Yar rer pipe yuvireco pẽu. ²⁰ Opacatu Jesús reroyasar coha pendar avei omondo omahenduhasa yuvireco pẽu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pẽu.

²² Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi. ²⁴ Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.

IMONŪVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tüpa reroyasar ivi Acaya rupindar avei. Che Pablo, Tüpa remimbotar rupi Jesucristo apóstol aico. Aicuachía che ñehe pëu. Co yande rivri Timoteo avei omondo omahenduhasa pëu. ² Tapeipisi catu yande Ru Tüpa, yande Yar Jesucristo porovasasa avei pe reco tupri ägua.

Pablo paraisu agüer resendar

³ Yamboeteiño itera yande Ru Tüpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha ägua yepi. ⁴ Ahe niha yande mbovihaño opacatu yande paraisusa pipe, yande avei evocoiyase yaicatura ava iparaisu vahe mboviha ägua yuvireco. Ègüe ehi eté Tüpa imbou vihasa yandeu, ahe avei yande yamondora yuvireco chupe. ⁵ Esepia, inungar Cristo imombaraisupri secoi, ègüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha ägua ‘toñepisiro yuvireco’ ore yapave. Iyavei Tüpa ore mboviha pe mboviha ägua avei. Supi evocoiyase pe peñemosañora mbegüe rupi ore paraisu agüer nungar tupri pe recose. ⁷ Ore oroyeroya ité Tüpa pe pítivi ägua rese. Esepia, oroiuca ore paraisu agüer nungar tupri peico, ègüe peye avei peipisi ore vihasa Tüpa suindar.

⁸ Che rivireta, opomomahenduha pota mara orohe oroiuco ivi Asia rupi. Ore recoãhasa yavai vahe ité oime aheve oreu. Ndoroicatu iri eté oroñemoso ore piratãhise chupe, seni orepihañemoñeta: “Yamanoño itera co mbahe-mbahe tēi pipe” orohe viña. ⁹ Supi eté oromoha ore cañi tēi ägua viña, ègüe ehi rumo oreu oroyeroya catu ägua Tüpa rese, ndahei oreyses tēi. Esepia, ahe oporombogüerayevi vahe secoi. ¹⁰ Ahe niha ore repi ore mano rãgüer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pítiviise peye pe yeroqui pipe. Ahese setá, “Aviye ndeu” ehira yuvireco Tüpa oporopítiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroiuca oroiuco tupri Tüpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tüpa porovasasa pipe niha ègüe orohe, ndahei ava co ivi pipendar mbahecuasa pipe tēi. ¹³⁻¹⁴ Esepia, che ñehe aicuachía vahe imondo pëu, aicuachía ñepei reseve pe yeroqui tupri ägua, pe senducua tupri ägua avei no. Iyavei ore cua revo chíli peye cute. Acoi yande Yar Jesús yevise curi, ahese peyembovihara ore rese, inungar ore oroyembovihara pe rese.

¹⁵⁻¹⁶ Sese yipindar supi eté che pihañemoñeta aso vaheerã ñuvirío yupagüer pe repia, pe mboviha catu ägua viña. Ègüe ahe ité, che pihañemoñeta pe piri rane che so ägua che guatasa rupi Macedonia ve. Ichui ayevi pota iri pe piri viña, ipare pe che pítiviimira peye ivi Judea rupi che so ägua rese viña. ¹⁷ Ndachepihañemoñeta voño tēi che so ägua, ndahei iporombopa serai vahe aico “che co mbahe ayapora” ehi tēi vahe, ipare rumo nomboaviyei eté. ¹⁸ Tüpa rumo oicua ore ndahei, “Aviye” ore he voisa pëu, ahe pipeve avei, “Ani” ore hesa. ¹⁹ Esepia, Tüpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombehu oroiuco pëu, che, Silvano, Timoteo avei. ²⁰ Esepia, opacatu Tüpa remimombehugüer imboaviyasa sese. Sese niha serer pipe, “Ègüe tehi” yahe Tüpa upe imboeisave. ²¹ Tüpa niha opacatu yande momirata seseño ité yande reco ägua, yande poravo avei. ²² Güerer omondo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tüpa niha oicua acoi ndayeviise Corinto ve pe piri, ègüe ahe pëu mbahe aviye ägua rese. ²⁴ Ndahei opocuai pota mbahe pe rembieroyará rese. Esepia, pe Tüpa rese pe yeroyasa pipe peyemoviracuaño ité Cristo rese. Ore rumo oroiopota pe pítiviisa pe yemboviha ägua.

2

¹⁻² Co rese ndaso catu iri pe piri. Esepia, che aso irise pe piri ndopomboviha catui chira viña, ¿ava vo evocoiyase che mbovihara viña? Pe ité niha che mbovihasar peico. ³ Sese che aicuachía ñehesa ipírata vahe pëu cuese. Esepia, ndaipotai eipeve che sose, che mbovihaēhi ägua peye. Pe rumo iya ité che mboviha catura peye viña. Che ayeroya ité opacatu pe rese

aviharetese, pe avei evocoiyase opacatu peviharetera che rese. ⁴ Supi eté che aicuachiasa che ñehe pëu, che ae ayepihamboasi ité, ayaseho avei. Esepia, aicuachía vahe pëu ndahei pe mbovihaëhi ãgua, che rumo aicuachía ‘toicua che guaisu eteprisa yuvireco’ che yapave pëu.

Oime ñerosa ava upe mbahe sembiavi rese

⁵ Acoi yande rivri omoime uca vahe viharëhisa co mbahe tõi apo pipe, ndahei che güeraño ndache mbovihai, pe avei rumo seni opacatu ëgüe peye. Che, “Seni” aipo ahe ité pëu. Esepia, ndaipotai che ñehe rasi ãgua. ⁶ Co mbia upe setá mbahe peiporara uca ité, evocoi rupive iya ëgüe peye chupe. ⁷ Co suive ité rumo peñerora chupe, peipitívii aveira. Esepia, aviyeteramo oviharëhisa pipe oyemocañi tẽira. ⁸ Sese cõritei opomonguerëhi ité pe mboyecua iri ãgua pe poroaisusa chupe. ⁹ Cuese ambuae che ñehe aicuachía co che pe mbohesa resendar pëu pe recoãha ãgua, “¿Oyapo itera pãha che remimombehu yuvireco?” ahe pëu. ¹⁰ Cõritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque ëgüe ahe pe raisusave ¹¹ Caruguar yande mbopaëhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña. ¹³ Nambohe catui rumo che pihañemoñetasa. Esepia, ndasepiai eté yande rivri Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tõi recopi

¹⁴ Aviye yande Ru Tũpa upe. Esepia, yande Cristo rese yaico vahe yande renose oamotarëhimbar povri sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe siacua vahe yasëtu vahe opacatu rupi. ¹⁵ Esepia, inungar itaisi siacua vahe opacatu rupi, ëgüe yahe avei yande Tũpa upe Cristo yande reropovëhese yaico ava ipisiropirã upe, ava ocañi tõi vaherã upe avei. ¹⁶ Ahe ava ocañi tõi vaherã upe evocoi ñehesa yaru vahe inungar cañi tẽisa resendar; ava ipisiropirã yuvirecoi vahe upe rumo evocoi ñehesa ombou tecovesa. Yande ae tõi rumo ndayaicatu evocoi nungar mbahe apo. ¹⁷ Ore rumo ndahei setá ambuae ava nungar tõi oroico. Esepia, oromombehuse Tũpa Ñehengagüer, ndahei mbahe pisi ãgua tõi rese ëgüe orohe, ore rumo ore pihañemoñeta tuprisa pipe oromombehu co ñehesa Tũpa rovaque Cristo rese ore recosa pipe. Esepia niha, ore semimondo oroico.

3

Ñehesa Tũpa remimbotar ipiasu vahe resendar

¹ Ore aipo orohese, aviyeteramo pëu ndoyavii oroyecomboivate ai pota iri viña, ëgüe ndorohei rumo iyavei ndorosecai icuachía ãgua ava ñehesa aviye vahe ore recocuer resendar oromondo vaherã pëu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ² Esepia, pe ité inungar ore rembicuachía ore recocuer resendar ore oroipota vahe, ëgüe peye peico ore piha pipe. Esepia, opacatu ava pe reco tupri repiase, oicua ore poraviqui tuprisa pe pãhuve yuvireco. ³ Pe niha pemboyecua pe reco tupri pipe ore rembiapo Cristo porocuita pipe pe pãhuve. Sese pe inungar Cristo rembicuachía aviye vahe oromondo vahe ava upe, ahe rumo ndahei tinta pipe ité icuachiapri itape rese, Espiritu Tũpa oicove vahe suindar pipe rumo yapopri ava piha pipe.

⁴ Oroyeroya ité co rese Tũpa rese ore yeroyasa pipe. Cristo niha ëgüe ehi oreu. ⁵ Ndahei oreyesui tõi oroicatu co mbahe apo. Tũpa rumo ombou oreu opacatu co mbahe apo ãgua. ⁶ Ahe niha ombou opirataso oreu güemimbotar ipiasu vahe rese poraviqui ãgua, ndahei Moisés rembicuachiagüer rupi oroporaviqui. Esepia, ahe imboaviyehëhisa pipe yamano tẽira viña. Ahe rumo Espiritu Tũpa suindar pipe oroporaviqui. Esepia, ahe ombou tecovesa yandeu.

⁷ Co Moisés recosendar porocuita icuachiasa ité itape rese, iyavei Tũpa reco porañetasa pipe ou. Israelita evocoiyase Moisés rova rese nomahe catui eté yuvireco. Esepia, sendí iteanga, yepesendigüer ogüe mbegüeño oso viña. Ahe Moisés recosendar porocuita ava upe manosa tõi güeru vahe iporañete ai eté yipindar oico viña. ⁸ Cõritei rumo iporañete catu ité ñehesa Tũpa remimbotar ipiasu vahe resendar Espiritu Santo ombou vahe yandeu! ⁹ Supi eté yepes iporañete ai eté Moisés porocuita acoi güeru vahe manosa yandeu viña, jco ñehesa ipiasu vahe rumo yande reco moingatu vahe iporañete catu ité ichui! ¹⁰ Esepia, co yipindar porañete vahe ndahoyoyai ñehesa cõriteindar porañete catu vahe rese. ¹¹ Acoi mborocuita

yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹² Ore oroyeroya ité co ñehesa ipocopi vahe rese. Sese oroñehe ava upe ore siquiyeēhisa pipe ité. ¹³ Ore rumo ndahei Moisés nungar oroico. Esepia, ahe oyovapi turucuar pipe omu israelita sui güepiaēhi āgua ndogüe viteise sendigüer ichui aracahe. ¹⁴ Ēgüe ehi ahe ndosenducua ucai eté ndoyavii sovapisa vite vahe cūrítei, ēgüe ehi vite oyeroqueise Moisés porocuaíta icuachiapri yipindar vahe pipe yuvireco. Nomiipi vahe nungar tēi chupe ahe senducuaēhi pipe. Esepia, Cristo güeraño ité oicatu sovapisa nungar rerocua ichui senducua uca āgua chupe. ¹⁵ Ēgüe ehi vite cūrítei, senducuaēhi pipe Moisés porocuaíta pipe oyerocuqui viteño tēi eté yuvireco inungar sovapisa vite vahe. ¹⁶ Supi eté que ava oyevise yande Yar upe, ahese ramo serocuaasa sovapisa nungar ichui senducua tupri āgua. ¹⁷ Esepia niha, yande Yar Espiritu secói. Ahe Espiritu ava rese secoise, ndahe iri mbiguai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi āgua. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepia, ēgüe yahese, yareco catu-catu iri seco porañetesa yandeyese. Yande Yar rumo acoi Espiritu secói vahe ēgüe ehi yandeu.

4

¹ Sese, “Ndorequerēhi iri” ndorohei eté. Esepia, Tūpa ore poravo ore paraisuerecosa pipe ore poraviquí āgua co ñehesa rese. ² Ore rumo oroseyapa opacatu mbahe tēi ore chí aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñhengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ēgüe orohe opacatu ava upe Tūpa rovai ‘Supi eté, tehi yuvireco opiha pipe’ ore yapave. ³ Yavaise co ñehesa piširosa resendar ore remimombehu renducua āgua, ahe ēgüe ehi ava ocañi tēi vaheñā upe. Ahe aviye oyeovapi vite vahe. ⁴ Esepia, supi eté caruguar rerecuar inungar nomboesapiso vahe ahe ava yuvireco, sese ndosenducua ucai chupe ‘toviroya eme ñehesa Poropisirosar Cristo resendar porañete vahe’ oyapave. Ahe niha Tūpa recocuer mboyecuar secói. ⁵ Esepia, oromombehuse ñehesa pēu, ndahei oreyese tēi. Ore rumo, “Jesucristo yande Yar secói” orohe oroico. Ore evocoiyase mbiguai nungar tēi oroico pēu Jesús raisupave. ⁶ Esepia, Tūpa aipo ehi aracahe: “Toime tesapasa pītumimbi vahe resape āgua” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yande yeroyasa pipe ité

⁷ Co tesapasa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahe moinda ndipocopi vahe pipe tēi viña. Ipipe toicua opacatu ava yuvireco co pīratasa Tūpa suindar, ndahei oreyesuindar tēi. ⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasa rumo ndoromocañi eté oreyesu. ⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo. ¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyese, “Toyecua avei secocuer ore rese” ore hesave. ¹¹ Esepia, ore recove viteseve imboguairi oroico ore mano āgua Jesús rese. Ēgüe orohe secocuer mboyecua āgua ore retecuer ndipocopi vahe rese. ¹² Evocoiyase co ñehesa mombehu pipe ore manosa ore ropeña, ipipe sui rumo pesopeña tecovesa apirēhi vahe peico seroyasa pipe.

¹³ Icuachiapri arachendar pipe niha aipo ehi: “Ayeroya ité Tūpa rese, ipipe sui añehe” ehi; ēgüe orohe avei ore, sese oroyeroya ité, ichui oroñehe. ¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecua. ¹⁵ Co opacatu mbahe tēi oime vahe oreu, pēu mbahe aviye āgua rese niha ‘tovireco catu Tūpa porovasasa yuvireco; ipipe sui, Aviye ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasu-asuño ité ari yacatu rupi. ¹⁷ Esepia, co mbahe oroiporara vahe co ivi pipe, ahe ēgüe ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaheñā. ¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepai vahe rese. Esepia, co mbahe yasepai vahe, ahe ēgüe ehi raimi tēi vahe; co mbahe rumo ndayasepai vahe, apirēhi vaheñā ité.

5

¹ Yaicua niha yande retecuer ndipocopi vahe, inungar oi ndipocopi vahe avei. Sese imocañisase, avíyeño. Esepia, Tüpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi. ² Supi eté yaicove vitesse co yande rete ndipocopi vahe rese, yande poāsesa pipe yaipota ité yande rete ivi pendar. ³ Aheve yande rete ipiasu vahe yarecose, ahesse ndahei chira yande hā nani tupri vahe nungar yuvirecoira. ⁴ Ēgüe ehi eté yande retecuer pipe vite yaicose, yande poāse yande viharēhisa pipe. Esepia, ndayaiipotai yande hā nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoyase, “Tocañipa co mbahe ocañi tēi vaheṛā yande resendar tecovesa piasu, ndopai vahe rereco āgua” yahe. ⁵ Tüpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya. ⁶ Sese niha yayeroyaño ité yepi; iyavei yaicuaño yande yaicove vitesse yande rete rese, ndayaico vitei eté ivave yande Yar piri. ⁷ Esepia, cūrítei yande Yar rese yeroyasa pipe ité yaguata, ndahei mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mboviha āgua yepi, que yaicove vitesse yande rete rese, anise que yasēse ichui. ¹⁰ Esepia, yande opacatu yañecuavēhera Cristo rovai iporandusave yaipisi vaheṛā ñepeipei mbahe yande rembiapocuer rupi mbahe avíye vahe, anise que mbahe naporai vahe yande rete rese yaico vitesse.

Ñehesa yande reco moingatusa resendar

¹¹ Ore niha oroicua yande Yar sui ore siquiye āgua imboyeroyasave. Sese orosāha ava pihañemoñeta rerova Tüpa rese ipihañemoñeta āgua yuvireco. Tüpa niha ore cua tupri, tapeicua avei ru ore recocuer. ¹² Ndorōñehi pēu ore yemboivate ai āgua tēi. Ore rumo oroñehi pēu ‘toviharete catu ore rese yuvireco’ ore yapave. Ipipe sui peicatura ava güembiepia rese tēi oyemboivate ai vahe upe iñehi mboyevi āgua. Esepia, ahe ndahei ava piha pipendar rese oyemboviha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tüpa upe rumo ēgüe orohe oroico. Yaracua vahe nungar rumo, ore rerecose peye, pēu mbahe avíye āgua rese ēgüe orohe. ¹⁴ Cristo poroaisusa, ahe ité ore reroguata catu. Esepia, supi eté ahe omano opacatu ava repirā, ipipe sui yaicua opacatu uva ocañi tēi vaheṛā yuvireco viña. ¹⁵ Cristo niha omano opacatu yande repirā. Yande yaicove vite vahe evocoyase ndahe iri yandeyupe nara tēi yaico; yande rumo yaico chupe nara ité. Esepia, ahe omano, ocuerayevi yande rese. ¹⁶ Sese, iya ité oreu ore pihañemoñetaēhi iri āgua que ava rese, ava tēi pihañemoñetasa rupi. Yepe yipindar inungar ava ivi pipendar tēi ēgüe orohe ore Cristo rese ore pihañemoñeta oroico viña, cūrítei rumo ēgüe ndorohe iri orepihañemoñeta sese. ¹⁷ Evocoyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipindar vahe sese. Opacatu ité oyembopiasu iri.

¹⁸ Co mbahe opacatu Tüpa oyapo yandeu, ahe niha Cristo rembiapo sui yande recocuer moingatu oyeupe nara. Ipape oreu avei ombou co ñehesa mombehu āgua ambuae ava upe secocuer moingatu āgua avei. ¹⁹ Aipo oyapave aipo ehi: Tüpa ombou Guahri Cristo co ivi pipe ava recocuer moingatu āgua ‘toyevi cheu’ oya; ipipe sui avei ahe ava angaipagüer omocañi yuvireco ichui. Ore evocoyase ore cuai ahe ñehesa ava recocuer moingatura resendar mombehu āgua ava upe. ²⁰ Ore evocoyase Cristo porocuita rupi oroñehi vahe oroico, inungar Tüpa ité oñehera pēu viña. Sese, “Peyevi Tüpa upe, ahe pe recocuer moingatura oyeupe nara” orohe Cristo rer pipe pēu. ²¹ Yepe Cristo ndoyapoi eté angaipa, Tüpa rumo vireco uca angaipa viyar nungar yande repirā yande reco ivi āgua Cristo rupi yande guatase.

6

¹ Ore pe mboetas co Tüpa upendar mboraviqui resendar ore recosa pipe: “Peicua catu, pemocañi tēi rene Tüpa porovasasa peipisi vahe” orohe pēu. ² Esepia, Tüpa aipo ehi icuachiapri aracahendar pipe: “Acoi ari avíye vahe pipe niha che asendu pe yeruresa; iyavei ahe ari poropisirosa pipe poppitivii” ehi.

¡Ahe ari oyepota cute! iyavei oime ité cūrítei ñepisirosa.

³ Ore niha ndoromboyecuai ore reco ai ava pāhuve. Esepia, ndoroipotai que ava Tüpa upe ore poraviquisa rese iñehi rai āgua yuvireco. ⁴ Ore rumo oromboyecua ité Tüpa rembiguai ore recosa. Esepia, ore reco mbegüesa pipe oroñemosañi mbahe-mbahe tēi upe yepe ipane mbahe oreu viña, iyavei mbahe yavaise; ⁵ ēgüe orohe avei ore nupanupase, ore roquendase avei iyavei omonguerēhise ava rehii ore amotarēhi āgua yuvireco.

Oroyapo avei mboraviqui ipirata vahe; amove ndoroquei eté, setá rupi ndoreriepoi tēi avei. ⁶ Oromboyecua avei ore reco maranehisa, ore mbahecuasa supi eté vahe, ore reco mbegüe tuprisa, yeaisusa orovireco avei no. Ëgüe orohe ité niha Espiritu Santo pīratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa pīratasa pipe avei orico. Ore niha ore reco tupri pipe orosecopi mbahe-mbahe tēi. Ipipe avei oroyoei. ⁸ Amove ava ore mboetei ai, amove rumo oñemoiro yuvireco oreu; amove avei oñehe tupri ai ore rese yuvireco, ipare rumo iñehe-ñehe tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie orico viña; amove ore yuca seni yuvireco, oricoveño ité rumo; iyavei amove ore mombaraisusa catu tēi, ndore yucaí eté rumo ipipe yuvireco. ¹⁰ Amove ndoyavii ndorovihai vahe yuvireco chupe, ore rumo orovihaiño ité yepi; iyavei yepe ndoyavii iparaisu vahe orico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu ñgua orovireco ore piha pipe tuvichá pe rese. ¹² Ndorehāpisi pe rese pe raisu ñgua; pe rumo ñgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Esepia, ndoyoyai eté pe pihañemoñetasa. Ëgüe ehi eté teco ñvisa ndoyoyai teco rai rese inungar tesapesa ndoyoyai pītumimbi vahe rese. ¹⁵ Ndahoyoyai eté niha Cristo pihañemoñetasa Carugar pihañemoñetasa rese yuvireco. ¿Oyoya tie Tūpa reroyasar Tūpa reroyasarēhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatará ipāhu rupi yuvireco; che avei aicora iTūpa ité; ahe evocoyase cheundar yuvirecoira” ehi.

¹⁷ Iyavei aipo ehi:

“Sese peyepipi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoyase peicora che rahir, che rayri avei aipo ehi yande Yar güeco pīratasa pipe” ehi.

7

¹ Che rivireta, che rembiaisu, co Tūpa remimombehu imboaviyepirā yandeu. Sese yande yamoingatu tuprira yande recocuer chupe yarecoñhi ñgua yande retecuer iyavei yande espiritu mbahe tēi pipe. Iyavei Tūpa mboeteisa pipe yasecara yande reco catupri ñgua chupe nara güeraño ité.

Corinto pendar ava recocuer recuñarosa resendar

² ¡Che pisi peye pe piha pipe! Ndoroyapoi niha mbahe tēi que ava upe, ndoromomaraí eté que ava recocuer, ndoroporombopai avei. ³ Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoaisu, pēu nara avei aicove, amano aveira pēu” ahe acói pēu cuese. ⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovihareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime vitéño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyemboviha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaiño ité aipo che rese pe che raisusave yepi. Aipo nungar renduse ayembovihá catu.

⁸ Yepe che ñehe aicuachía vahecuer imondo pēu ndape mbovihai viña, cheu rumo aviyeño cūrítei. Yipindar rumo ayepihamboasi aicuase che ñehe tasí iteanga vahe pēu; chíhi rupi tēi rumo ndapevihai peyeroqui pare sese. ⁹ Cūrítei che aviharete. Ndahei rumo pe viharēhisa rese ñgüe ahe. Esepia, co pe viharēhisa sui pemboasi pe angaipa Tūpa upe pe yevi ñgua, evocoi nungar Tūpa oipota. Evocoyase ore ñehe ndoyapoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi ñgua. Ipipe sui niha yañepisiro yande pihañemoñeta roervaehisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosaiño pe viharēhisa upe;

ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evocoi Tūpa remimbou pe viharēhisa sui cute! Supi eté rumo, peyapísaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu āgua. Sese pemboyepepi ité evocoi mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiasse evocoi che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyemboviharete.

Iyavei oroviha catu Tito yembovihasa repiase. Esepia, pe avei niha opacatu pembovaha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūrítei ahe pe raisu catu ité pe rese omahenduhase opacatu pe poreroyasa rese. Iyavei peipísi tupri ité imboeteisave sereco. ¹⁶ ¡Ayeroya ité pe rese, sese aviha ité!

8

Ava querēhisa porerecosa mondo āgua Jerusalén pendar upe

¹ Che rivireta, cūrítei che amombehu potami pēu mara ehi mbahe tupri apo Tūpa ava viroyasa upe ivi Macedonia rupi. ² Yepe ahe ava recocuer yavai eté yuvireco chupe secoāhasa pipe viña, ovihareteño rumo ipipe yuvireco; yepe iparaisu vahe pāve tēi, iporerecoño ité rumo yuvireco. ³ Supi eté oquerēhisa pipe omondo ité ocaturgüer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipítivii ambuae Tūpa reroyasa” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tūpa remimbotar rupi ēgüe ehi avei oreu yuvireco. ⁶ Evocoiyase ore aipo oroho Tito upe pēu: “Tomboyeapi iri co porerecosa monuha āgua ava upe” oroho. Esepia, yipindar ahe osose pe pāhuve, ahe pe pítivii imboipi āgua. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tūpa ñehesa, pereco ité Tūpa suindar mbahecua, pequerēhi ité Tūpa upe mbahe apo āgua iyavei ore raisu ité peye. Evocoiyase ēgüe peye aveira co nungar poroaisusa apo.

⁸ Ndahei pe cuaisa pipe aipo ahe pēu, che rumo ‘toicua ambuae ava rembiapo oquerēhisa pipe oyapo vahe yuvireco’ che yapave. Sese niha peicuara, supi eté vahe piha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secói viña, opa rumo oseya ombahe pe recocuer rese; iparaisu pipe sui niha pe iva pendar mbahe pereco.

¹⁰ Pēu mbahe aviye āgua che añehe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querēhisa pipe peyapo. ¹¹ Cūrítei pemboaviye catu pe porerecosa pe querēhisa yipindar pe reco vahe pipe; pemondoñora mbahe peicaturgüer rupi. ¹² Esepia, acoi que ava omondo pota vahe mbahe, Tūpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pítiviisa pipe yuvireco” ndahei rumo pēu. ¹⁴ Cūrítei mbahe pe rembiereco eta pipe peipítivii catu ambuae ava ipane vahe mbahe yuvireco chupe. Virecomise mbahe, ahe avei pe pítiviira yuvireco pēu mbahe ipanese. Evocoiyase pe recocuer oyoya tupri itera. ¹⁵ Inungar Tūpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi tēi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso āgua pe repia.

¹⁸ Supi oromondo yande rivri, ahe opacatu ambuae Jesús reroyasa oicua iporaviqui tupri aise ñehesa piñirosa rese yuvireco. ¹⁹ Sese opacatu oiporavo yuvireco ore rupi iguata āgua ore pítivii vaherā avei co porerecosa reraso āgua. Ore ēgüe oroho oroico yande Yar mboetei āgua rese ‘toicua ore querēhisa pipe ité oroporopítivii yuvireco’ ore yapave. ²⁰ Ore ndoroipotai que ava oñehe téira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboyecua ité oreu oquerēhisa opacatu mbahe güembiapo pipe. Ahe cūrítei iquerēhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco pēu, “Ahe oyoya Pablo rese oporaviqui vahe pe

pítivii água” peyeñora. Acoi oporanduse avei ambuae yande rivri rese yuvireco pëu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴Sese, pe recocuer cua água, pemboyecua catu pe poroaisusa supi eté vahe chupe yuvireco. Evocoiyase toviroya ité che ayeroyase iyavei ayembovihase pe recocuer rese yuvireco.

9

Porrecosa imonuhapri Jesús reroyasar upe

¹ Porrecosa imonuhapri Jesús reroyasar upe nara rese rumo nañehe iri pëu. ² Esepia, che aicua pequerëhi ité ipítivii água. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii água cuese ambuae araviter suive yuvireco” ahe yuvireco chupe. Evocoiyase pequerëhise ité ipítivii água, ahese setaño ité oyemonguerëhi yuvireco. ³ Che rumo amondo co yande rivri yuvireco pëu cūrítei ‘ëgüe tehi tēi eme che ñehesa aviye vahe sesandar yuvireco’ viya pëu. Pe yemoingatu tupri água ité aipo ahe pëu; ⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Ëgüe peyese ore mochi guasu uca tiëtera peye. Esepia, che ayeroya ité pe rese. Pe avei evocoiyase pechñra. ⁵ Sese che pihañemoñeta yipindar añehe co mbosapi yande rivri upe yuvireco, ahe ranei ore renonde yuviraso água pe piri pe pítivii água co porrecosa aviye vahe monuha água rese, acoi cuese pe remimombehugüer rupi. Evocoiyase ahe pe porrecosa pe remimónuha opara pemoingatu tupri ité pe avagüer mboyecua água, ndahei chira rumo pe recatëhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepeipei iya opihañemoñetasa rupi omondora oporrecosa Tüpa upe yuvireco, ndahei chira opiha víracuasa pipe tēi iyavei ndahei chiaveira ambuae ava ocuai píratasa pipe tēi. Esepia, Tüpa osaisu ava oviharetesa pipe omondo vahe oporrecosa chupe. ⁸ Tüpa niha oicatu opacatu mbahe aviye vahe mondo água pëu ari yacatu rupi pereco vaheñá opacatu mbahe ipane vahe pëu iyavei sumbirer pipe opacatu ambuae mbahe aviye vahe rese pe poropítivii água. ⁹ Inungar icuachiapri pipe aipo ehi: “Ahe iporerereco ai iparaisu vahe rese yepi. Ahe mbahe aviye vahe sembiapo nocañii chietera” ehi.

¹⁰ Tüpa niha ombou mbahe rāhii ava remitira, mbahe semihura avei. Sese ombou catura mbahe pëu iyavei ombouvicha catura pe rembiapo aviye vahe ava pítivii água. ¹¹ Tüpa ombou catura opacatu mbahe pe rembierecorá ava upe imondo catu água pe avasa pipe. Ore orovirase porrecosa pe remimbou yande rivireta upe, ahe evocoiyase, “Aviye ndeu” ehira Tüpa upe yuvireco. ¹² Esepia, co pemondo vahe yande rivireta pítivii água, ndahei peipítivii mbahe ipane vahe rese güeraño, ichui avei niha, “Aviye Tüpa upe” ehira yuvireco. ¹³ Ahe evocoiyase omboeteira Tüpa yuvireco. Esepia, co pe poropítivisa pipe pemboyecua itera pe Cristo ñehe reroyasa peico. Ahe avei omboeteira Tüpa yuvireco. Esepia, pe pemondoño itera mbahe pe porrecosa chupe iyavei opacatu ambuae ava upe. ¹⁴ Evocoiyase ahe oyerquirá pe rese iyavei pe raisu etepirira yuvireco. Esepia, Tüpa pe pítivii eté oporovasasa pipe. ¹⁵ ¡Aviye Tüpa upe! ¡Esepia, ahe ombou mbahe tuvichá vahe aviye catu vahe yandeu, ndayaicatui vahe mombehu tupri água!

10

Pablo cuaita apóstol seco água

¹ Che Pablo añehe Cristo poroaisusa, seco asiëhisa pipe avei pëu. Amove aña pe pāhu pendar, “Seco mbegüemi tēi yande pāhuve oicose, amombri güecose rumo oñehe píratá iteanga” aipo ehi tēi yuvireco cheu viña. ² Che rumo asome pe repia, ndaipotai che píratasa mboyecua água pe pāhu pendar upe. Amove rumo ava pe pāhu pendar ipihañemoñeta: “Oyapo mbahe co ivi pipendar pihañemoñetasa rupi tēi” ehi yuvireco cheu. Sese che ayemoingatuño ité evocoi nungar ava upe añehe píratasa vaheñá. ³ Supi eté, yepe co ivi pipe orocove viña, ore rumo ndoroyapoi mbahe ava co ivi pipendar rembiapo nungar. ⁴ Esepia, ore yoepisa ndahei ava co ivi pipendar yoepisa nungar; orovireco rumo Tüpa píratasa mbahe tēi seco píratasa vahe recopi água ava aracuasa tēi recopi água avei. ⁵ Ahe ipipe ore opa orosecopi yepoepi-episa iyavei opacatu semira-mira tēi vahe güeco ivate aisa pipe ndoicua uca potai vahe Tüpa recocuer ava upe. Iyavei opacatu ava pihañemoñeta raisa orosecopi Cristo reroya tupri água yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi água. Pe rane rumo peroya tupri.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe

ayecomboivate che mborerecuasa rese pëu viña, ipipe rumo nachi eté. Esepia, yande Yar ombou mborerecuasa cheu pe recocuer moviracua tupri ãgua, ndahei rumo pe recocuer momara ãgua. ⁹ Aní chira, “Pablo yande mboisiquiye pota güembicuachía pipe” peye cheu. ¹⁰ Esepia, amove ava pe pãhu pendar, “Oñehe oicuachía vahe ombou yandeu, ahe ipiratá, yavai avei yandeu; ahe ité rumo aní angai vahe secoi yande pãhuve iyavei iñehe ãgüe ehi tēi vahe” ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pipe amombri che recose, ãgüe ahe tupri aveira yapo pe pãhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepia, omboyoyase oyese, ndoyapisacai eté yuvireco. ¹³ Ore rumo ore remimombehu pipe ndoroyapirasai chietera ore cuaita ore yeecomboivatesa pipe. Tūpa rumo güemimbotar rupi ombou ore poraviqui ãgua oreu, eipeve pe rese ore poraviqui ãgua avei. ¹⁴ Ore rumo ndoroyapirasai ore cuaita mombehusa icuachía pëu. Esepia, supi eté ore ranei eté oroico pe pãhuve, ore ranei avei oroviraso Cristo resendar ñehesa imombehu pëu. ¹⁵ Ndoroyapirasai avei ore ñehe pipe ambuae ava poraviquisa sui tēi. Ore rumo, orosãro ore oroporaviqui catu vahe rã pe pãhuve Tūpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosãro ñehesa písirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyecomboivate oroico.

¹⁷ Acoi ava oyecomboivate pota vahe, toyecomboivate catu yande Yar rese. ¹⁸ Esepia, acoi ava “che aico tupri” ehi vahe ndahei ahe osē tupri güecoãhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoãhasa sui.

11

Pablo iyavei apóstol angahu tēi yuvirecoi vahe

¹ ¡Peñemosá iriñomi tēira cheu co che ñehe ndayaracuai vahe nungar pipe che ñehese! ² Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vahe rã pe reco marañehisa pipe, inungar cuñatai ndaseco marai vahe imondopri cuimbahe upe imenda ãgua. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Carugar pe mbopa aveira pe pihañemoñetasa rerova ãgua Cristo mboeteisa supi eté vahe sui. ⁴ Esepia, peñemosãno ava oñehe vahe pëu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahe cuer sui. Iyavei ambuae ñehesa písirosa resendar peipisi avei ndoyoyai vahe ore pëu oromombehu vahe rese. ⁵ Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. ⁶ Yepe ndayembohei che ñehe tupri ãgua ité, che rumo areco che mbahecuasa, ahe oromboyecuaño ité opacatu ore rembiapo pipe pe rembiapiave.

⁷ Ndamombehui eté niha ñehesa písirosa resendar pe cheu imboepi ãgua; pe recocuer mboivate catu ãgua rumo Tūpa rovaque ãgüe ahe che reco yemominisa pipe. ¿Mbahe tēi pãha ayapo ãgüe ahese pëu? ⁸ Aipisi ambuae ava Jesús yeroyasar sui guarepochi, pe recocuer rese che poraviqui ãgua. ⁹ Iyavei acoi aicose pe pãhuve, ipane avei mbahe cheu. Ndopomañecoi eté rumo; yande rivri ivi Macedonia pendar yugüeru vahe ombou mbahe ipane vahe yuvireco cheu. ãgüe ahe che pepoisupave pe mañecoēhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vahe rã co che viharetasa che sui yuvireco. ¹¹ ¿Mbahe rese pãha aipo ahe pëu? ¿Pe raisuñehisave pãha? ¡Tūpa rumo oicua che pe raisusa!

¹² Ayapoño itera rumo co mboraviqui cheu imboepiñehisa pipe vichico co ambuae pe pãhu pendar ava pe mbopañehi ãgua yuvireco. Esepia, che nungar yuvirecoi pota tēi viña. ¹³ Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. ¹⁴ Yaicua niha Carugar rerecuar oporombopa. Esepia, oyeapo inungar Tūpa rembiguai amove. ¹⁵ Sese yaicua avei Carugar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pëu: tipo eme ava “ndayaracuai” ehi vahe cheu. Acoi, “ãgüe ehi oico” peyese cheu, tañehẽño ayase ndayaracuai vahe nungar, che avei evocoyase tayecomboivateño vichico. ¹⁷ Ndahei rumo yande Yar che cuaisa pipe aipo ahe, che aracañehisa nungar pipe rumo aipo ahe che yemboivate aisa pipe. ¹⁸ Esepia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatara. ¹⁹ Esepia, yepe pe imbahecua vai vahe nungar peico, pemboyoyá catu pe querēhisa pipe ava ndayaracuai vahe. ²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembiereco sui tēi oicove vahe, que pe mbopa tēisar,

pe roerõrosar, que pe rova pete-petesar avei. ²¹ Che chõsa pipe aipo ahe co imombehu, jore reco mbegüe etepri evocoi nungar apo ãgua pẽu!

Acoi õñehese ambuae ava oyeupendar mbahe rese oyemboivate aisa pipe, che avei evocoiyase ãgüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembuguai aico” ehi yuvireco, che rumo sembuguai catu aico ichui yuvireco, aipo añehese aviye che ndayaracuai vahe aico. Aporaviqui catu rumo ichui yuvireco, setá catu soquendapri tẽi aico yuvireco ichui, inupambri catu aico ichui yuvireco, setá rupi avei seniseni che yuca uca che mombarrisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ivira pipe, ñepeí rupi evocoiyase che api-apisá ita pipe. Mbosapi yupagüer avei õñepivil iar ipive che guatasa rupi cheu, ñepeí pitu, ñepeí ari avei avevui tẽi para guasu aviter rupi vichico. ²⁶ Setá aguata opacatu rupi, iyavei iai rupi mbahe-mbahe tẽi oime cheu, aico avei imonda rai vahe pãhuve; che mu judío mbahe tẽi vahe pãhuve avei aico iyavei ndahei vahe che mu pãhuve no. Aico avei tecua guasu pipe mbahe tẽisave, amombri vahesa rupi iyavei para guasu pipe, iyavei mbahe-mbahe tẽisave Jesús reroyasar angahu tẽi pãhuve aico. ²⁷ Aporaviqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporẽhi iyavei husei; setá rupi ndacarui; sõhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhãno ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyavi uca vahe mbahe, che moñemoiro uca. ³⁰ Iyase che yeecomboivate ai ãgua cheu, co mbahe omboyecua vahe che pĩrataẽhisa rese ayecomboivate aiño itera. ³¹ Yande Yar Jesucristo Ru Tũpa, ahe imboetepri apirẽhi secoi vahe, ahe oicua aipo che hesa supi tupri vahe. ³² Tecua Damasco ve aicose, mborerecuar guasu Aretas povri pendar mborerecuar oyocuai osundao co tecua roquendipive che rese osareco vaheerã che roquenda ãgua yuvireco viña; ³³ oime rumo ava iruova guasu pipe che mogüeyi vahe tecua ãchisa metana rupi yuvireco. Ëgüe ahe añemi ichui yuvireco.

12

Tũpa omboyecua Pablo upe mbahe queraisa nungar pipe

¹ Ndiptoi eté que ava mbahe oipisi vahe ahe ae tẽi oyemboeteisa pipe. Che rumo amombehuño itera mbahe asepiã vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cõritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihã güeraño tie revo. Tũpa rumo oicua. ³⁻⁴ Che rumo, “Ëgüe ehi tie revo oico” ahe aipo mbia upe, Tũpa güeraño oicua. Serasopri ivave teco orisave. Aheve osendu ñehesa ndicuasai vahe. Ahe niha que ava tẽi upe ndipotasai imombehu ãgua yuvireco. ⁵ Evocoi nungar mbia rese ayecomboivatera; cheyese ité rumo ndayecomboivate ai chira. Che recocuer nipiratai vahe reseño ãgüe ahera vichico. ⁶ Yepe che añehe tupri aira cheyese viña, che revo ndahei chira ndayaracuai vahe nungar aico. Esepia, mbahe rupi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rãgüer sui’ viya. ⁷ Sese che yemboivate aiẽhi ãgua che quer nungar mbahe che pihamondii vahe rembiepiagüer rese Tũpa ombou teco asisa cheu. Ahe aviye yu che cutu guasu vahe, ndoyavii avei Carugar mara-mara tẽi che rereco vahe. ⁸ Mbosapi yupagüer yande Yar upe aporandu ité teco asisa che sui serocua ãgua rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosa ãgua. Esepia, che pĩratasa oyecua catu ité ava nipiratai vahe recocuer rese” ehi. Evocoiyase che ayemboviha catuño itera che reco nipiratai vahe rese. Ëgüe ehira Jesucristo pĩratasa oyecua che rese. ¹⁰ Sese Cristo rese che recosa pipe aviyeño ité ndache pĩratase, que ambuae ava õñehe raise che rese, que mbahe ipanese cheu, ambuae che recareca tẽise che reco momara ãgua yuvireco iyavei que mbahe yavai vahe aiporaras Cristo sui. Esepia, ayandu che pĩrataẽhisa, ahese che pĩratata.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pẽu, pe rese tẽi rumo ãgüe ahe. Iya rumo peñehe tupri che rese viña. Esepia, yepe ndahei seco ivate vahe aico viña, co apóstol angahu tẽi rumo pe supi peguata vahe ndahei ivate catu vahe che sui yuvireco. ¹² Che ñemosa tupri pipe mboraviqui ayapo pe pãhuve. Ayapo mbahe poromondisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi

coti catu peico ambuae Jesús reroyasareta sui, che ndopomañeicoise mbahe cheu pembou vaheṛā rese. ¿Ayavi tie che cuaita, ěgüe ahese pēu? ¡Peñero sese cheu!

¹⁴ Cūrītei che ayemoingatu imombosapisa rupi che so āgua pe pīri. Iyavei ndopomañeicoi chira mbahe rese. Esepia, ndasecai mbahe pe rembiereco; pe recocuer ité rumo aipota. Esepia, iyesua omonuha guarepochi guahir upe, ndahei tahir tēi ěgüe ehi oyesupa upe yepi. ¹⁵ Evocoiyase che querēhisa pipe amondora opacatu che mbahe areco vahe pe pītivii āgua iyavei opacatu che recocuer rese ayemondo pēu pe reco tupri āgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese pēu. Amove rumo ava, “Yande mbopa āgua tēi ěgüe ehi Pablo yandeu” ehi tēi yuvireco. ¹⁷ ¿Opombopa uca tie ava pēu che remimondo pipe? ¹⁸ Che Tito upe, “Eresora ipīri yuvireco” ahe. Supi avei ambuae yande rivri Tūpa reroyasar amondo. ¿Pembopa tie Tito? Oyoya tupri mbahe oroyapo Tūpa upe ñepeī ore pīhañemoñetasu pipe.

¹⁹ Che rivireta, che rembiaisu, pe revo pepīhañemoñeta ore oroicuachía co pēu, ore yoepi āgua tēi. ěgüe ndorohei eté rumo. Ore rumo Cristo rese ore reco pipe oroñehe Tūpa rovaque. Opacatu ité niha mbahe oroyapo pe recocuer moviracua catu āgua. ²⁰ Che asiquiye asose eipeve pe repia, aviyeteramo ndahei chira che pīha rupi pe recocuer. Iyavei pe aviyeteramo ěgüe peye aveira che repiase. Che asiquiye ité, oime revo pe pāhuve yepoepi-episa, pe pīhañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pāhuve ava oyeupeño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporoviroyai vahe. ²¹ Asiquiye avei aso irise pe repia, omboura Tūpa pe sui che chī āgua, che mboiyaseho uca tiētera peye setá pe cueseve peyemboangaipa vahe rese iyavei ndapemboasiī etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuaa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. ² Co yipīndar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe pīri. Cūrītei amombri aico pe sui, amombehu irira rumo co pēu. Co yipīndar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pāhuve, ndopoparisuereco iri chira. ³ Esepia, pe peipota ité che recoāha āgua ‘¿Cristo ité pīha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opīratasa pēu. ⁴ Supi eté niha ahe yaticasa, inungar ava nipīratái vahe. Cūrītei rumo ahe oicove Tūpa pīratasa pipe. ěgüe orohe avei ore seco pīrataēhisa sereco. Oroicoise rumo sese oroico Tūpa pīratasa pipe pe rese hañeco āgua.

⁵ Pemahecua tupri catu pe recocuer rese: ¿peico ité pīha pe Cristo rese yeroyasa pipe? ¿Ndapeicuai vo Jesucristo secoise pe rese, pesēse pe recoāhasa sui? ⁶ Pe revo peicua ore ndoroçañi tēi vahe oroico ore recoāhasa pipe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboycuasave ěgüe orohe; co catu ‘toyapo mbahe aviye vahe yuvireco’ ore yapave, yepe pēu ndoyavii oroçañi tēi vahe oroico viña. ⁸ Esepia, ndiyai mbahe supi tupri vahe amotarēhi āgua oreu; ěgüe ehi rumo sese catu ité oroñehe. ⁹ Sese orovihaño ité norepīrataise, ore rumo oroipota ité pe momirata; iyavei ore oroyerure catuño itera pe recocuer catupri catu āgua rese. ¹⁰ Aicuachía co che ñehe imondo pēu pe piri che so āgua renonde. Acoi asose, namboycua pīratái chira che mborerecuasa eipeve. Ahe niha yandé Yar ombou vahe cheu pe reco momirata catu āgua, ndahei pe reco momara āgua.

¹¹ Imomba āgua, che rivireta, aipota pevīharetera peico. Peseca avei pe reco tupri catu āgua peyeupe, peyemonguerēhi catu, oyoya guasu peico tupri avei peyese mbahe tupri pipe. Evocoiyase Tūpa oporoaisusa pipe, güeco tupriisa pipe avei secoira pe rese. ¹² Pemombehu che mahenduhasa ñepeī-peī peyeupe pe yeovapītesa pipe. ¹³ Opacatu ambuae yande rivri, Tūpa reroyasar avei omondo omahenduhasa yuvireco pēu.

¹⁴ Peipisi yande Yar Jesucristo porovasasa, Tūpa poroaisusa iyavei Espiritu Santo tasecoi opacatu pe rese. Aipo rupive che ñehe pēu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohawe oroiacuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá repirã. Ēgüe ehi cūrítei yande renose co ivi pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropisirosa resendar

⁶ Che pihamondii etepri peye. Esepia, peyepipi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa pīsirosa resendar. Ēgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropisirosa angahu tēi rese ndoyoyai vahe che ñehesa rese pesendu vahe yipisuive, evocoi nungar ava upe “Toime Tūpa ñemoirosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evocoi nungar ava upe toime ité Tūpa ñemoirosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepia, ¡ava remimbotar rupi tēi mbahe ayapo vitesse, evocoiyase ndahei chietera Cristo rembiguai aico viña!

Mara ehi Pablo apóstol güeco água

¹¹ Che rivireta, tapeicua co ñehesa poropisirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yipindar che recocuer resendar, che mu judío yembohesa rupi aguata vitesse aracaco. Che pīratasa pipe tēi aseca opacatu Tūpa rembiporavo Jesús reroyasar momara água. ¹⁴ Ēgüe ahe che ayemboivata ai catu che mboetasa eta sui judío yembohesa pipe. Ayapó catu opacatu che recocuer pipe yipindar che ramoi eta yembohe agüer rupi eté vichico. ¹⁵ Tūpa rumo yipive che ha viteēhiseve che poravo oyeupe nara. Iyavei oporoaisusa pipe che renoi güemimbotar rupi. ¹⁶ Ēgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yipive apóstol yuvirecoi vahe repia água. Che rumo aso voi eté ivi Arabia ve. Coiyé ayeve tecua Damasco ve vitu.

¹⁸ Ichui mbosapi araviter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi. ¹⁹ Ndasepiai eté rumo ambuae apóstol. Yande Yar rivri Santiago güeraño asepia. ²⁰ Tūpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cūrítei omombehu Jesucristo reroya água oico” ehi, “Ahe acoi yipindar yande mocañi pota rai vahe oico” ehi yuvireco cheu. ²⁴ Ahese, “Imboeteipri Tūpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce araviter pare, Tūpa omboyecua cheu Jerusalén ve che yevi água. Evocoiyase aso iri aheve. Ahese oroso Bernabé rese, Tito avei oroviraso oreyeupi. Aheve yipindar opacatu Jesús reroyasar rerecuar reseño rane oroñemonuha. Esepia, ndaipotai che rembiapo opitara ēgüe ehi tēi vahe. Evocoiyase amombehu co ñehesa poropisirosa resendar chupe yuvireco acoi amombehu vahe ava eta ndahei vahe judío pāhuve. ³⁻⁴ Oime rumo amove yande rivri angahu tēi, ahe yuviroique mbegüe vahe ore pāhuve ‘yasecoepia rane, ¿supi eté ndoviroyai Moisés porocuita Jesucristo reroyasa pipe yuvireco?’ oyapave. Oipota ahe ore reroyevi iri Moisés porocuitavri tēi yuvireco viña. Ahese che ndugüer Tito upe, “¡Eyembocircuncida Moisés porocuita rupi!” ehi yuvireco. Esepia, ahe ndahei

vahe judío secoi. ⁵ Ore rumo ndoroipotai eté semimbotar apo água yuvireco chupe. Esepia, 'tovireco viteño oyese co ñehesa písirosa resendar supi tupri vahe yuvireco' ore yapave pëu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu, oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepia niha, Tüpa ndahei ava rete tēi osepia.) ⁷ Ahe rumo ocuaita yuvireco Tüpa che cuai oñehengagüer poropísirosa resendar mombehu água ndahei vahe judío yuvirecoi vahe upe, inungar omondo Pedro oñehengagüer poropísirosa resendar mombehu água judío upe. ⁸ Esepia, inungar Tüpa omondo Pedro upe apóstol seco água ava judío upe nara, ãgüe ehi avei imbou apóstol che reco água ava ndahei vahe judío upe nara.

⁹ Sese Santiago, Pedro iyavei Juan, ahe chupe, "Oyemoviracua vahe Jesús reroyasar pãhuve" ehi yuvireco, ahe ocua yuvireco Tüpa ombou vahe oporovasasa cheu. Aheso imboetasa ore recosa pipe che po pisi yuvireco, Bernabé upe avei ãgüe ehi yuvireco. Iyavei ipiha rupi eté ore oroporaviqui vahe rã ava ndahei vahe judío pãhuve oroico, inungar ahe oporaviqui judío pãhuve yuvireco. ¹⁰ Co reseño oporandu yuvireco oreu: "Peyemomahenduhami ava iparaisu vahe pítivii água rese" ehi. Yipive ité rumo che ãgüe ahe pota vichico yepi.

Pablo oñeha pĩrata Pedro upe sembiavi rese Antioquía ve

¹¹ Iyavei osole Pedro tecua Antioquía ve. Aheve oyavi güecocuer. Evocoyase añeha pĩrata sovai eté chupe mbahe sembiavi rese. ¹² Esepia, yipĩndar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, aheso Pedro osiriño ichui osiquiyepave. Iyavei ndocaru iri ipiri. Esepia, ahe Jesús reroyasar judío yugüeru vahe "judío recocuer rupi yaguatara yande ñepísiro água" ehi vahe ité yuvireco. ¹³ Evocoyase ambuae Jesús reroyasar judío avei osiripãño tēi supive yuvireco. Bernabé avei eté supive ãgüe ehiño tēi. ¹⁴ Che asepiase rumo, ndahoyoyai secocuer yuvireco co ñehesa poropísirosa resendar supi tupri vahe rese. Ichui Pedro upe añeha opacatu Jesús reroyasar rovaque: "Nde niha judío, ereico rumo inungar ndahei vahe judío. Cũritei rumo erembohe tēi nde rembiapo pipe evocoi ava ndahei vahe judío Jesús reroyasar judío rereco uca água" ahe chupe.

Judío, ndahei vahe judío oyoya oñepísiro yuvireco Cristo rese oyeroyasa pipe

¹⁵ Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶ Cũritei rumo yaicua, ndipoi eté que ava seco catupri vahe Tüpa rovaque Moisés porocuaita mboaviyasa pipe. Jesucristo rese yeroyasa pipeño ité rumo yande reco catupri. Sese yande yayeroya ité Jesucristo rese, "Co seco catupri vahe" Tüpa he água yandeu. ãgüe ehi eté seroya pipe, ndahei acoi porocuaita tēi reroyasa pipe. Esepia, ndipoi chietera que ñepeí ava seco catupri vahe Tüpa rovaque evocoi porocuaita tēi aposa pipe.

¹⁷ Yasecase yande reco catupri água Cristo rese yande yeroyasa pipe, ipipe yaicuaase angaipa viyar yande reco, ¿Cristo pĩha evocoyase yande mboangaipa? ¡Aní eté! ¹⁸ Che amocañise mbahe, ipare rumo amopuha irise, che evocoyase ayemboangaipa ipipe. ¹⁹ Esepia, ndaicatuise Moisés porocuaita reroya tupri che ñepísiro água, aheso ocafñi tēi vahe aico ipipe. Ichui rumo Jesucristo reroyasa pipe asupiti Tüpa upe nara che recove água. Esepia, che aviye yaticapri aico Cristo rese. ²⁰ Sese ndahe iri che ité aicove; Tüpa Rahir Cristo rumo che rese secoi. Sese ité ayeroya che retecuer pipe che recove água. Ahe niha oyemondo omano água che raisupave. ²¹ Naroĩroi eté co Tüpa porovasasa. Esepia, ava seco catuprira Tüpa rovaque porocuaita tēi reroya pipe viña, evocoyase Cristo mano agüer ãgüe ehi tēi etera viña.

3

Porocuaita iyavei yeroyasa

¹ ¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pëu. ² ¡Pemboyecua co che porandusa cheu! ¿Moisés porocuaita mboyeroya pipe pĩha peipisi Espiritu Tüpa suindar, co ñehesa pesendu vahecuer reroya pipe tie? ³ ¡Ndapembahecuai eté! Yipĩndar Espiritu pipe pemboipi Cristo rupi pe guata água. ¿ãgüe peye aveira pĩha pe pĩratasa pipe tēi pe guata tupri água Cristo rupi cũritei? ⁴ ¿Ndape pítiviiimi eté vo acoi opacatu pe paraisusa Cristo recocuer rese? ¡Pe pítiviiimira tarahu viña! ⁵ Tüpa niha omondo oEspiritu pe rese iyavei oyapo poromondiisa pe pãhuve. ¿Mahera pĩha oyapo? Esepia, co ñehesa pesendu vahe peroya ité, sese ãgüe ehi pëu ndahei Moisés porocuaita tēi reroya pipe.

⁶ Esepia, aracahe Abraham oyeroya ité Tüpa rese, ipipe sui Tüpa oipisi seco catupri vahe nungar oyeupe nara. ⁷ Sese iya ité peicuara opacatu acoi oyeroya vahe Tüpa rese

yuvireco, ahe Abraham suindar supri tupri vahe. ⁸ Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyeseyeroya vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapri vahe yuvireco nde sui” ehi. ⁹ Evocoiyase Tūpa osovasara cūriteindar oyeseyeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tūpa ñemoirosavri tēi yuvirecoira. Esepia, icuachiapri arachendar pipe aipo ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe ñemoirosavri tēi yuvirecoira” ehi. ¹¹ Sese, co omboyecua tupri yandeu ndahei Moisés porocuaita reroyasa pipe tēi Tūpa, “Co seco catupri vahe” ehi ava upe. Esepia, icuachiapri arachendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuaita ndahoyoyai Cristo rese yeroyasa rese. Esepia, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove āgua” ehi.

¹³ Moisés porocuaita mboaviyēhisa pipe yacañi tēira viña. Cristo rumo yande renose yande cañi tēi rāgüer sui. Ahe ae opa oipisi ñemoirosa yande repirā. Esepia, icuachiapri arachendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ēgüe ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espiritu imombehupri yayeroyase Cristo rese cūritei.

Porocuaita iyavei Tūpa güemimombehugüer omboaviye vaheerā

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepeiseve oicuachise güemimbotar omombehu vahe, ahese ndipoi que ambuae ava omboyeho vaheerā iyavei ndipoi que ambuae ava omboyepi iri vaheerā. ¹⁶ Ēgüe ehi avei Tūpa remimombehugüer Abraham upe aracahe. Esepia, oñehe ñepeiseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ēgüe ehi rumo, “Nde suindar upe ité” ehi ‘ñepe avei’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pēu: evocoi porocuaita Tūpa ombou vahecuer cuatrocientos treinta araviter pare, ndoicatu chietera Tūpa ñepeiseve Abraham upe omombehu vahecuer iyavei oñehe omboaviye vaheerā mboyeho āgua. ¹⁸ Supi eté acoi Tūpa suindar ovo vaheerā porerocosa Moisés porocuaita mboaviyasa pipe suise viña, ahese ndahei chiaveira Tūpa remimombehugüer sui. Ahe rumo ñepeiseve Tūpa remimombehugüer rupi Abraham upendar porerocosa.

¹⁹ ¿Mahera pīha evocoiyase aviye Moisés porocuaita? Esepia, ava poreroyaēhisa cua āgua Tūpa ombou porocuaita Moisés upe aracahe. Co porocuaitavri rumo ava yuvirecoi acoi oyepotase voi Abraham suindar Jesús Tūpa remimombehugüer rupi. Yipindar rumo Tūpa oyocuai güembuguai iva pendar oporocuaita mombehu āgua Moisés upe aracahe ‘tomombehu evocoiyase Moisés che porocuaita opacatu ava upe’ oyapave. ²⁰ Ñepe avei rese oñemoñetase, ndipotasai ambuae imoingatu āgua. Tūpa niha ñepe vahe secoi.

Mbahe sui Tūpa ombou oporocuaita

²¹ “Moisés porocuaita co coti tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondose que porocuaita ombou vaheerā tecovesa apirēhi ava upe imboaviyasa pipe, evocoiyase porocuaita reroyasa pipe yande reco catupri Tūpa rovaque viña. ²² Icuachiapri arachendar pipe rumo omombehu ité co: opacatu ava inungar mbuguai tēi oangaipa pipe yuvirecoi. Evocoi Ēgüe ehi, Jesucristo rese yande yeroyasa pipe yasē vaheerā ichui mbahe imombehupri pisi āgua.

²³ Yipindar rumo mbuguai nungar yaico Tūpa nomboyecua viteise Guahir rese yande yeroya āgua. ²⁴ Inungar chīhivahemi tēi, Ēgüe yahe porocuaitavri yaico yipindar. Ahe porocuaita rumo yande mbohe Cristo yu āgua ‘toyeroya Cristo rese güeco catupri āgua curi’ oya yandeu. ²⁵ Cūritei rumo oime Jesucristo rese yeroya āgua cute. Evocoiyase ndahei iri ahe porocuaitavri yaico. ²⁶ Pe niha opacatu Tūpa rahir peico Jesucristo rese yeroya pipe. ²⁷ Opacatu pe ñapiramombri peico vahe Jesucristo rupi pe guata āgua, secocuer avei pereco. ²⁸ Iyavei ndipoi eté yembohosa Jesucristo rese yaicose, yepera que judío viña, ndahei vahe judío; anise mbuguai, ndahei vahe mbuguai; que cuimbahe, cuña avei. Esepia, opacatu ñepe vahe nungar ité yaico Cristo rese. ²⁹ Jesucristo rese peicose, pe evocoiyase Abraham suindar nungar tupri ité peico. Evocoiyase pe avei peipisira Tūpa remimombehu porerocosa yandeundar.

4

¹ Amboyoapi vitera co che ñehesa pëu: inungar que ava omanose, oseya ombahe eta guahir upe chñihavahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povrive secoi imboyeroya āgua. Ocuacuase voi eté, opoira tu remimombehugüer rupi ichui. ³ Ēgüe ehi avei yandeu. Yande chñihavahemise, evocoiyase mbiguai nungar yipindar vahe co ivi pipendar porocuitavrive yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoiyase ahe Moisés porocuitavrive secoi. ⁵ Ēgüe ehi ou opacatu yande renose āgua evocoi mborocuitavrive sui Tūpa rahir ité yande reco āgua. ⁶ Evocoiyase Tūpa omboyecua Guahir yande recose ombouse Guahir Espiritu yande piha pipe, “¡Che Ru!” yande he āgua chupe. ⁷ Sese yande Tūpa rahir ité yaico, ndahe iri cūrítei mbiguai tēi nungar: Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai tēi peico Tūpa ité cuaēhi pipe. ⁹ Cūrítei rumo peicua Tūpa, ēgüe ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi piha oyevi iri mborocuita tēi pipe mbiguai tēi güeco iri āgua yuvireco?” ahe pëu. ¹⁰ Esepia, pemboetei vite ari, yasi, araviter pieta eta tēi peico. ¹¹ ¡Che ayembosiquiye pe rese, “Che porombohesa revo ēgüe ehi tēi vahe ipāhuve yuvireco chupe” ahe pëu!

¹² Iyavei che rivireta, aipota che recocuer moña peye. Esepia, cuese che asē Moisés porocuita povri sui inungar pe yipindar ēgüe ahe vichico pe pāhuve. Ahese ndapeyapoi eté mbahe cheu. ¹³ Peicua niha che yipindar chembaheasise vichico, ahese amombehu co ñehesa písirosa resendar pëu. ¹⁴ Yepe co che mbaherasisa yayai etepri pëu viña, pe rumo ndache roerōiroi eté peye iyavei ndache momboi peye. Ēgüe ehi rumo aviye acoi Tūpa rembiguai eté che rereco peye viña iyavei aviye Jesucristo itera aico pëu viña no. ¹⁵ ¡Mahera ru cūrítei ndapeyembovihareté vitei che rese peico eipeve! Esepia, supi eté, cuese acoi que pe resa tieté revo pemboura cheu viña. ¹⁶ ¡Evocoiyase cūrítei che amotarēhi tie peye acoi pëu mbahe supi tupri vahe mombehusa sui tēi!

¹⁷ Evocoi ava iquerēhi ité pe rese, ndahei rumo mbahe aviye vahe apo āgua yuvireco. Ahe rumo oipota pe mboyepepi āgua tēi ore sui yuvireco pe querēhi āgua supi. ¹⁸ Aviye ité niha yande querēhise mbahe apo ambuae ava upe, mbahe aviye vahe apo āgua rumo. Ndahei chira pe pāhuve che recoseño pereco pe querēhisa. Iyacatu rumo pequerēhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasi vahe; ēgüe aheño itera ayemombaraisu vichico ‘toico rane ité Cristo sese yuvireco’ che yapave pëu. ²⁰ Cūrítei rāgüer opoepiara viña añehe tupri catu āgua pe rese. Esepia, “¿Mara ahera revo sereco yuvireco?” ahe pëu.

Agar, Sara recocuer resendar yembohesa

²¹ Pe peroya pota vahe Moisés porocuita pe reco catupri āgua, pemombehumí cheu: ¿Ndapesenducuai tie co mborocuita aipo ehi vahe? ²² Esepia, aipo ehi: Abraham aipo vireco ñuvirío guahir, ñepeí tahir aipo sembiguai Agar membri, ambuae tahir evocoiyase sembiereco Sara membri. ²³ Evocoi sembiguai membri oha que ava tēi yesu nungar; sembiereco membri rumo oha Tūpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecua evocoi porocuita imondopri Arabia pipendar ivitri Sinái ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuitavrive yuvirecoi. Ēgüe ehi avei opacatu Moisés porocuita pipendar, yuviroha mbiguai nungar güeco āgua, opacatu ichuindar ēgüe ehi vite yuvireco. ²⁶ Yande rumo inungar-ra que Jerusalén íva pendar suindar yaico viña ēgüe yahe yaico mbiguaiēhi. ²⁷ Esepia, icuachiapri arachendar pipe aipo ehi:

“Eyembovihareté, cuña nimembii vahe;

esapucái nde rorivetesa pipe, nde ndereiporarai vahe nde membri rasicuer.

Esepia, acoi cuña seyapri imembii ati catura cuña omer vireco vahe sui” ehi.

²⁸ Che rivireta, inungar Sara membri Isaac, ēgüe yahe avei tahir ité yaico Tūpa remimombehugüer rupi. ²⁹ Co rumo aracahe sembiguai membri oha vahe ava tēi yesu nungar, ahe ndoyambotai sembiereco membri acoi Espiritu píratasa pipe sui oha vahe; cūrítei ēgüe ehi tupri avei. ³⁰ ¿Mara ehi icuachiapri arachendar pipe? “Pemboyepepi pe rēta sui cuña mbiguai tēi imembii reseve. Esepia, cuña mbiguai tēi membri ndiyai oyoya cuña ndahei vahe mbiguai membri rese vu mbahe pisi āgua yuvireco” ehi. ³¹ Sese, che rivireta, yande ndahei sembiguai tēi membri nungar yaico, yande rumo sembiereco membri nungar yaico. Esepia, ahe ndahei mbiguai.

5

Peyemoviracuaño ité Moisés porocuita pipe pe recoēhi āgua

¹ Jesucristo niha ombou yandeu mbuguai tēi nungar sui yande sē āgua. Sese peyemoviracua mbuguai tēi pe reco iriēhi āgua.

² Pesendu che ñehe. Che, Pablo, aipo ahe pēu: acoi peyembocircuncida ucasa, ahese ēgüe ehi tēi vahe Cristo pereco. ³ Che amombehu pota irimi pēu, que ava oyembocircuncida uca vahe, vireco niha ocuita opacatu Moisés porocuita mboyeroya āgua. ⁴ Pe pereco catupri pota tēi vahe Tūpa rovaque evocoi porocuita tēi reroya pipe, peyepēpi ité Cristo sui. Evocoiyase Tūpa porovasasa avei pemocañi tēi peyesui. ⁵ Yande rumo yande querēhisa pipe yayeroya yande reco catupri āgua rese. Ēgüe yahe Espiritu yande pītiviisa pipe iyavei Jesús rese yeroyasa pipe avei. ⁶ Esepia, acoi yaicose Jesucristo rese, yepē yayembocircuncidase, anise ndayayembocircuncidase, ahe ndayande pītivii eté yande reco catupri āgua Tūpa rovaque. Co güeraño rumo yande pītivii Jesús rese yande yeroyasa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndaheí eté rumo pe poravasar Tūpa ēgüe ehi pēu. ⁹ ¿Ndapecuai vo acoi aipo ehi vahe: “Chīhimi pan mboapepasa oso panguā rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pihañemoñeta āgua che pihañemoñetasa rupi. Tūpa rumo omboura oñemoirosa que ava pe mbopihañemoñeta yoavirati uca vahe upe.

¹¹ Che rumo, che rivireta, “Iya yayembocircuncida yande reco catupri āgua” ahe vītese Jesús reroyasar upe viña, ahese revo ndipoi chira che amotarēhisar judío pāhuve, ahese avei ndipoi chira ñehesa curusu rese Jesús manosa resendar amotarēhimbar ipāhuve viña. ¹² Evocoi ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepeí reseve yuvireco!

¹³ Esepia, pe ore rivireta, Tūpa niha pe renoi mbuguai tēi nungar pe recosa sui pe renose āgua. Ndaheí chira rumo pe remimbotarai tēi apo āgua, iyacatu rumo peñepitiviira pe yeaisusa pipe. ¹⁴ Esepia, opacatu evocoi mborocuita imboaviyasa yamboaviyese co ñehesa aipo ehi vahe: “Esaisu ambuae ava nde yeaisu nungar” ehi vahe. ¹⁵ Peyeseñi tetei rene catu; peicua catu, aviyeteramo ēgüe peyese, pe recocuer pemomara pa tiētera.

Yaguatara Espiritu remimbotar rupi, ndaheí yande remimbotar tēi rupi

¹⁶ Pesendu che ñehe: Espiritu pīratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tūpa Espiritu remimbotar rese. Ndoymbohe catu eté. Sese ndapeyapo ucai mbahe pe remimbotar avīye vahe peyeupe. ¹⁸ Acoi Espiritu ité pe reroguatase, ahese ndahe iri chiaveira Moisés porocuitavri ve peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehepoepi-episa iyavei ambuae ava mbahe pota raisa; ñemoiro seraisa, yemboyaho-yahosa, pihañemoñeta yoyaēhisa, ²¹ iyavei ambuae ava mbahe pota raisa rese ñemoirosa, savaiposa, yembopieta tēisa iyavei ambuae mbahe co nungar tupri aposa. ¡Peicua catu! Esepia, evocoi nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espiritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboycuara yande cuaita mboaviyesa, ²³ yayemominiñora iyavei yande recorā rese yañearo tupri. Evocoi nungar yayapose, ndipoi eté que mborocuita pipe yande yeamotarēhi āgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opihañemoñeta raisa avei no. ²⁵ Yande yaicose Espiritu pīratasa rese, ahese Espiritu rupi eté yaguatara.

²⁶ Ndayayemboivate ai chira. Esepia, ipipe sui yayeamotarēhi, yaipotā rai avei yande mboetasa recocuer nungar yande reco āgua.

6

Peñepitivii ñepeí-peí

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espiritu rese, peipītivii secocuer moingatu āgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiētera. ² Peñepitivi-tivii catu que mbahe yavai rai vahe rese. Ēgüe peyese, Jesucristo porocuita pemboaviyera.

³ Amove ava, “Che ivate catu vahe aico” ehi tēi. Ēgüe ehi rumo ahe ae oyembopa aipo ohesa pipe oico. ⁴ Sese niha ñepeí-peí eté yaicua tupri yande recocuer. Aviyese,

evocoiyase sese yavharetera. Ndahei acoi ambuae ava recocuer rese tēi yamboyyara yande recocuer. ⁵ Esepia, ñepi-pei eté yande yacatu yareco yande cuaita imboaviye āgua.

⁶ Acoi oyembohe vahe Tūpa ñehes pīsirosa resendar rese, tomondo ombohesar upe mbahe güembierco ipitívii āgua.

⁷ Peyembopa eme catu pe ae. Ndpioi chietera que ava viroiro vahe Tūpa ñemoirosa pisiēhisa pipe. Ēgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apirēhi vahe. Acoi oyapo vahe mbahe Espiritu remimbotar rupi, ahe oipisira tecovesa apirēhi vahe yuvireco. ⁹ Evocoiyase tayandecuerai eme mbahe tupri aposa pipe. Esepia, acoi ndayandecueraise, yaipisira mbahe tupri apo repri. ¹⁰ Sese yande catugüer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pēu! ¹² Acoi judío Jesús reroyasar pe mbocircuncida uca potaño tēi vahe ‘Co mbia aviye ité, tehi ndahei vahe Jesús reroyasar judío yuvireco yandeu’ ohesa pipe tēi ēgüe ehi yuvireco viña. Esepia, ndoipotai evocoi judío oamotarēhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tēi vahe avei rumo nomboaviyei eté opacatu mborocuaite yuvireco. Oipota rumo pe mbocircuncida ucara oyemboivate ai āgua pe cuaise evocoi nungar apo yuvireco. ¹⁴ Che rumo ndayemboivate potai eté. Curusu rese yande Yar Jesucristo mano agüer rese güeraño ité ayemboviha. Imano agüer sui co ivi pipendar mbahe pota raisa opa ité che sui. Che evocoiyase inungar omano vahe aico chupe. ¹⁵ Yepe que yayembocircuncidase revo, anise que ndayayembocircuncidaise viña, ndayande pitívii eté Cristo rese yaico tupri āgua. Co rumo aviye vahe ité yandeu: Tūpa yande recocuer mbopiasuse. ¹⁶ Opacatu yuvirecoi vahe co ñehesa che remimombegüer rupi iyavei opacatu Tūpa upendar supi eté vahe toipisi Tūpa suindar teco tuprisa iyavei iporoparisuerecosa yuvireco.

¹⁷ Aviye, co pipe suive ndaipota iri que ava che mañeco tēi vaherā. Esepia, che areco che retocuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PNDAR UPE EFESIOS

Pablo mahenduhasa Jesús reroyasar Efeso pndar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pndar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri āgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoēhi vitesese 'toyuvirecoi cheu nara ité iyavei tasecomara eme yuvireco che rovaque' oyapave oporoaisusa pipe. ⁵ Ipipe avei yipisuive yande pisi guahirguā Jesucristo yande pisirosa pipe güemimbotar rupi. ⁶ Sese yande yasapucái chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pisiro Guahir ruvi piyeresasa pipe yande angaipa rese ñero āgua. ⁸ Yande raisu pipe avei ombou opacatu yande aracua āgua iyavei yande yapisaca āgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporā mboaviye āgua. ¹⁰ Oyeopotase ahe ari imboaviye āgua, Tūpa opacatu mbahe iva pndar, co ivi pipendar avei opara omingue ñepeí reseve Guahir Cristo povrive.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi āgua. Opacatu rumo mbahe Tūpa remimbotar rupi. Ahe niha oicua ité güemimbotar apo āgua ¹² 'tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase' oya oreu. ¹³ Pe avei niha, pesenduse co ñehesa supí eté vahe pisirosa resendar, Cristo peroya pe piha pipe sese peico vaherā. Tūpa ombou güemimombegüer Espiritu Santo pe piha pipe 'cheundar ité yuvirecoi' oya. ¹⁴ Ipisasa pipe niha yaicua yande yaipisi vaherā yandeundar mbahe imoingatupri, acoi Tūpa opase oipisiro ava oyeupendar 'ipipe sui tomboetei che reco ivatesa ava yuvireco' oya.

Pablo oporandu Tūpa upe mbahecuaasa Jesús reroyasareta upe mondo āgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, "Aviye ndeu" che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape āgua rese. Ipipe peicua tupri catura semimboyecua iyavei peicua tupri catura yande Yar. ¹⁸ Ēgüe ahe ité aporandu Tūpa upe pe piha resape āgua rese. Ipipe peicua catura co pesāro vahe ivave pe reique āgua; chupe nara ité Tūpa pe peha. Iyavei peicuara co mbahe imondopirā iva pndar iporañete vahe Tūpa upendar yuvirecoi vahe upe. ¹⁹⁻²⁰ Ipipe sui peicua tupri aveira Tūpa pīratasa ndopai vahe yande seroyasar yaico vahe rese. Co pīratasa ivaté vahe ité. Ahe pīratasa Tūpa omboyecua, ombogüerayevise Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pndar, ivi pndar seco ivate vahe mborerecuarecuar tēi pīratasa sui iyavei opacatu cūriteindar sui, que oime vaherā sui avei. ²² Opacatu mbahe omondo Guahir Cristo povrive, Tahir upe avei ombou mborerecuar ivate catu vahe seco āgua opacatu víroyasar upe. ²³ Opacatu yande seroyasar yaico vahe recocuer rese Cristo secoi. Evocoiyase yande setecuer nungar yaico. Ahe opacatu rupi secoi.

2

Tūpa oporovasasa pipe yande pisiro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñetasa rupi tēi peico iyavei ivate rupindar carugar rerecuar porocuaíta tēi avei peroya, ahe Jesús reroyasarēhi ombohe vahe. ³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoirosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu eteprí avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove āgua. Ahe oporovasasa pipe yande pisiro. ⁶ Yande mbogüerayevi iri avei niha sese. Ipare seseve yande moingue oyeperí ivave ⁷ 'tamboyecua opacatu iva pndar upe che porovasasa iyavei che poroaisusa tuvicha vahe che Rahir rembiapo pipe sui curi' oya. ⁸ Esepia, oporovasasa pipe pe pisiro Jesús rese peyeroyase. Ndaheí rumo pe recocuer sui tēi peñepisiro, ahe rumo ombou pororecosa pēu. ⁹ Ndaheí avei ava rembiapo sui tēi ou vahe. Evocoiyase ndiyai chira

yayemboivate ai ipipe. ¹⁰Tüpa niha yande recocuer mohivi Jesucristo rese yande reco ägua mbahe icatupri vahe apo ägua. Ahe mbahe icatupri vahe yipisuive Tüpa omoime yande rembiaporã.

Cristo ombou yande reco tupri ägua

¹¹Evocoyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tüpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tüpa rembiporavo imbocircuncidapri yaico” ehi yuvireco). ¹²Peyemomahenduha yipindar Cristo ndaperecoi vahe rese. Ahese ndapeicoi Tüpa rembiporavo Israel recua pendar iyavei ndapecuai Tüpa remimbotar semimombehu avei ombou vahe judío upe ipitívii ägua; ndaperecoi Tüpa iyavei ndaperecoi särosa pe ñepisiro ägua co ivi pipe viña. ¹³Esepia, ahese amombri Tüpa sui peico. Cüritei rumo Jesucristo rese peico. Esepia, ahe vuví pipe pe reru Vu Tüpa upe. ¹⁴Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepepe vahe nungar yande yeamotarēhiēhi iri ägua oyeupe. Yande ñemoirosa niha opa omocañi yande sui güetecuer mondosa pipe. ¹⁵Cristo omomba opacatu Moisés porocuaíta. Ahe ipota ñepepe ava nungar teco piasu pipe yande reco ägua, judío iyavei ndahei vahe judío. Ēgüe ehi imocañipa yande yeamotarēhisa yande sui yande reco tupri ägua. ¹⁶Evocoyase ahe ae omanose curusu rese, ombou yandeu yandeyeupe ñero ägua judío, ndahei vahe judío ñepepe ava nungar Tüpa rupi yande reco ägua.

¹⁷Ahe ou omombehu co tecocuer piasu pēu pe amombri Tüpa sui peico vahe, omombehu avei ore namombrii vahe judío oroico vahe upe “tñifero yuvireco oyeupe” oya. ¹⁸Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboya vaheerã Tüpa rese Espiritu ñepepe vahe pipe. ¹⁹Sese pe ambuae ivi pendar peico vahe, ndahe iri amombri Tüpa sui peico cute. Cüritei rumo Tüpa upendi ite peico opacatu ambuae seroyasar reseve. Yande evocoyase ñepepe reseve oñemu guasu vahe nungar yaico. ²⁰Pe inungar tüparo maranehi imopuhambri ihivipirã hari pendar peico; apóstol iyavei Tüpa ñehe mombehusar evocoyase inungar ihivipi yuvirecoi tüparo moviraca ägua. Jesucristo rumo inungar ita yipindar vahe imohivisa yandeu. ²¹Ichui Cristo opa yande mboyeseha oyese, inungar oi imopuhambri oyeupi catu-catu iri vahe tüparoguã, Ēgüe yahe ipehapri yaico yande Yar upe nara sese ité yande reco ägua. ²²Sese niha, Cristo rese peicoese, pe ambuae viroyasar rese avei sētarã nungar peico. Ipipe Tüpa, oEspiritu pipe, secoira.

3

Pablo cuaita ñehesa pīsirosa resendar mombehu ägua ava ndahei vahe judío upe

¹Sese, che Pablo, soquendapri aico cohabe Jesucristo recocuer mombehusa sui tēi. Ndahei vahe judío peico vahe pe recocuer aviye ägua rese Ēgüe ahe. ²Peicua tupri revo co che poraviquisa Tüpa ombou vahe cheu oporovasasa mombehu ägua pēu nara. ³Co ñehesa yipindar ndicuasai vahe güemimbotar resendar Tüpa omboyecua uca vahe cheu, ahe niha aicuachía chíhi pēu. ⁴Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵Co ñehesa icatupri vahe ndoicuai eté ava yuvireco aracahe. Cüritei rumo Tüpa oEspiritu pipe omboyecua güembipeha yuvirecoi vahe upe. Ahe sembipeha apóstol, iñehe mombehusar avei yuvirecoi. ⁶Evocoi oyecua ramo vahe, ahe co: pe ndahei vahe judío upe avei Tüpa omboura judío upendar nungar tupri porovasasa co ñehesa poropīsirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tüpa remimombehugüer arachendar peyeroyase Jesucristo rese.

⁷Yepe ndiyai cheu viña, Tüpa rumo che moingo opīratasa pipe ñehesa pīsirosa resendar mombehu ägua. ⁸Che recocuer niha ivi coti catu opacatu ambuae Tüpa reroyasar sui viña, ahe rumo ombou oporovasasa co mboraviquisa ñehesa aviye vahe Cristo recocuer resendar mombehu ägua ava ndahei vahe judío upe nara cheu. ⁹Iyavei ombou che cuaitarã amombehu tupri vaheerã opacatu ava upe opacatu mbahe Aposar pihañemoñetasa yipindar ndicuasai vahe. ¹⁰Ēgüe ehi cüritei yesuindar aracuasa cua uca ägua viroyasareta recocuer rese opacatu mborerecur guasu, seco pīrata vahe iva pendar upe. ¹¹Ēgüe ehi, Tüpa opihañemoñeta ndopai vahe mboaviye Guahir, yande Yar Jesucristo rese. ¹²Sese yande yeroyasa suiño ité yaicatu yande yemboya ägua Tüpa rese yande siquiyeēhisa pipe. ¹³Sese aní chira, ndapequerēhi iri Cristo rupi pe guata ägua, pe recocuer rese che yemombaraisusa sui. Iyacatu rumo che paraisusa pereco pe yemboviha ägua.

Cristo poroaisusa

¹⁴Sese añenopiha yande Ru Tüpa rovaque. ¹⁵Ichui serer pāve víreco yuvireco, opacatu seroyasareta iva pendar, ivi pendar avei ñepepe oñemu yuvirecoi vahe nungar. ¹⁶Che

aporandu chupe ‘tombou güeco porañetesa sui opĩratasa yuvireco chupe oEspĩritu pipe imoviracua āgua’ viya pēu. ¹⁷ Ēgüe ahe ayeroqui pe rese pe piha pipe Cristo rereco āgua sese pe yeroyasa pipe. Iyavei pe poroaisusa pipe pe yemoviracua catu āgua peyese ¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu āgua yuvireco’ viya pēu. ¹⁹ Che ayeroqui ahe poroaisusa peicua tupri catu āgua rese (yeye ndayacatui icuapu tupri āgua yaico viña). Ipise sui Tūpa tasecoi pe rese.

²⁰ Cũritei yamboetei yande Ru Tūpa. Esepia niha, ahe opĩratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opĩratasa pipe oporaviqui yande rese. ²¹ ¡Sese ēgüe tehi imboeteipri Tūpa tasecoi seroyasareta recocuer sui, Jesucristo sui avei apirēhi vaherā!

4

Ava Espĩritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. ² Peyemominira peico pe reco aviyesa pipe, pe reco mbegüesa pipe aveira iyavei peñemosañe pe yeaisusa pipe peyeupe. ³ Peyapo opacatu pe recocuer pipe peico tupri vite āgua peypāhuve Espĩritu Santo pe pĩtiviisa pipe, pe reco tuprira pipe avei. ⁴ Yaico ñepeini nungar Cristo rese iyavei yareco ñepeini Espĩritu. Ēgüe ehi avei Tūpa yande poravo ñepeini guārosa rereco āgua. ⁵ Oime ñepeini yande Yar, ñepeini yande yeroyasa, oime avei ñepeini poroāpiramosa. ⁶ Oime ñepeini Tūpa, ahe opacatu yande Ru, opacatu yande cauaisar, ahe oporaviqui opacatu yande rese, secoi avei yande rese no.

⁷ Iyavei Cristo niha yande yacatu ñepeini-peini mbahecuasa ombou. ⁸ Sese aipo ehi icuachiapri aracahendar pipe:

“Oso ivave, viraso secopipireta oyeupi; omondo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe. ¹⁰ Acoi ogüeyi vahe co ivi pipe oso ivate casutave ‘taico opacatu rupi’ oya. ¹¹ Ahe niha ombou amove apóstol seco āgua, ambuae upe ombou Vu ñehe mombehu āgua, ambuae upe ombou ñehesa pisirosa mombehu āgua, ombou avei ambuae upe viroyasar rāro āgua iyavei iporombohe āgua. ¹² Ēgüe ehi ava viroyasar mbohe oyeupe mboraviqui apo ambuae viroyasar moviracua tupri catu āgua. ¹³ Opacatu yaico tupri rane itera oyese Jesús rese yeroyasa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoiyase ndahe iri chira chĩhivahe tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoiyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, ēgüe ehi ahe yande mboyemboya oyese ñepeini vahe nungar. Ñepeini-peini yaporaviqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe, ¹⁸ ndoicatu mbahe renducua tupri āgua iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetañehisa pipe yuvireco. ¹⁹ Ndoyvinochi iri mbahe ite apo āgua iyavei oyemondo ite mbahe tēi pipe. Ndosiquiyei eté opacatu güemimbotarai apo āgua yuvireco. ²⁰ Pe rumo ndapeyembohe eté evocoi nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohesa secocuer rese. ²² Ahe yande mbohe yande recocuerai yipindar vahe reya āgua. Esepia, ahe naporai vahe yande mbopa tēi yande pihañemoñeta rai apo āgua. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tūpa yande apo yande reco ivi tupri āgua yande reco maranehi vaherā supi tupri vahe pipe, inungar ahe.

²⁵ Sese ndaperemira iri chira, iya rumo peñehe ñepeini-peini mbahe supi tupri vahe rese peyeupe. Esepia niha, yande opacatu ñepeini ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Carugar upe peyeupe mbahe apo āgua.

²⁸ Acoi imonda rai vahe, timonda iri eme; toporaviquiño ava iparaisu vahe pĩtivi āgua.

²⁹ Ndapeñehe rai chira, iyacatu rumo peñehe tuprira ñehesa aviye vahe pipe ambuae pe ñehe rendusar monguerēhi catu āgua yuvireco yande Yar rese. ³⁰ Peyapoi rene mbahe

Espíritu Santo mbovihaēhi āgua. Ahe niha Tūpa ombou yandeu ‘toicua ava co cheundar oipisira ari ipa vahe pipe poropisirosa ñepeí reseve vahe yuvireco’ oya.

³¹ Peyepépi co nungar mbahe sui: piha víracuasa, mbahe mboasi píratasa, ñemoirosa, pe rāse aisa, opacatu pe ñehe rai, opacatu ambuae mbahe-mbahe tēi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tūpa iñero Guahir Cristo rese pēu.

5

Mara ehira ava Tūpa rahir yuvireco

¹ Pe niha Tūpa rahir sembiaisu peico. Sese peyemonguerēhi catu secocuer moña āgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovēhepri Tūpa uve. Ahe aviye ité inungar mbahe siacua vahe chupe.

³ Pe niha Tūpa upendar ité peico. Sese ndapeyemboaguasai chintera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ēgüe ehi tēi vahe rese, anise que co coti-coti tēi vahe rese. Esepia, evocoi nungar ndahei mbahe aviye vahe. “Aviye ndeu” peye catuñora rumo Tūpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evocoi nungar ndoyuvirecoi chira Tūpa povrive iyavei Tahir Cristo povrive. ⁶ Ndapeyembopa ucai chira evocoi nungar ñehesa tecocuer ēgüe ehi tēi vahe upe. Esepia, evocoi nungar mbahe apo pipe sui ou Tūpa ñemoirosa ava seroyasarēhi upe. ⁷ Sese ndapeyemboyai chira evocoi nungar ava rese.

⁸ Peicua niha yipindar peico pítumimbisa nungar mbahe-mbahe tēi pipe. Cūrítei rumo peico tesapesa nungar pipe yande Yar rese. Sese peico tupriño ité Tūpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ívi tuprisave, mbahe supí tupri vahe pipe. ¹⁰ Sese peyembohe catu mbahe Tūpa piha rupindar apo āgua rese. ¹¹ Peyepépi ité opacatu pítumimbisa nungar ava rembiapo ai, ēgüe ehi tēi vahe sui. Iya peicua uca vaira co nungar mbahe. ¹² Esepia, ahe sembiapo yemochisa ñomipri tēi víreco yuvireco. ¹³ Acoi yamboyecua ucasa rumo evocoi nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa mboyecua tupri opacatu mbahe recocuer yandeu. Sese aipo ehi: “Peyemopoāse pe oque vahe nungar, peyepépi omano vahe nungar pāhu sui. Ahese niha Cristo pe recocuer resapera” ehi.

¹⁵ Sese pemahecia tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. ¹⁶ Peiporu catu ñepeí-peí ari yande Yar upe nara pe recove-seve. Esepia, cūrítei tecocuer co ívi pipe mbahe tēi. ¹⁷ Sese peico eme ndoyemboaracuai vahe; iya rumo peyembohe catu yande Yar remimbotar apo āgua. ¹⁸ Ndahei chira caguar tēi peico, evocoi mbahe ndoporopoisui mbahe tēi apo uca āgua. Peico catura rumo Espíritu Santo pe mbohesa pipe. ¹⁹ Peñehe catu Salmu pipe, opacatu Tūpa upendar sapucaisa pipe avei peyeupe; pesapucái, pemboetei avei opacatu pe piha pipe yande Yar. ²⁰ “Aviye” peyera opacatu mbahe rese yande Ru Tūpa upe yande Yar Jesucristo rer pipe yepi.

Omenda vahe cuaitarā mbiguai reseve

²¹ Peyemboyeroa catu ambuae rese Cristo mboeteisa pipe peico. ²² Cuña tomboyeroa omer, inungar yande Yar omboyeroa yuvireco. ²³ Esepia, imer güembireco cuai āgua secói, ēgüe ehi avei niha Cristo viroyasar cuai āgua oico. Viroyasar písirosar avei secói, inungar güetecuer ité sereco. ²⁴ Evocoiyase inungar seroyasar omboyeroa Cristo yuvireco, cuña avei niha ēgüe ehira opacatu omer mboyeroa yuvireco.

²⁵ Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. ²⁶ ēgüe ehi yande recocuer moatiro yande angaipu sui i pipe Tūpa ñehengagüer reroysave. ²⁷ Iyavei oyeupe yande rerecora yande reco catuprisa pipe iyavei yande reco quihāēhisa pipe ‘tipo eme que mbahe tēi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. ²⁸ ēgüe ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. ²⁹ Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua āgua, ofñero tupri avei. ēgüe ehi avei Cristo opacatu viroyasar upe. ³⁰ Esepia, chupendar ité yaico setecuer nungar. ³¹ “Sese ava osepara vu, osi güembireco rese güeco āgua; ñuvirío yuvirecoira ñepeí ava nungar.” ³² Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. ³³ ēgüe ehi eté ñepeí-peí pesaisu pe rembireco pe yeaisu nungar. Iyavei cuña tomboetei tupri omer yuvireco.

6

¹ Chīhivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. ² Co porocuaita yīpīndar omombehu vahe porovasasa pisi āgua imboaviyesa pipe aipo ehi: “Pemboeteira pe ru, pe si avei. ³ Ēgüe peyese, pe rorivetera iyavei pe reco pāhumbucu catura co ivi pipe” ehi.

⁴ Iyavei pe iyésupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pemboyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaheṛā viña. ⁶⁻⁷ Pe poraviqui tupri catu chupe nara, ndahei chira rumo pe repiaseño imboviha āgua tēi; pe poraviquira rumo pe querēhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri āgua. ⁸ Esepia, peicua Tūpa omboepira opacatu yandeu yayapose mbahe aviye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiēhisa pipe. Peicua niha pe opacatu Tūpa pe rerecuar ivave chini vahe povrive peicose. Ahe niha ndayande raisu yoaviratīi yande rereco.

Ava Cristo rese yuvirecoi vahe yoepisa resendar

¹⁰ Sese peyemoviracua catu yande Yar rese, ipīratasa rese avei. ¹¹ Peñearo tupri catu Tūpa pīratasa pipe pe yemoviracua āgua Carugar pe mbopa tēiēhi āgua. ¹² Esepia, yande ndahei ava ité amotarēhise yayepihamoviracua. Yande rumo yayepihamoviracua espíritu naporai vahe ndoyecuai vahe upe iyavei co ivi pipendar Carugar ipīrata vahe pītumimbisa pendar roeryaēhi āgua. ¹³ Sese peipisi catu opacatu mbahe Tūpa ombou vahe pēu pe yoepi āgua. Evocoiyase yepe oime tēira mbahe tēi pēu viña, peyemoviracuaño itera rumo chupe.

¹⁴ Ēgüe peye aveira peyemoviracua catu ñehesa supi tupri vahe pipe. Iyavei peyoepira pe reco ivi tupri sa pipe. ¹⁵ Peyemoingatu voi Tūpa Ñehengagüer ñeroisa resendar mombehu āgua yepi. ¹⁶ Iyavei pereco catu Tūpa rese pe yeroyasa peyese. Ahe inungar sundao yoepisa. Ipīpe peyoepira carugar uhu tata resendar nungar pe ātoisa sui. ¹⁷ Poropisirosa inungar sundao āca ndiru, ipipe tapeyoepi; peiporu avei Tūpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu pīratasa pipe ari yacatu rupi Tūpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tūpa roeryasar rese yepi. ¹⁹ Peyeroqui avei che rese. Evocoiyase Tūpa tombou che ñehē āgua cheu che siquiyēhisa pipe ñehesa ñepisirosa icuapi ramo vahe cua uca āgua ava eta upe. ²⁰ Tūpa niha che cuai co ñehesa mombehu āgua. Ichui tēi cūrīte soquendapri aico. Peyeroqui catu che rese che siquiyēhisa pipe co ñehesa mombehu āgua.

Ñehesa ipa vahe

²¹ Yande rivri Tíquico, yande rembiaisu, che pītivisar omboaviye vahe ocuaita yande Yar upe mboraviquisa rese, ahe omombehura opacatu che recocuer, mbahe che rembiapo avei pēu. ²² Sese amondo eipeve pēu ore recocuer mombehu āgua ‘ipipe toyemonguerēhi catu yuvireco’ viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri āgua, iporoaisu āgua, oyese yeroya āgua avei. ²⁴ Tūpa tosovasa opacatu yande Yar Jesucristo raisupar saisusa ñepeī reseve vahe pipe. Aipo rupive.

PABLO REMBICUACHIA FILIPO PENDAR UPE FILIPENSES

Pablo mahenduhasa Jesús reroyasar Filipino pendar upe

¹ Che, Pablo, iyavei Timoteo oroico Jesucristo rembiguai. Aicuachia co che ñehe pëu, pe Tüpa upendar Jesucristo rese peico vahe tecua Filipino ve, Jesús reroyasar rãrosar uve, seroyasar rese ihañeco vahe upe avei. ² Yande Ru Tüpa, yande Yar Jesucristo tape rovasa pe reco tupri ägua.

Pablo yeruresa Jesús reroyasar rese

³ Pe rese che mahenduhasa pipe, “Aviye ndeu” ahe Tüpa upe yepi. ⁴ Iyavei che ayerurese, ari rupi ayeroqui opacatu pe rese Tüpa upe che viharetesa pipe yepi. ⁵ Esepia, oyoya yañepitivi Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tüpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyeveise yande Yar Jesucristo.

⁷ Aviye ité aipo rupi che pihañemoñeta areco opacatu pe rese. Esepia, che opoaisu ité. Opacatu niha oyoya yaipisi Tüpa porovasasa yepe co che roquendasave ai, anise que co coti rupi aico mborerecuar rovai co ñehesa písirosa resendar repi ägua iyavei amboyecua vaherã ahe ñehesa supi tupri vahe yuvireco chupe. ⁸ Tüpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tüpa upe che yeruresa pipe: “Toicua tupri oaracuasa pipe oyeaisu catu-catu iri ägua yuvireco” ahe pëu. ¹⁰ Ipipe sui peicuaru mbahe aviye catu vahe poravo ägua yepi; ägüe peye aveira pe recocuer moatiro ägua peico. Evocoiyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye ité Jesucristo ombou vahe pëu Tüpa mboetei ägua.

Cristo Pablo recovesa ité secoi

¹² Che rivireta, aipota peicuaru co mbahe tõi co oyapo vahe yuvireco cheu, ahe ichui setã catu ava osendura Jesucristo resendar ñehesa yuvireco. ¹³ Evocoiyase opacatu mborerecuar guasu poraviquisa pendar iyavei opacatu ambuae ava oicua che roquendasu Jesucristo rupi che guata sui tõi yuvireco. ¹⁴ Iyavei setã etepri yande rivri che repiase soquendapri che recose yuvireco, oyemonguerëhi catu Tüpa Ñehengäuer mombehu ägua osiquiyëhisa pipe. Yande Yar rese evocoiyase oyeroyã catu yuvireco.

¹⁵ Supi eté oime ava oñehe angahu tõi vahe Jesucristo rese che reroirosa pipe tõi. Oime rumo amove ava oñehe tupri Jesucristo rese opihañemoñeta tuprisa pipe. ¹⁶ Evocoi ava oñehe tupri oporoaisusa pipe, ahe oicua cohawe che roquendasu yuvireco, “Co ñehesa Tüpa ñehe písirosa resendar, ahe supi eté vahe, ndahei temira tõi” ahesa. ¹⁷ Evocoi ambuae ava Cristo rese oñehe angahu tõi vahe oyeupe nara tõi oipota mbahe. Ahe che reco momara pota catu co che roquendasave che rõi viteseve. ¹⁸ Mara etemo che areco aipo mbahe-mbahe tõi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mboviha.

Che mboviha catu aveira. ¹⁹ Esepia, che aicua co opacatu mbahe-mbahe tõi sui añepisiora pe yeruresa pipe iyavei che pítiviira Jesucristo Espiritu. ²⁰ Che aipota ité, asãro avei opacatu che recocuer sui che chïhï ägua añehe vaherã opacatu che siquiyëhisa pipe. Evocoiyase yepe amanora, anise aicovera, tomboetei catu ava Cristo che recocuer repiase yuvireco. ²¹ Esepia, Cristo che recovesa ité secoi; amanose rumo, aviyeño itera cheu. ²² Aicove vitese co ivi pipe, aicatura aporaviqui tupri yande Yar recocuer rese. Evocoiyase ndaicuai uma revo aviyaera cheu. ²³ Ndaicatu co ñuvirio che pihañemoñetasa rereco: amove amano pota che so ägua ivave Cristo piri. Ahe aviye catura cheu viña. ²⁴ Pëu nara rumo aviye catu aicove vitese co ivi pipe. ²⁵ Sese che aicua aicove vite vaherã pe pítivi vite ägua, pe guata tupri vite catu ägua iyavei pe viharete catu ägua pe Jesús reroyasa pipe. ²⁶ Evocoiyase che rereco vitera peye pe piri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviye vahe Jesucristo resendar rese. Evocoiyase asose pe repia, anise amombri aicose pe sui, asendu pota pe resendar ñehesa aviye vahe, pe yemoviracuasa resendar, pe pihañemoñetasa yoyasa resendar iyavei pe poraviqui pïratasa resendar pe poreroyasave co ñehesa poropísirosa resendar rese. ²⁸ Iyavei ndapeyembosiquiyei chira pe amotarëhimbar sui. Evocoiyase ahe oicuaru yuvireco chupe ité Tüpa omondora imocañi ägua; pe rumo Tüpa pe písiora curi. ²⁹ Supi eté ndahei Jesucristo recocuer reroya ägua güeraño Tüpa oipota pëu, sese pe yemombaraisu ägua avei oipota. ³⁰ Esepia, pe, che avei oyoya tupri yaporaviqui pïrata yande amotarëhimbar

pāhuve yaico. Iyavei acoi pesepia yipindar che aporaviqui pīrata che amotarēhimbar pāhuve vichico, iyavei cūríte peyandu mara ahe aporaviqui pīrata vīte ipāhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerēhi, pe mboviha oporoaisusa pipe oico, Espiritu avei secoi pe rese. Peyeaisu tupri iyavei pe yeaisusa pipe peñepitivii. ² Sese che mboviha catu peye: perecora pihañemoñetasa ñepei reseve, oyoya guasu avei peyeaisura, oyoya aveira pe pihañemoñetasa, ñepei reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae aviye catu perecora peyesui. ⁴ Pesecai rene mbahe aviye vahe peyeupe nara güeraño; iyacatu rumo peseca avei mbahe aviye vahe ambuae ava reco tupri āgua.

⁵ Inungar Cristo pihañemoñeta, ēgüe peye tupri aveira.

⁶ Yepe ahe Tūpa recocuer vireco, “Taseya eme Tūpa recocuer areco vahe ivive che so āgua” ndehi.

⁷ Opa ité rumo oseya, oyemboava inungar mbiguai tēi ou.

⁸ Ēgüe ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse ‘toñenopiha opacatu iva pendar, ivi pīpendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tūpa mboetei āgua yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisur, yepe che amombri aico pe sui viña, iya rumo pe che reroya vīte ité peye inungar aicose pe pāhuve cuese. Che aipota peicora písirosa pipeño ité Tūpa mboeteisave ichui pe siquiyesa pipe. ¹³ Esepia, Tūpa ombou pe querēhisa semimbotar apo āgua. Güemimbotar rupi avei ombou pīratasa imboaviye āgua pēu.

¹⁴ Peyapo opacatu mbahe pe ñehe-ñehe tēihisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pāhuve. Ahe ipāhuve pe recocuer osesapera, inungar tataendi osesape pītumimbisave. ¹⁶ Pemombehuse ñehesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ēgüe ndehi tēi vaherā. ¹⁷⁻¹⁸ Jesucristo recocuer rese pe yeroyasa, ahe inungar mbahe seropovēhepri Tūpa upe. Aviyeteramo ichui tēi che yucara yuvireco. Ahe omboaviye tupri itera pe porerecosa Tūpa upe. Yepe che yucara yuvireco viña, che rumo ayembovihañora opacatu pe rese. Pe avei, pevihanora che rese.

Pablo oicuachía Timoteo, Epafrodito recocuer resendar

¹⁹ Che ayeroya yande Yar Jesús rese amondo pihavi vaherā Timoteo pe repia. Ahe omboeyevise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pihañemoñetasa rupi tupri imahenduha vahe pe rese pe reco tupri āgua. ²¹ Esepia, opacatu oseca güemimbotar tēi apo āgua, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che pītivii Tūpa Ñehengagüer mombehu āgua, inungar chihivahe oipītivii oyesupa, ēgüe ehi che pītivii oico. ²³ Sese che aipota imondo āgua pe repia acoi aicuase mara ehira cheereco yuvireco. ²⁴ Che rumo ayeroya yande Yar rese aso pihavi vaherā che teieté pe repia.

²⁵ Iyavei revo aviye catu co yande rivri Epafrodito amboeyevira pe piri ahe pembou vahe che pītivii āgua mbahe cheu ipane vahe rese. Ahe che ndugüer oporaviqui pīrata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi. ²⁷ Supi eté imbaheasi oico, seni eté omano viña. Ipore rumo Tūpa oiparaisuereco, ndahei ahe güeraño oipītivii, che avei che paraisuereco co viharēhisa yeapi-apifioēhi āgua cheu. ²⁸ Sese che amondo pota poyava ité pe piri sese pe yemboviha iri āgua, che mboviha iri āgua avei. ²⁹ Peipisi tupri pēu iyepotase pe viharetesa pipe. Esepia, ahe yande rivri yande Yar rese secoi vahe ité. Pesaisu itera evocoi nungar ava yepi. ³⁰ Yande Yar rese oporaviquise che piri seni omano. Ahe niha oyemondo ité mbahe-mbahe tēi porara āgua che pītivii pipe. Esepia, pe ité ndapeicatu che pītivii peye.

3

Oicoete ai vahe ité

¹ Iyavei, che rivireta, peyembovihaño yande Yar rese peicose. Ndachecuerai eté ñehesa aicuachía vahecuer cuachía iri água pëu. Iyavei aviye catu ité pëu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tüpa mboyeroyasar yaico. Esepia, yayerure Espiritu pipe Tüpa upe; yayemboviha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evocoi nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoyase ayembohe tupri fariseo aracuaa judío porocuaita resendar rese vichico. ⁶ Ipipe sui tēi eté aseca-seca catu ayapo vahe rā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviye ité cheu aracaco viña. Cūrtei rumo Jesucristo rese aicose, ēgüe ehi tēi vahe nungar areco. ⁸ Iyavei opacatu que ambuae mbahe aviye cheu viña, areco rumo inungar iti che Yar Jesucristo recocuer cuasa pipe. Opacatu ahe mbahe aseya Cristo rese che reco água. Supi eté Cristo rereco água areco opacatu ambuae mbahe iti nungar tēi ⁹ ‘taico sese’ che yapave. Ndahei porocuaita mboaviyasa rese tēi aseca che reco catupri água, che rumo aseca Jesucristo rese che yeroyasa pipe sui ēgüe ahe vahe rā. ēgüe ehi eté Tüpa che pisi seco catupri vahe nungar Cristo rese che yeroyasa pipe. ¹⁰ Che aipota ité Cristo va tu tupri catu água. Iyavei areco pota pīratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ēgüe ahe pota avei. ¹¹ ēgüe tahe avei che cuerayevi água omano vahe pāhu sui, ahe co che asāro vichico.

Pablo osupiti pota ité güeco maranehi água

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chintera. Che rumo aseca vite ahe tecocuer che recorā. Esepia, Jesucristo che pisi ité oyeupe nara. ¹³ Che rivireta, “Che ae tēi co tecocuer ihīvi vahe opa ité ayapo vichico” ndahei chira pëu. Co rumo mbahe che ayapo, ayemboesarai opacatu che reco agüer sui. Iyavei opacatu che recovasa rese aguata tenondeño ité. ¹⁴ Esepia, Tüpa che renoi ivave che so água aipisi vahe rā iporrecosa iva pendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tüpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pëu, cūrtei amboyevi iri che yasehosa pipe imombehu pëu. Setá ité oime ava co ñehesa Cristo mano agüer curusu resendar amotarēhimbar. ¹⁹ Ahe rumo imocañipirā yuvirecoira curi. Oyemonguerēhi opacatu mbahe tēi apo água rese yuvireco yepi. Ahe niha otüpa nungar ité vireco. Iyavei güeco ivate aisa pipe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité ipihañemoñeta yuvireco. ²⁰ Yande rumo ivave nara ité yaico. Iyavei yasāro ité yaico iva sui ou vahe rā yande Pīsirosar, ahe yande Yar Jesucristo. ²¹ Ahe opīratasa pipe virecora opacatu mbahe opovrive. Ahe opīratasa pipe avei osecuñaropara yande retecuer ēgüe ehi tēi vahe, ahese inungar ahe setecuer sendi yai, nimarai vahe, ēgüe vahe aveira yande yaico.

4

Yayemboviha yande Yar rese yepi

¹ Sese che rivireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porrecosa imboupi peico cheu. Esepia, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroyasa pipe yuvireco. ³ Nde niha che pītivii tupri vahecuer che poraviquisa rese eve. Eipītivii evocoi cuña. Esepia, ahe niha oyembopihaviracua ité che pītivise Tüpa Ñhengagüer pīsirosa resendar mombehu água yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tüpa cuachiar tecovasa apirēhi vahe resendar pipe.

⁴ Peyemboviharete ari yacatu rupi yande Yar rese yepi, “iPeyembovihaño ité!” ahe aipo pëu. ⁵ Pemboyecua catu opacatu ava upe pe reco mbegüesa. Esepia, cōimi yande Yar yevi iri água yandeu.

⁶ “¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evocoi nungar mbahe rese Tūpa uve, peporandura evocoi mbahe rese iyavei, “Aviye ndeu” peyera chupe. ⁷ Evocoyase Tūpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipīpe sui Tūpa osārora pe piha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rivireta: yande pihañemoñetara opacatu mbahe supi tupri vahe rese, poromboetei āgua rese, mbahe ihīvi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tūpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou āgua cheu. “Sesarai yuvireco che sui” ndahei chira pēu. Pe rumo yīpindar ndapeicatu eté che pītīvii āgua peye. ¹¹ “Ipane mbahe cheu” ndahei chira pēu. Esepia, ayembohe che viharete āgua mbahe che rembiereco rese. ¹² Aicua mara yahe yande paraisusa pipe yaico, aicua avei mara yahe mbahe rereco ati āgua. Ayembohe avei che viha āgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua āgua. Esepia, Cristo ombou che pīrata āgua. ¹⁴ Pe rumo peyapo mbahe aviye vahe cheu che pītīvii eteprisave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yīpindar peipisise pīsīrosa resendar Tūpa Ñehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pītīvii āgua. ¹⁶ Iyavei aicose Tesalónica ve, pembou pe porerecosa cheu ñuvirío yupagüer che pītīvii āgua. ¹⁷ Ndachepihañemoñetai mbahe arocuano tēi vaherā pe sui. Che rumo aipota Tūpa omboyevira pēu co pe porerecosa pembou vahe cheu. ¹⁸ Che opa aipisi pe porerecosa Epafrodito upe pembou vahe. Evocoyase oimeño ité iyavei sumbire vite cheu. Ahe pembou vahe cheu aviye ité, inungar itaisi śiacua vahe, iyavei inungar mbahe seropovēhepri aviye vahe Tūpa upe. ¹⁹ Evocoyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe. ²⁰ ¡Ēgüe tehi timboeteisa yande Ru Tūpa! ¡Ahe apīrēhi vahe secoi yepi!

Ñehesa ipa vahe

²¹ Aviye, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu. ²² Iyavei opacatu ambuae yuvirecoi vahe cohava Jesús reroyasar iyavei acoi mborerecuar guasu rētave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rivri Timoteo reseve.
² Co aicuachia pēu, pe Cristo rese peico tupri vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tupri āgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esepia, oroyandu acoi oyepota ramosē Tūpa ñehe supi eté vahe, aviye vahe písirosa resendar pēu, peyapisaca tupri sese. Ipipe sui peyeroya ivave pe reique āgua Tūpa porerecosā písi āgua. Ahe ichui peyeroya tupri Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu ivi rupi, setá ava oipisi tupri avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tupri catu ahe porovasasa supi eté vahe. ⁷ Co ñehesa yande rembiaisu yande mboetasa Epafras pe mbohe. Ahe mbia yande Yar Jesucristo rese oporaviqui vahe ore rupi, ocuaita viroya tupri vahe pe pāhuve. ⁸ Ahe omombehu oreu Espiritu pipe pe ore raisusa resendar.

⁹ Sese avei ore aipo nungar rendu ramosēve ndoroyeroquipai pe rese. Oroyeroqui, oroporandu pe rese ‘toicua tupri opacatu Tūpa remimbotar ombahecuasa Espiritu suindar pipe, senducua tupriasa pipe avei yuvireco’ ore yapave pēu. ¹⁰ Ipipe sui tapeguata tupri yande Yar rupi reroyasar tupri pe recosa pipe. Tapemboaviye tupri opacatu semimbotar; mbahe pe rembiapo tupri pereco catu sovaque. Ipipe sui avei tapeicua tupri catu Tūpa recocuer peico. ¹¹ Iyavei tombou catu pe momirata āgua güecocuer pīratasa pipe sui. Evocoyase oimese que mbahe tēi pēu, peñemosañora pe reco mbegüesa pipe. ¹² “Aviye ndeu” peyera pe viharetasa pipe yande Ru Tūpa uve. Esepia, ahe omoingatu pe recocuer peipisi āgua iporerecosā oime vaherā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande písiro Carugar povri sui. Ēgüe ehi yande reraso Guahir güembiaisu povrive. ¹⁴ Ahe Tahir yande písiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboyecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerrecuar; mborerrecuar guasu iyavei mborerrecuar ivate catu vahe. Ēgüe ehi ipipe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeñhi vitesēve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei ‘che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei’ oya. Ēgüe ehi Jesús oipiyere vuvi curusu rese Tūpa upe opacatu mbahe moingatu āgua.

²¹ Yipindar pe pihañemoñeta raisa pipe sui tēi amombri Tūpa sui peico yamotarēhisa pipe mbahe pe rembiapo ai rese. ²² Cūrítei rumo Tūpa iñero pēu pe reroyevi oyeupe Cristo mano pipe. Ahe niha Ēgüe ehi Vu rovai ipehapri pe rereco oyeupe nara, pe reco marañehi āgua mbahe aviēhisa pipe ava rovaque. ²³ Ēgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepipi chiveira mbahe oime vaherā rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuapri, aico co ñehesa mombehu āgua.

Pablo icuaita Jesús reroyasar rese hañeco āgua

²⁴ Cūrítei aviha pe rese che yemomborarsa pipe. Ēgüe ahe iporara che rete rese cohawe vichico. Ēgüe ehi avei Cristo oyemomborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pītivii āgua niha Tūpa che cuai. Sese amombehu opacatu iñehengagüer pēu pe reco tupri āgua rese. ²⁶ Ahe ñehesa aracahe suive ndicuasai vahe ité. Cūrítei rumo Tūpa omboyecua viroyasar upe. ²⁷ Chupe ité omboyecua pota co ñehesa porañete vahe omboyecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vahe rā teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe ‘toyuvirecoi tupri ité Cristo rese Tūpa rovai’ ore hesa pipe. ²⁹ Co rese niha che aporaviqui etepri opacatu Cristo pīratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparēhi recocuer rese avei ² ‘toyemonguerēhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pēu. Esepia, ichui avei peicua tupri co mbahe imboyecuapi ramo, ahe niha Cristo. ³ Ahe vireco opacatu mbahe yande mboaracua āgua, mbahe renducua tupri āgua avei. ⁴ Aipo mbahe amombehu pēu ava oñehe tupri aisa pipe tēi pe mbopaēhi āgua. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ĩvisa pipe, ndapeyepēise co coti rupi Jesucristo reroyasa sui. Sese che mbovihareteño ité peye.

Jesús suindar tecocuer piasu

⁶ Evocoiyase inungar acoi peipisi Jesucristo pe Yarā, ēgüe peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Tūpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe ēgüe ehi tēi vahe, ava suindar tēi yembohesa, ivi pendar ava seco ivate catu vahe pihañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Tūpa reco oyese. ¹⁰ Evocoiyase pe pereco Tūpa reco Cristo rese peicose. Ahe opacatu mborerecuar ivi pipendar iyavei iva pendar rerecuar secoi. ¹¹ Iyavei sese peicose, ahesē inungar imboircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocuā pe recocuerai pe sui. ¹² Pe āpiramosa pipe ndoyavii pe recocuerai ñotimbri Cristo reseve. Ēgüe ehi avei ndoyavii pe recocuer ocuerayevi vahe seseve avei, peyeroyase Tūpa pīratasa rese. Ahe niha ombogūerayevi vahe Guahir omano vahe pāhu sui. ¹³ Pe niha acoi cuese omano vahe nungar peico Tūpa upe pe angaipa pipe, pe ndahei vahe judío peico vahe. Ahe rumo pe recocuer mbogūerayevi Guahir reseve iyavei iñero pe angaipa rese pēu. ¹⁴ Ahe yande cañi rāgüer rumo opa omboepi. Esepia, yande iporocuaita pipe yaico imboaviye āgua viña, evocoiyase imocañipri tēi yaico ipovrive viña; ombou rumo Guahir curusu rese yatica āgua yande cañi rāgüer sui yande renose āgua. ¹⁵ Ēgüe ehi ehi omano pipe curusu rese caruguar, ipovri pendar mborerecuareta reseve secoi. Ēgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoiyase toñehe-ñehe tēi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osē ramomi vahe, anise que judío ari mbituhusa avei no. ¹⁷ Esepia, opacatu co mbahe, ahe yipindar vahe, “Ēgüe ehira Cristo ou” hesa tēi yandeu. Co rumo Cristo ité cute. ¹⁸ Peyapisacai rene acoi ava “ndapeipisii chira porerecosa iva pendar ndaperoyaise ore ñehe” ehi tēi vahe rese pēu. Acoi ava “Tūpa rembiguai pemboeteira” ehi tēi vahe yuvireco. Ahe avei, “Che seco mbegüe vahe aico” ehi angahu tēi. Iyavei, “Che asepia che quer nungar pipe iva pendar mbahe” ehi tēi. Esepia, ahe oyemboivate ai oaracua rai tēisa pipe yuvireco. ¹⁹ Evocoi rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepe vahe nungar vireco oyeupe Vu Tūpa remimbotar rupi.

²⁰ Pe omano vahe nungar peico Cristo rese. Evocoiyase ndahe iri co ivi pipendar pihañemoñetasavrive peico. ¿Mahera evocoiyase peroya vite co ivi pipendar porocuaita ēgüe ehi tēi vahe, ²¹ inungar “pepocoi rene co mbahe rese, pehui rene evocoi nungar mbahe” ehi tēi vahe? ²² Opacatu co nungar porocuaita ocañi tēi vahe. Esepia, ahe ava remimbotar tēi yembohesa, iporocuaita tēi avei. ²³ Co mbahe aviye angahu aracuasa supi eté vahe. Esepia, seroyasar ahe ehiiño oyeruresa uve, oyeecomomini tēi iyavei omombaraisu güetecuer yuvireco viña. Ahe aracuasa rumo ēgüe ehi tēi vahe. Esepia, ndayande pītivii eté yande yepepi āgua yande remimbotarai sui.

3

¹ Cūrítei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oi güeco mborerecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tēi. ³ Esepia, cūrítei omano vahe nungar peico pe recocuerai upe. Iyavei Cristo reseve peico

Tūpa piri, inungar-ra ivave viña. ⁴ Cristo niha yande recovesa ité secoi. Sese ahe oyevei irise curi, ěgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemoirosa oipisira seroyaěhisa pipe yuvireco. ⁷ ěgüe peye avei yipindar pe recocuerai pipe peico. ⁸ Cūrítei rumo peseya opacatu co mbahe-mbahe tēi: pe ñemoirosa, pe poroyucaí aisa, pe reco raisa, pe ñehe mara-mara tēisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviye vahe. Ipipe peyembohe ari yacatu yande Aposar Tūpa recocuer rese peico, icua tupri catu āgua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chori”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ ěgüe peyera peñemosa oyeupe, peñero aveira opacatu oyeupe acoi pe pāhu pendar oñemoirose pēu. Inungar Cristo ñerosa ombou yandeu, pe avei ěgüe peyera ambuae ava upe. ¹⁴ Iyavei peyeyaisu catura. Esepia, ahe yande mboyemboya tupri oyese yepi. ¹⁵ Acoi tecu tuprisa Cristo ombou vahe pēu, tape mbohe pe pihañemoñeta tupri āgua. Esepia, co rese Tūpa pe renoi ñepeí ava nungar pe reco āgua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerēhi catu sapucaisa Tūpa resendar rese. Pesapucaí opacatu sapucaisa Tūpa upendar pe pihá pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñehe vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upe yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei no imer: pesaisu pe rembireco. Perecoi rene pihaviracuasa pipe.

²⁰ Pe avei no chñihavahe: peroya aveira pe yesupa. Esepia, ahe yande Yar oipota. ²¹ Pe avei no tu: pemoñemoiro ucaí rene pe rahir peyeupe. Esepia, aviyeteramo niquerēhi iri chira ocuaise pēu.

²² Pe avei no mbiguai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquiyesa pipe avei. ²³ Opacatu mbahe peyapo vahe, peyapo pe querēhisave yande Yar mboviha āgua. Ndahei chira ava mboviha āgua tēi. ²⁴ Esepia, peicua tupri co: yande Yar omboura oporeciosa yandeundar. Esepia niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai reprí. Tūpa niha nomboyoaviratii yande raisu.

4

¹ Pe avei serecuar: peyapo mbahe ihivi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

² Iyavei no opacatu peyerocui catu ari rupi pe mahemohasa pipe. “Aviye ndeu” peye Tūpa upe. ³ Peyeroqui avei ore rese. Tore pitivii Tūpa oñehengagüer mombehu vite āgua. Toroñehe vite avei co ñehesa Cristo resendar Tūpa omboyecua ramo vahe rese yandeu. Sese tēi niha co che roquendasa. ⁴ Evocoyase peyerocui che rese, tamombehu tupri catu co ñehesa opacatu upe senducua tupri catu āgua. ěgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviye viteseve. ⁶ Pe reco aviye tuprisa pipe peñehera yepi. Iyavei peicua tuprira ñehesa mboyeví āgua ñepeí-peí ava uve.

Ñehesa ipa vahe

⁷ Co yande rivri, yande rembiaisu, Tíquico, che pitivii tuprisar, ahe oporaviqui tupri yande Yar recocuer rese che rupi. Ahe omombehura che recocuer resendar pēu. ⁸ Sese co amondo

pëu ore recocuer cua tupri ãgua, pe monguerëhi catu ãgua avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirio mbia omombehura pëu opacatu mbahe oime vahe cohava.

¹⁰ Aristarco, che ndugüer che roquendasave, omondo omahenduhasa pëu iyavei Marcos, Bernabé rihir. Pe revo peicuaño Marcos so ãgua eipeve; oose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pëu. Co güerañomi Jesús reroyasar pãhüve judío oporaviqui vahe che rupi yuvireco Tüpa mborerecuasave nara. Ahe niha che mboviha yuvireco yepi. ¹² Epafras avei omondo omahenduhasa pëu. Ahe pe recua pendar ité, Jesucristo rembiguai. Ahe oyerogui vahe pe rese yepi 'toyemoviracua tupri iyavei toyuvirecoi Tüpa remimbotar rupi yuvireco' oyapave. ¹³ Che aicua ité secocuer. Ahe oyemboaqüi oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pëu.

¹⁵ Pemboaviravemi eipeve yande rivri Laodicea pendar oreu, cuña Ninfa serer vahe avei iyavei opacatu oñemonuha vahe Tüpa reroyasar yuvireco. ¹⁶ Peyeroquire, pemondo co cuachiar Laodicea pendar Jesús reroyasar upe iyeroqui ãgua. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: "Emboaviye tupri Tüpa nde cuaisa" ere.

¹⁸ Che Pablo aico. Che ité aicuachía co che mahenduhasa pëu. Tapemahenduha vite che roquendasave che rese. Aviye pëu. Yande Aposar tape pítiviñ. Aipo rupive.

PABLO REMBICUACHIA YIPINDAR VAHE TESALONICA PNDAR UPE TESALONICENSSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano reseve iyavei Timoteo, aicuachía co che ñehe pëu, ore rivireta, peñemonuha vahe Tüpa upe tecua Tesalónica ve, yande Ru Tüpa, yande Yar Jesucristo rese peico vahe. Tape rovasa pe reco tupri água yande Ru Tüpa, yande Yar Jesucristo avei.

Tesalónica pndar yeroyasa resendar ñehesa

² Ore, “Aviye ndeu” orohe ari rupi Tüpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe pepyapo mbahe Tüpa upe, iyavei peñemosañño mbahe tēi upe Jesucristo rārosa pereco vahe rese. Sese oremahenduha pe rese ari yacatu rupi yande Ru Tüpa rovai. ⁴ Ore rivireta, Tüpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa písirosa resendar, ndahei ñehesa oreyesuindar tēi oromombehu pēu; Espiritu Santo reco pīratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriñño ité, orosecaño avei pe reco tupri água.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiñño ité rumo co ñehesa pe vihasa pipe Espiritu Santo ombou vahe pēu. ⁷ Evocoya pe reco pipe pemboycua catu pe reco catuprisa Tüpa reroyasar Macedonia pndar upe, Acaya pndar upe avei. ⁸ Esepia, pe Tüpa ñehe peicua uca Macedonia rupi, Acaya rupi avei. Ndahei rumo co rupiñño, opacatu rupi avei oicua yuvireco Tüpa reroyasa pereco vahe peyese. Sese ore ndorombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe piri, pe ore pisi tupri agüer avei. Iyavei omombehu mbahe rahanga sui pe poi agüer Tüpa oicove vahe rupi pe guatasa yuvireco, pe chupe nara mbahe apo água avei no. ¹⁰ Omombehu avei pesāro vahe Tüpa Rahir Jesús iyevi água iva sui yuvireco oreu, acoi Tüpa ombogüeravevi vahe omano vahe pāhu sui. Ahe niha yande písirora Tüpa ñemoirosa ipīrata vahe ou vaherā sui.

2

Tesalónica pndar yeroyasa mboycuasa

¹ Ore rivireta, pe niha peicua ore so agüer pe piri ndahei ĕgüe ehi tēi vahe. ² Peicua tupri avei niha acoi cuese yipindar mara-mara tēi ava ore rereco yuvireco tecua Filipino ve. Tüpa rumo ore pītivii oñehengagüer písirosa resendar mombehu água opacatu ore siquiyēñisa pipe ore amotarēhimbar pāhuve. ³ Esepia, ndoroyavii eté ore ñehe iyavei ndoroñehei ore pihañemoñeta raisa tēi pipe pēu, ndahei avei ore porombopa água oroñehe. ⁴ Tüpa rumo ore recoāha, ichui ore cuai oñehengagüer písirosa resendar mombehu água; ĕgüe ehi ore ñehe, ndahei ava tēi mboviha água. Tüpa yande pihañemoñetasā oicua vahe rumo oromboviha. ⁵ Peicua niha ore ndoroñehei ñehesa icatupri catu vahe tēi rese pe mbopa água, iyavei ndahei guarepochi potasave tēi oroñehe tupri. Tüpa niha oicua. ⁶ Ore ndorosecai eté ava ore mboetei catu água pe, que ambuae ava eta avei no. ⁷ Ehi oroyandu ucara ore mborerecuasa Jesucristo ore cuaisa pēu viña; oroyominiñño rumo oroico pe pāhuve inungar acoi cuña osāro tupri vahe omembri imboacua. ⁸ ĕgüe orohe avei ore pe raisu. Sese ndahei Tüpa Ñehengagüer año oromondo pota pēu, ore recocuer avei no. Esepia, opoaisú ité. ⁹ Ore rivireta, peyemomahenduha acoi ore paraisu agüer rese, ore poraviqui agüer rese avei ari, pītu reseve. Ndahei que ñepepi mañeco tēi água mbahe rese oromombehu Tüpa Ñehengagüer oroico pēu.

¹⁰ Pe niha ore repia peye Tüpa avei oicua, ore reco tuprisa, ore rembiapo supi eté vahe, ihivi vahe pe Jesús reroyasar pāhuve. ¹¹⁻¹² Peicua niha, inungar mbia guahir upe, ĕgüe orohe pe monguerēñi, pe mbovihasa avei ñepepi-pei opacatu. Iyavei oromondo pe cuaitarā pe reco tupri água Tüpa remimbotar rupi. Ahe niha oñehe pēu peico vaherā sese imborerecuasa porañetesave.

¹³ Co rese, “Aviye ndeu” orohe Tüpa upe ari yacatu rupi. Esepia, Tüpa Ñehengagüer, oromombehu vahe pēu, peipisi ité, “Co Tüpa ñehe, ndahei ava tēi ñehe” aipo peye ité pe chupe. Supi eté Tüpa ñehe. Ahe niha osecaño ité pe recocuer peroyare. ¹⁴ Ore rivireta, acoi cuese peiporara mbahe-mbahe tēi pe mu eta pāhuve peicose; ĕgüe ehi tupri avei Jesús

reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotarêhisave yuvireco. ¹⁵ Ahe niha oyuca yande Yar Jesús yuvireco. Ahe avei oyucapa Tûpa ñehe mombehusar yuvireco aracahe. Ore avei opa ore mombo yuvireco. Ndoviroyai Tûpa yuvireco iyavei opacatu ava amotarêhimbar têi yuvirecoi. ¹⁶ Esepia, acoi oroñehe potase ava ndahei vahe judío upe iñepisiro âgua rese, ahe rumo ndoipotai yuvireco oreu. Ipípe sui oyemboangaipa catu yuvireco. Cûritei rumo Tûpa ñemoirosa ipîrata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepipi raimise yandeyesui, ore piha pipe rumo, “Ahé” oroheño ité pëu. Iyavei orequerêhiño ité yepi oroso iri vaherã pe repia. ¹⁸ Orosãha têi ore so âgua pe repia yepi; che Pablo teieté setã yupagüer têi aso pota. Carugar rumo ndoipotai. ¹⁹ ¿Ava sui piha orosãro mbahe aviye vahe? ¿Uma ore vîhasa? ¿Uma ore mbovîharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovîhara peye, iyavei oroviha catura pe rese no.

3

¹⁻² Evocoyase che nañemoso irise pe repiaêhi rese, chepihañemoñeta yande riviri Timoteo mondo âgua pe repia; “Che güeraño tapita Atenas ve” ahe. Esepia niha, ahe oporaviqui vahe Tûpa upe ore rupi, omombehu vahe co ñehesa písirosa resendar Cristo suindar ou vahe. Ahe amondo pëu pe moviracua catu âgua, pe monguerêhi catu âgua avei peyeroya catu vaherã Cristo rese. ³ Evocoyase tipo eme oyembosiquiye vahe co mbahe têi pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico vîtese pe piri, “Yande paraisu rane itera mbahe yavai vahe” orohe voi eté acoi pëu. Ahe niha cûritei peicua. ⁵ Evocoyase che nañemoso irise, amondo Timoteo ‘¿yuvirecoiño ité piha Tûpa rese?’ che yapave. Che asiquiye, “Aviyeteramo Carugar omondora mbahe têi piye yuvireco” ahe ‘ore poraviqui agüer evocoyase ocañi têira’ che hesave.

⁶ Cûritei rumo Timoteo oyevi Tesalónica sui, güero ñehesa aviye vahe pe resendar oreu pe Tûpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota têi peye no; inungar ore pe repiasa pota têi avei. ⁷ Sese, ore rivireta, ore paraisusa pâhuve ore mbovîharete peye, co oroicuse pe reco tupri Tûpa reroyasa pipe. ⁸ Cûritei ore mopoase catu iri oroyanduse pe yemoviracua tuprisa yande Yar rese. ⁹ “¿Mara yahera piha, ‘Aviye ndeu’ yande he tupri catu âgua Tûpa upe?” orohe pe reco tuprisa rese, iyavei ore yemboviha catura rese avei no ¹⁰ pítu, ari rupi oroporandu Tûpa upe ore so âgua pe repia eipeve iyavei Tûpa reroyasa ipane vîte vahe mboaviye tupri âgua pëu.

¹¹ Iyavei ore oroipota ore pîtivira yande Ru Tûpa, yande Yar Jesucristo avei ore so âgua pe piri. ¹² Evocoyase yande Yar tape moviracua catu, tombou catu avei pe yeaisu âgua, iyavei opacatu raisu catu âgua, inungar ore orovireco pe raisusa. ¹³ Ipípe sui tape moviracua pe reco maranehi pipe pe mbahe aviêhisave yande Ru Tûpa rovai acoi oyevise yande Yar Jesús opacatu ovoya reseve. Êgüe tehi pëu.

4

Teco tupri Tûpa oipota

¹ Ore rivireta, cûritei oroñehe pota pëu pe cuaitarã rese yande Yar Jesús rer pipe: inungar cûritei pe recocuer pereco, êgüe peyeño ité catu peico ore pe mbohe agüer rupi Tûpa mboetei âgua.

² Pe niha, peicua acoi ore pe mbohe agüer yande Yar Jesús rer pipe. ³ Esepia, Tûpa oipota pe reco maranehi âgua oyeupe. “Tipo eme que ñepeí oyemboaguasa têi vahe” ehî. ⁴ Iyavei peico tupri pe rembireco rese pe reco ivisa pipe Tûpa remimbotar rupi, iyavei pemboetei tuprira sereco yepi. ⁵ Peicoi rene ava Tûpa ndoicuai vahe reco pipe pe remimbotar têi apo âgua. ⁶ Tipo eme avei oyapo vahe co nungar angaipa yande riviri reco momara âgua têi. Esepia, Tûpa omondora oñemoirosa ipîrata vahe evocoi nungar ava upe. Evocoi niha yipisuive oromombehu vahe pëu. ⁷ Esepia, Tûpa niha yande poravo yande reco maranehi âgua, ndahei angaipa pipe yande reco âgua têi. ⁸ Sese acoi ndosendu potai vahe co yembohesa, ndahei eté ava têi viroiro, ahe rumo Tûpa ité viroiro yuvireco acoi ombou vahe oEspíritu Santo pëu.

⁹ Iyavei co peyepãhuve pe yeaisusa rese, ndaicuachía iri chira pëu. Esepia, Tûpa ité niha pe mbohe pe yeaisu âgua opacatu. ¹⁰ Êgüe peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvîcha vîte catu pe poroaisusa. ¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco;

peporaviꝑui pe po pipe ité” aipo orohē acoi pēu cuese. ¹² Evocoiyase pe mboyeroyara ava ndahei vahe Jesús reroiyasar yuvireco; iyavei ēgūe peyera mbahe pēu ipaneñhi āgua avei no.

Oyevira yande Yar co ivi pipe

¹³ Ore rivireta, ore oroipota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoiyase yande avei yaroya Tūpa Guahir Jesucristo reseve ombogūerayevira opacatu acoi seroyasa pipe omano vahe yuvireco.

¹⁵ Sese co oromobehu pēu, ahe niha yande Yar porombohesa: yande yaicove vite vahe co ivi pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogūeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe piratasa. Ahese seroyasar omano vahecuer rane opūhara yuvireco. ¹⁷ Ipare voi yande yaicove vite vahe, serasopri yaicora opacatu iva quiha rese co yande Yar rovañchi āgua ivitu rupi. Ēgūe yahera yande Yar piri yaico vaheṛā apirēhi. ¹⁸ Sese peyemonguerēhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu. ² Esepia, pe peicua tupri co yande Yar ari oyepotara imohaēhisa pipe, inungar acoi imonda rai vahe oyepota pītu pipe. ³ Acoi ava aipo ehise yuvireco: “Opacatu aviye ité yaico, ndipo iri mbahe-mbahe tēi yandeu” ehise, ahese inungar acoi cuña imembirasi aviyeteramo tēi, ēgūe ehi aveira, aviyeteramo tēi icañi oura iharive, ahese ndoicatu chira ichui oñemi yuvireco. ⁴ Pe rumo, ore rivireta, ndahei pītumimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pītumimbi pipendar yaico. ⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pītu pipe; iyavei acoi osavaipo vahe, osavaipo avei pītu pipe yuvireco. ⁸ Yande rumo yaico vahe Tūpa poroesapesa pipe. Evocoiyase yareco tuprira yande pihañemoñetasa yande reco tupri āgua yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oāca ndiru guarepochi apopri yuvireco oāca repi āgua, yande avei tayareco yande remiario yande ñepisiro āgua. ⁹ Esepia niha, Tūpa yande poravo ndahei yaico vaheṛā iñemoirosa pipe nara; ahe rumo yande poravo yasupiti vaheṛā ñepisirosa yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco āgua opacatu yande recove vitesē, yamanose avei. ¹¹ Sese peyemonguerēhi catu, iyavei peyemoviracua vite peyeupe inungar co peyapo peico.

Pablo omboaracua Jesús reroiyasar oico

¹² Iyavei no, ore rivireta, pemboyeroya acoi oporaviꝑui vahe yuvireco pe pāhuve. Ahe niha pe cuai vahe yuvireco, iyavei pe mboaracua vahe yande Yar uve nara yuvireco.

¹³ Pemboyeroya iyavei pesaisu tuprira iporaviꝑuisa rese. Peico tupri avei peyepāhuve.

¹⁴ Iyavei ore rivireta, pe cuaisa: pemboaracua acoi ndoporaviꝑui potai vahe imbohe catu āgua. Iyavei pemonguerēhi acoi niquerēhi iri vahe. Peipītivi avei acoi ndoyemoviracuai vahe Tūpa rese gūeco āgua. Iyavei peñemosañō opacatu ava uve yepi.

¹⁵ Peicua catu pe rereco megua potasar sui. Ndapemboyevii chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyembovihañora ari yacatu peico. ¹⁷ Iyavei peyeroquirā ari yacatu rupi no. ¹⁸ “Aviye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

¹⁹ Iyavei ndapembōituhui chira mbahe Espiritu Santo oyapo pota vahe pe rese. ²⁰ Ndapeyamotarēhi chira Tūpa ñehe imombehupri. ²¹ Pesāhapa rane opacatu mbahe. Ichui peipisira mbahe aviye vahe peyeupe. ²² Peyepēpi opacatu mbahe naporai vahe sui.

²³ Tūpa acoi ombou vahe teco tuprisa yandeu tape pēhapa tupri oyeupe nara. Iyavei tosāro tupri opacatu pe espíritu, pe hā, pe rete avei pe reco maranehi āgua co yande Yar Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroiyasar rese

²⁵ Ore rivireta, peyeroꝑui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yar rer pipe: peyeroꝑui co cuachiar opacatu yande rivireta upe.

²⁸Yande Yar Jesucristo tape rovasa tupriño pe rereco. Aipo rupive.

PABLO REMBICUACHIA IMON̄UVIROSIA TESALONICA PNDAR UPE TESALONICENSES

Pablo mahenduhasa Jesús reroyasar Tesalónica pndar upe

¹ Che, Pablo, Silvano, Timoteo reseve, aicuachía co ore ñehe p̄u, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou p̄u oporovasasa pe reco tupri āgua yande Ru Tūpa, yande Yar Jesucristo avei.

Tūpa omombaraisura viroyasarēhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise p̄u, peñemosañ chupe pe Cristo rese pe yeroyasa pipe. ⁵ Co niha omboyecua Tūpa reco īvisa ava upe. Esepia, ipipe pe rereco omborerecuasave pe rieque āgua. Sese niha, peparaisu vite tēi peico.

⁶ Tūpa omombaraisura acoi pe mombaraisurarer. Iya ité ēgüe ehi vaheṛā chupe. ⁷ Pe rumo imombaraisupri peico vahe, Tūpa omondora pe pituhu āgua, ore pituhu āgua avei, acoi yande Yar Jesús oyevise tata rendigüer p̄ahuve iva sui opacatu güembiguai seco p̄irata catu vahe reseve. ⁸ Ahe oura opacatu Vu Tūpa reroyasarēhi mombaraisu āgua iyavei oye-suindar ñehesa porop̄isirosa resendar rendu tēisar mombaraisu avei. ⁹ Evocoi iparaisura yuvireco, imocañipri yuvirecoira apirēhi. Iyavei imboyepepisara amombri yande Yar reco p̄iratas porañetesā sui. ¹⁰ Acoi ouse ahe ari pipe, yande Yar imboeteiprira opacatu seroyasar p̄ahuve; ip̄ahuve pe peicora. Esepia, peroya ité oromombhu vahe p̄u.

¹¹ Co rese oroyeroqui pe rese yepi: oroporandu yande Ru Tūpa upe tape rereco tupri gümienoi pe recosa pipe. Iyavei oroyeroqui chupe, tomboaviye güeco p̄iratas pipe opacatu ñepeipei mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombhu potami p̄u opacatu acoi yande Yar Jesucristo yevisa resendar yande monuha vaheṛā oyese. ² Peicua catu, tapepihanemoñeta rerova eme iyavei peyembosiquiyei rene que ava “che añehe Espiritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco p̄u. ³ Peicua catu peyembopa ucai rene ñepeipe yepa ava upe. Esepia, yipindar ari Jesucristo yu āgua renonde, yugüerura mbahe-mbahe tēi aposar. Ahe Tūpa amotarēhisar yuvirecoi vahe. Aheese oyemboyecua ara yangaipa guasu vahe. Ahe ocañi tēi vaheṛā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe p̄ahuve aico vitese cuese? ⁶ Co imombitasar peicua cūrtei. Iharī oyepotase voi, oyemboyecua. ⁷ Co porocuita amotarēhisar ndoyemboyecua vitei vahe rembiapo oime cūrtei. Co güeraño ipane imombitasar renose āgua ip̄ahu sui, ⁸ aheese voi oyemboyecua ara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer p̄iratas pipe oyevise curi. ⁹ Yucasa renonde rumo, acoi ava yangaipa guasu vahe oura Carugar p̄iratas pipe; güerura güeco p̄iratas tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa āgua oico ava ocañi tēi vaheṛā upe. Esepia, evocoi ava ndosendu potai porombohesa supi eté vahe oñepisiro āgua yuvireco. ¹¹ Sese Tūpa osevara co porombopasa reroya āgua yuvireco ¹² ‘ipipe tocañi tēi co ava, opacatu mbahe supi eté vahe reroyaēhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ip̄is̄iropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepia, Tūpa niha pe poravo yip̄is̄iive pe p̄is̄iro āgua pe reco marañehi āgua rese Espiritu pipe iyavei porombohesa supi eté vahe reroya āgua.

¹⁴ Sese niha, Tüpa oñehe yandeu yande piha pipe co ñehesa p̄sirosa resendar pipe, ore oromombehu vahe p̄u 'tovireco che Rahir Jesucristo reco porañetesa' oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroicuachía vahe acoi p̄u. ¹⁶ Yande Yar Jesucristo teieté, yande Ru Tüpa avei, yande raisusa yande rovasasa pipe ombou vahe vihasa apirēhi vahe yandeu iyavei yande reco tupri r̄oro āgua, ¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota p̄u: peyerogui ore rese. Evocoiyase toyepota pihaivi yande Yar ñehengagüer opacatu rupi; tipisisa tupri imboeteisa pipe inungar oyeypota pe p̄huve. ² Peyerure avei ore repi āgua rese ava ndaseco p̄rai vahe, ipihañemoñeta rai vahe sui. Esepia niha, ndaopacatui Tüpa rese ipihañemoñeta yuvireco. ³ Yande Yar rumo seco ïvi vahe. Ahe pe recocuer moviracuara iyavei pe r̄orora mbahe t̄i sui. ⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer. ⁵ Yande Yar tape pitivii pe poroaisu āgua inungar Tüpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe p̄huve, peyepiñi ichui, acoi ndoviroya potai vahe avei ore porombohesa oromombehu vahe p̄u. ⁷ Pe peicua mara peyera ore recocuer moña āgua peico. Ore oroicoose pe p̄huve, ndoroico t̄i, ⁸ ndorohu t̄i avei ambuae tembihu imboepipirēhi. Ore rumo que ñepe mañeco t̄iñi āgua rese oroporaviqui orecurai rane ité ari, pitu reseve. ⁹ Iya ité niha mbahe rese ore porandu āgua p̄u ore pitivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitesse pe p̄huve, oromondo pe cuaitarā: acoi ndoporaviqui potai vahe, ahe tocaru eme. ¹¹ Oroyandu amove aipo pe p̄hu pendar yuvirecoiño t̄i ndoporaviquii vahe. Evocoi omañeco t̄i ambuae ava recocuer. ¹² Ore oromondo acoi ava upe mborocuita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoi nungar. Peyemboya eme sese. Evocoiyase tochi ahe. ¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

¹⁶ Aviye, yande Yar ae tombou güeco tuprisa pe reco tupri āgua p̄u ari yacatu rupi opacatu pe reco pipe. Tasecoi pe rese ari yacatu.

¹⁷ Che, Pablo, aicuachía co mahenduhasa che po pipe ité p̄u. Che rembicuachía icuapri opacatu che cuachiar pipe. ¹⁸ Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachia che ñehe ndeu, Timoteo. Nde niha che rahir Tüpa reroyasa pipe ereico. Che niha Jesucristo apóstol aico, yande Písirosar Tüpa porocuita rupi iyavei yande Yar Jesucristo porocuita rupi. Ahe niha yande remiaro. Tombou yande Ru Tüpa, yande Yar Jesucristo oporovasasa, oporoparisuerecosa ndeu nde reco tupri ägua.

Pablo, “Eicua catu porombohesa co coti tēi vahe sui” ehi Timoteo upe

³ Iyavei acoi aipo ahe ndeu cuese che so ägua Macedonia ve: nde epita co tecua Efeso ve. Evocoyase eremboaracuara co ava co coti tēi oporomboaracua vahe, toporomboaracua eme pihañemoñetasa co coti-coti tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ägüe ehi tēi vahe rese avei. Ahe ichui osē yeacasa naporai vahe yepi; ndayande pitivii rumo Tüpa remimbotar reroya tupri ägua rese.

⁵ Sese co amondo porocuita ndeu yande yeaisu ägua yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepia, amove ava oime ichui oyearacua mocañi oñehe-ñehe tēisa pipe yuvireco. ⁷ Oporombohe pota tēi Tüpa porocuita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuita aviye ai eté yaiporuse Tüpa remimbotar rupi eté. ⁹ Yaicua avei acoi porocuita ndahei ava aviye vahe upe nara. Ahe rumo ndiporeroyai vahe mboaracua ägua, ndayaracua potai vahe upe nara, angaipa viyar upe nara avei, iyavei opacatu mbahe-mbahe tēi aposar upe nara, nombotei vahe Tüpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuita; imondosa avei opacatu porombohesa nimarai vahe amotarēhisar upe nara. ¹¹ Co porombohesa nimarai vahe oyoya tupri ñehesa porañete vahe poropísirosa resendar rese. Tüpa sovasapri secoi, ahe che cuai vahe sese.

Pablo oparisuerecosa rese, “Aviye ndeu” ehi Tüpa upe

¹² “Aviye ndeu” ahe yande Yar Jesucristo upe. Ahe niha ombou pīratasa co che ñehe ägua. Esepia, ahe oyeroya che rese. Sese che mondo oñehengagüer mombehu ägua. ¹³ Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotarēhimbave che yemboivate aisa pipe, Tüpa rumo, che paraisuerecoño. Esepia, che ahese, ndahe vitei Cristo reroyasar aico; ndaicua vitei mbahe ayapo vahe. ¹⁴ Ägüe ehi yande Yar ombou catu oporovasasa che rese iyavei ombou che oyese yeroya ägua iyavei che poroaisu ägua Jesucristo rese che recosa pipe.

¹⁵ Iya peroya co supi eté vahe, che apota avei opacatu oyapisacara yuvireco sese: Jesucristo ou co ivi pipe ava yangaipa vahe písiro ägua. Che rumo acoi ivate catu vahe yipindar aico ipāhuve. ¹⁶ Sese Tüpa che paraisuereco che rese rane Jesucristo reco mbegüe tuprisa mboyecua ägua. Ägüe ehi che recocuer upe ambuae ava seroya ägua. Ipipe sui osupitira tecovasa apirēhi vahe yuvireco. ¹⁷ Sese yamondo imboeteisa apirēhi yande Rerecuar ndopai vahe upe! ¡Ahe nomanoi vahe, ndayasepia vahe, ahe ñepe vahe Tüpa!

¹⁸⁻¹⁹ Che rahir Timoteo, co amondo nde cuaitarã ndeu nde reco moviracua ägua mbahe tēi recopi ägua Cristo rese nde yeroyasa pipe nde pihañemoñeta catuprisa pipe avei. Supi tupri cuese Tüpa reroyasar oñehe yuvireco nde rese serer pipe. Amove ava opihañemoñeta tupri reroyaēhisave, omocañi uca Tüpa rese oyeroyasa ²⁰ inungar vahe Himeneo rese, Alejandro yuvirecoi. Ahe che amondo Caraguar povrive ‘evocoyase toicua tüñehe-ñehe tēi eme Tüpa upe yamotarēhisave yuvireco’ che yapave.

2

Ñehesa yeruresa resendar

¹ Iyavei no, co che opomonguerēhi pe yerure ägua, peporandu, pemondo avei “aviye” pe hesa Tüpa upe opacatu ava recocuer rese. ² Iyavei peyerure opacatu mborerecuar rese. Evocoyase tayareco yande reco tupri Tüpa mboetei tuprisa pipe, yande poromboeteisa pipe avei. ³ Co aviye ité; ahe niha yande Písirosar Tüpa remimbotar. ⁴ Supi eté ahe oipota opacatu ava ñepísiro iyavei co porombohesa supi eté vahe cua tupri ägua. ⁵ Esepia, ñepeifio

ité Tūpa, iyavei ñepeño ité ava oicatu vahe yande reraso Tūpa upe: ahe Jesucristo. ⁶ Esepia, Jesucristo omano opacatu ava yangaipa vahe repirā ipísiro āgua. Ahe imombehusa chupendar ari iporavopri rupi. ⁷ Sese che supi eté apóstol, icuaipri aico Tūpa Ñehengagüer mombehu āgua, ava ndahei vahe judío mbohe āgua, co yeroyasa rese iyavei supi eté vahe rese. Supi eté ndopombopai.

⁸ Evocoiyase che aipota opacatu rupi ava toyerure yuvireco. Tomopuha opo yuvireco opihañemoñeta catuprisa pipe, ombahe mboasiēhisa pipe, oyeacaēhisa pipe avei. ⁹ Iyavei cuña toyemonde tupriño turucuarño tēi pipe yuvireco. Aní chira rumo oāca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomondo eme yuvireco. ¹⁰ Iyacatu rumo yuvirecoi tuprira güembiaipo aviye vahe pipe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehíi pāhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imboypapri; cuña rumo oyembopa uca. Ichui oviapi angaipa pipe. ¹⁵ Oñepisirota rumo ocuaita mboaviyasa pipe oyese yeroyasa rereco pipe, iporoaisusa pipe, güeco maranehisa pipe avei.

3

Tūpa reroyasar rārosar cuaita

¹ Iyavei co supi eté: acoi amove oico pota vahe Tūpa reroyasar rāro āgua, ahe oipota mboraviqui aviye catu vahe. ² Sese acoi vireco vahe ocuaita Tūpa reroyasar rāro āgua, ahe secoi tuprira mbahe aviye vahe pipe yepi. Ipipe ava noñehi chira yamotarēhisave. Iyavei omendara ñepeñi cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepiri ava oyepota vahe güētave. Oicua aveira ava mbohe tupri āgua. ³ Iyavei ndahei chira caguar tēi. Ndosecai chiaveira ovava āgua. Iyacatu rumo seco mbegüera opacatu ava upe. Ndoipota rai chiaveira guarepochi. ⁴ Iyavei oicua tuprira güēta pipendar rāro āgua. Ombohe aveira guahir iporeroya āgua, iporomboetei āgua avei. ⁵ Esepia, acoi ndoicuai vahe güēta pipendar rāro, ¿mara ehira evocoiyase Tūpa reroyasar rāro? ⁶ Tūpa reroyasar rārosar rumo ndahei chira oipisi ramo vahe Tūpa opiha pipe. Esepia, aviyeteramo oyemboivate ai tiētera. Ipipe sui imocañipri avei secoira Carugar nungar. ⁷ Iyavei oyecua uca tupri ranera Tūpa reroyasarēhi pāhuve. Ahe ndipoi chira imboeteiēhisa iyavei ndoviapi chira Carugar povrive.

Tūpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehi. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opihañemoñeta catuprisa pipe yuvireco. ¹⁰ Iyavei secoāhasa ranera. Acoi osē tuprise, ahe toyuvirecoi Tūpa reroyasar rese ihañeco vahe. ¹¹ Iyavei sembireco yuvirecoi aveira oporomboeteisa pipe, nimahechiroi chira, osāro tuprira güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeño itera sembireco, oicua aveira guahir rāro tupri āgua, güēta pipendar rāro āgua avei. ¹³ Esepia, Tūpa reroyasar rese hañecosar oyapo tuprise oporaviquisa yuvireco, ipipe sui imboyeroyasara. Osiquiyēhisave avei secoira Jesucristo reroyasa pipe.

Tūpa reco oyecua ramo vahe reroya tuprisa

¹⁴ Che aso pihaivi pota nde repia. Aicuachía rumo co che ñehi ndeu ¹⁵ acoi che aracahese, ereicuañora rumo pe reco tupri āgua ava Tūpa rese yuvirecoi vahe pāhuve; ahe acoi Tūpa oicove vahe upendar yuvirecoi, oyemoviracua tupri vahe yuvireco co porombohesa supi eté vahe mboyecua āgua. ¹⁶ Supi eté tuvichá etepri Tūpa reco oyecua ramo vahe reroya tuprisa:

Cristo oyemoporēhi yande reco nungar pipe yandeu.
Ipare Espiritu pipe imboyecuasa secocuer supi tupri vahe.
Iyavei Tūpa rembiguai rembiepiave secoi.
Ichui imombehusa opacatu ivi rupi; opacatu rupi avei seroyasa.
Iyavei ipisipri secoi ivave nara.

4

Oimera ava oyepipi vahe Tūpa rese oyeroyasa sui yuvireco coiye

¹ Iyavei Espiritu aipo ehi tupri yandeu: coiye, ari cañi renonde, amove ava oyepipira Tūpa rese oyeroyasa sui yuvireco. Imboyeroyara espíritu oporombopa tēi vahe, porombohesa Carugar suindar avei. ² Oyapisacara ava aipo ehi tēi vahe rese, semirañete ai vahe ñehi

rese avei yuvireco. Ēgüe ehira opihãñemoñetasã mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromoviracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu mbahe Tūpa rembiapo, aviye ité. Ahe ndiyai chira yarõiro yaipisise, “Aviye ndeu” yande hesa pipe chupe. ⁵ Esepia, Tūpa õñhe pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapísacai chira rumo acoi mbahe aracahendar co ivi pendar yapísaca tēisa rese. Eyembohe catu yande Yar uveño ité nde reco água. ⁸ Esepia, yepe aviyeño chíhi yande retecuer yamoviracua viña, yande Yar upe yande reco água aviye catu opacatu yande reco uve nara. Esepia, ahe yande pítiviira yande recove água cūrítei iyavei curi yande recove água. ⁹ Co supi eté vahe, evocoiyase yande yaroyara opacatu yepi. ¹⁰ Sese niha yaporaviquí etepri. Esepia, yande yayeroya ité Tūpa ndopai vahe rese, ahe opacatu ava Písirosar, iyavei viroyasar Písirosar catu ité secoi.

¹¹ Co porombohesa eremombehura ava pãhuve, erembohe aveira sese. ¹² Tipo eme ava nde reroiro vahe chíhivahe catu nde reco rese. Nde rumo ereico tuprira Tūpa reroyasar rovaque. Eñhe Tūpa reroyasave nde reco tuprísã pipe. Esaisu tupri nde yeroyasave nde recocuer marañhi pipe. ¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecuasa ombou vahe sui. Esepia, ava Jesús reroyasar rãrosar upe Tūpa omombehuse nde cuaitarã, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; yemoviracua sese ité nde hañeco. Acoi ěgüe erese, ipísiroproi ereicora; nde ñhehe rese oyapísaca vahe avei ipísiroproi yuvirecoira.

5

Mara ehira Jesús reroyasar oyepãhuve yuvireco

¹ Eremboaracua pĩrata eme mbia cuacuami. Iyacatu rumo eremboaracura mbegüe rupi inungar nde yesupa ité sereco. Iyavei mbia chíhivahe upe ereñhe tuprira secocuerã rese inungar nde rivri upe. ² Cuña otĩaro vahe upe avei ereñhe tuprira inungar nde si ité sereco; iyavei cuñatai eremboaracua tuprira inungar nde reindri ité ererocora opacatu nde reco catuprísã pipe.

³ Acoi imer mano vahecuer ité ereipítiviira que mbahe ipane vahe rese. ⁴ Que oimese imembri, anise que semiariro, toyembohe rane ocuaita mboaviye água yuvireco chupe. Ēgüe tehi guaisu mboeyvi chupe, ahe niha Tūpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tūpa rese, iyavei oyerokuñi ité ari, pĩtu yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi. ⁸ Acoi ava rumo nosaroi vahe omu; acoi güeta pipendar nosaroi vahe avei, ahe ndoguata iri Tūpa rese oyeroyasa rupi iyavei mbahe tēi catu Jesús reroyasarēhi sui.

⁹ Icuachiasara rumo ambuae cuña imer mano vahecuer pãhuve ivate catu sesenta sui iharaviter vahe, iyavei ñepeño ité omer vireco vahecuer. ¹⁰ Icuaprira secocuer icatuprísã rese, omboacua tuprísã chíhivahe oyesuindar, omoinguese ava güeta pipe, ihañecose ava Tūpa reroyasar rese ipi sei água, oipítiviise ava iparaisu vahe, oyapo tuprísã opacatu mbahe aviye vahe.

¹¹ Ereicuachía eme iharaviter ndosupitii vahe sesenta cuachiar pipe. Esepia, amove güemimbotar pipe tēi oyepipi Cristo sui, omenda yupagüe pota iri vahe. ¹² Ipipe oimera Tūpa poronupasa chupe. Esepia, yipindar oyemondo Tūpa upeño ité oyecuachiasẽ. Ipare rumo nomboaviyei eté õñhe. ¹³ Iyavei oi yacatu rupi tēi oguatase oico, ahese virecora oatēhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembri iri avei yuvireco, iyavei tosãro tupri güeta pipendar. Sese yamotarēhimbar secocuer ndahei chira õñehepora tēi vireco yuvireco. ¹⁵ Esepia, oime ité amove oyepipi vahe güemimbotar pipe Caruguar rupi güeco água.

¹⁶ Acoi oimese que cuña Tūpa reroyasar vireco vahe que cuña imer mano vahecuer oyeperi, ahe toipitivi yuvireco. Ahe sese evocoyase tūparo pendar nihañeco chira. Ahe se oicatura supi eté imu ndipoi vahe rese hañeco āgua yuvireco.

¹⁷ Iyavei acoi Tūpa reroyasar rārosar osāro tupri vahe, ahe toipisi catu ava poropitiviisa imboyeroyasave. Acoi oyemondo vahe Tūpa Ñehengagüer mombehu āgua, ava mbohe āgua avei, ahe co poropitiviisa oipisi catura. ¹⁸ Esepia, arachendar icuachiapri pipe aipo ehi: “Ereyuru āpichi rene tivi oporaviqui vahe trigo cambesar” ehi. Iyavei aipo ehi: “Mbia oporaviqui vahe iyacatu oipisira oporaviqui repr” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahe se ramo ereroyara.

²⁰ Acoi oimese rumo angaipa aposar ipāhuve, ahe se eremboaracuara opacatu ava rovaque. Evocoyase ambuae osiquiyera angaipa apoēhi āgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tupri ra co mborocuaita, nderemomahuaiti chira ava imboaracua nde remimbotar rupi tēi. ²² Ndahei chira pihaivi ereseni mbia mborocuaita rese ihañeco vahe rā. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chīhimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu āgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroya tupri ra güerecuar yuvireco ava oñehe-ñehe tēiēhi āgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahe se ndovirecoi chira imboyeroyaēhisa Jesús reroyasar recosa rese. Iyacatu rumo imboyeroya tupri catura güerecuar yuvireco. Esepia, serecuar oipisi vahe iporaviquisa, ahe Jesús reroyasar saisupri yuvirecoi yepi.

Tūpa rese yande pihañemoñetasā sepirusu vahe nungar

Eporombohe, emombehu co mbahe: ³ oimese oporombohe vahe oyesuindar pihañemoñetasā co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tupri sa rese, ⁴ ēgüe ehi vahe oyemboivate ai tēi mbahe renducuaēhisave. Iyavei oporandurandu tēi ñehesa rese secoāha āgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati āgua yuvireco viña. ⁶ Yayembovihañose mbahe yande rembiereco rese, ahe se Tūpa rese yande pihañemoñetasā inungar mbahe sepirusu vahe yandeu. ⁷ Esepia, ndayarui eté niha mbahe yahase co ivi pipe iyavei ndayarasoi chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde āgua avei, sese yayembovihañora yaico. ⁹ Amove rumo ava, “Mbahe rerecosar ité taico” ehi tiēte viña, ndoyemoviracuai rumo tecoāhasa upe. Ipare oviapi mbahe tēi pipe, setā mbahe pota raisave, ipipe oyecomomara. Ipare oyemocañi tēi. ¹⁰ Esepia, guarepochi pota raisa sui osē opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisū güecocuer ipipe ahe ae yuvireco.

Tūpa rese yande reco viracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ivisa pipe, ndemahenduhāño ité Tūpa rese. Eroya, esaису, eñemosa avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apirēhi vahe sui, sese niha Tūpa oñehe ndeu. Iyavei eremombehu ité niha Tūpa reroyasa nde reco āgua ava eta rovai. ¹³ Cūritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tupri sa sui acoi ouse yande Yar Jesucristo. ¹⁵ Acoi oyepotase ari imombehupri curi, ahe se Tūpa omboyevira Guahir. Ahe niha ñepehi vaheño ité imboeteipri, seco pīrata catu vahe. Aheño ité niha mborecuar ivate catu vahe rerecuar. ¹⁶ Aheño ité teco apirēhi vahe, tesapesa secoi; ndipoi oyemboya vahe sese, ndipoi eté que ava osepia vahe. ¡ēgüe tehi, imboeteipri tasecoi opacatu opīratasa apirēhi vahe rese!

¹⁷ Acoi imbahe eta vahe co ivi pipe eyocuai: toyemboivate ai eme, iyavei toyeroya rai eme ombahe eta rese tēi yuvireco. Esepia, ahe ēgüe ehi tēi vahe. Iyacatu rumo Tūpa rese oyeroyara yuvireco. Ahe niha opacatu mbahe icatupri vahe ombou yandeu nara yande rembiporuguā. ¹⁸ Eyocuai avei evocoi ava: toyuvirecoi mbahe yar nungar mbahe aviye vahe aposa pipe. Iyavei toyemoingatufi acoi mbahe vireco vahe mboyaho āgua ambuae ava upe yuvireco. ¹⁹ Evocoiyase virecora mbahe aviye vahe, apirēhi vahe oyeupe nara yuvireco curi tecovesa supi eté vahe rereco āgua.

Timoteo cuaitarā ipa vahe

²⁰ Timoteo, esāro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihāñemoñetasa ēgüe ehi tēi vahe rese, iyavei porombohesa co coti tēi vahe rese avei. Esepia, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipipe sui niha amove ava oyavi Tūpa reroyasa yuvireco.

Aviye, yande Aposar tande rovasa. Aipo rupive.

PABLO REMBICUACHIA IMONŨUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remimbotar rupi acoi “che amondora teco piasu che reroyasar uve” ehi vahe rupi tupri. Ahe cūrítei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaisuerecosa nde reco tupri āgua ndeu.

Pablo yocuai Timoteo Cristo recocuer mombehu āgua

³ Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporavīqui tupri ité Tūpa rese che pīhañemoñeta tuprisa pipe yepi inungar che ramoi eta oyapo yuvireco aracahe. ⁴ Ndacheresarai eté acoi nde yaseho agüer sui. Iyavei oroepia pota tēi che yemboviharete āgua. ⁵ Supi eté chemahenduhano ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgüe ehi yuvireco. Evocoyase ayeroyano ité nde rese, nde avei ēgüe erese.

⁶ Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. ⁷ Esepia, Tūpa nomboui siquiyesa yandeu. Ahe rumo ombou yande reco moviracuasa, poroaisusa, iyavei yande mbopihañemoñeta tupri āgua. ⁸ Evocoyase eresiquiye eme catu yande Yar recocuer mombehu. Nderechī chīaveira che roquendasua sui tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosañora co mbahe-mbahe tēi Tūpa pīratasa pipe. Ahe oura ndeu ñehesa pīsīrosa resendar mombehusa sui. ⁹ Tūpa niha yande pīsīro iyavei yande renoi yande reco tupri āgua sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuive ivi apo vīteēhiseve. ¹⁰ Cūrítei rumo ahe omboyecua oporoaisusa yande Pīsīrosar Jesucristo ouse, acoi ou vahe co ivi pipe manosa pīratasa recopi āgua. Iyavei ñehesa pīsīrosa pipe avei oicua uca tecovesa ndopai vahe.

¹¹ Tūpa niha che cuai co ñehesa mombehu āgua. Che cuai avei apóstol che reco āgua iyavei che porombohe āgua. ¹² Sese niha che opacatu aiporara co mbahe-mbahe tēi vichico. Nachi eté rumo yande Yar rese che yeroyasa pipe. Esepia, aicua ahe vireco pīratasa acoi ñehesa ombou vahe cheu imocañiēhi āgua acoi Jesús yevi āgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroyasa pipe iyavei poroaisusa yareco vahe pipe Cristo rese yaicose. ¹⁴ Esāro avei co ñehesa aviye vahe Tūpa ombou vahe ndeu Espīritu Santo reco pīratasa pipe yareco vahe yandeyese.

¹⁵ Ereica niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirio, ahe serer: Figelo, Hermógenes. ¹⁶ Yande Yar tomondo paraisuerecosa Onesíforo mu upe. Esepia, Onesíforo setā yupagüer che mboviha. Iyavei nochī eté ava rovaque che roquendasua sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo oporoparaisuerecosa chupe ahe ari pipe curi. Iyavei nde ereica tupri ité ahe mbia yande pītivīi vahe Efeso ve.

2

Jesucristo sundao oyemoviracua vahe

¹ Iyavei nde no, che rahir, eyemoviracua mbahecuasa Jesucristo ombou vahe pipe ndeu. ² Acoi che porombohesa eresendu vahe ava rehī rovaque amondo vahe ndeu, embohe tupri mbia oyeroya vahe, oicatu vahe avei ambuae mbohe āgua.

³ Nde eyemoviracuañi teco así upe Jesucristo uve nara inungar sundao oyemoviracua vahe ité. ⁴ Ñepeī yepe sundao ndosirī eté ocuaita sui. Esepia, ahe oyemoingatu voi eté ocuai āgua güerecar upe. ⁵ Iyavei iguayī rai vahe, ndoipisī chira porerecosa oguayī tupriēhi pipe. ⁶ Iyavei yande inungar que ava oñoti vahe mbahe, ahe rane omonuha güemiti yaviyese oyeupe yepi. ⁷ Eyapisaca tupri co che ñehē rese. Yande Yar niha osenducua uca tuprira opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei arachendar mborerecar David suindar secoi. Co niha ñehesa ñepīsīrosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatui eté yuvireco. ¹⁰ Sese che añemosaño opacatu mbahe-mbahe tēi upe opacatu Tūpa rembiporavo

recouer aviye ãgua rese ‘tovireco catu písirosa porañete, apirẽhi vahe Jesucristo rese yuvireco’ che yapave.

¹¹ Co niha supí tupri vahe:

Yamanose Cristo rese, ahese yaicove aveira sese.

¹² Yañemosase mbahe tẽi upe, ahese yande yaicora mborerecuar imborerecuasave ipiri.

“Ndaicuai Jesucristo” yahese, ahese ahe avei,

“Ndopocuai vahe” ehiñora yandeu.

¹³ Yepe co coti tẽi yarovara yande recouer seroyãhisave, ahe rumo ndovirovai chietera güeco ïvisa.

Esepia, ndoicatui, “Ndahei che ahe aico” ehi vaheã.

Ava osẽ tupri vahe güecoãhasa Tũpa upe nara

¹⁴ Emomahenduha yuvireco co ñehesa rese, iyavei eyocuai Tũpa rovaque: topoi ñehepoepi-episa sui yuvireco, co ñehepoepi-episa ãgũe ehi tẽi vahe. Esepia, omomara ambuae ava osenduse ñehese rai yuvireco. ¹⁵ Eyapo tupri mbahe opacatu nde catugũer rupi nde recouer mboyecua ãgua Tũpa rovai inungar oporaviqui tupri vahe, nochi vahe. ãgũe ere, eporombohe tupri ñehesa supi eté vahe rese. ¹⁶ Eyepepi ñehese tẽisa, ãgũe ehi tẽi vahe sui. Esepia, co nungar ñehesa tẽi ombouvicha catu mbahe naporai vahe. ¹⁷ Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. ãgũe ehi Himeneo, Fileto ¹⁸ oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tẽi yuvireco. Ipipe Jesús seroyasar oiphañemoñeta rerova yuvireco. ¹⁹ Tũpa rumo omondo mbahe moviracua tupri ãgua, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

²⁰ Oi guasu pipe, ndahei guarepochi, oro apopri güeraño oime, oime avei ivirape, ñaihu apopri avei no. Nepei iporupirã ari imboeteisa pipe nara, ambuae rumo ari rupi iporupirã. ²¹ Acoi ava oñemoatiro vahe co tecocuerai sui Tũpa upe nara, ahe iphasa inungar vaso oro apopri poromboeteisa pipe iporupirã; ahe ava oyemoingatu voi eté oico mbahe icatupri vahe apo ãgua Tũpa upe.

²² Eyepepi mbia chihivahe pihañemoñeta rai tẽisa sui. Emohivi tupriño ité nde recouer seroco. Eyeroyaño ité Tũpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo opihañemoñeta tuprisa pipe yuvireco. ²³ Eremboyoyai rene ñehesa porandu-randu tẽisa, ãgũe ehi tẽi vahe. Ereicua niha ichui tẽi oime yeamotarẽhisa yepi. ²⁴ Iyavei yande Yar rese oporaviqui vahe, ndiyai oyeecopi oñehese pipe yuvireco. Iyacatu rumo, aviñera secocuer opacatu upe, eporombohe tupriã, oñemosañora ombahe mboasiẽhisa pipe oico. ²⁵ Iyavei omboaracuara güeco asiẽhisa pipe acoi ava ndiporeroyai vahe. Esepia, aviyeteramo Tũpa oseñarora ipihañemoñeta raisa oyeupe yevi iri ãgua: ipipe sui porombohesa supi eté vahe oicuarã yuvireco. ²⁶ Ipipe sui avei toyemopoase, toyuvinoso Carugar povri sui semimbotar apo iriẽhi ãgua.

3

Mara ehira ava ari ipa vahe pipe curi

¹ Iyavei tereicua ari ipa vahe yepotasa, ahese oimera tecocuer yavai catu vahe. ² Ahese ava ahe ae tẽi oyeaisura yuvireco, guarepochi tẽi oipotã raira, oyemboivate aira, oyemboetei ai tẽi aveira. Oñehese raira Tũpa rese yamotarẽhisave. Nomboyoyai chira oyesupa yuvireco. Setã aveira, “Aviye ndeu” ndehi vahe ava upe. Iyavei nombotei chira Tũpa rese pihañemoñetasa yuvireco. ³ Ndosaisui chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tẽi apo ãgua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarẽhira yuvireco. ⁴ Iyavei omondora ava yamotarẽhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tẽi oyemboivha ãgua yuvireco. Ipipe rumo Tũpa ndosaisui chira yuvireco. ⁵ Ahe inungar-ra Tũpa rese ité yuvirecoi vahe viña. Tũpa pĩratasa rumo nomboyecuai chietera güembiaapo pipe yuvireco oyese.

Sese nde, eyepepiño evocoi nungar ava sui. ⁶ Esepia, evocoi nungar ava pãhuve oime yuviroiqueño tẽi vahe oi rupi cuña ndoicatui vahe angaipa rerecosar mbopa ãgua. Esepia, ahe cuña opihañemoñeta raisa pipe yuvirecoi vahe. ⁷ Yepe oyapisaca tupri tẽira ñehesa rese yuvireco viña, ndosupitii eté rumo co porombohesa supi eté vahe renducua ãgua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarẽhi yuvireco, ãgũe ehi avei evocoi ava porombohesa supi eté vahe amotarẽhisar yuvireco. Ahe oyemomara vahe opihañemoñeta rai pipe yuvireco. Ndovirovai eté Jesús porombohesa yuvireco. ⁹ Ndoporombopa iri chira rumo yuvireco. Esepia, opacatu ava oicuarã yuvireco imbahecuaẽhi rese, inungar co ñuvirio mbia Moisés amotarẽhimbar yuvirecoi aracahe.

Timoteo cuaitarā ipa vahe

¹⁰Nde rumo che reco rupi tupri ité ereico. Esepia, ereroya tupriño ité che porombohesa, che pihañemoñetas, che Cristo rese yeroyasa, che reco mbegüesa, che poroaisusa iyavei che ñemosasa ¹¹opacatu mbahe tēi porarasa rese. Nde niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraisusa mara-mara tēi che rerecose yuvireco. Yande Yar rumo che písiro opacatu evocoi mbahe-mbahe tēi sui. ¹²Supi eté opacatu acoi Jesucristo rese güecocuer víreco pota vahe oiporarara mbahe-mbahe tēi yuvireco. ¹³Ava secocuer naporai vahe rumo, iporombopa serai vahe avei ombouvicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴Nde rumo ereyemoviracuaño itera acoi ereyembohe vahe rese. Ahe ereroya tupriño ité. Esepia niha, nde mbohesar ereicua. ¹⁵Iyavei eyemomahenduha co rese: nde chíhivahe suive ité niha ereicua Tūpa ñehe icuachiapri eico. Ahe niha nde mombahecua vahe nde písiro água Jesucristo yeroyasa pipe. ¹⁶Opacatu co ñehesa icuachiapri ou vahe Tūpa sui, aviye ai eté porombohe água, iyavei poromboyapisaca água, poromboaracua tupri água iyavei ava upe ñehe tupri água secocuer mohívi água yepi. ¹⁷Ichui, ava Tūpa rese yuvirecoi vahe oyemoingatu vaira opacatu tecocuer tupri apo água yuvireco.

4

¹Iyavei no, co rese che orocuai pota Tūpa rovaque, Jesucristo rovaque avei acoi ou vaheñā omborecuasa reseve oicove vahe, omano vahe recocuer rese porandu água. ²Emombehu Tūpa Ñehengagüer ari rupi. Erova ité ava reco. Eporomboaracua, eporomonguerēhi tupri avei opacatu nde reco asiēhisa pipe. ³Esepia, coye ava ndosendu pota iri chira porombohesa aviye vahe yuvireco. Ahesē güemimbotar tēi osecara ombohe água, güemimbotar tēi avei omombehu ucara oyeupe yuvireco. ⁴Iyavei oyepepira co mbahe supi eté vahe sui. Viroyara rumo opacatu ava remimombehu tēi yuvireco. ⁵Nde rumo, ererecoveñora nde aracua tuprisa. Eñemosañō mbahe naporai vahe upe. Ndehañeco catu ñehesa písirosa resendar mombehu água. Emboaviye tupri avei opacatu nde poraviquisa.

⁶Viroví ari che retocuer mondo água manosave inungar mbahe seropovēhepri yande Yar upe. ⁷Ayapopa che recoeté pipe che poraviquisa aviye vahe che amotarēhimbar pāhuve. Amboaviye che cuaita. Ndayepipi eté che yeroyasa sui. ⁸Cūrítei che rāro ivave co porerecosa che poraviqui aviye vahe resendar. Yande Yar mborerecuar seco ívi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osāro vahe upe yuvireco.

Pablo, “Eyu rane che repia” ehi Timoteo upe

⁹Ndepoyava catu eyu che repia. ¹⁰Esepia, Demas che reya co mbahe ívi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹Lucas güeraño oicove che piri. Eseca Marcos, tou nde rupi che pítivíi água mboraviqui rese. ¹²Tíquico amondo tecua Efeso ve. ¹³Acoi ereyuse, eru avirave che yemboyhasa aseya vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴Alejandro, guarepochi mombesar, oyapo mbahe tēi cheu. Yande Yar rumo oicuaa sembiapogüer rese chupe. ¹⁵Iyavei nde eicua catu ichui. Esepia, ahe yande amotarēhi mbahe yande remimombehu rese oico.

¹⁶Yipindar añehese che yoepi água mborerecuareta rovai, ndipoi eté que che pítivíisar; opacatuño ité che reya yuvireco. Tūpa tiñero sese yuvireco chupe. ¹⁷Yande Yar Jesucristo rumo che pítivíi. Che momirata co ñehesa písirosa resendar mombehu tupri água opacatu ava ndahei vahe judío upe. Ēgüe ehi avei che renose mbahe tēi sui. ¹⁸Ahe che pehara opacatu mbahe-mbahe tēi sui iyavei che písirora oyepiri ivave che so água. ¡Ēgüe tehi timboeteisa catu yande Yar apirēhi vahe yepi!

Mahenduhasa opacatu upe

¹⁹Emombehu che mahenduha Prisca upe, Aquila upe iyavei opacatu Onesíforo rēta pendar upe avei. ²⁰Erasto opita Corinto ve, Tróximo rumo imbaheasi, evocoyase aseya Mileto ve. ²¹Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²²Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tüpa rembiguai aico iyavei Jesucristo apóstol semimbou aico Tüpa rese yeroyasa mondo água sembiporavo eta upe iyavei Tüpa rese pihañemoñetasu supi tupri vahe cua uca tupri água. ² Esepia, tecovesa apirêhi vahe rãrosa pipe sui viroyara, oicua aveira yuvireco. Tüpa ndoporombopai vahe niha omombehu co tecovesa mondo água ivi apo viteêhiseve oico. ³ Ichui cüritei ari oyepota yandeu iñehengagüer cua água. Sese Tüpa, yande Písirosar, che cuai oñehengagüer mombehu. ⁴ Tito, co che ñehe aicuachia ndeu; nde niha che rahir ité ereico Jesucristo rese yande recosa pipe. Esepia, oyoya yaroya vahe yaico. Yande Ru Tüpa, yande Písirosar Jesucristo tombou oporovasasa nde reco tupri água ndeu.

Tito poraviquisa caha pãhu Creta ve

⁵ Che oroeya vitu co caha pãhu Creta ve mbahe opita vite vahe moingatu tupri água. Iyavei, “Eiporavo ava, Jesucristo viroya vahe rãro água ñepepe-tecua rupindar” ahe acoi ndeu cuese. ⁶ Evocoi Jesucristo viroya vahe rãrosar toyuvirecoi güeco tupri água. Tipo eme “co oyapo mbahe” ehi-ehi tēi vahe yuvireco oyeupe. Ñepeño güembireco viorecora yuvireco; tahir evocoiyase Jesucristo reroyasar pãvera. Iyavei ndoyuvirecoi chira ndoyemboaracuai vahe nungar oporeroyaêhisa pipe ambuae ava ñeñeêhi água sese yuvireco. ⁷ Acoi Jesucristo reroyasar rãrosar yuvirecoi vahe, ahe icuaita mbahe Tüpa upendar rese. Sese taseco ivi tupri yuvireco. Iyavei toico eme oporeroyaêhisa pipe, toñemoiro eme avei, ndahei chiveira caguar tēi; ndivava serai chiveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güetave oyepiri. Iyavei aviye aira yepi. Osãro tuprira güecocuer. Iyavei taseco ivi güeco catupri pipe Tüpa upe. Tosãro tupri avei opihañemoñetasu yuvireco. ⁹ Iya oyemboya catu oyembohesa supi tupri vahe rese yuvireco. Ipape sui tomonguerêhi catu ambuae yuvireco co ñehesa maranehi pipe iyavei ambuae seroírosar pihañemoñeta mohivi água.

¹⁰ Esepia, oime setá nimbahe reroyai vahe; judío “peyembocircuncida pe ñepisiro água” ehi vahe pãhuve oime catu evocoi nungar. Ahe omondo-mondo tēi vahe oñehe, ombopa tēi vahe avei ava yuvireco. ¹¹ Ègüe ehi vahe iyacatu pemonguiriri. Esepia, ahe niha setá ava oñemu vahe omboyepepi uca porombohesa supi tupri vahe sui yuvireco. Oporombohe mbahe co coti tēi vahe rese guarepochi rereco água tēi yuvireco.

¹² Ñepepe mbia, otüpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipai vai yuvireco yepi” ehi oñehe. ¹³ Supi eté aipo ehi; sese emboaracua pírata ité. Evocoiyase toviroya tupri Tüpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuita tēi yuvireco. Esepia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esepia, ipihañemoñeta, yaracuasa avei naporai eté. ¹⁶ Iyavei, “Che aicua Tüpa” ehi tupri tēi angahu yuvireco. Mbahe sembiapo rese rumo icuasa seroyaêhisa yuvireco. Ahe niha ava ndosepia potai vahe, ndiporeroyai vahe yuvireco, ndoicatu mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoiyase mbia otãro catu vahe Tüpa reroyasar toñearo tupri, imboyeroyapri toyuvirecoi, tosãro tupri güecocuer, toviorecoi tupri avei Tüpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ègüe tehi avei cuña otãro vahe Tüpa reroyasar yuvireco: güeco tupri tovioreco oporomboeteisa pipe yuvireco. Iyavei timahechiroi eme, ndosavaipoi chiveira. Ahe rumo omboyecuar güecocuer aviye vahe, ⁴ ombohera cuñatai imer raisu água, imembrí raisu água avei. ⁵ Tombohe avei seco tupri água, iñearo tupri água angaipai sui iyavei sēta pipendar rese hañeco tupri água yuvireco. Tomboaracua avei seco aviye água, imer mboyeroya água avei. Evocoiyase noñehe-ñehe tēi chira ava Tüpa Ñehengagüer rese yuvireco.

⁶ Ègüe ere avei emonguerêhi mbia chihivahe secocuer rese iñearo tupri água. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe

tuprisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoiyase yande amotarêhimbâr yuvinochira ndoicatuise, “Mbahe” ohe ãgua yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroa imboeteisave, toiñehepoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoiyase opacatu osepia sece tuprisa, omboeteira yande Písirosar Tüpa recocuer resendar yembohesa yuvireco.

¹¹ Tüpa niha omboyecua oporoaisusa yandeu. Ahe güeru písirosa opacatu ava upe. ¹² Co poroaisusa Tüpa suindar yande mbohe mbahe-mbahe tõi iyavei yande remimbotar tõi reya ãgua. Iyavei yande mbohe co ivi pipe yande ñearo tupri ãgua, yande reco ivi ãgua iyavei Tüpa mboetei ãgua. ¹³ Iyavei yasãro yande viharetesa pipe Tüpa omboaviye vaheerã güemimombehu, ahe Jesucristo yande Tüpa sece ivatã vahe, yande Písirosar yevi irisa oporañetesã pipe. ¹⁴ Ahe oyemondo oyeyuca uca yande rese yande písiro ãgua opacatu mbahe-mbahe tõi sui yande reco moatiro tupri ãgua. Evocoiyase yande yaico chupe nara güerañõ ité yande querêhisave opacatu mbahe aviye vahe apo ãgua.

¹⁵ Evocoi rese erembohera, eremonguerêhira, eremboaracua aveira opacatu nde porocuaita pipe. Sese tipo eme que nde reroirosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuaita yuvireco iyavei opacatu ambuae mborerecua-recuarmi porocuaita avei. Iyavei toyemoinatu tupri opacatu mbahe aviye vahe apo ãgua yuvireco. ² Toñehe-ñehe tõi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepia, yipindar yande avei ndayande mbahecua yaico iyavei ndayaroyai Tüpa. Ocañi tõi vahe yaico, iyavei yande mbiguai tõi yaico opacatu mbahe yande remimbotar apo pipe; iyavei yaseca-seca mbahe tõi vahe yande yemboviha ãgua. Iyavei yaicoño mbahe tõi pipe, yaipotaño tõi ambuae ava mbahe, yamotarêhimbri yaico iyavei yandeyeupe ae-ae yayeamotarêhi. ⁴ Ipare rumo Tüpa, yande Písirosar, omboyecua güeco tuprisa, oporoaisusa opacatu ava upe. ⁵ Yande písiro, ndahei rumo yande rembiapo aviyesa sui, ahe rumo vireco oporoparisuerecosa yandeu nara. Ichui omoatiro yande recocuer yande reco mopiasu. Iyavei Espiritu Santo pipe yande recocuer recuñaro tecove piasu rereco ãgua. ⁶ Iyavei yande Písirosar Jesucristo rembiapo sui Tüpa ombou catu oEspiritu Santo yandeu, ⁷ ipipe yande reco ai sui yande renese yande reco ivi tupri ãgua oporoaisusa pipe ‘toipisi co tecovesã apirêhi güemiario yuvireco’ oya.

⁸ Aipo ñehesa supi eté vahe. Che aipota sese ereporombohera. Ipipe Tüpa reroyasar toyapo mbahe aviye vahe yuvireco. Evocoi ñehesa aviye ité opacatu oiporu vaheerã yuvireco. ⁹ Ereyepira rumo opacatu co nungar mbahe sui: yipindar ñehesa yepoepi tõiisa sui, ipare arachendar ava recocuer rese ñehesa sui. Ereyepi aveira iporomoiñemoiro serai vahe sui, Moisés porocuaita resendar sui tõi ñehepoepi-episa sui avei. Esepia, evocoi nungar mbahe êgüe ehi tõi vahe.

¹⁰ Acoi ava omoimese yemboyahosa Tüpa reroyasar pâhuve, eñehe chupe. Nande reroyaise, eñehe iri chupe. Nande reroya catu itese, eremosera peyesui. ¹¹ Terecua evocoi nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaivi che repia tecua Nicópolis ve. Esepia, aheve apita potã sõiisa vahe pituhu rãro. ¹³ Eipitivi opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasã rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo ãgua iyavei ava mbahe chupe ipane vahe pitivi ãgua. Evocoiyase secocuer aviye itera yuvirecoi.

Mahenduhãsa iyavei porovasãsa ipã vahe

¹⁵ Opacatu yuvirecoi vahe cohãve che piri omondo omahenduhãsa yuvireco ndeu. Iyavei emombehu che mahenduhãsa yande mboripar iporeroya vahe upe. Tüpa tape rovasã eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasa Jesucristo recocuer sui tēi. Aicuachía co che ñehe yande rivri Timoteo reseve ndeu, Filemón. Nde niha ore rembiaisu iyavei ore ndugüer ité Tüpa upe mboraviqui apo água ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboraviqui apo água Tüpa upe nara yuvirecoi, iyavei opacatu Jesús reroyasar nde rêtave oñemonuha vahe upe nara. ³ Yande Ru Tüpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tüpa upe che yeruresa pipe nde rese yepi. ⁵ Esepia, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tüpa upe nde rese nde ereyeroyase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemonguerēhi catu opacatu nde poroaisusa rese. Che rivri, nde niha eremonguerēhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguaigüer Onésimo upe nara. Che niha Pablo, acuacuami vichico. Cūrítei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe cohawe che roquendasave.

¹¹ Aracaco co nde rembiguai secoise nde piri, ěgüe ehi tēi vahe secocuer ndeu viña. Cūrítei rumo ěgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vahe rā nde nungar tupri che pítivií água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemofñetasa cuaēhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepipi pucu raimi nde sui oyeve iri vahe rā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepia, yande rivri niha yande rembiaisu secoi cūrítei. Che asaisu etepri iyavei nde eresaisu catu irirā che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upe nara.

¹⁷ Inungar nde rivri che rereco eve. ěgüe ere tupri aveira co mbia pisi. ¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu. ¹⁹ Che Pablo, aikuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ěgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

²¹ Che aikuachía ndeu. Esepia, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Tüpa che renose vahe rā che roquendasa sui pe yeruresa pipe che so água eipeve pe repia. Sese emoingatumi avei che pítuhu água.

Mahenduhasa, porovasasa ipa vahe

²³ Che ndugüer, Epafras, omondo omahenduhasa ndeu. Ahe avei soquendapri cohawe yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporaviqui vahe Tüpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboyecua yandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri āgua yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secói. Ēgüe ehi eté, ahe Vu recocuer tupri ité. Ahe opacatu mbahe omoviracua oñehe pīratasa pīpe. Yande angaipagüer sui yande moatiro pare oso, oguapi Vu acato coti oĩ ivave cute.

Tūpa Rahir seco ivate catu Vu rembiguai iva pendar sui

⁴ Tūpa Rahir secoi ivate catu vahe Vu rembiguai iva pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe:

“Nde che Rahir ereico; co pīpe amondo nde recove āgua” ndehi eté.
Iyavei:

“Che Tu aicora, ahe evocoyase che rahir secoira” ndehi avei chupe.

⁶ Ichui rumo ombouse Guahir ñepi vahe co ivi pīpe aipo ehi:

“Tomboetie opacatu che rembiguai yuvireco”

ehi. ⁷ Evocoyase güembiguai rese oñehe Tūpa aipo ehi icuachiapri aracahendar pīpe:

“Ayapo che rembiguai ivitu nungar, tata nungar avei cheu oporaviqui vaherā” ehi.

⁸ Tahir rese ñehesa rumo aipo ehi icuachiapri aracahendar pīpe:

“Che Yar Tūpa, nde mborecuasa rumo apirēhi vaherā ité.

Ereporocuai nde reco ivi tuprisa pīpe yepi.

⁹ Mbahe ihivi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesa ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo iva.

¹¹ Opacatu co nde rembiapo opa vaherā tēi,

inungar turucuar cuacua oyearo vahe opa.

Nde rumo apirēhi vaherā ité ereico.

¹² Ipape ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherā ité” ehi.

¹³ Ndahei que ñepi iva pendar güembiguai upe Tūpa aipo ehi:

“Eguapi che acato coti, aheshe che amondora nde amotarēhimbar nde povrive” ehi.

¹⁴ Esepia, opacatu Tūpa rembiguai espíritu yuvirecoi chupe oporaviqui āgua, icuapri avei ava ipisiropirā pītivii āgua.

2

Yandemahemoha tuprira yande pīsirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piasu sui yande yepipiēhi āgua. ² Esepia, co Tūpa rembiguai remimombehugüer seroyapri ité secói, iyavei oyemboangaipa vahe, ndoviroyai vahe avei imombaraisupri ité sembiapo rupi yuvirecoi aracahe. ³ ¿Mara yahera pīha evocoyase yande yañemi Tūpa ñemoirosa sui viña acoi ndayandemahemoha tupriise co yande pīsirosa aviye vahe rese? Esepia, yande Yar ahe rane ité omombehu co ñehesa ñepisirosa resendar. Ipape sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pīpe, omboyovirati mbahecuasa imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secói

⁵ Ndahei güembiguai povrive omondo Tūpa ivi oime vaherā, acoi oromombehu vahe pēu.

⁶ Oime rumo icuachiapri aracahendar pīpe omombehu tupri vahe:

“Che Yar, ¿uma vo evocoyase ava?”

¿Mahera ndemahenduha ava tēi rese, iyavei eresāro no?

⁷ Ndaseta ariimi erereco ivi coti catu nde rembiguai sui.

Ipare voi rumo eremondo nde porañetesa imboetisave chupe.

⁸ Iyavei opacatu erereco uca mbahe nde rembiapo ipovrive” ehi imombehu.

Ēgüe ehise Tūpa, ndoseyai eté que ñepeí yepe mbahe ipo pendarēhi. Cūrítei rumo ndaopacatu tupri vitei mbahe ipovrive. ⁹ Yaicua niha Jesús, ahe Tūpa güembiguaí sui ndaseta araviter ivi coti catu vireco. Oporoaisusa pipe oipota imano āgua opacatu ara repirā. Cūrítei rumo iyemombaraisu pare, omondo oporañetesa imboetisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañeteseve’ oyapave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco āgua’ oya. ¹¹ Esepia, opacatu vireco ñepeí Vu yuvireco co seco catupri vahe, seco mbocatuprisar avei. Sese Tahir nochí eté, “Che rivireta peico” ohe āgua viroyasar upe. ¹² Ahe aipo ehi icuachiapri arachendar pipe:

“Añehera nde rese che rivireta upe.

Asapucaí aveira sapucaisa ndeu opacatu ava ndeu oñemonuha vahe pāhuvé” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suvi; ēgüe ehi avei Jesús vireco voho, vuvi yande nungar; omano pipe sui omocañi vaherā iporoyuca ai vahe piratasa; ahe Carugar. ¹⁵ Opacatu ava manosa sui osiquiyesa pipe mbiguaí tēi nungar yuvirecoí vahe güecove viteseve, evocoi nungar sui senose āgua, ēgüe ehi Jesús. ¹⁶ Esepia, ahe ndoui Tūpa rembiguai pítivíi āgua, ahe rumo ou Abraham suindareta pítivíi āgua. ¹⁷ Sese niha tivireta nungar tupri ité oyapo Tūpa, “Toime che rovaque pahí rerecuar ivate catu vahe seco tupri vahe; taseco mbegüé avei, tomondo güetecuar ava angaipa repirā ñeroisa reime āgua” ehi. ¹⁸ Esepia, ahe avei oiporara Carugar poroātoisa. Sese cūrítei ahe oicatu ité ava Carugar remiatoí pítivíi āgua.

3

Jesús ivate catu vahe Moisés sui

¹ Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secói yandeu apóstol iyavei pahí ivate catu vahe yande yeroyasa. ² Ahe ité niha omboaviye tupri Vu remimbotar, osenose imbou co tecocuer apo āgua inungar Moisés omboaviye tupri ocuaita Tūpa mbahe rāro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secói. ⁴ Esepia, ñepeí-peí oi vireco oaposar viña. Tūpa rumo opacatu mbahe aposar secói. ⁵ Supi eté Moisés Tūpa rembiguai güeco pipe omboaviye opacatu oporaviquisa itūparo rese. Esepia, omombehu Tūpa omboyecua pota vahe ava upe yepi. ⁶ Cristo rumo tahir güeco pipe omboaviye ocuaita Vu tūparo rese. Ahe tūparo yande yaico yayeroyaño itese Cristo rese iyavei yasāroño itese yande yembovihasa pipe co mbahe aviye vahe oime vaherā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espiritu Santo icuachiapri arachendar pipe:

“Co pipeve voi, pesenduse Tūpa ñehe,

⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.

⁹ Aheve avei acoi che recoāha tēi pe ramoí mbahe güemiapo pipe, yepe cuarenta araviter rupi osepia tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe:

‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoiro ahe ava upe, ‘Ñepeí reseve ndapepíthuhí chiertera che pítuhusa pipe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepeí ipihañemoñeta naporai vahe Tūpa reroyaēhisa pipe oyepépi vaherā ichui. ¹³ Iya rumo peyemonguerēhi catu ñepeí-peí ari yacatu rupi cūrítei pe recove pipe angaipa upe pe yembopa uca iriēhi āgua, pe mbahe reroya iriēhi āgua rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano āgua rupi eté, ahesa yaico itera sese.

¹⁵ Supi niha acoi aipo ehi ñehesa:

“Co pipe voi pesenduse Tūpa ñehe,

peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ĕgüe ehi yuvireco. ¹⁷ ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi. ¹⁸ ¿Uma upe pīha acoi ñepei reseve, “Ndapeiquei chietera che pituhusa pipe pe pituhu āgua” ehi Tūpa? Acoi viroyaēhisar upe aipo ehi. ¹⁹ Sese yaicua seroyaēhi pipe ndoicatu yuviroique ipipe.

4

¹ Oime vite Tūpa remimombehu yande yaique vaherā ipiri yande pituhu āgua. Sese iya ité yañearo tupri. Aní chira que ñepei pe pāhu pendar ndoiquei chira. ² Esepia, yandeu avei imombehusa ñehesa poropisirosa resendar inungar yande ramoi upe ivi iporupirēhi rupi yuvireco aracahe. Co ñehesa rumo ndoipitivií eté ahe ava yuvireco. Esepia, ahe osendu yuvireco seroyaēhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepei reseve,

‘Ndoyuviroiquei chietera che pituhusa pipe opituhu āgua yuvireco’ ahe” ehi.

Tūpa rumo yipive ité opa omboaviye oporaviquisa iva, ivi. ⁴ Esepia, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporaviquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

⁶ Ipane vite rumo amove ava yuviroique vaherā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaēhisa pipe yuvireco.

⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe,

peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahe viña, Tūpa evocoyase noñehe iri chira co ambuae ari rese viña. ⁹ Evocoyase oimeño itera mbituhusa iporavopri ava Tūpa upendar upe nara: ¹⁰ Acoi oi que vahe evocoyase pituhusa pipe, opituhu oporaviquisa sui inungar Tūpa opituhu ombahe mboaviye pare aracahe. ¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

¹² Esepia, Tūpa Ñehengagüer oicove vahe, ipirata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oi que vahe ité yande aviterve; ĕgüe ehi avei iñehengagüer oñatoi eté yande hā, yande espíritu avei. Iyavei omboyecua tupri ité yande pihañemoñeta. ¹³ Ndiopoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oi que vahe ivave Tūpa piri. Sese yayemoviracuaño itera sese yande yeroyasa pipe. ¹⁵ Esepia, yande pahi ivate catu vahe oicuaño ité yande recocuer pīrataēhisa. Ahe avei niha yande nungar aracaco viroparaisu opacatu mbahe-mbahe tēi güecoñhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Ru Tūpa rese. Esepia, ahe yande raisu ité. Ipípe sui tayande paraisuereco güeco aviyesa pipe yande pitivií āgua mbahe tēi oimese yandeu.

5

¹ Opacatu pahi ivate catu vahe iporavopri secoi ava pāhu sui ava recocuer reropovēhe āgua Tūpa upe iyavei porerecosa mondo āgua chupe, mbahe mimba yucapri reropovēhe āgua avei ava angaipa repirā. ² Ahe pahi niha oiporara avei teco asisa ambuae ava nungar. Sese güeco asiēhisa pipe oipitivií ava ndayaracuai vahe, oyavi vahe avei. ³ Ahe rumo güeco pīrataēhisa pipe viropovēhe mbahe mimba yucapri Tūpa upe oangaipa repirā, opacatu ambuae ava angaipa repirā avei. ⁴ Ndiyai chira que ava oyesui tēi pahi oyeapo. Tūpa ité rumo osenoira imboetei uca āgua inungar acoi Aarón upe aracahe. ⁵ Ēgüe ehi avei Cristo, ahe noñeñoi pahi ivate catu vahe güeco āgua oyesui tēi. Tūpa ité osenoi imboetei uca āgua acoi aipo ehise:

“Nde che rahir ereico, co pipe amondo nde recove ãgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirêhi vaherã, inungar tupri mbia Melquisedec serer vahe” ehi.

⁷ Co ivi pipe Cristo oicove vitese, oyerouqui pĩrata oyasehosa pipe Vu Tũpa upe yepi. Esepia, ahe oicatu ipĩsĩro ãgua manosa sui. Êgũe ehi iporeroya tuprisa pipe, Tu osendu iyerouqui yepi. ⁸ Yepe Tahir itẽ viña, güeco paraisu pipe rumo oyembohe imboyeroya ãgua; ⁹ evocoiya güeco pipe omboaviye güeco catuprisa. Ipipe sui güeru poropĩsĩrosa ndopai vahe opacatu viroyasar upe nara. ¹⁰ Esepia, Tũpa niha osenoi pahi ivate catu vahe seco ãgua inungar Melquisedec aracahe.

Peicua catu, “Ndaroyai eté co tecocuer piasu” pe hesa sui

¹¹ Orovireco vite mo setã mbahe ore ñehe ãgua pẽu co mbahe tecocuer resendar rese. Yavai etepri rumo imombehu tupri ãgua. Esepia, pe ndapesenducua tupri vitei eté. ¹² Aracacove peporombohera viña; peipota vite rumo pẽu mbahe ndayavaimi vahe imombehu iri ãgua yembohosa Tũpa suindar. Ndapeyemoviracuai rumo; peihu iri pota cambi mbahe sãta vahe hu rãgũer sui. ¹³ Esepia, acoi êgũe ehi vahe pitani osi rese ocambu vite vahe nungar tẽi pe recocuer. Ipipe sui ndapeyembohe eté Tũpa Ñehengagũer rese mbahe tupri pe reco ãgua. ¹⁴ Co tembihu sãta vahe rumo ahe ava ocuacua vahe upe nara. Esepia, ahe oyembohe tupri catu ñehengagũer rese güeco tupri ãgua yepi. Ipipe sui oicua ité mbahe aviye vahe poravo mbahe naporai vahe sui.

6

¹ Sese ndiyai yayembohe yembohosa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipipe sui tayaicua seroyasa pipe ambuae mbahe Tũpa suindar co mbahe rese yembohe iri rãgũer sui. Ahe yipindar vahe co: yande ñecuñarosa, yande reco ai sui yande poisa, manosa apirêhi vahesave yande rerasoẽhi ãgua, iyavei Tũpa rese yande yeroyasa, ² yembohosa poroãpiramosa resendar, po mondosa Tũpa reroyasar harive, omano vahe cuerayevisa iyavei ava recocuer rese porandusa resendar avei. ³ Tũpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tũpa remimbotar, osãha vahe avei Tũpa suindar porerecosa iyavei oyandu ité Espĩritu Santo güecocuer pipe, ⁵ osãha vahe avei Tũpa Ñehengagũer aviye vahe iyavei osãha chĩhi ipĩratasa curi oime vaherã viña, ⁶ oyepepise rumo ichui, ndayaicatu iri seco reroyevi iri ãgua Tũpa upe. Esepia, yaticapri nungar iri eté vireco Tũpa Rahir iyavei ambuae ava omoñehe-ñehe tẽi iri sese. ⁷ Esepia, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upe, evocoiyase evocoi nungar ava oipisira porovasasa Tũpa suindar. ⁸ Ahe ivi rese yu pãve tẽi oyese, ahe naporai eté. Evocoi nungar ava Tũpa poromocañisavrive tẽi, sapipirã tẽi avei yuvirecoira curi.

Yande remiaro aviye vahe yande moviracua tupri vahe

⁹ Che mboripar saisupri, yepe aipo orohe pẽu viña, oromoha ité rumo mbahe aviye catu vahe pẽu co ñepisĩrosa pare. ¹⁰ Esepia niha, Tũpa seco aviye vahe, ahe ndasesarai chietera pe rembiapo aviye vahe sui pe poroaisusa pemboyecua vahe peipitiviise seroyasar. Ahe niha co peyapoño vite peico. ¹¹ Ore rumo oroipotaño ité ñepeipei-peipei pemboyecuaño itera ari cañi rupi eté co pereco vahe pe querẽhisa pe remiaro aviye vahe rupiti ãgua. ¹² Ndoroiopotai pe atẽhisa perecora co tecocuer upe. Oroipota rumo pe saquicue moñara acoi ava yande Yar rese oyeroyasa pipe iyavei güeco ñemosasa pipe oipisi vahe porerecosa imombehupri Tũpa sui.

¹³ Peyemomahenduha acoi Tũpa güemimbotar omombehuse Abraham upe: “Che rer pipe amboaviyera co mbahe ndeu” ehise chupe aracahe. Esepia, ndipoi eté ambuae ivate catu vahe ichui êgũe ehi vaherã. Sese ahe güerer ité osenoi ¹⁴ aipo ehi chupe: “Supi eté oroovasa itera, iyavei setara ava nde suindar” ehi. ¹⁵ Evocoiyase Abraham osãro güeco mbegũesa pipe, êgũe ehi ipisi oyeupendar Tũpa remimombehu. ¹⁶ Ava omoingatu potase oñehe, ivate catu vahe rer pipe omoingatu yuvireco yepi. Êgũe ehise yuvireco, ndiya iri eté ipare oñehe viterã sese. ¹⁷ Tũpa güerer pipe ité omoingatu oñehe omombehuse güemimbotar aracahe ‘toicua tupri che remimombehu pisi ãgua che ñehe ñepeipei reseve vahe yuvireco, iyavei amboaviye itera che remimombehu chupe’ oyapave aipo ehi aracahe. ¹⁸ Êgũe ehi oime ñuvirio mbahe imboyepoepipirẽhi: Tũpa niha ndoporombopai vahe ité, ipipe avei yande monguerẽhi catu yande yaseca vahe iporopitiviisa iyavei yayeroya vahe ñearosa yandeu ombou vahe rese. ¹⁹ Co mbahe yasãro vahe omoviracua tupri yande hã, inungar mbahe carite guasu mombitasa omoviracua tupri carite ivitu sui. Êgũe ehi yande remiaro

oique turucuar guasu tūparo asiassa cupeve oi imaranehi catu vahesave ivave. ²⁰ Aheve Jesús oique yande raperā mboi āgua. Ēgüe ehi ahe apirēhi vahe ité pahi ivate catu vahe güeco āgua, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar seci aracahe. Abraham oyeveise peri rupi ovavasa sui ou mborerecuar guasu eta momba pare, ahesa aipo osē voi eté oso Abraham rovaichi Tūpa porovasasa mondo āgua chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepeipei chupe. ‘Mborerecuar guasu seco ñi vahe’ oyapave Melquisedec ehi. Iyavei ahe mborerecuar Salem pendar, ahe tecua Salem ‘mbahe tupri’ oya; sese mborerecuar guasu mbahe tupri vahe seci. ³ Ahe iyepa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apirēhi vahe ité.

⁴ Peyapisaca tupri co mbia recocuer rese: ivate ité seci aracahe. Yande ramoi Abraham teieté avei omondo diez sui ñepeipei mbahe porerecosa mborerecuar guasu eta sui güembierocua chupe. ⁵ Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepeipei iporaviquimi roerocua āgua yuvireco. Abraham suindar ité niha ēgüe ehi yuvireco. ⁶ Yepa Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi vahe mbahe Tūpa remimombehu. Ēgüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu seci yepi. ⁸ Evocoi levita suindar oipisi ava poraviqui repri diez sui ñepeipei. Ahe ava rumo omano vahe tēi yuvirecoi. Icuachiapri arachendar pipe rumo Melquisedec serer vahe oicoveño vahe ité. ⁹ Ndojavii evocoyase opacatu pahi eta Leví suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Leví oyesuindar vireco, evocoyase ihaēhi viteveve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catuprisa evocoi mborocuaita reroya pipe viña, evocoyase ndoyemboyecuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñarose evocoi pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Leví suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehi ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuae pahi ipiasu vahe Melquisedec nungar. ¹⁶ Ahe rumo ndahei porocuaita “uma sui osēra pahigüa” ehi vahe sui oique pahi güeco āgua; güecocuer pīrata ndopai vahe reseve oique. ¹⁷ Esepia, Tūpa ité aipo ehi oñehese sese: “Nde pahi apirēhi vahe ité ereico inungar Melquisedec” ehi.

¹⁸ Sese mborocuaita arachendar opa ité. Esepia, ahe nipiratai, ndayande pītvii eté. ¹⁹ Esepia, Moisés porocuaita ndosecocuer mbocatupri eté ava. Yande rumo yasāro mbahe aviye catu vahe yande recocuer uve nara. Supi niha yayemboya Tūpa rese.

²⁰ Tūpa rumo oñehese omoingatu ñepeipei reseve güerer pipe. Ambuae pahi rumo ndahei ñepeipei reseve senoipri yuvirecoi Tūpa rer pipe. ²¹ Yande Yar rumo Tūpa osenoi ñepeipei reseve güerer pipe pahi seco āgua icuachiapri pipe aipo ehise chupe:

“Yar Tūpa osenoi ñepeipei reseve, sese nosecuñaroi chietera:

‘Nde pahi apirēhi vahe ité ereico’ ehi”

ehi icuachiapri pipe. ²² Sese Jesús rese yaicua Tūpa omboaviyera güemimbotar ipiasu vahe yandeu aviye catu vahe yipindar vahe sui. ²³ Yipindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomonoi chietera pahi güecosa ambuae upe. ²⁵ Sese ahe oicatu ité ñepeipei reseve viroyasar Tūpa rese oyemboya vahe písiro āgua apirēhi. Esepia, ahe oicove vahe ité apirēhi oyoeroku vahe Vu Tūpa upe sese.

²⁶ Supi eté Jesús pahi ivate catu vahe seci. Evocoi nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar seci, ndoyuca ranei ari yacatu rupi mbahe mimba Tūpa upe seropovēhe āgua yipindar oangaipa rese, ipare opacatu ambuae angaipa rese. Ñepeipei reseve ité rumo güete viropovēhe opacatu ava angaipa repirā. ²⁸ Moisés porocuaita rupi iporavopri pahi ivate catu vahe ité ava ndahei seco tupri vahe; Tūpa rumo Moisés

porocuaita pare osenoí ñepeí reseve Guahir seco catupri vahe ‘tasecoi pahi ivate catu vahe apirêhi vahe rã ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviye catu vahe upe. Yareco ité evocoi nungar pahi ivate catu vahe. Ahe ougapi Vu acato coti omborerecuasa pipe ivave oí. ² Aheve pahi secói oporaviquí Vu rêta supí eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimba yucapri viropovêhe vahe rã Tūpa upe yuvireco. Sese Jesucristo avei vireco mbahe viropovêhe vahe rã Vu Tūpa upe. ⁴ Ahe secoise co ivi pipe viña, ndahei chietera pahi secói viña. Esepia, cohava oime vite ité pahi mbahe viropovêhe vahe Moisés porocuaita rupi yuvireco. ⁵ Co ivi pipendar pahi rumo ihañeco íva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acói ivitrive amboyecua vahe rese ndeu. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuaíta aviye catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviye catu vahe ité yipindar vahe sui iyavei sendar Tūpa remimombehu aviye catu vahe avei.

⁷ Esepia, yipindar Tūpa remimbotar oicatusé yande recocuer recuñaro ãgua viña, ndipoi chira ambuae semimbotar ipiasu vahe yandeu viña. ⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:

“Yande Yar aipo ehi:

‘Oimera ari ayapo iri ãgua che remimbotar ipiasu vahe ahe Israel pendar upe, Judá pendar upe avei.

⁹ Ndahoyoyai chira rumo acói tamoi eta rese yipindar ayapo vahe che remimbotar.

Ahese acói opa anose ivi Egipto sui, nomboaviyei eté rumo che porocuaíta yuvireco. Sese apoi íchui’ ehi yande Yar Tūpa.

¹⁰ ‘Co ari pare rumo na ahera che remimbotar apo Israel pendareta upe’ ehi yande Yar Tūpa,

‘Amondora che porocuaíta iyapisacasa pipe, aicuachía aveira ipihañemoñetasa pipe.

Evocoiyase che iTūpa aicora; ahe evocoiyase cheundar yuvirecoira.

¹¹ Nombohe iri chira ondugüer, omu avei che cua uca ãgua yuvireco.

Esepia niha, opacatu chíhivahe catu vahe sui, ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese yuvireco chupe; ndayemomahenduha iri chiaveira yangaipagüer rese’ ehi yande Yar”

ehi icuachiapri pipe aracahe. ¹³ Oñehese Tūpa güemimbotar piasu rese, omombehu yipindar vahe cañi ãgua; chíhimi tēi ipane icañipa ãgua.

9

Tūparo ivi pipendar iyavei tūparo íva pendar

¹ Evocoiyase yipindar Tūpa remimbotar vireco ava cuaitarã iñemonuha ãgua Tūpa mboeteisa pipe iyavei vireco tūparo co ivi pipendar. ² Ahe tūparo pipe na ehi mbahe imoin-gatusa: yipindar oí Nimarai Vahe serer. Ipipe oime vera renda iyavei mesa pan sovasapri Tūpa upendar reseve. ³ Imoñuviriosa turucuar tūparo asíasa cupeve oime ambuae oí, ahe serer Nimarai Catu Vahe. ⁴ Aheve oime itaisi rapisa renda oro apopri, aheve avei oime Tūpa porocuaíta riru oro pipe yaopri. Ahe ipipe oime cambuchi oro apopri ahe tembihu maná riru, ipipe avei oime Aarón pococa ahe sorí vahe, iyavei mborocuaíta cuachiapri ita ípe vahe rese oime ipipe. ⁵ Ahe mborocuaíta riru haríve oime Tūpa rembiguai rahanga oyovai yuvinohai, “Tūpa oime ité cohava” he ãgua. Ahe ipepo oyopri tupri Tūpa porocuaíta riru rovapisa yuvireco. Co rupive revo amombehura co mbahe pēu.

⁶ Evocoi nungar mbahe moingatupri pare, pahi eta yuviroiqueño yipindar oí asiapri pipe ari rupi ocuaíta apo ãgua. ⁷ Imoñuviriosa oí pipe rumo pahi ivate catu vaheño oique ñepeí reseve ñepeí-peí araviter pipe, iyavei güeique yacatu viroique mbahe mimba ruvi viropovêhe vahe rã Tūpa upe oangaipa rese, ava icuaêhi pipe angaipa oyapo vahe repirã avei. ⁸ Co rese Espíritu Santo oicua uca yandeu avaño tēi ndiya vitei eté oique ipa vahe oí imaranehi catu vahe pipe Tūpa rovai oime vitese yipindar oí yasiapri. ⁹ Co opacatu mbahe yande mbohe mbahe cūriteindar rese. Esepia, co porerecosa iyavei mbahe seropovêhepri

aheve Tūpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuita. Ahe rumo ěgüe ehiñomi tēi yuvireco Tūpa remimbotar ipiasu vahe yu āgua renonde.

¹¹ Poropisirosar rumo ou cute. Iyavei ahe ité cūritei yande pahí ivate catu vahe secói mbahe aviye vahe güeru vahe yandeu. Ahe pahí reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopi. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe āgua, ahe rumo viropovēhe vuvi ité opacatu rese; ěgüe ehi ahe ñepei reseve oique apirēhi vahe ñepisirosa reime āgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi pīratasa ava rete moatiro āgua. ¹⁴ Cristo ruvi rumo vireco catu ité pīratasa. Esepia, Cristo, Espiritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca āgua yandeu.

¹⁵ Sese Jesucristo secói Vu remimbotar ipiasu vahe moingatusar ava reru āgua Tūpa upe omano pipe. Ipipe sui oime ñeroisa oyemboangaipa vahe yipindar mborocuitavrive yuvirecoi vahe upe 'toipisi che rembiporavo yuvireco oyeupendar mbahe apirēhi vahe che remimombehugüer rupi' oya. ¹⁶ Que ava oicua ucasa güemimbotar ombahe mondo āgua omano renondeve, icuasa tupri ranera rumo imanosa semimbotar apo āgua renonde. ¹⁷ Esepia, ndiya vitei eté omano vaheerā recove viteseve mbahe imondosa iyarā upe. Imanore voi rumo aviye imondosa. ¹⁸ Sese yipindar vahe Tūpa remimbotar yapasa mbahe mimba ruvi piyere pipe. ¹⁹ Esepia, Moisés omombehupase mborocuita opacatu ava upe, oipisi ovesa ragüer pira vahe iyavei ivira hisopo serer vahe rāca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuita resendar, opacatu ava avei. ²⁰ Evocoyase aipo ehi icuachiapri pipe: "Co mbahe ruvi oicua tupri uca co porocuita Tūpa ombou vahe omboyeroya āgua pēu" ehi. ²¹ Mbahe mimba ruvi pipe avei opa Moisés osipii tūparo iyavei opacatu mbahe ipipendar iporupri. ²² Porocuita rupi eté tuvi pipe seni opacatu mbahe oñemoatiropa Tūpa rovaque; ndipoi eté ñeroisa angaipa upe mbahe ruvi piyerepri porēhise.

Tūpa upe güete reropovēhe pipe Cristo omocañi angaipa

²³ Iyacatu ité imoatirosa evocoi nungar mbahe mbahe mimba seropovēhepri ruvi pipe. Esepia, co mbahe iva pendar nungar tēi sahangaposa; iva pendar ité rumo ipotasa seropovēhepirā mbahe aviye catu vahe evocoi sui. ²⁴ Esepia, Cristo ndoiquei tūparo oi imaranehi catu vahe ava rembiapo pipe tēi. Esepia, ahe iva pendar rahanga tēi. ěgüe ehi rumo ahe oique ité ivave. Aheve cūritei secói Tūpa rovai yande pītivii āgua oyeroci pipe. ²⁵ Judío pahí ivate catu vahe niha ñepei reseve oique araviter yacatu oi imaranehi catu vahe pipe mbahe ruvi tēi reropovēhe āgua; ndahei rumo vuvi ité viropovēhe. Cristo rumo ndoyeeropovēhe pihi Tūpa upe. ²⁶ ěgüe ehise rumo, yipisuive omano pihira viña. Cūritei rumo oyemboyecua co ipa ari rupi ñepei reseve, apirēhi vaheerā viropovēhe āgua güete Tūpa upe 'tocañipa angaipa' oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeeropovēhe ñepei reseve opacatu angaipa mocañi āgua. Ipare rumo oyevi irise ou, ndahe iri chira angaipa recocuer rese. Ahe rumo oyevira ou guārosar piñiro āgua.

10

¹ Esepia, Moisés porocuita mbahe aviye vahe ou vaheerā rahanga tēi, ndahei ahe eté vahe ité. Sese ahe porocuita ndoicatu eté ava Tūpa rese oyemboya vahe reco mohivi tupri āgua mbahe seropovēhepri araviter yacatundar pipe tēi. ² Porocuita oicatusa pe angaipa sui pe moatiro tupri āgua, ndapeyandu iri chira pe angaipa viña iyavei pahí ndoviropovēhe iri chiaveira mbahe ruvi Tūpa upe yuvireco viña no. ³ Co seropovēhepri rumo yande momahenduha uca āgua tēi yande angaipagüer rese araviter yacatu. ⁴ Esepia, mbahe mimba ruvi tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Tūpa upe:

"Ndereipota iri niha mbahe mimba tēi porerecosa seropovēhepirā ndeyeupe, nde rumo ereyapo che retecuer evocoi nungarā.

⁶ Ndahei niha nde piha rupi mbahe rapipri mbahe mimba yucapri ndeu seropovēhepri ñepei reseve angaipa mocañi āgua.

⁷ Evocoyase che aipo ahe:

"Che ayu nde remimbotar apo āgua, che Ru Tūpa, che resendar icuachiapri remimombehu rupi tupri mboaviye āgua' ahe" ehi.

⁸ Yipindar aipo ehi, Tüpa ndoipotai eté, iyavei ndahei ipiha rupi mbahe mimba reropovêhepri, porerecosa mbahe sapipri avei angaipa mboyeho âgua, yepe ahe mborocuaíta rupi seropovêhesa viña. ⁹ Ipape aipo ehi: “Che ayu nde remimbotar apo âgua” ehi. Ahe ipipe omombopa yipindar vahe mbahe seropovêhepri co ambuae mbahe ipiasu vahe apo âgua. ¹⁰ Tüpa evocoiyase yande peha angaipa sui oyeupe nara. Esepia, Jesucristo oyapo ité semimbotar mbahe ñepei reseve apirêhi vaheerã güete mondo pipe.

¹¹ Opacatu judío pahi eta ari yacatu oyapo ocuaíta iyavei mbahe mimba avei-vei viropovêhe Tüpa upe yuvireco. Yepe ahe viropovêhe tēi yuvireco viña, nomocañi catui eté rumo angaipa. ¹² Jesucristo rumo oyeeropovêhe ñepei reseve angaipa repirã apirêhi vaheerã. Ipape oso ivave, oguapi oï Vu acato coti. ¹³ Aheve osãro oï Vu Tüpa opase voi omondo yamotarêhimbar ipovrive. ¹⁴ Esepia, ñepei reseve oyeeropovêhe pipe osecomohivi tupri Vu Tüpa rembipeha apirêhi vaheerã. ¹⁵ Iyavei Espiritu Santo aipo ehi tupri avei icuachiapri arachendar pipe yandeu:

¹⁶ “ ‘Co ari pare rumo na ahera che remimbotar apo chupe’ ehi yande Yar Tüpa, ‘Co iye amondora che porocuaíta ipihañemoñetasa pipe, amondo aveira iyapisacasa pipe’ ehi.

¹⁷ Ndayemomahenduha iri chietera yangaipagüer rese iyavei mbahe tēi sembiapogüer rese yuvireco” ehi aracahe.

¹⁸ Êgüe ehi angaipa rese oimes ñeroisa, ahese ndiya iri seropovêhesa mbahe angaipa repirã.

Yayemboya catura Tüpa rese

¹⁹ Sese che rivireta, iya ité cūrítei yande reique âgua Tüpa rovai yande siquiyêhisa pipe Jesucristo ruvi pipe sui. ²⁰ Yaicoveño itera ipiasu vahe tecocuer tecovesa yandeu ombou vahe pipe. Ahe niha omboi tüparo pipe asiasa turucuar yande reique âgua Tüpa rovai. Ahe turucuar inungar Jesús rete. ²¹ Iyavei ahe yande pahi ivate catu vahe ité secoi Vu Tüpa rēta rãrosar; ²² sese yayemboya catura Tüpa rese yande pihañemoñeta tuprisa pipe iyavei yande yeroyasa ipa voi vahe pipe. Supi eté ahe opa yande reco mbocatupri yande pihañemoñeta raisa sui iyavei omoatiro yande rete i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rovaêhisa pipe. Esepia, Tüpa omboaviye itera mbahe güemimombehugüer yandeu. ²⁴ Iyavei yasecañora ñepei-pei yañepitivii vaheerã yande yeaisu catu âgua iyavei mbahe tupri apo âgua yandeyeupe. ²⁵ Ndayamopanei chira yande ñemonuhasa Tüpa upe. Ndayaicoi chira omopane vahe nungar, iya rumo yayemonguerêhi catura ñepei-pei yandeyeupe. Esepia, virovi ari yande Yar yevi iri âgua.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovêhepirã evocoi yande angaipa repirã yandeu; ²⁷ Tüpa ñemoirosa ipirata vahe güeraño oimera yandeu iyavei tata guasu apirêhi vahe opara omocañi Tüpa amotarêhimbar yuvirecoi vahe. ²⁸ Ava Moisés porocuaíta ndoviroyai vahe que ñuvirio, anise mbosapi rembiepiave, ahe secocuer mombehuse, ahe yucapri ité saisuêhisa pipe yuvirecoi. ²⁹ Peyapisaca tupri co rese: ipirata catu oimera Tüpa ñemoirosa tahir roeroirosar upe curi iyavei acoi ava vireco vahe suvi inungar mbahe êgüe ehi tēi vahe iyavei viroiro tēi vahe guaisusar Espiritu, chupe avei oimera Tüpa ñemoirosa ipirata catu vahe. Esepia, co tuví rese niha seroyapri ité Tüpa remimbotar. Ipipe avei niha ahe ava Tüpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyvira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tēi eté yaiquese Tüpa oicove vahe ñemoirosa pipe!

³² Peyemomahenduha acoi aracaco co tesapasa nungar supi eté vahe pisi ramose, peyemoviracuaño ité pe recoãhasa upe pe yemombaraisusa pipe. ³³ Esepia, acoi amove pe pâhu pendar rese ñeñe-ñeñe tēi yuvireco, mara-mara tēi avei pe rereco opacatu ama rovaque. Ambuae pe pâhu pendar evocoiyase peipitivii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosañi avei pe viharetesa pipe peico. Esepia, peicua ivave perecora mbahe aviye catu vahe iyavei apirêhi vahe. ³⁵ Sese pemocañi tēi eme Tüpa rese pe yeroyasa. Esepia, evocoiya pe recosa pipe omoime ucara mbahe tupri pēu curi. ³⁶ Pe rumo peyemoviracuaño itera mbahe-mbahe tēi upe Tüpa remimbotar apo âgua semimombehugüer oime vaheerã pisi âgua curi. ³⁷ Supi eté icuachiapri pipe Tüpa aipo ehi:

“Pihaiivi eté oura acoi ou vahevi.

Ndiaracahei chietera.

³⁸ Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavihai chira sese” ehi aracahe.

³⁹ Yande ndahei oyepepi vahe nungar yaico. Evocoi nungar niha ocañi tēi vaheerã yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepiai vahe. ² Supi eté amove yande ramoi arachendar upe, “Aviye ité” ehi Tūpa oyese yeroyasa pipe sui.

³ Tūpa rese yande yeroyasa pipe yaicua ahe oñehe pipe ité oyapo opacatu mbahe. Sese yaicua cūrteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovêhe oporrecosa aviye catu vahe Caïn porrecosa sui chupe. Sese, “Co ava seco catupri vahe che rovaque” ehi iyeroyasa rese oipisi tuprise iporrecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, “Tomano rane” ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoêhi viteseve, “Enoc recocuer aviye ai rane ité chupe” ehi icuachiapri arachendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, “Oime ité Tūpa” ehi rane itera, iyavei, “Oime itera mbahe secasar upe nara” ehi aveira.

⁷ Noé avei oyeroya Tūpa rese. “Oimera mbahe tēi co ivi pipe ndapesepia vitei vahe” ehise chupe, viroya voi eté. Evocoiyase seroyasave oyapo arca oyesuindar pīsiro āgua. Iyavei sese oyeroya pipe omombehu ava co ivi pipendar cañi āgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, “Eso ambuae ivi ndeu amboyecua vaheṛā vahesave, ahe amondora ndeu” ehise, omboyeroñaño ité. Yepe ahe ivi ndoicuai viña, osēño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oi mbahe pīrer apopri pipe tēi aheve secoi. Ēgüe ehi tupri avei tahir Isaac iyavei sumino Jacob. Ahe avei oipisi vaheṛā Tūpa remimombehu ivi yuvireco. ¹⁰ Esepia, aipo Abraham osāroño ité tecua ivave ovīracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahī āgua. Esepia, viroyaño ité Tūpa oñehe omboaviye āgua chupe. ¹² Evocoiyase yepe Abraham ocuacuami viña, vireco rumo guahī. Ahe ichuindar sehii eteanga coipe inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipisii eté mbahe semimombehugüer oyeupendar. Ahe mbahe amombri rupi osepiñañomi tēi yuvireco oyeroyasa pipe, soriveteño avei sese. Ēgüe ehi ocuañaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyevi iriño itera aheve avei yuvireco viña. ¹⁶ Ahe rumo oipota ambuae ivi aviye catu vahe yuvireco, ahe iva pendar. Sese Tūpa nochī eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahīr ñepeī vahe Isaac reropovêhe āgua Tūpa upe güecoāhasa pipe. Yepe Tūpa aipo ehi chupe aracahe viña: ¹⁸ “Nde rahīr Isaac sui setā oimera nde suindar” ehi. ¹⁹ Esepia, oicua ité Tūpa vireco pīratasa ava omano vahe mbogüerayevi iri āgua. Evocoiyase imano rāgüer sui eté oipisi iri guahīr aracahe. Ahe evocoiyase omboyecua mbahe yandeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaheṛā pisi āgua.

²¹ Iyavei Tūpa rese oyeroya pipe avei Jacob omano pota āgua, osovasa ñepeī-peī José rahīr. Ahese opococa rese tēi eté oyemovīracua oyerokuī āgua Tūpa upe imboeteisa pipe.

²² Tūpa rese oyeroya pipe avei José, omano āgua renonde, aipo ehi: “Yande mu israelita opara yuvīnose ivi Egipto sui curi” ehi. Ipare oyocuai omu oitacuer rerova āgua aracahe.

²³ Tūpa rese oyeroya pipe avei, ohase Moisés, iyesupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyei eté mborerecuar guasu porocuaita yuca āgua sui.

²⁴ Tūpa rese oyeroyasa pipe avei, ocuacuase Moisés, ndoipotai eté, “Egipto pendar mborerecuar guasu rayri membri” oyeupe he āgua. ²⁵ Ahe rumo oipota catu mara-mara tēi güereco āgua Tūpa reroyasar reseve chīhi rupive mbahe tēi rese yemboviha rāgüer sui. ²⁶ Aviye catu ité chupe Tūpa rembiporavo upe nara mbahe tēi porara āgua Egipto pendar mbahe eta sepīrusu vahe rereco rāgüer sui. Esepia, ahe oicuaño ité oyeupe nara porerecosa Tūpa ombou vaheṛā.

²⁷ Tūpa rese oyeroya pipe avei osē ivi Egipto sui osiquiyeēhisa pipe mborerecuar guasu roriēhise. Oyemoviracuaño ité oyese mbahe apo āgua; aviye osepia vahe ité Tūpa acoi ndoyecuai vahe. ²⁸ Tūpa rese oyeroya pipe avei oyapo Pascua pieta. Opa uca oipichi ava upe oquenda rese mbahe mimba ruvi Tūpa rembiguai oporoyuca vahe ava israelita rahir ipi yucaēhi āgua.

²⁹ Tūpa rese oyeroya pipe avei ava israelita osasa para guasu Pira Vahe ivi ipiru vahe hari rupi yuviraso. Ipare yamotarēhimbar Egipto pendar, “Ēgüe yahe avei” ehi yuvireco viña, i rumo opaño oyopi.

³⁰ Tūpa rese oyeroya pipe avei israelita oyerese siete ari rupi tecua Jericó rese, opa ñachisa onduru. ³¹ Tūpa rese oyeroya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepia, ahe oipisi tupriño güetave israelita Jericó ivi repiasar.

³² ¡Setá vite ambuae ava recocuer oime amombehu vakerā pēu! Ipane ité rumo ari imombehupa āgua: Gedeón, Barac, Sansón, Jefé, David, Samuel iyavei opacatu Tūpa ñehe mombehuar recocuer. ³³ Evocoi avei Tūpa rese oyeroya pipe osecopi ité ambuae ivi pendar, oporocuai tupri güeco ñiva pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rāgüer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua. ³⁶ Ambuae iparaisu catu ava upe oñeeroirosa pipe, onupasa pipe, oapichi-pichisa pipe, voquendasa pipe avei yuvireco. ³⁷ Ambuae ita pipe oapi-apisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pírer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evocoi seco catupri vahe yuvireco ndiyai co ivi pipendar Tūpa cuaparēhi upe vireco vakerā oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisi eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihivi tupri āgua che remimombehugüer rupi yuvireco’ ohesa pipe chupe, yandeu opacatu avei.

12

Yamahecuia tupri ra yande yeroyasa pipe Jesús rese

¹ Sese yande, yaicuaese setá ité evocoi ava oime omboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochiēhisa pipe. Esepia, ahe oicua ité oparaisu pare virecora oviharetasa, oguapise omborerecuasave Vu acato coti oi.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico āgua iyavei, “Ndorequerēhi iri” ndapeyei chira. ⁴ Esepia, pe ndapemano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri arachendar pipe aipo ehi:

“Che rahir, eyemoingatua voifoi Yar nde mombaraisusa upe nde reco mohivi tupri āgua, iyavei, ‘Ndachequerēhi iri’ nderei chiaveira chupe ndeu oñehe pīratase.

⁶ Esepia, Tūpa osecomohivi tupri ava güembiaisu iyavei omombaraisu rane guahir sereco āgua” ehi.

⁷ Peñemosañu catu pe mombaraisusa upe pe reco mohivi āgua. Esepia, Tūpa ēgüe ehise pēu guahir ité pe rereco. ¿Oime piha que ñepeí ava guahir upe noñehe pīratai vahe secocuer mohivi āgua? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chíhivahe ndiyesupai vahe, ēgüe peye tēi peico chupe. ⁹ Iyavei, chíhivahe tēi vite yaicose, yande yesupa co ivi pipendar yande nupa yande recocuer mohivi āgua, ahese yamboetei. Sese yamboetei catura yande Ru Tūpa iva pendar tecovesa rereco āgua. ¹⁰ Yande yesupa co ivi pipendar opihañemoñetagüer rupi tēi yande nupa yaicove raimi tēise co ivi pipe; Tūpa rumo yande mombaraisu yandeu mbahe tupri āgua rese yande reco maranehi āgua inungar ahe ndaseco marai vahe. ¹¹ Supi eté yipidar, poronupasa yaipisi

ramose, tasi yandeu. Coiye rumo yande imboyeroyasa pipe yayapo catura mbahe ihívi vahe. Ahe evocoyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopose iri pe reco pīratasa iyavei peyemonguerēhi iri pe guata āgua yande Yar rupi. ¹³ Ipare peseca peri ihívi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava piha pipe; aviyeteramo opacatu rese ova tiētera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe pe pāhuve inungar Esaú aracahe. Ahe omondo Tūpa porovasasa oyeupendar tahir ipi güecosa resendar mimoi repirā tēi vīvri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasēhō iteanga viña, ndiya iri eté rumo mbahe sembierecovi rāgüer mboyevi āgua chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendi ité inungar tata rendigüer; oime pītu, pītumimbi vahe, ivitu ai avei sese. ¹⁹ Iyavei ndapesendui mimbi imoñehepri, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evocoi porocuaita aipo ehi vahe sui: “Acoi opīro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avei” ehi. ²¹ Ahe mbahe oyecua vahe aipo oporombosiquiye vahe ité. Evocoyase Moisés teieté aipo ehi: “Che siquiyepave aririi eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetēi āgua yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco aviye vahe espíritu yuvirecoi vahe rese. Ahe niha Tūpa osecomohivi tupri sereco. ²⁴ Peyemboya avei Jesús rese, ahe omoime yandeu Tūpa remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vahe rā acoi pēu oñehe vahe upe. Esepia, Moisés reroyaēhisa pipe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Ēgüe ehise chupe yuvireco aracahe, ēgüe ehi catu iri tiētera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboririi eté ivi aracahe; cūrítei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiaho Tūpa ‘topita apirēhi mbahe nomii vahe’ oyapave” ehi. ²⁸ Tūpa mborerecuasa ombou vahe yandeu ahe nomii chietera. “Aviye ndeu” yahera evocoyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepeí reseve mbahe omocañipa vahe.

13

Mara yahera Tūpa mboviha

¹ Ndapepoi chietera pe yeaisusa sui ñepeí-peí oyeivri nungar pe recosa pipe. ² Iyavei peresarai eme pe avasa sui ava oyeopotase pe piri. Esepia, co nungar apo pipe amove ava omoingue Tūpa rembiguai güetave icuaēhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ēgüe ehi aveira pēu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuarā oyemboaguasa tēi vahe upe.

⁵ Ndahei guarepochi tēi peipotā raira. Iya rumo peyembovihaño mbahe pereco vahe rese. Esepia, Tūpa aipo ehi: “Ndroeyai chietera, ndapoi chietera nde sui” ehi aracahe.

⁶ Evocoyase aipo yahera Yar rese yande yeroyasa pipe:

“Che Yar che pītivii, ndasiquiyei chietera ava tēi sui oyapo potase mbahe cheu” yahera.

⁷ Peyemomahenduha pe reroguatasa rese, pēu Tūpa Ñehengagüer mombehusa rese avei. Pepihañemoñeta tupri secocuer rese, seco apri rese avei; iTūpa reroya agüer rupi tupri avei peico.

⁸ Jesucristo recocuer noñecuñaroi vahe ité, yipisuive secoi apirēhi vahe. ⁹ Peyembopa ucai rene yembohesa co coti tēi vahe upe. Aviye catu yayemomirata Tūpa poroaisusa rese que mborocuaitea tembihu resendar sui. Esepia, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tēi Tūpa rēta oi imaranehi catu vahe pipe seropovēhe ava angaipa rerocua āgua; ahe mbahe mamba rete rumo osapi tecua ivii yuvireco yepi. ¹² Ēgüe ehi avei niha Jesús iparaisu, omano tecua ivii ava reco mbocatupri āgua vuvi pipe. ¹³ Ēgüe yahe aveira yasora Jesús upe yande paraisu āgua supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evocoi tecua oime vaherā yandeu curi. ¹⁵ Sese Jesús rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri ari rupi chupe. ĩĒgüe yahera imboetei yande ñhehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepia, evocoi nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepia, ahe ndopituhui eté pe recocuer rāro yuvireco. Esepia, oicua Tūpa oicua mbahe sembiapo rese chupe curi. Sese pemboyeroya catu 'tayavai eme iporaviquisa chupe; tasorivete oporaviquisa rese yuvireco' pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepia, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihaiivi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ĩĒgüe tehi imboeteipri apirēhi tasecoi Cristo yepi!

²² Che rivireta, peñemosañ co che opomboaracua vahe rese, moviro tēi niha co ñehesa aicuachía pēu. ²³ Aipota pe peicua yande rivri Timoteo imosesa soquendasa sui. Oyepota pihavise, arasora cheyeupi che sose pe repia.

²⁴ Pemombehu che mahenduha opacatu ava pe cuaisar upe, opacatu ambuae Tūpa upendar ava upe avei. Ivi Italia rupindar avei ombou omahenduhasa yuvireco pēu.

²⁵ Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbahecuasa ou vahe Tūpa sui

² Che rivireta, pevihareteñora peico acoi oimese tecoãhasa pëu yepi. ³ Esepia, peicua niha pe poreroyasa rese oimese mbahe tecoãhasa, ahe ipipe peyembohe pe ñemosasa ãgua rese peico. ⁴ Peicoño ité pe reco ñemosasa pipe pe reco mohivi tupri catu ãgua. Evocoiyase nipane iri chira mbahe Tūpa suindar pëu.

⁵ Iyavei acoi ipanese que ava pe pãhu pendar upe yaracua ãgua, toporandu Tūpa upe. Evocoiyase ahe omboura chupe. Esepia, ahe opacatu upe mbahe ombou güecatëhiëhisa pipe iyavei ombahe mboasiëhisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opihañemoñeta rerova-rova tëisa pipe inungar acoi ivitu i ombohitu-hitu tëi vahe. ⁷ Acoi ëgüe ehi-ehi tëi vahe ava ndoipisii chira mbahe yande Yar sui yuvireco. ⁸ Esepia, ñepeí ari ipihañemoñeta ñepeí mbahe rese, ambuae ari ambuae rese. Ndoymoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyembovihareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pãhuve, toyemboviba viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ëgüe ehi raimi tëi vahe yuvireco. ¹¹ Evocoiyase acoi ari osëse, sacú iteangase, ahesa caha opa ipiru; ipotri avei opa oviapi ichui iyavei iporañetesa opa ichui. Ëgüe ehi aveira ava mbahe yar; omanora oporaviquisa sui.

Tecoãhasa, poroãtoisa resendar

¹² Acoi ava oyemoviracua vahe poroãtoisa upe oyembovihara oico. Esepia, osasa tuprise evocoi poroãtoisa, oipisira porerecosa, ahe tecovesa apirëhi vahe Tūpa ombou vahe guaisupar upe. ¹³ Acoi ava oyanduse poroãtoisa oyeupe mbahe tëi apo ãgua, “Tūpa revo ëgüe ehi cheu” ndehi chira. Esepia niha, Tūpa ãtois ar ndipoi eté mbahe tëi oyapo uca vaheerã chupe. Iyavei ahe noñatoi avei mbahe tëi apo ãgua ava. ¹⁴ Co rumo ava opihañemoñeta rai upe oñeatoi uca mbahe tëi apo ãgua yepi. ¹⁵ Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepia, opacatu mbahe aviye vahe ahe Tūpa ombou vahe yandeu. Ahe niha opacatu iva rese mbahe aposar. Ndahei rumo güembiapo nungar secoi. Esepia, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pipe ‘toyuvirecoi inungar yipindar mbahe miti ha seropovëhepri cheu opacatu che rembiapo sui’ ohesave yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehese rese: peyapisaca tupri vaira ambuae ava ñehese rese, mbegüe rupi rumo peñehera chupe iyavei ndapembahemboasi voi tëi chiaveira. ²⁰ Esepia, yambahemboasi voi tëise, ndayayapoi Tūpa remimbotar. ²¹ Evocoiyase peseya teco raisa, opacatu ambuae oime vahe mbahe naporai vahe pe pãhuve. Co catu pe yemominisave peroya catu vite Tūpa ñehese omoingue vahe pe piha pipe. Ahe niha vireco piratasa pe písiro ãgua.

²² Pe rumo pemboaviyera co pe mbohe vahe ñehesa; ndahei acoi pesenduño tëira. Esepia, pesenduño tëise, pe ae peyembopara. ²³ Supi eté acoi ava osenduño tëise Tūpa Ñehengagüer, ipare rumo ndoviroyai, ahe inungar acoi ava osepiaño tëi vahe vova yepiasa pipe. ²⁴ Ipare rumo oyepepise ichui, cüriteimi sesaraño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuita maranehi mbahe-mbahe tëi sui yande reroqua vahe rese iyavei oyemoviracuaño ité vahe oyapo vaheerã iporocuita, ahe oviharetera opacatu güembiapo tupri rese.

²⁶ Amove ava, “Che aguata tupri Tūpa rupi” ehi tëi. Ndoicuai rumo oñehese monguiriri ãgua. Evocoiyase ahe ae oyembopa oico. Sembieroya evocoiyase ëgüe ehi tëi vahe. ²⁷ Yarecose rumo yande rembieroya icatupri, nimarai vahe yande Ru Tūpa rovai, ahesa yaipitivaira co tirëhi, imer mano vahecuer avei iparaisusa rese. Iyavei ndayayapoi chira mbahe naporai vahe.

2

Ndayamboyoavirati chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyaisu yoavii chira. ²⁻³ Inungar-ra que ava mbahe yar oiqueste pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, “Eguapi co tenda aviye catu vahesave” peyera chupe. Ahe pipeve avei co oiqueste pe pãhuve iparaisu vahe oturucuar cuacua vahe reseve, “Eipe peve nde epita, anise eguapi ivive” aipo peyeñora co chupe viña. ⁴ Evocoyase ñgüe peyese, peyapo mbahe ndoyoyai vahe, naporai vahe pe pãhuve ae iyavei peyeapo ava poravosar nungar peico pe pihanemoñeta raisa pipe.

⁵ Che rivireta, che rembiaisu, pesendu aipo ñehesa: Tüpa oiporavo ava iparaisu vahe co ivi pipe ‘toyuvirecoi mbahe yar nungar che reroyasa rereco’ oya, iyavei ‘toipisi che remimobehugüer rupi che mborerecuasa oyeupe nara’ oyapave guaisupar upe. ⁶ Pe rumo seroïrosa pipe pemochi ava iparaisu vahe. ¿Ndahei vo mbahe yar mara-mara tõi pe rereco yuvireco yepi? Ahe niha pe mbotiriri mborerecuar rovai pe reraso yuvireco yepi. ⁷ Ahe avei niha oñehe-ñehe tõi seroïrosa pipe yande Yar yaroya vahe rer imboyeroyapri rese yuvireco.

⁸ Supi été yayapo mbahe aviye vahe yamboaviyese mborocuaita ivate catu vahe icuachiapri aipo ehi vahe: “Pesaisu ava pe yeaisu nungar” ehi vahe. ⁹ Acoi yayeaisu yoavirati tõeise rumo, ahese yayapo angaipa, yayavi mborocuaita Tüpa rovai. ¹⁰ Esepia, acoi ava viroya vahe opacatu mborocuaita, ipare rumo oime que ñepe nomboaviye tuprii vahe, ahe oyavi opacatu mborocuaita. ¹¹ Esepia, Tüpa ité niha aipo ehi: “Ndapeyemboaguasai chira” ehi. Ahe avei aipo ehi: “Ndapeporoyucaí chira no” ehi. Yepe acoi ndapeyemboaguasai chira viña, pe poroyuca pipe rumo, peyavi mborocuaita. ¹² Evocoyase peñehe tuprii iyavei peico tupri aveira. Esepia, oporandura yande recouer rese yande Yar oporocuaita pipe güeru vahe yande reco tupri ñgua. ¹³ Supi été acoi ndoiparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tõi

¹⁴ Che rivireta, zaviyera pïha acoi ava, “Ayeroya yande Yar rese” ehi tõi vahe, ndoyapoise mbahe aviye vahe yuvireco? ¿Oicatura pïha ahe oñepisiro aipo ohe pipe tõi yuvireco? ¹⁵ Inungar-ra oimese que yande rivri, anise yande reindri upe ipanera iturucuarã, semihura ari yacatu rupindar viña. ¹⁶ Evocoyase que pe aipo peyeñora chupe viña: “Aviye, eso tupri eico. Eyeao eso sôhisagüer sui, ecaru tupri” peyera. Ipare rumo ndapemondoise mbahe ipane vahe chupe, zaviyera pïha ava upe aipo yande he tõi viña? ¹⁷ Ñgüe ehi avei, “Ayeroya yande Yar rese” yande hesa; ndayapoise rumo mbahe aviye vahe aipo yande hesa pipe, aipo yahe tõi yaico.

¹⁸ Aviyeteramo ava pe pãhu pendar aipo ehira cheu: “Nde ereyeroya yande Yar rese, che rumo ayapo mbahe tupri” ehi. Che evocoyase aipo ahera chupe: “Emboyecua ru nde yeroyasa mbahe nde rembiapoñhi pipe. Evocoyase che amboyecua che yeroyasa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepe Tüpa” ere. Supi été aipo ere. Co rumo carugar avei oicua. Ichui osiquiyepave rumo ahe oririi été yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoñhisa nde yeroyasa ñgüe ehi tõi vahe? ²¹ Esepia, Tüpa oipisi yande ramoí Abraham seco tupriisa pipe oicuvêhese porerecosa nungar guahir Isaac chupe aracahe. ²² Indó, Abraham yeroyasa omboyecua ité güembiao catupri reseve. Evocoyase ñgüe ehi ahe güembiao tupri pipe omboaviye tupri oyeroyasa oico aracahe. ²³ Ñgüe ehi yaviye icuachiapri aipo ehi vahe: “Abraham viroya ité Tüpa, evocoyase, ‘Co seco catupri vahe’ ehi Tüpa ipisi” ehi. Ahese ava, “Abraham Tüpa mboripar ité” ehi yuvireco chupe.

²⁴ Indó, Tüpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ Ñgüe ehi tupri avei cuña ndipihai vahe Rahab upe. Esepia, ahe omoingue ñuvirío ava ivi repiasar imondopri güeta pipe, ipare oñomi imondo ambuae peri rupi yamotarêhisar sui. Ipipe sui Tüpa oipisi inungar-ra seco ivi tupri vahe viña. ²⁶ Ñgüe ehi yande rembiapo catupri ndayamboyeuaise yande yeroyasa pipe, ahe inungar avei Espirito ndasecoise yande rese, yande yeroyasa evocoyase omano tõi été oico.

3

Yande ñehe resendar

¹ Che rivireta, yipindar ndapeyepoi chira setá etepri oporombohe vahe peyepãhuve. Esepia, peicua niha yande oporombohe vahe yaicose, Tüpa oporandu catu itera ambuae ava sui yande porombohe agüer rese yandeu curi. ² Opacatu yande yayavi setá mbahe

rese yepi. Oimese que ava ndoyavii vahe oñehe, ahe ava seco ïvi tupri vahe. Iyavei oicua tupri opacatu güeco rereco tupri água. ³ Inungar acoi yamondose cavayu yuru penda sese seroguata água. Ahese opacatu cavayu retecuer yaicatu imboyahuva água. ⁴ Inungar tupri avei carite guasu, yepe tuvicha iyavei yepe ivitu omoañi opiratagüer pipe viña, serovasa rahimi pipe rumo seroguatasar omohivi-hiviño seraso güemimbotar rupi. ⁵ Ëgüe ehi avei yande ápecu, yepe chíhimi tēi viña, ipipe rumo yayapo tēi mbahe tuvicha vahe ava upe. Inungar avei que tata chíhimi vahe sui tēi yuvi guasu opa ocai. ⁶ Ëgüe ehi yande ñehesa tata nungar. Iyavei yande ápecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehúsar yande resendar ité! Ahe amove ovireco mara opacatu yande recocuer. Inungar tata ova-ova vahe mbahe rese. Evocoi yande ñehesa tēisa caruguar suindar. ⁷ Ava oicatu opacatu mbahe mimba nimasoi vahe mboaracua água, vírai, mboi iyavei mbahe ipi para guasu pipendar avei no. ⁸ Ndipoi eté rumo que ava oipoepeí vaheerá oñehe. Yandeu ndiyai eté ipoepi água. Yande ñehesa oporoyuca vahe nungar ité yepi, mbahe tēi eté. ⁹ Co yande ápecu pipe yamboetei yande Yar Túpa, ipipe avei rumo yamomara ava, ahe ava rumo Túpa oyapo onungar. ¹⁰ Ëgüe ehi eté, yande ñehé pipe yamboetei Túpa, ipipe avei yaroïro ava. Che rivireta, ndiyai evocoi nungar mbahe yayapo yepi. ¹¹ ¿Oicatura pñha osé ñepeí i ohé vahe sui sēhe vahe, iro vahe avei viña? ¹² ¿Ihara pñha higuera ivira rese aceituna viña? ¿Iyavei oicatura pñha uva hi rese oha higo viña no? ¡Aní, ndoicatui eté! Iyavei ndoicatui ñepeí i ohé vahe sui osé i, sēhe vahe sēhe asi vahe reseve.

Mbahecuasa supi eté vahe

¹³ Acoi oimese pe pñhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecuasa tuprisa pipe. ¹⁴ Oimese rumo pe pñhave pe poroamotarēhisa mbahe pota raisa pipe, iyavei peyeupe nara tēi mbahe peseca, ahese ndiyai peyembovñha tupri tēi ‘che yaracua vahe aico’ pe yapave. Esepia, peremira tēira supi eté vahe mbahe rese. ¹⁵ Ëgüe ehi eté evocoi nungar aracuasa ndahei Túpa suindar. Ahe rumo co ivi pipendar tēi vahe, ava pñhañemoñeta sui tēi osé vahe iyavei caruguar suindar tēi avei. ¹⁶ Esepia, poroamotarēhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osé ñehépepisa iyavei opacatu mbahe tēi. ¹⁷ Acoi vireco vahe rumo Túpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asii chiaveira. Iyavei oyemoingatu voi vahe, ahe oporoparisuereco vahe, nomboyoaviratii vahe güecocuer. Ahe ipñhañemoñetasa ñepeí reseve vahe iyavei oyapo tupri vahe mbahe. ¹⁸ Iyavei acoi oseca vahe mbahe tupri yepi, oipisi itera opñha pipe teco ïvisa.

4

Co ivi pipendar mbahe raisusa

¹ ¿Que sui pñha ou vavasa iyavei ñehépepeí-episa pe pñhuve? Ahe ou pe mbahe pota raisa sui pereco vahe pe pñhañemoñetasa pipe. ² Pe peipota rai mbahe. Ipare rumo ndapeicatui sereco água. Evocoiyase peporoyuca pe mbahe pota raisa pipe. Ndiyai eté rumo pēu sereco água. Ipipe sui peyeecoña, pevava avei no. Ndapeyosui eté rumo mbahe pe remimbotar. Esepia, ndapeporandui Túpa upe. ³ Acoi peporanduse rumo sese, ndapeipisi. Esepia, peporandu rai tēi, peipota pe yembovñha água rese nara tēi. ⁴ ¡Pe mbñha, peyavi vahe pe recocuer! ¿Ndapeicuai vo acoi ava Túpa cuaparēhi mboripar tēi yuvirecoi vahe, ahe Túpa amotarēhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tēi pipe güeco água, ahe oyeapo Túpa amotarēhimbar. ⁵ Supi eté Túpa Ñehengagüer aipo ehi: “Túpa osaisu güecatēhisa pipe o Espíritu omondo vahe yande pñha pipe” ehi. ⁶ Ahe rumo yande pñvivi catu oporoaisusa pipe. Esepia, icuachiapri arachendar pipe aipo ehi: “Túpa oyamotarēhi ava oyeecomboivate ai vahe. Oipñvivi rumo seco mbegüe vahe saisusave” ehi. ⁷ Sese pemboyeroa catu Túpa. Peyemoviracua caruguar remimbotar apoñhi água. Ahese ahe oyepepñra pe sui. ⁸ Peyemboya Túpa rese, ahe evocoiyase oyemboyara pe rese. Pe, angaipñ viyar, ¡peñemoatiro mbahe peyapo vahe sui! ¡Iyavei pemoatiro pe pñhañemoñetasa ñuvirió pereco vahe sui! ⁹ ¡Tatasi pēu, tapeyaseho, perorivete iri eme, pemboasi pe angaipñ pe yembovñharēhisave! ¹⁰ Peñnopñha Yar rovai imboyeroya pipe. Ahe evocoiyase pe reco mboivatera.

Peroïro eme pe mboetasa

¹¹ Che rivireta, aní chira peñehe mara peyeupe. Acoi oñehe rai vahe iyavei viroïro vahe ambuae Jesús reroyasar, ahe oñehe rai tēi aveira mborocuaíta rese seroïrosave. Ëgüe peyese, evocoiyase seroyaēhisa pipe peyemboivate catura mborocuaíta sui viña. ¹² Oime rumo ñepeñño ité ombou vahe mborocuaíta yandeu iyavei oporandu vahe yande recocuer

rese. Ahe güeraño avei oicatu oporopĩsiro iyavei oporomocañi ñgua no. Evocoyase pe, ñdiyai pe cotindar reroĩro ñgua pẽu!

Ndayaicuai mbahe oime vaheřa yandeu ayihive

¹³ Pesendu pe aipo peye vahe: “Cũritei, anise ayihive yasora que tecuave, anise que tecua guasuve revo. Aheve yaicora ñepei araviter yande poraviqui ñgua. Ahese yamogana catura guarepochi” aipo peye vahe. ¹⁴ ñNdapeicuai rumo mbahe oime vaheřa pẽu ayihive! ¿Mara ehi pĩha yande recocuer? Ahe inungar ivichi oyecua raimi tẽi vahe, ipare opaño ocañi. ¹⁵ Iyacatu aipo peyera viña: “Oipotase yande Yar yande reco ñgua, yayapora co nungar mbahe, que ambuae mbahe” peyera yepi. ¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo naporai. ¹⁷ Esepia, acoi oicua vahe mbahe tupri apo ñgua, ipare rumo ndoyapoi eté, ahe oyapo angaipa.

5

Imbahe eta vahe paraisusa resendar

¹ ñPe mbahe yar, pesendu co: peyaseho iyavei perãse! Esepia, peiporarara mbahe tẽi peico. ² Opacatu pe mbahe eta ocañi tẽi vaheřa. Esepia, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa opochi ati-ati no. Ahe niha pe recoãha ñgua, omboyecua vahe mbahe tẽi pẽu. Iyavei pe mbahe pota raisa ndoyavii pe roho ocai vahe vireco. Esepia, pemonuha guasu tẽi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pẽu nara yuvireco, chupe ndapemboepii eté. Sese sãsé tẽi yuvireco. Ahe rumo yande Yar ipĩratá vahe, ivate catu vahe oicua. ⁵ Co ivi pipe tẽi pe peyecomendiayi peico iyavei peyemboviha co ivi pipendar mbahe rese inungar guaca imonguirapri yuca ñgua. Ipipe peyemoingatu pe cañi ñgua. ⁶ Pe ñehe pipe pemobaraisu ava ndoyapoi vahe mbahe yuvireco; yepi, “Mara” ndehi yuvireco pẽu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosañi yande Yar yevi iri ñgua rese. Inungar ava omaheti vahe osãro rane güemiti poho ñgua. Esepia, ahe osãro yipindar oqui vahe iyavei ipa oqui vahe mbahe miti aviye ñgua. ⁸ Pe avei peñemosañi, peyemonguerẽhi catu. Esepia, cõimi eté yande Yar yevi ñgua cute.

⁹ Iyavei che rivireta, peñemoĩroi rene peyeupe. Evocoyase Tũpa ndoporandui chira co mbahe rese pẽu. Esepia, mborerecuar guasu iva pendar oyemoingatu voi ohã yandeu porandu ñgua. ¹⁰ Che rivireta, peico catu inungar Tũpa ñehe mombehisar aracahendar yuvirecoi vahe. Ahe oñemosañi mbahe rasicuer upe yande Yar rer pipe oñehe ñgua yuvireco. ¹¹ Yande rumo yaicua sovasapri ava oñemosã vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviye vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe ñgua ndapeiporui chietera que iva rer iyavei que ambuae mbahe pe ñehe reroya uca ñgua. Iyacatu rumo, “Supi eté” peyese, supiño itera; “Ani” peyese, ani chiño itera Tũpa poronupasa pisiñhi ñgua.

¹³ Aviyeteramo que pe pãhu pendar iparaisura oico; toyerogui. Aviyeteramo oimera que sorivete vahe oico; ahe tosapucaĩ Tũpa upe. ¹⁴ Aviyeteramo que ava imbaheasira oico, toñehe evocoyase Jesús reroyasar rãrosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco. ¹⁵ Acoi oyeroguisse oyeroyasa pipe sese yuvireco, imbaheasi vahe evocoyase ocuerara; yande Yar avei omopuhara. Acoi angaipa virecose, oime aveira ñerosã chupe. ¹⁶ Sese pemombehu pe angaipa peyeupe, peyeroqui avei peyese pe yembogũera tupri uca ñgua. Ava aviye vahe oyeroguisse oquerẽhisave opacatu güecocuer pipe, ahe iyeroquisã ipĩratá ité. ¹⁷ Acoi Tũpa ñehe mombehisar Elías yande nungar avei. Ahe oporandu oyeroguisã pipe Tũpa upe, “Toqui eme” ehi. Aipo ehi, ndoqui eté ivi harive mbosapi araviter imombitesã rupi. ¹⁸ Ipare oyerogui iri, ahese oqui iyavei mbahe miti iha iri.

¹⁹ Che rivireta, acoi oimese oyahuva vahe supi eté vahe sui pe pãhuve, ipare ambuae viroyeve Jesús upe, ²⁰ tãpeicua pe acoi viroyevi vahe angaipa viyar secocuerai sui, oipisiro ihã imano rãgũer sui. Iyavei omoime ñerosã tuvichã vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tüpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tüpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água 'imoatiropri toyüvirecoi che Rahir ruvi pipe oangaipagüer sui' oya. Peipisi catu Tüpa porovasasa pe reco tupri água.

Tüpa suindar mbahe aviye vahe rãrosa

³ Imboeteipri tasecoi Tüpa, yande Yar Jesucristo Ru! Ahe niha oporoparaisuerecosu pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipipe sui yaicuaño ité oimera mbahe aviye vahe Tüpa suindar yandeu. ⁴ Ipipe sui avei Tüpa oipisi ucara pëu pe mombahesa ivave yapocatupri nocañii vaheerã, ndituyui vaheerã iyavei ndopai vaheerã ité. ⁵ Pe peyeroya ité Tüpa rese. Sese niha ahe opiratasa pipe pe repi mbahe tēi sui poropisirosa pe reco água. Ahe vireco vahe imoingatupri ari ipa vahe mboyecua água pëu.

⁶ Co rese peyemboviharereño peico, yepe cūrítei pe reco pipe peparaisu pucu raimi tēi setá pe recoãhasa pipe peico viña. ⁷ Esepia, pe yeroyasa Tüpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, "¿Aviye vahe ité pïha?" hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaheerã sui. Ëgüe yahese, "Che rese pe yeroyasa aviye ité" ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cūrítei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatu vahe ahe imombehu. ⁹ Esepia niha, pesupiti pe remiaro poropisirosa apirēhi vahe peico pe yeroyasa pipe.

¹⁰ Aracahe suive ava Tüpa ñehe mombehusar oicua tupri pota ité co poropisirosa resendar yüvireco '¿mara ehi eté pïha co tecocuer?' oyapave yüvireco. Iyavei oñemoñeta yüvireco Tüpa oporoaisusa pipe pëu mbahe ombou vaheerã rese. ¹¹ Cristo Espiritu senondeve oicua uca mbahe Tüpa ñehe mombehusar upe aipo ehi: "Poropisirosar oyemombaraisu ranera, ipare rumo teco orisa porañete vahe oimera" ehi chupe aracahe. Sese, "¿Umara pïha evocoi mbia?" ehi; "¿Mbahesera vo oimera co Espiritu remimombehu yandeu?" ehi yüvireco. ¹² Tüpa rumo omboyecua chupe, ndahehi chupe nara ité imombehupri yüvireco, pëu nara ité rumo. Ahe avei niha poropisirosa resendar ñehesa mombehusar omombehu pëu cūrítei, Espiritu Santo pīratasa pipe imbouprí iva pendar yandeu. ¡Tüpa rembiguai avei oicua tupri pota tēi cūrítei yüvireco viña!

Tüpa yande poravo yande reco maranehi água

¹³ Sese pe pihañemoñeta tuprisa pipe pemahemoha tuprira peyese Tüpa porovasasa pëu ombou vaheerã rese pe yeroya catu água acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tüpa recocuer cuaēhi viteseve. ¹⁵ Peicora rumo pe reco maranehisa pipe ité. Esepia, Tüpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: "Pe tapeico seco maranehi vahe. Esepia, che ndaseco marai vahe aico" ehi.

¹⁷ Tüpa niha opacatu ava upe secocuer rese nomboyoaviratíi chira oporandu curi, sese pe, "Che Ru" peye vahe chupe peyembosiquiyera mbahe tēi apoēhi água imboeteisave co ivi pipe peico vitese. ¹⁸ Esepia, Tüpa pe písiro aracahendar pe ramoi suindar aracuaa egüe ehi tēi vahe sui. Peicua tupri ité niha co poropisirosa repri nimboepisai eté que mbahe ocañi tēi vaheerã pipe inungar oro, anise guarepochira viña. ¹⁹ Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe. ²⁰ Ahe Tüpa oiporavo aracahe ivi, iva apoēhi viteseve egüe ehi vaheerã. Cūrítei rumo oyemboycua pëu mbahe tupri água. ²¹ Secocuer sui niha peroya Tüpa peico, ahe ombogüerayevi vahe omano vahe pãhu sui, ipare omondo oyemboeteisa, güeco porañetesa avei chupe. Ipipe sui peyeroya Tüpa rese iyavei pesãro co mbahe aviye vahe pisi água ichui.

²² Cūrítei Tüpa Ñehengagüer supi tupri vahe mboyeroyasa pipe imoatirosa pe recocuer pesaisu vaheerã ambuae Jesús reroyasareta. Evocoiyase egüe peyera peyeaisu catu opacatu

pe pihanemoñeta tuprisa pipe, iyavei opacatu pe pīratasa pipe. ²³ Pe niha pereco tecovesa piasu, ndahe pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe. ²⁴ Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipape ahe caha opa omano, ipotri avei opa oviapi;

²⁵ Tūpa Ñehengagüer rumo apirēhi vahe rā ité yepi” ehi.

Ahe co ñehesa imombehupri poropisirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar. ² Inungar pītanimi ocuacua āgua oipota cambi; ēgüe peye aveira pe querēhisa pipe Tūpa Ñehengagüer rese pe yembohe catu iri āgua, peico tupri āgua poropisirosa pipe, ³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroñeroño yuvireco. Tūpa rumo ahe ita oiporavo aviye catu vahe. ⁵ Ēgüe ehira pe rereco oyeupe inungar ita ndopai vahe; ipipe sui omopuhara otūparoguā pe rese. Iyavei pahī ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espiritu upendar mbahe aviye vahe. Ahe inungar mbahe seropovēhepri aviye vahe Tūpa upe. ⁶ Esepia, icuachiapri aracahendar pipe aipo ehi:

“Che amondo ñepe ita nungar ava aviye vahe tecua Sión ve imoviracua āgua.

Ahe che rembiporavo iporañete vahe, imboeteipri.

Acoi oyeroyā vahe sese, ahe nochī chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarēhi upe rumo imboaviyesa co ñehesa aipo ehi vahe:

“Oi aposar rumo viroñeroño co ita yuvireco.

Ahe ita rumo coiye viracuasa aviye catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vahe rā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahī, iyavei chupendar ava seco maranehi vahe peico. Ēgüe peye Tūpa reco pīratasa mombehu āgua peico. Esepia, ahe pe renose pītumimbisa nungar pe recocuerai sui tesapesa aviye vahe pipe pe reique āgua. ¹⁰ Yipindar ndahe vitei eté Tūpa upendar ava peico, cūrteit rumo ahe ité peico; yipindar ndaperecōi Tūpa poroparisuerecosa, cūrteit rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihanemoñeta raisa sui. Esepia, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroño peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu āgua, iyavei ava seco catupri vahe upe, “Aviye nde recocuer” he āgua. ¹⁵ Esepia, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese ñehē-ñehē tēiēhi āgua.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tupri rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rivireta Jesūs reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepia, aviye catu yañemosase mbahe-mbahe tēi ava rembiapo upe Tūpa mboyeroya tuprisa pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipape peñemosase chupe, ahe rumo aviye catu itera Tūpa upe. ²¹ Pe paraisu āgua rese niha Tūpa pe poravo. Esepia, Cristo oyemombaraisu pe recocuer rese. Ahe rane ēgüe ehi pe

rese pe secocuer moña água. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ñvi vahe oicuara chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatu água. ²⁵ Esepia, pe niha yipindar inungar ovesa ocañi tēi vahe peico viña. Cūrítei rumo peyevi Cristo upe. Ahe pe recocuer osáro cūrítei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Ēgüe peye aveira cuña, pemboyeroia itera pe mer. Esepia, amove ndoviroya vitei Tūpa Ñehengagüer yuvireco; pemboyecuae rumo pe reco tuprisa imboetisa avei chupe, aviyeteramo ahe avei viroyara, yepe ndapeñehei chira chupe viña. ³ Acoi pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe aviter pipe sui mbahe porañete ipocopi vahe pemboyecua pe reco mbegüemisa iyavei pe recoasiñehisa pipe. Evocoi nungar aviye catu ité Tūpa rovaque. ⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroia yuvireco. ⁶ Inungar Sara aracahe, omboyeroia ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyēñehisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēñi vahe oyoya voi pēu. Ēgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepeñi oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo água niha Tūpa pe poravo ‘toipisi che porovasasa’ oyapave. ¹⁰ Esepia, “Peipotase pe recocuer aviye tupri água pe yemboviahretesa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

¹² Esepia, supi eté, yande Yar osáro ava seco catupri vahe iyavei osendu oyeupe yeruresa. Ava mbahe tēi aposar rumo ndoipisii eté” ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēñise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ñsovasapri peico! Peyembosiquiyei rene que ava sui. ¹⁵ Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiario rese oporanduse pēu pe querēñisa pipe imombehu tupri água. ¹⁶ Ēgüe peyera rumo pe reco mbegüesa pipe imboetisave. Peico tuprira pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui. ¹⁸ Esepia niha, Cristo teieté omano yande angaipa repirā ñepeñi reseve. Güeco marañehi pipe ēgüe ehi ava recocuerai rese opacatu pe reraso água Vu Tūpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tūpa osáro güeco mbegüesa pipe secocuer moingatu água viña Noé oyapo viteseva arca oico. Ahe ipipe oñepisiro ochomi tēi yuvireco amarusu sui. ²¹ Ahe i osāhangapo i poroāpiramosa, ahe omboyecua yande ipisiroproi yande recosa. Poroāpiramosa rumo i pipe ndahei yande rete moatiro água. Co rumo yaporandura Tūpa upe, yande pihañemoñetasa moatiro água. Ipipe sui evocoiyase yañepisiroira yande Yar Jesucristo cuerayevisa pipe. ²² Ahe oso ivave uguapi oñ Vu acato coti. Opacatu sembiguai eta, mborerecuareta, opacatu imborerecuasa ipirata vahe avei ipovri pendar yuvirecoi.

4

Yandehañeco yandeyese mbahecuasa Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoiyase peyemoingatu voi ěgüe peye vaheřá peico chupe nara. Esepia, acoi ava oyemomborara vahe güete pipe oseya angaipa yuvireco. ² Ipipe sui ndoyuvireco iri chira ari rupi ava tēi pihañemoñeta pipe. Tūpa remimbotar rupi eté rumo oyapo pota mbahe co ivi pipe yuvirecoi vitesa. ³ ěgüe peye pucu rane niha pe rembiapo ai pipe peico ava Tūpa reroyasarēhi recocuer nungar rupi tupri. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cūrítei rumo pe mboriparer, ndoyembovihaí tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi. ⁶ Sese niha co ñehesa písirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyureu catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ěgüe yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepeipei yande yaiporura Tūpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tupri co Tūpa porovasasa setá vahe yande cuaita mboaviye tupri āgua. ¹¹ Acoi pemombehusa Tūpa suindar mbahe, pemombehura inungar iñehe ité; acoi peporopitivii potase, peyapoño opíratasa pēu Tūpa ombou vahe pipe. Opacatu mbahe peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. ěgüe tehi apirēhi vaheřá ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucái chira, acoi oimese mbahe-mbahe tēi yande recoāhasa pēu ‘ndoyavií, ndipoi chietera evocoi nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoiyase yayemboviharete itera acoi yande Yar oyevisi güeco pírata pipe. ¹⁴ Iñehe marase yuvireco pēu Cristo reroyasar pe recosa rese, sovasapri peico. Esepia, Tūpa Espíritu güeco porañetesa pipe secoi eté pe rese. ¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui ěgüe ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechí chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu āgua. ěgüe ehise yandeu, mbahe tēi catu itera Jesús reroyasarēhi upe. ¹⁸ Yavaise seco catupri vahe upe iñepisiro āgua, ¿mara ehira piha ava ndaseco pórai vahe ava angaipa viyar yuvirecoi vahe upe? ¹⁹ Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hā rāro āgua. Esepia, ahe niha yeroyasa ité secoi.

5

Aracuasa Jesús reroyasar upe

¹ Che amboaracua pota pe pāhu pendar Jesús reroyasar rārosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ěgüe ahe aveira acoi yande Yar oyevisi curi. ² Pesāro tupri catu Tūpa upendar ava eta pe remiario co omondo vahe pēu inungar ovesa rese yangarecuar osāro tupri vahe ovesa; peyapora pe querēhisa pipe ité. Ahe niha Tūpa oipota, ndahei ambuae yande cuaisa pipe tēi, ndahei avei guarepochi pota raisave yayapo. Yayapora rumo mboraviqui yande querēhisa pipe ité. ³ Ndapeicoi chira pe remiario upe inungar que mborerecuar güeco ivatesa pipe oporocuai pírata vahe. Pemboyecuara rumo pe recocuer aviye vahe chupe imbohosa tupri pipe. ⁴ Evocoiyase acoi oyevisi yande Yar, yande rārosar ivate catu vahe, ahese peipisira mbahe porerecosa, teco ori porañete apirēhi vahe.

⁵ Iyavei no pe mbia chíhivahe, pemboyeroyara ava pe rārosar peico. Iyavei opacatu peyemboyeroyara pe reco mbegüesa pipe peyeupe peico. Esepia, “Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pīratasa povrive. Evocoiyase pe reco mboivatera curi.
⁷ Opacatu mbahe rese pe pihañemoñeta atisa pemombehura Tūpa upe. Esepia, ahe pe rārosar ité secói.

⁸ Pearacua cañii rene peyesui, pemahemoha ari rupi peyese. Esepia, pe amotarēhimbar Caruguar pe reco momara pota yepi inungar yaguar oñaro vahe uguata tēi oporoeca ‘tamomara ava’ oyapave. ⁹ Sese peyemoviracuara Tūpa rese pe yeroyasa pipe Caruguar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe. ¹⁰ Peparaisumi pare rumo, Tūpa teieté pe reco mohivi tupri, iyavei pe reco moviracuara, pe momirata aveira pe yepipi iriēhi āgua ichui. Ahe niha oporovasasa pipe yande poravo oyeupe nara, yande yaso vaheṛā supi teco ori ndopai vahesave yande Yar rese yande recosa pipe. ¹¹ Ēgüe tehi tasecoi güeco pīratasa apirēhi vahe pipe.

Mahenduhasa ipa vahe

¹² Yande rivri Silvano omboaviye tupri vahe ité ocuaita yepi, ahe che pītivisa pipe co ayapo imondo che rembicuachía ndipucuimi vahe pe mboaracua catu āgua ‘ipipe toicua tupri catu yuvireco co porovasasa oipisi vahe, supi eté omboyecua vahe Tūpa poroaisusa’ che hesave. ¡Peyemoviracua tupri ité sese!

¹³ Iyavei Babilonia pendar Jesús roroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pēu. Marcos, che rahir nungar avei imahenduha pe rese. ¹⁴ Peyeovaupite “avirave” apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pëu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tüpa, yande Písirosar Jesucristo seco ivi vahe yuvirecoi. ² Tapeipisi catu porovasasa iyavei teco tuprisa Tüpa, yande Yar Jesús cua tupri pipe.

Jesús reroyasar recocuer

³ Tüpa ombou güeco pīrata pipe opacatu mbahe ipane vahe yande recove āgua, sese yande pīhañemoñeta catu āgua avei yande secocuer cua tupri pipe. Ahe yande poravo güeco porañetesa pipe, güembiapo porañete vahe pipe avei. ⁴ Ipipe avei oseya oñehe imboaviyepirā yandeu; ahe ñehe ēgüe ndehi tēi vahe, aviye catu vahe ité. Co yandeu ñehesa pipe sui perecora Tüpa reco aviye vahe peyese pe yepēpi āgua mbahe tēi sui. Ahe acoi oime vahe co ivi pipe ava remimbotar tēi sui. ⁵ Sese pe peyeroya vahe Jesús rese, peyemomirata catu aveira peyapo vahe mbahe aviye vahe. Peseca aveira Tüpa remimbotar cua tupri catu āgua. ⁶ Iyavei peñearo tuprira. Ipare peñemosañe aveira mbahe tēi upe. Ipipe sui peyemondo tupri catura Tüpa upe. ⁷ Ipare peyeaisura peyeviri nungar pe recosa pipe. Ipipe sui peseca catu vītera ava raisu tupri āgua.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ēgüe ndehi tēi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapiso vahe, anise mbahe ndosepia tupri vahe, sesarañe oangaipa rese ñero agüer sui. ¹⁰ Sese che rivireta, peyemoviracua catu Tüpa pe renoisa mboyecua āgua iporavopri pe recosave. ēgüe peyese, ndapeviapi chītera mbahe tēi pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písirosar Jesucristo.

¹² Sese niha opomomahenduhā ñehe itera evocoi nungar mbahe rese, yepē peicua, peicoveño avei mbahe supi tupri vahe rese. ¹³ Aviyeño itera revo che recove vīteseve opomomahenduha vite co aracuasa rese. ¹⁴ Esepia, yande Yar Jesucristo oicua uca cōimi che mano āgua cheu. ¹⁵ Opombohera rumo opacatu che catugüer rupi co tecocuer rese che manore pe mahenduha āgua.

Co osepia vahe ité Jesús mborerecuasa yuvireco

¹⁶ Co porombohesa oromombehu vahe pëu yande Yar pīratasa resendar, iyevi iri āgua resendar avei, ndahei oreyesui tēi. Ore rumo orosepia vahe ité ore resa pipe yande Yar mborerecuasa. ¹⁷ Orosepia niha yande Ru Tüpa omboeteise Guahir iyavei omondose chupe seco porañete iri āgua aipo ehise oñehe güeco porañetesa pipe: “Co che Rahir, che rembiaisu ité, sese niha che ayemboviharete vichico” ehise. ¹⁸ Ore ité niha aipo ñehesa orosendu iva suindar oroicose yande Yar rupi ivitri imboeteipri vahesave.

¹⁹ Ahe ñehesa omboyecua catu ñehesa aracahendar Tüpa ñehe mombehusar remimombehu supi tupri vahe Cristo resendar. Iya ité pëu pe yapisaca tupri āgua sese; inungar que tataendi pītusave osesape vahe oico acoi osēse voi cōhe rerusar yasitata guasu ou, ēgüe ehi co ñehesa pe pīha pipe sesape. ²⁰ Peicua catu co mbahe, co ñehesa aracahendar icuachiapri Tüpa suindar ité, ndahei yandeyesui tēi yaicua imombehu āgua. ²¹ Esepia, ndahei ñehe mombehusar oyesui tēi omombehu yuvireco. Ahe rumo ava seco catupri vahe ité. Tüpa ité omombehu uca oñehe chupe Espiritu Santo pīratasa pipe aracahe.

2

Oporombopa vahe porombohesa

¹ Yuvirecove rumo aracahe porombohesar oporombopa tēi vahe Israel ivi rupi. Oime aveira niha pe pāhuve co nungar oporombopa tēi vahe yuvireco. Ahe ñemisa pipe oporombohera co coti tēi vahe ava reco momara tēi āgua; evocoiya güeco pipe oicuacuñora oyar opísirosar. Co rumo güecocuer momba pīhavi āgua tēi ēgüe ehira yuvireco. ² Setā ava uguatara secocuerai rupi. Ipipe sui ambuae ava oñehe rai tēira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti tēi vahe rese. Icañi rumo oimeño itera yuvireco chupe. Yipisuive ité niha ahe imocañipirā yuvirecoi.

⁴ Esepia, aracahe Tüpa niñeroi eté güembiguai oyemboangaipa vahe upe. Ahe opa ité omondo mbahe tēisave. ēgüe ehi seyapa pītumimbisave, inungar ñapichimbri carena pipe

yapocatupri yuvireco cañisave nara. ⁵ Iyavei acoi Tūpa niñeroi avei ava aracahendar ndaseco pōrai vahe ivi pipe yuvirecoi vahe upe. Omocañi ité amarusu pipe ahe ava yuvireco. Noé acoi omombehu vahe tecocuer ihivi vahe resendar iyavei ava siete yuvirecoi vahe supindar, ahe güeraño ité oipisiro. ⁶ Iyavei opa omocañi tata pipe tecua Sodoma, Gomorra avei; ãgüe ehi imbotanimbu tupri ‘na ahe aveira niha ambuae ava che reroyaeñisar upe curi’ ohesave. ⁷ Lot güeraño rumo ahesa oipisiro. Ahe mbia aviye vahe secocuer; ndoyembovihal tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviye vahe secoise ahe ava pāhuve ari rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose āgua mbahe tēi sui; oicua avei mbahe tēi pipe yuvirecoi vahe rereco imombaraisu āgua ari cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyecomboivate ai vahe güemimbotar aposa pipe, acoi osiquiyeeñisa pipe oñehe rai vahe seco ivate, ipirata vahe rese. ¹¹ Tūpa rembiguai eta iva pendar rumo yupe ipirata catu vahe, omborecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voño tēi mbahe rese; evocoi nungar yuviroha yucapirā tēi eté. Ahe oñehe rai tēi vahe mbahe güemienducuaēhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraisu uca ambuae ava mombaraisusa pipe sui tēi, “Yayembovihal mbahe yande rembiapo ai rese” ehi tēi eté yuvireco viña. ¡Oporomochi pipe tēi rumo yuvirecoi, yuvirasose pe pietasave pe pirí, güeco rai reseve oyembovihal oporombopasa tēi pipe yuvireco!

¹⁴ Osepiase cuña, oipota voño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evocoi nungar oyembohe-mbohe catu mbahe pota raisa reca āgua oyeupe yuvireco. Ava ocañi tēi vaheñā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepia, oyepepi tecocuer aviye vahe sui mbahe tēi apo āgua guarepochi pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucasa vahe ñehe pipe chupe. Ahesa ramo opoi oaracuaēhisa sui.

¹⁷ Co ava oporombohe vahe inungar ivicuar ipiru vahe. Iva quihal ivitu remimombo nungar tēi avei. Apirēhi vahe ité imombopirā yuvireco pītumimbi catu vahesave nara. ¹⁸ Esepia, oñehe tupri ai angahu tēi ava monguerēhi āgua ava pihañemoñeta raisa rupi seroyevi āgua. Ipipe sui ombopa tēi ahe ava seco catupri pota vahe yuvireco evocoi nungar mbahe tēi pipe iyevi iri āgua. ¹⁹ “Opacatu mbahe apo yaicatu yande reco pipe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pipe. Esepia, noyuvinose catui eté ichui. Supi eté, yayapoño itese que mbahe tēi, ahe evocoyase mbiguai nungar ité yande rereco uca. ²⁰ Esepia, acoi oicua vahe yande Yar, yande Pisirosar Jesucristo yuvireco, ipipe oyepepi co ivi pipendar mbahe-mbahe tēi sui, oyeiti uca irise rumo co nungar mbahe tēi pipe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihivi vahe yuvireco viña. ²² Supi tupri ité yaviye ñehesa resendar: “Cave rumo ohu iri ogüēhe. Iyavei cuchi oyasu pare, oyevi iri tuyuve oyembovaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipipe opomopihañemoñeta tupri uca pota che pe mboaracuasa pipe. ² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropisirosar porocuaita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroñora co tecocuer aviye vahe Tūpa suindar güemimbotarai pipe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaheñā curi? Esepia, yande ramo opa tēi omano yuvireco. Cūrítei opacatu ahe tupriño tēi tecocuer aracahe ivi apo suive” ehi tēira yuvireco. ⁵ Ahe nimahenduha potai yuvireco co aracahendar rese. Esepia, Tūpa oyapo oñehe pipe iva, ivi avei, ahe ivi osē vahe i sui, i pāhuve avei secoi. ⁶ Coiye i pipe avei opa omocañi ivi, ombouse amarusu aracahe. ⁷ Cūríteindar rumo iva, ivi imoingatupri tata uve nara Tūpa porocuaita rupi. Evocoi tata pipe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepepi ari inungar mil araviter; mil araviter evocoyase inungar ñepepi arimi tēi chupe. ⁹ Esepia, yande

Yar ndiaracahei eté oñehe mboaviye ãgua; inungar amove ava, “Iharacahe tẽi” ehi yuvireco viña. Ahe rumo aviye etepri; güeco mbegüesa pipe yandeu. Esepia, ndoipotai que ñepei yepe yande cañi tẽi ãgua; ahe rumo oipota opacatu tupri ité yande recocuer ñecuñaro ãgua.

¹⁰ Yande Yar ari yande resapiha tẽira inungar imonda rai vahe ou pitu pipe yepi. Ahesẽ iva ocañi tupri tẽira viapugüer ipĩrata vahe pipe curi. Opacatu mbahe yapopri opara yuvirocai. Ipipe sui co ivi opacatu ipor reseve ocañi tẽi etera.

¹¹ Opacatu ité niha co mbahe yapopri ocañi tẽi vaheã. Sese, ¡peyemoviracuaño itera pe reco maranehisa rese Tũpa rese pe pihañemoñetasa pipe! ¹² Pesãroño Tũpa yepotasa resendar ari, iyavei peyapo opacatu peicatu güer rupi ‘toyepota poyava voi’ pe yapave. Ahe ari pipe iva opara ocañi tẽi eté tata pipe. Ipipe sui opacatu mbahe yapopri ticupa tuprira curi. ¹³ Yande rumo yasãro ité iva, ivi ipiasu vahe Tũpa remimombehu. Aheve opacatu ava yuvirecoira güeco aviyesa pipe.

¹⁴ Sese che rembiaisu, pesãro viteseve co tecocuer, ãgüe peyera opacatu peicatu güer rupi pe reco tupri: ãgua pe angaipãhi pipe, pẽu Tũpa, “Peyavi mbahe” ehiẽhi ãgua. ¹⁵ Tapeicua co: yande Yar seco mbegüe yandeu yande písiro ãgua. Ëgüe ehi avei yande rembiaisu Pablo icuachía oyeupe Tũpa ombou vahe mbahecuasa pipe pẽu. ¹⁶ Opacatu ocuachiar pipe omombehu evocoi nungar mbahe pẽu, yepe amove yavai senducua ãgua yuvireco viña. Sese amove ndoyemoviracua tuprii vahe yande Yar rese iyavei ndoyemboaracua tuprii vahe, ahe co coti tẽi virova ñehesa, inungar oyapo ambuae ñehesa icuachiapri Tũpa suindar rese. Ipipe güecocuer omocañi tẽi ahe.

¹⁷ Che rivri, che rembiaisu, peicua ité niha evocoi mbahe; sese peñearo tuprira pe yembopa ucaẽhi ãgua ava ndiporeroyai vahe upe Tũpa rese pe recocuer yemoviracuasa sui pe yepepiẽhi ãgua. ¹⁸ Peicua tupri catura rumo yande Yar Poropĩsirosar Jesucristo iyavei peicoveño itera iporovasasa pipe. ¡Ëgüe tehi imboeteipri taseco cũritei apirẽhi vaheã! Aipo rupive che ñehe pẽu.

JUAN REMBICUACHIA YĪPĪNDAR VAHE SAN JUAN

Ñehesa tecovesa resendar

¹ Co cuachiar pipe oromombehu pēu co yipisuive seci vahe. Ahe orosendu, orosepia avei ore resa pipe ité iyavei oropoco ité sese. Ahe niha Tūpa Ñehese tecovesa resendar. ² Co tecovesa oyemboyecua, orosepia iyavei ahe secocuer oromombehu. Ahe tecovesa apirēhi oromombehu vahe pēu. Ahe Vu rese seci vahe oyemboyecua vahe oreu. ³ Oromombehu co orosepia vahe, orosendu vahe ñepe vahe nungar pe reco āgua ore rese inungar ore oroico yande Ru Tūpa rese, Tahir Jesucristo rese avei. ⁴ Evocoyase cūritei oroicuachía evocoi mbahe pēu yande yembovīharete catu āgua.

Tūpa tesapesa seci

⁵ Iyavei Jesucristo ore mbohe co ñehesa rese, ahe oromombehu pēu: yande Ru Tūpa niha tesapesa seci; ndipoi eté pītumimbisa sese. ⁶ “Che aico tupri Tūpa rese” yahese, yaicoño rumo angaipa pipe, ahe inungar pītumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tūpa seci tesapesa, evocoyase yaico tupri yandeyeupe. Iyavei suvi yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tūpa upe, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ivi vahe. ¹⁰ Iyavei, “Che ndacheangaipai eté” yahe tupri tēise yaico, evocoyase Tūpa semirañete ai vahe nungar yareco. Ipīpe ndayaroyai iñehengagüer.

2

Jesucristo yande reco moingatusar

¹ Che rahireta, co aicuachía pēu pe angaipaēhi āgua. Que revo ava oime oyemboangaipa vahe pe pāhuve, yareco rumo yande Pītivīisar yande Ru rovai. Ahe Jesucristo, seco ivi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi āgua yande sui.

³ Acoi yayapo tuprise Tūpa porocuita, ahese supi eté yaicua Tūpa. ⁴ Oime amove ava “che aicua Tūpa” ehi vahe; nomboaviyei rumo iporocuita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboaviyese iñehengagüer, ahese supi eté yasaisu Tūpa. Ipīpe sui yaicua yande reco tupri Jesucristo rese. ⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuita ipiasu vahe resendar

⁷ Iyavei, che rivireta, ndaicuachiai mborocuita ambuae ipiasu vahe pēu. Aheño ité mborocuita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepia, pītumimbi opara. Tesapesa evocoyase osesape.

⁹ Oime amove ava “che aico tesapesave” ehi angahu tēi vahe; oyamotarēhiño rumo ambuae omboetasa Tūpa reroyasar. Evocoi nungar recocuer pītumimbisave tēi vite. ¹⁰ Acoi osaisu vahe ambuae omboetasa Tūpa reroyasar, ahe seci tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pītumimbisa pipe tēi seci, ndoicuai avei que rupi güecocuer virecora. Esepia, pītumimbi vahe nomboesapisoi.

¹² Che rahireta, co aicuachía pēu nara. Esepia, Tūpa iñero pe angaipa rese pēu Jesucristo recocuer pipe. ¹³ Pe, yesupa peico vahe upe co aicuachía. Esepia, peicua yipisuive oicove vahe. Aicuachía avei pēu, mbia chīhivahe. Esepia, pesecopi Carugar. ¹⁴ Iyavei pe tahireta aicuachía opacatu pēu. Esepia, peicua vahe niha yande Ru Tūpa. Aicuachía avei pēu, pe iyepupa. Esepia, peicua yipisuive oicove vahe. Aicuachía avei pēu, mbia chīhivahe. Esepia, peyemoviracua etepri, peipisi avei Tūpa Ñehengagüer pe piha pipe. Ipīpe pesecopi Carugar.

¹⁵ Evocoyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepia, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboivate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apirēhi vaheñā ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotarêhimbar” ehi vahe, ahe cūrítei setá oyemboyecua yamotarêhimbar yuvireco. Sese yaicua ari ipa vahe yepota água. ¹⁹ Ahe oyepepi yande pãhu sui; ndahei eté rumo yande rivri yuvireco Tüpa rese. Esepia, acoi yande rivri itese, ahese opítara yande píri yuvireco viña. Êgüe ehi oyecua ndahei opacatu yande rivri yuvireco.

²⁰ Cristo omondo Espíritu Santo pëu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pëu. Esepia, mbahe supi eté vahe sui ndoui temira. ²² Acoi “Jesús ndahei Poropísirosar imboupri” ehi vahe, ahe semira tēi vahe, yamotarêhimbar yuvirecoi. Ahe niha ndoviroyai Tu, Tahír avei yuvireco. ²³ Acoi ava “evocoi ndahei Tüpa Rahír” ehi vahe, ndovirecoi Tu oyese yuvireco. Acoi “evocoi niha Tüpa rahír” ehi vahe rumo, ahe vireco yande Ru Tüpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Êgüe peyese, ahese peico tupríra Jesucristo rese, Tu rese avei. ²⁵ Esepia, Jesucristo aipo ehi: “Pe perecora co tecovesa apirêhi vahe peyese” ehi yandeu.

²⁶ Sese co ava pembopa pota vahe resendar aicuachía pëu. ²⁷ Pe pereco Espíritu Santo Jesucristo ombou vahe pëu. Sese ndiyai eté ambuae pe mbohera. Espíritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espíritu Santo pe mbohesa rupi.

²⁸ Iyavei che rahireta, peicoño ité Cristo rese yareco yaherã sese yande yeroyasa. Acoi ogüeyise iva sui curi, ahese nayachí chietera sovai ichui. ²⁹ Pe niha peicua Jesucristo seco ivi vahe. Iya peicua avei opacatu oyapo vahe mbahe ihívi vahe, ahe Tüpa rahír ité yuvirecoi.

3

Tüpa rahír yuvirecoi vahe

¹ Mara ehi rutei Tüpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tüpa, ndoicatu eté yande recocuer cua água. Esepia, ndoicuai Tüpa recocuer yuvireco. ² Che rivireta, yaico ité Tüpa rahír. Yande rumo ndayaicua tupri vitei yande reco água ipare. Cūrítei rumo co mbahe yaicua: acoi oyemboyecuase Jesucristo, yaicora inungar. Esepia, yasepia itera opacatu seco reseve. ³ Iyavei opacatu osãro vahe Jesucristo yuvireco, oyepepiño ité opacatu angaipa sui güeco catupri água, inungar ahe secoi.

⁴ Opacatu ava oyemboangaipa vahe, ahe oyavi Tüpa porocuaíta. Esepia, angaipa Tüpa porocuaíta mboaviyehísa yepi. ⁵ Pe rumo peicua Jesucristo ou co ivi pipe yande angaipagüer mocañi água. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa. Acoi ava yangaipa vahe rumo ndosepiaí, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Carugar suindar. Esepia, Carugar yipisuive ité oyapo angaipa. Sese ou Tüpa Rahír Carugar rembiapo mocañipa água.

⁹ Opacatu yuvirecoi vahe Tüpa rese ndoyapoi angaipa. Esepia, ahe vireco ité Tüpa recocuer oyese yuvireco. Sese ndoicatu iri angaipa apo água yuvireco. Esepia, ahe Tüpa rahír ité yuvirecoi. ¹⁰ Icuapri ité Tüpa rahír yuvireco, icuapri avei Carugar rahír yuvirecoi vahe. Esepia, acoi ndoyapoi vahe mbahe tupri iyavei ndosaisui vahe Tüpa reroyasar, ahe ndahei eté Tüpa rahír yuvirecoi.

Yayeaísura ñepeí-peí yande yacatu

¹¹ Co niha ñehesa, acoi pesendu vahe yipisuive, ahe co yayaísura ñepeí-peí. ¹² Ndayaicoi chira inungar Caín, ahe Carugar remimbohe oyuca vívri. ¿Mahera píha oyuca? Esepia, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Tüpa ndoicuai vahe pe reroírose yuvireco. ¹⁴ Yande rumo yaicua aracacondar yande hã cañi tēi agüer. Cūrítei rumo yasē evocoi nungar sui tecovesa apirêhi vahe pipe yande reco água. Esepia, yande niha yasaisu yande rivireta Tüpa rese yuvirecoi vahe. Acoi ndosaisui vahe rumo ahe ihã ocañi tēi vite ité yuvireco. ¹⁵ Opacatu ava iporapichí serai vahe yande rivri, ahe iporapichí serai vahe nungar. Pe rumo peicua ava iporapichí serai vahe ndovirecoi tecovesa apirêhi vahe oyese. ¹⁶ Jesucristo niha omondo güecocuer manosave yande recocuer repirã. Ichui yande yaicua poroaisusa. Sese yande avei êgüe tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiaño tēi rumo vívri upe mbahe ipane vahe, iyavei ndoipítivii, ahe ndovirecoi Tüpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehé pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Tūpa rovai

¹⁹⁻²⁰ Ēgüe yahese, yande yaicua yande recocuer supi eté vahe pipe yaico. Acoi, “Ndahei revo Tūpa rahir aico” yahese, ahese Tūpa rovaque yayemomahenduhara evocoi nungar rese: “Tūpa niha tuvichá catu yande pīhañemoñetas sui. Ahe opacatu mbahe oicua.” Sese yayeroyara. ²¹ Supi eté che rivireta, yaicua itese yande pīha pipe yande reco tupri Tūpa rese, ahese yayeroyaña itera sovai. ²² Ahe avei niha ombou opacatu mbahe yandeu yaporanduse chupe. Esepia, yamboyeroya iporocuaita iyavei yayapo semimbotar yaico. ²³ Co ité iporocuaita: yaroyara Tahir Jesucristo iyavei yayeaisura ñepeí-peí Tūpa yande cuaisa rupi tupri. ²⁴ Acoi yaroyase iporocuaita, ahese yaicora Tūpa rese; ahe avei secoira yande rese. Iyavei ahe ombou Espiritu yandeu. Ichui yaicua Tūpa secoi yande rese.

4*Espiritu Tūpa suindar iyavei espíritu Cristo amotarēhimbar*

¹ Che rahireta, aní chira peroya opacatu “Espiritu pipe añehe” ehi vahe. Iyacatu rumo pesāha rane ‘¿Tūpa suindar ité pīha?’ pe hesa pipe. Esepia, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espiritu Tūpa suindar vireco vahe: “Jesucristo ou opacatu güete reseve” ehise, aipo ehi vahe vireco Espiritu Tūpa suindar ité. ³ Acoi aipo ndehi vahe rumo, ndovirecoi eté Espiritu Tūpa suindar oyese. Ahe rumo vireco espíritu Cristo amotarēhimbar tēi. Aracaco niha pesendu ñehesa acoi yamotarēhisar espíritu ou vaherā resendar. Ahe cūrítei secoi co ivi pipe.

⁴ Che rahireta, pe rumo Tūpa suindar peico. Iyavei pesecopi ité acoi semira tēi vahe peico. Esepia, Espiritu secoi vahe pe rese, ahe ipīrata catu Carugar sui. ⁵ Evocoi co ivi pipendar tēi yuvirecoi vahe. Esepia, oñehe mbahe ivi pipendar rese tēi yuvireco. Iyavei ava supindar ae ité oyapisaca ñehe rese yuvireco. ⁶ Yande rumo Tūpa suindar yaico. Acoi oicua vahe Tūpa oyapisaca yande ñehe rese yuvireco. Acoi ndahei vahe Tūpa rahir, ahe yande ñehe ndosendu potai yuvireco. Sese yande yaicuara vireco vahe Espiritu supi eté vahe, yaicua aveira vireco vahe espíritu oporombopa tēi vahe.

Tūpa oporoaisu vahe

⁷ Che rivireta, che rembiaisu, yayeaisu ñepeí-peí. Esepia, yeaisusa Tūpa suindar. Opacatu osaisu vahe ava, ahe Tūpa rahir, oicua ité avei Tūpa yuvireco. ⁸ Acoi ndosaisui vahe ava, ahe ndoicuai Tūpa yuvireco. Esepia, Tūpa yeaisusa secoi. ⁹ Ēgüe ehi omboyecua oporoaisusa yandeu. Ahe niha, ombou Guahir ñepeí vahe co ivi pipe ichui yande recove āgua. ¹⁰ Ndahei yande rane yasaisu Tūpa. Ahe rane rumo yande raisu iyavei ombou Guahir imano āgua yande angaipa repirā. Ahe niha poroaisusa supi eté vahe.

¹¹ Che rivireta, che rembiaisu, ēgüe ehi Tūpa yande raisu. Evocoyase ēgüe yahe aveira yande yayeaisu ñepeí-peí yepi. ¹² Ndipoi eté ava osepia vahe Tūpa. Yayeaisuse rumo, Tūpa secoi yande rese. Iporoaisusa evocoyase oime ité yande rese. ¹³ Ahe ombou oEspiritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar pisiro āgua. ¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoyase secoi sese.

¹⁶ Ēgüe yahe icua, seroya tupri āgua co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ēgüe yahe Tūpa poroaisusa mboaviye tupri ichui yande siquiyeeñi āgua acoi oyepotase ari cañi yandeu. Esepia, yande yaico co ivi pipe inungar Jesucristo. ¹⁸ Yasaisu tupri itese Tūpa, ndipoi chira siquiyesa yandeu. Ēgüe yahese, opara siquiyesa yande sui. Esepia, cañisa sui oime siquiyesa yandeu. Sese acoi ava osiquiye ai vahe, ndoporaisu tupri eté.

¹⁹ Yipindar Tūpa yande raisu. Sese cūrítei yande avei yasaisu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroiro omboetasa Tūpa reroyasar. Evocoyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatui Tūpa ndayasepiái vahe raisu āgua. ²¹ Jesucristo ombou co porocuaita yandeu: acoi osaisu vahe Tūpa, tosaису avei omboetasa seroyasar yuvireco.

5*Yande mbahe-mbahe tēi co ivi pipendar recopisa*

¹ Opacatu viroya vahe Jesús Tūpa Rembiporavo Poropīsīrosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaisuse Tūpa, yayapose avei iporocuaita, ahese yaicua yasaisu avei ava Tūpa rahir yuvirecoi vahe. ³ Yamboaviyese Tūpa porocuaita, ahese yamboyecua Tūpa raisusa yaico. Iyavei iporocuaita

ndahei yavai etepri yapo āgua. ⁴Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi āgua yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei osecó mombehu. Esepia, ahe omombehu mbahe supi eté vahe yepi. ⁷ Evocoyase oime mbosapi imboyecuar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe ité ichui. Esepia niha, ahe Guahir omombehu. ¹⁰ Acoi viroya vahe Tūpa Rahir vireco ité ahe semimombehu opíha pipe. Acoi ndoviroyai vahe rumo Tūpa, semirañete ai vahe nungar tēi vireco. Esepia, ndoviroyai Tūpa ñehese Tahir resendar. ¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secó. ¹² Acoi oipisi vahe Tūpa Rahir opíha pipe, ahe vireco avei co tecovesa. Acoi ndoipisii vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua āgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehese osendu. ¹⁵ Evocoyase yaicuae ahe osendu yande yeruresa, yaicua avei mbahe yande porandusa ombou vahe rā yandeu.

¹⁶ Acoi osepia vahe yande mboetasas Tūpa reroyasar oyemboangaipa vahe, ahe rumo ndahei manosave nara, oyeró quira sese. Evocoyase Tūpa omondora secove āgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu. ¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esepia, Tahir osāro evocoi nungar. Ichui Carugar ndopocoi sese. ¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Carugar povri pendar tēi yuvirecoi. ²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua āgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe. ²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMON̄UVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuai pri, aicuachía co che ñehe p̄eu pe Tūpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe raisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherā ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparaisuerecosa p̄eu nara. Tombou avei güeco tuprisa, güeco supi eté vahe pipe oporoaisusa pipe avei p̄eu.

⁴ Che mboviharete aicuase pe p̄ahu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tūpa porocuaíta yandeu. ⁵ Iyavei, che rivireta, che rembiaisu, tayayeaisu catu ñepeipei. Co aicuachía vahe ndahei porocuaíta ipiasu vahe. Ahe niha acoi yipindar icuachiapri p̄eu. ⁶ Co yande yeaisusa, yande guata tupri āgua Tūpa porocuaíta rupi. Co Tūpa porocuaíta yipisuive pensendu vahe, ahe omombehu yande yeaisu tupri āgua yandeu.

Iporombopa serai vahe resendar

⁷ Setá vai oguata ivi yacatu rupi oporombopa t̄ei vahe yuvireco. Ahe, “Jesucristo ou güete reseve” ndehi eté yuvireco. Ahe oporombopa t̄ei vahe Jesucristo amotar̄ehimbar yuvirecoi. ⁸ Peñearo catu pe poraviqui repri mocañi t̄eiēhi āgua. Tapeipisi catu opacatu Tūpa pororecosa peyeupe nara.

⁹ Oime ava oyepipiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa t̄ei vahe p̄eu, ndovirecoi vahe co porombohesa, ndapeipisii chira pe r̄etave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe p̄eu. Namombehu potai rumo cuachiar pipe. Che teieté aso pota p̄eu che ñehe āgua. Ahese yayemboviharetera oyese.

¹³ Iyavei Tūpa rembiporavo oñemonuha vahe cohava opacatu omondo omahenduhasa yuvireco p̄eu. Aipo rupive co che ñehesa amondo p̄eu.

IMOMBOSAPISA JUAN REMBICUACHIA SAN JUAN

Gayo recocuer aviye vahe resendar

¹ Che, icuaipri, aicuachía co che ñehe ndeu, che mboripar, che rembiaisu, Gayo. Che supi eté oroaису yepi.

² Che rembiaisu, che rivri, cūrítei nde recocuer erereco tupri Tūpa rese. Che ayeroqui nde rese opacatu nde reco tupri āgua iyavei tipo eme mbaherasisa ndeu. ³ Che aviharete asenduse yande rivri ñehe nde recocuer resendar yugūeruse cohawe. Ahe aipo ehi yuvireco cheu: “Evocoi Gayo oyemoviracua tupri mbahe supi eté vahe pipe” ehi yuvireco ndeu. ⁴ Ndipoi eté niha ambuae ñehesa asendu vahe che mboviharete catu vahe que che rahireta oguatase co porombohesa supi eté vahe rupi yuvireco.

⁵ Che rivri, che rembiaisu, ereyapo tupri opacatu mbahe yande rivireta upe iyavei ambuae tecua pendar oyepota vahe upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahe; eipitívii catu chupe mbahe ipane vahe rese iguataño āgua Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisii eté rumo mbahe ipane vahe opitívii āgua yuvireco ava Tūpa reroyasarēhi sui. ⁸ Sese yande ēgüe yahera yaico evocoi nungar upe ñehesa supi eté vahe rese ipitívii āgua.

Diótrefes recocuerai iyavei Demetrio recocuer aviyesa

⁹ Che aicuachía che ñehe eipeve Tūpa upe oñemonuha vahe upe cuese. Diótrefes rumo ndoviroyai ore mborerecuasa. Esepia, ahe oipota rai mborerecuar güeco āgua ipāhuve. ¹⁰ Evocoiyase asose eipeve, amboaracuara opacatu Tūpa viroya vahe rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güetave yande rivireta oyepota vahe. Iyavei ndoipotai ambuae upe ipisi āgua sētave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicoi rene evocoi ava recocuer nungar. Ereicora rumo ava aviye vahe recocuer rupi. Esepia, oyapo vahe mbahe aviye vahe, ahe Tūpa suindar. Acoi oyapo vahe rumo mbahe naporai vahe, ahe ndoicuai vahe Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombehu. Pe niha peicuaño ore oromombehu mbahe supi eté vahe.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepia, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepeipei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rivri. Che aicuachía co che ñehe pëu. Pe niha yande Ru Tüpa rembiaisu semienoi peico. Jesucristo niha pe rãro opacatu mbahe-mbahe tēi sui. ²Tüpa tombou catu pëu pe paraisuerecosu pe reco tupri ägua pe raisusa pipe.

Oporombohe vahe ava mbopa tēi ägua resendar

³ Che rivireta, che rembiaisu, yipindar chepihañemoñeta ité yande písirosa resendar cuachía ägua pëu viña. Ipape rumo chepihañemoñeta iri: iyaño revo che aicuachía pe yemoviracua tupri catu ägua yembohesa yaroya vahe rese. Ahe yembohesa yaroya vahe ñepeí reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pãhuve. Aracahe suive rumo Tüpa Ñehengagüer icuachiapri pipe omombehu evocoi nungar ava imocañisa tēira yuvireco. Ahe ava ndaseco pōrai vahe, “Tüpa aviye ité, ndoyapoi chietera mbahe yandeu” ehi tiēte yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepeí vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tüpa vinose yande ramoí eta Egipto sui. Ipape rumo opa omocañi viroyasarēhi. ⁶ Inungar avei Tüpa rembiguai yipindar vahe yuvirecoi, nomboavīyei vahe ocuaita. Ipipe sui Tüpa osoquenda pītumimbi ndopai vahesave ari cañise nara.

⁷ Iyavei ava Sodoma pendar, Gomorra pendar iyavei ahe tecua ivirindar avei inungar acoi Tüpa rembiguai oyemondo mbahe tēi pipe, ahe avei oyemondo vahe oyemboaguasagua tēi ägua yuvireco. Iyavei cuimbahe, cuimbahe rese; cuña, cuña rese no. Ipipe sui iporara tata guasu apirēhi vahe yuvireco. Ahe opita opacatu yande yembosiquiye ägua.

⁸ Ēgüe ehi avei niha evocoi nungar ava pe pãhu pendar. Esepia, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndoviroyai vahe yande Yar mborerecuasa. Ahe avei oñehe-ñehe tēi vahe iva pendar rese yuvireco. ⁹ Aracahe Tüpa rembiguai ivate vahe Miguel oyepoepi-epi Carugur rese yuvireco Moisés retecuer rese. Yepe ahe Tüpa rembiguai rerecuar viña, ndiyai rumo chupe iñehe mara ägua Carugur upe. Evocoiyase aipo ehi chupe: “¡Tüpa oicuara co rese ndeu!” ehiño. ¹⁰ Evocoi ava pe pãhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ägua tēi.

¹¹ ¡Iparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyavi güeco yuvireco. Inungar Coré omano oporeroyaēhisa pipe.

¹² Pe peñemonuhase pe yeaisusa pipe pe caru ägua, ahese ahe avei yuviroique pe pãhuve; noyuvinochi eté ocaru ägua pe pirí. Ndapeicuai rumo ahe pe recocuer monguiha ägua tēi yuviroique vahe pe pãhuve. Evocoi inungar ovesa rãrosar oyese tēi ihañeco vahe yuvireco. Iyavei ahe inungar iva quíha ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri. ¹³ Inungar avei acoi iai pipe itu omombo tiyui vahe oyesui yepi. Ēgüe ehi avei evocoi mbia rembiapo poromochisa. Iyavei inungar yasitata amove omocañi vahe guaper co coti tēi oso pītumimbisave, ēgüe ehi aveira ava Tüpa sui oyepoepi vahe pītumimbisa apirēhive secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoi nungar ava naporai vahe recocuer resendar rese aracahe aipo ehi: “Co che asepia che queraisu nungar pipe yande Yar turi iva pendar rehií reseve ¹⁵ opacatu ava recoña ägua iyavei icañi mombehu ägua opacatu mbahe-mbahe tēi aposar upe, opacatu oñehe-ñehe tēi yamotarēhisave yuvirecoi vahe upe avei” ehi. ¹⁶ Ahe mbia niha oporoviroiro yuvireco. Iyavei oseca oyeupe nara mbahe güemimbotar tēi apo ägua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ägua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co ari cañi renonde oimera ava viroiro ai vahe Tüpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe

ava niha omboyaho-yaho ucara ava Jesús reroyasar yuvireco. Güecocuer ivi pipendar tēi vireco vahe. Ahe niha ndovirecoi Tūpa Espiritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espiritu Santo pe rārosa pipe. ²¹ Peñearo tupri Tūpa pe raisusa pipe. Iyavei pesāro viteño yande Yar Jesucristo yande paraisuerecosa pipe tecovesa ndopai vahe mondo āgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rāgüer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepey yangaipa pipe pe viapiñhi āgua.

Tūpa mboetei tupriisa

²⁴⁻²⁵ Tūpa yande Pisirosar ñepey vahe vireco pīratasa pe rāro angaipa pipe pe viapiñhi āgua. Ahe avei pe rerecora güecocuer porañetesave pe reco angaipañhisa pipe. Ichui peicora pe viharetasa pipe. Ahe imboeteipri tasecoi. Ēgüe tehi timboyeroyasa seco pīratasa iyavei imborerecuasa yande Yar Jesucristo sui, yipisui, cūrítei apirēhi vaheṛā.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboaviye pihaiVIPirā pēu acoi Tūpa omboyecua vahe Guahir Jesucristo upe ‘tomboyecua oviroyasar yuvirecoi vahe upe’ oyapave. Ahe niha Jesucristo oicua uca Vu rembiguai pipe imboyecua uca āgua güembiguai che recose cheu. ² Che supi eté amombehu opacatu mbahe asepia vahecuer iyavei amombehu evocoi Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyerōqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi virovī ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cūrteindar apirēhi vahe avei; sietē espíritu suindar avei no, ahe senda rovai yuvinohai vahe, ⁵ iyavei Jesucristo suindar, evocoi omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yandē raisu iyavei yandē pīsiro yandē angaipa sui vuvī pipe, ⁶ iyavei yandē rereco mborerecuarā, pahiguā avei no Vu Tūpa upe yandē poravīqui āgua. ¡Ēgüe tehi imboeteipri tasecoi opīratasa pipe apirēhi vaheerā!

⁷ ¡Esepia, Cristo i va quiha rese oura curi!

Ahese opacatu ava osepiara yuvireco, yamotarēhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Ēgüe ehi etera curi.

⁸ “Che aico yipindar iyavei ipandar” aipo ehi yandē Yar Tūpa opacatu mbahe mboavais-arēhi evocoi yipivé vahe ité, cūrteindar apirēhi vahe avei.

Juan osepia oquer nungar pipe Jesucristo porañetesa

⁹ Che, Juan, pe riqehir aico, iyavei che pe nungar Tūpa povri pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico caha pāhumi para guasu aviterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. ¹⁰ Acoi yandē Yar ari pipe Espiritu povrive aicose, asendu che raquicuei oñehe pīrata vahe aviye acoi mimbī ñehe ¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipāhuve mbia aviye tupri ava ité viña, iturucuar pucucuer ipi rupi tupri ité sese, sumbicuasa evocoyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoyase aviye tupri ité tata rendigüer. ¹⁵ Ipi evocoyase sendi yai eté, aviye acoi bronce ocai vahe horno pipe, iyavei iñehe ipiratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osē quise pucu saimbe yoya vahe. Sovā evocoyase aviye ari rendigüer ipiratá vahe.

¹⁷ Sepia ramoseve, aviapi ipive inungar omano vahe. Ahe rumo omondo opo oacato coti che rese aipo ehi cheu: “Nderesiquiyēi chira. Esepia, che yipindar ité aico, ipandar avei.

¹⁸ Aicove vahe ité; yepe amano viña, cūrtei rumo aicove iri ndopai chivaherā ité aico. Che areco che mborerecuasa ava recocuer mocañi āgua. ¹⁹ Sese eicuachía co mbahe yesepia vahe: cūrteindar oime vahe mbahe iyavei mbahe oime vaheerā curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoyase vera hi oro apopri, ahe yuvirecoi siete tupri tecua pipendar che reroyasar” ehi.

2

Ñehesa siete tupri tecua-tecua pendar Jesús reroyasar upe. Ñehesa Efeso pendar upe

¹ “Eicuachía Tūpa rembiguai Efeso pendar che reroyasar rārosar upe: ‘Acoi vireco vahe oacato coti siete yasitata, ahe acoi uguata vahe siete vera hi yacatu rupi, aipo ehi

imombehu: ² Che aicua opacatu mbahe pe rembiapo, pe poraviqui pĩratasa iyavei pe yemoviracuasa. Aicua avei ndapeipotai ava naporai vahe pe pãhuve yuvirecoi vaheřã. Pesecoãha avei ava, ore apóstol oroico, ehi tẽi vahe; ipare peicua iporombopa tẽisa yuvireco. ³ Che aicua peñemosañ peyemombaraisu peico che raisupave; ndapecueraí eté ipipe. ⁴ Che rumo aicua oime mbahe ndahei vahe che piha rupi pe recocuer: ndapeyeaisu iri inungar yipindar. ⁵ Sese peyemomahenduha yipindar pe recocuer aviye rese; pemboasi mbahe pe rembiapo, peyevi Tũpa upe; peyeaisu iri catu inungar yipindar. Anise ayevira pẽu, aroucapara pe vera hi senda sui acoi ndapeyeviise Tũpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi oyemoviracua vahe mbahe-mbahe tẽi apoẽhi ãgua, itohu amondora ivira ha tecovesa resendar oime vahe teco orisave che Ru piri, ehi' erera icuachía chupe.

Ñehesa Esmirna pendar upe

⁸ "Eicuachía avei Tũpa rembiguai Esmirna pendar che reroyasareta rãrosar upe: 'Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pẽu aipo ehi: ⁹ Che aicua pe yemombaraisusa, pe paraísusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tẽi vahe, ore Tũpa rembiporavo judío oroico, ehi tẽi vahe. Ndahei rumo ahe yuvirecoi. Esepia, Carugar reroyasar tẽi evocoi yuvirecoi. ¹⁰ Ndapesiquiyei chira pe paraísu ãgua sui. Esepia, Carugar osoquenda ucara amove pe pãhu pendar secoãha ãgua; pe paraísu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porrecosa tecovesa pẽu. ¹¹ ¡Acoi osendu pota vahe, toyapisacaño Espiritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tẽi apoẽhi ãgua, ahe imanore ihã ndoiporarai chira imofuviriosa manosa pipe, ehi' erera icuachía chupe.

Ñehesa Pérgamo pendar upe

¹² "Eicuachía avei Tũpa rembiguai Pérgamo pendar che reroyasareta rãrosar upe: 'Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Carugar oguapi oĩ; mborerecuar guasu nungar imboyeroyapri secoi. Pe rumo peyemoviracuaña ité chupe che recocuer rese peico. Ndapeseyai eté che rese pe yeroyasa yepe oyuca tẽi che recocuer mombehu tuprisar Antipas evocoi tecua Carugar recosave. ¹⁴ Che rumo aicua mbahe pe resendar: eipeve amove ava ndoyepipi potai eté Balaam porombohesa sui yuvireco. Ahe omboaracua Balac israelita mboangaipa uca ãgua, toyuvirohuño mbahe roho seropovẽhepri mbahe rahanga upendar tẽi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pãhuve ndoyepipi potai eté nicolaíta porombohesa sui yuvireco. ¹⁶ Sese pemboasi pe recocueraí, peyevi Tũpa upe, anise che aso poyava vaira pẽu, ahese avajara chupe yuvireco che yuru pipe sui osẽ vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espiritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tẽi apoẽhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoi ava oipisi vahe güeraño oicuara, ehi' erera icuachía.

Ñehesa Tiatira pendar upe

¹⁸ "Eicuachía avei Tũpa rembiguai Tiatira pendar che reroyasareta rãrosar upe: 'Tũpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosañ evocoi cuña Jezabel pe pãhu pendar upe, ahe acoi oñehẽ tẽi angahu vahe Tũpa rese viña. Ahe rumo ombopa tẽi oporombohesa pipe che rembiguai iyemboaguasa-guasa tẽi uca ãgua seroco iyavei ohu uca mbahe roho mbahe rahanga tẽi upe seropovẽhepri yuvireco chupe. ²¹ Che amondo vite tẽi ari chupe, tombosai oangaipa Tũpa upe oyevi ãgua, che yapave viña. Ahe rumo ndopoi potai eté oyemboaguasa tẽisa sui. ²² Evocoiyase cūrítei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembri ichui. Ēgüe ehi opacatu che reroyasar oicuara yuvireco che aicua tupri ité opacatu ava pihañemoñetasa iyavei ñepeipei pe yacatu amondora pe rembiapogüer repri pẽu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Carugar suindar aracuasa, ndicuasai yavai vahe, ehi vahe rese, pẽu ndarecoi que ambuae che porocuita. ²⁵ Peyemoviracuaña rumo evocoi mbahe pereco vahe rese, acoi che ayevise voi vitu curi.

²⁶ Acoi ava oyemoviracua vahe mbahe-mbahe tēi apoēhi āgua, oyapo vahe che remimbotar mano rupi eté, chupe amondora mborerecuar seco āgua opacatu ivi rupi ²⁷ inungar che Ru ombou che mborerecuarā cheu; ēgüe ehi aveira oporocuai opacatu tecua rupi inungar acoi vara guarepochi, mbahe riapiipa uca āgua, aviyera acoi mahemoinda ñaihu apopri viña. ²⁸ Iyavei amondora yasitata cōhe rerusar chupe. ²⁹ ¡Acoi ava osendu pota vahe, toyapisacaño Espiritu omombehu vahe rese opacatu che reroiyasar yuvirecoi vahe upe! ehi' erera icuachía.

3

Ñehesa Sardis pendar upe

¹ “Eicuachía avei Tūpa rembiguai Sardis pendar che reroiyasareta rārosar upe: ‘Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vite vahe. Esepia, oyepepita pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ēgüe ahera vicho pe resapiha. ⁴ Oime rumo amove ava pe pāhu pendar ndoyapoi eté angaipita yuvireco, evocoyase inungar ava oguata vahe oturucuar morochi vahe rese, ēgüe ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi āgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espiritu omombehu vahe rese che reroiyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ “Eicuachía avei Tūpa rembiguai Filadelfia pendar che reroiyasareta rārosar upe: ‘Co seco maranehi vahe, supi tupri vahe ité, vireco vahe mborerecuasa arachendar mborerecuar guasu David nungar, acoi omboise que oquenda, ñepe yepe que ava nomboyai chietera; iyavei acoi omboyase, ñepe yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pēu pemombehu vahe rā che recocuer. Ahe que ñepe yepe ava nomboyai chietera yuvireco. Esepia, yepe pe nipirata tupri vahe, peroya ité rumo che ñehe iyavei ndacheñomi eté ava sui peye. ⁹ Co Caruguar reroiyasar semira tēi vahe, ore Tūpa remboravo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaita, peyemoviracua ité evocoi mbahe tēi upe peico. Evocoyase che opoepira acoi ari tecoahasa ouse opacatu ivi rupindar upe curi. ¹¹ Ayevi poyavara. Peyemoviracua catu Tūpa reroiyasa pereco vahe rese. Evocoyase ñepe yepe que ava ndovirocui chietera Tūpa suindar porerecosa pe sui. ¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoyase inungar-ra che Ru Tūpa rēta viracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoi ou vahe rā iva pendar che Ru Tūpa sui, iyavei che rer ipiasu vahe ité arovara sese no. ¹³ ¡Acoi ava osendu pota vahe, toyapisacaño Espiritu remimombehugüer rese che reroiyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroiyasareta rārosar upe: ‘Evocoi seco tupri vahe, omombehu vahe mbahe supi tupri vahe ité, ahe ichui oime opacatu Tūpa rembiapo, ahe aipo ehi: ¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi ité vahe nungar peico pe rembiapo pipe. ¡Ñepe reseve vahe rumo aipota, ndahei iguayí tēi vahe! Pe recocuer rumo iguayí tēi vahe nungar, sese opomboyeviñora cheyesui. ¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraisusa che Ru rovaque inungar ndasesapisoi vahe peico. Iyavei ndapeyavií nditurucuai vahe peico. ¹⁸ Sese opomboaracua; peseca iva pendar oro tatave imoatiropri nungar che sui pe paraisuēhi iri āgua che Ru rovaque; peseca avei turucuar morochi vahe teco tupri papeye che suindar nani tupri vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgüe peye aveira. ¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua. ²⁰ Esepia, inungar que ava oquenda omotara

oquendipive ohã viña, ãgüe ahe pe pihave vichico; pesenduse che ñehe, pemboira cheu. Che evocoyase aikuera pe piri, yacarura oyepiri. ²¹ Acoi ava oyemoviracua vahe mbahe-mbahe tẽi apoẽhi ãgua yuvireco, ahe amboguapi ucara che ipive imoi che porocuaisave, inungar che mbahe tẽi reco reroyi pare, aguapi che Ru ipive vite. ²² ¡Acoi ava osendu pota vahe, toyapisacaño Espiritu remimombehugüer rese che reroyasareta upe! ehi imombehu pẽu' erera icuachía" ehi Jesús cheu.

4

Tũpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoi ñehesa ipĩrata vahe mimbi nungar yipĩndar oñehe vahe cheu, ahe asendu iri: "Eyeupi ave. Che evocoyase mbahe amboyecuarã ndeu mbahe imboaviyepirã curi" ehi.

² Ahe pipeve voi, Espiritu pĩratasa pipe aico iyavei asepia tenda ivave, ahe iharive ñepe i oguapi oĩ. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendi vahe, inungar esmeralda. ⁴ Iyavei asepia evocoi rese oyere tupri ambuae veinticuatro tenda, ahe iharive oguapi yuvinoi veinticuatro avei icuaiipri yuvirecoi vahe; iturucuar morochi vahe yuvireco iyavei oãca rese omboyere tupri oro apopri yuvireco. ⁵ Evocoyase Tũpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoi tenda rovai, ahe co siete tupri Tũpa espĩritu. ⁶ Evocoi tenda rovai oime avei ndoyavii tupri para guasu tĩpiu vahe oyecua tupri vahe mbahe ipipe.

Ambuae tenda pãhu rupi oyere tupri Tũpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquicuei coti avei no. ⁷ Yipĩndar yuvirecove vahe pãhu pendar ahe ndoyavii tupri yagua pĩta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoi iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndogituhui eté ari, pĩtu rupi aipo ehi yuvireco:

"¡Santo, santo, santo ité secoi, yande Yar Tũpa ité, ahe mbahe mboavaisarẽhi, yipivẽ vahe ité, cüriteindar, apirẽhi vahe!" ehi yuvireco.

⁹ Evocoi yuvirecove vahe omboetei yuvireco, "Aviye ndeu" ehi co oguapi vahe oĩ tenda harive ndopai vahe upe. ¹⁰ ãgüe ehise evocoyase veinticuatro tupri icuaiipri yuvirecoi vahe, ahe oñenopihã imboeteisa pipe sovai yuvireco. Ipare osequiĩ oãca resendar oyere tupri vahe omborerecuasa resendar sovai aipo ehi:

¹¹ "Ore Yar Tũpa, iya ité nde mboeteisa, ndeu sapucaisa nde pĩratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe" ehi yuvireco chupe.

5

Ovesami upe güeraño iyacatu cuachiar imboyapri mboi ãgua

¹ Che asepia cuachiar Tũpa vireco vahe oacato coti, icuachiapri ipipe coti, ocar coti avei no, imboyapri siete sello pipe. ² Ipare asepia Tũpa rembiguai seco ivate vahe, ahe oporandu pĩrata oico aipo ehi: "¡Ava upe vo iya cuachiar mboi ãgua iyavei sello imboyeroyapri mondoro ãgua no?" ehi. ³ Ndogipoi eté rumo que iva pendar, ivi pipendar, ivivri pendar oicatu vaherã cuachiar pipira sepia ãgua viña. ⁴ Evocoyase che ayasehó iteanga. Esepia, ndogipoi eté que ñepe yepe oime angara aviye vahe cuachiar pipira sepia ãgua viña. ⁵ Ahese icuaiipri pãhu pendar ñepe aipo ehi cheu: "Ereyaseho iri eme. Esepia niha, evocoi ava yagua pĩta vahe vahe chupe, Judá suindar, acoi mborerecuar guasu David suindar avei, ahe niha Carugar osecoreroyi. Sese iya ité chupe siete sello mondoro cuachiar pipira ãgua" ehi.

⁶ Evocoyase, asepia Tũpa rovai iva pendar irungatu yuvirecove vahe pãhuve, icuaiipri yuvirecoi vahe mbiterve, ñepe iva Ovesami nungar ihãi, aviye seropovẽhepri. Ahe niha vireco siete tupri sãchi, siete tupri avei sesa; sesa evocoyase siete tupri Tũpa espĩritu yuvirecoi opacatu ivi rupi imboguatapri. ⁷ Ipare evocoi Ovesami oso, oipisi cuachiar evocoi tenda harive oguapi vahe yacato coti sui; ⁸ ipisi pare, evocoi irungatu yuvirecove vahe, iyavei veinticuatro tupri icuaiipri, ahe oñenopihapa Ovesami rovai yuvireco. Oyacatu ñepeipei vireco arpa yuvireco, itaisi riru oro apopri, ahe avei vireco yuvireco, ahe itaisi niha Tũpa reroyasar yeruresa. ⁹ Osapucã ipiasu vahe sapucaisa pipe aipo ehi yuvireco: "Ndeu iyacatu ité cuachiar pisi ãgua, imboyapri mondoro ãgua avei no.

Esepia niha, nde yucapri seropovēhepri ereico.

Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, iñehe ambuae-ae tēi vahe avei, ñepeipei tecua yacatu rupindar, ivi rupindar avei yuvireco.

¹⁰ Iyavei eremborerrecua uca Tūpa upe nara, erembopahi uca avei no, ipare ahe oporocuaira opacatu ivi rupi yuvireco” ehi osapucai yuvireco.

¹¹ Ipare asepia, asendu avei Tūpa rembiguai rehii ñehe evocoi oyere tupri vahe tenda rese yuvireco, iyavei evocoi yuvirecove vahe ñehe, icuaipri ñehe avei asendu setá iteanga yuvirecoi. ¹² Ahe aipo ehi pīrata yuvireco no:

“¡Co Ovesami yucapirer, ahe chupe iyacatu ité mborerrecuasa pisi āgua, opacatu Tūpa suindar porerrecosa pisi āgua, mbahecuasa, pīratasa, mboyeroyasa, poromboeteisa, iyavei sapucaisa pisi āgua avei no!” ehi.

¹³ Ahese asendu avei opacatu Tūpa rembiapo ivave yuvirecoi vahe, ivi pipendar, ivivri rupindar iyavei para guasu pipendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei pīratasa, ahe timondosa apirēhi vaheerā Tūpa acoi güendave oguapi vahe upe, Tahir Ovesami nungar upe avei no!” ehi.

¹⁴ Evocoi irungatu ava yuvirecove vahe, “¡Ēgüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopiha yuvireco sovai imboeteisave.

6

Siete sello

¹ Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñehe pīrata. Iñehe ndoyavii osunu vahe, “¡Eriol!” ehi cheu. ² Ahese asepia cavayu morochi vahe, ahe ava ihari pendar vireco virapar. Chupe omondo yeguaca yuvireco. Ēgüe ehi ahe osē seco pīrata catu vahe ava reco roeroyi āgua.

³ Omondorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Eriol!” ehi vahe cheu. ⁴ Ipare osē cavayu pīra vahe, ahe ava ihari pendar oipisi pīratasa mbahe tuprisa rerocua āgua ivi pipendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

⁵ Omondorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Eriol!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa. ⁶ Ipare asendu yuvirecove vahe cotindar ñehe, ahe aipo ehi: ‘Nēpei kilo trigo serocuasa guarepochi ñepepe ari resendar mboraviqui repri pipe, mbosapi kilo cebada evocoiyase serocuasa avei ñepepe ari resendar mboraviqui repri pipe no. Pemocañi eme mbahe quira iyavei uva ricuer avei no” ehi.

⁷ Evocoi Ovesami omondorose imoirungatusa sello, ahese asendu ava imoirungatusa ñehe aipo ehi: “¡Eriol!” ehi cheu. ⁸ Amahe, ipare asepia cavayu iyu rasi vahe, ahe ava ihari pendar serer Tehögüer. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa teco pīratasa ivi imoirungatusa yahocuer rupi iguata āgua ava yuca āgua vavasa pipe, tieporēhi pipe, mbaherasi pipe, mbahe ipi pipe avei no.

⁹ Evocoi Ovesami omondorose imbopoyandeposa sello, ahese asepia mbahe seropovēhepri rendavri ve ava hā, ahe yucasa vahe yuvireco Tūpa Ñehengagüer mombehusa sui tēi iyavei Jesús reroyasa sui tēi avei no. ¹⁰ Ahe aipo ehi pīrata yuvireco: “Ore Yar Tūpa seco maranehi, supi tupri vahe, imbahese vo eremombaraicura ore yucasarer yuvirecoi vahe ivi pendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vite rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepepe ovasa sello, ahese oime ivi riri ipīratá vahe. Ari evocoiyase sū, aviyae acoi turucuar sū vahe mano sendar yemondesa iyavei yasi pīrá inungar tuvi, ¹³ yasitata evocoiyase opa oviapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pāhu avei no osiri güenda sui yuvireco. ¹⁵ Mborerrecuareta avei co ivi pipendar yuvirecoi vahe opa tēi oñemi mbahecuar pipe yuvireco, ita guasu pāhu rupi avei yuvireco no, oyoya guasu seco ivate vahe, sundao rerecuareta, mbahe yar seco pīratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore harive, toroñemipa tēi Tūpa sui iyavei Ovesami sui acoi ombou vahe co poronupasa ipīrata

vahe oreu! ¹⁷ Esepia, oyepota ité Tūpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Tūpa rembiguai iva pendar yuvinochai vahe irohi coti, norte coti, ari sêsa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuêhi âgua, que para guasu pipe angara viña, que ñepeí yepe ivira ro angara viña no. ² Ipare asepia avei ambuae Tūpa rembiguai iva pendar ou vahe ari sêsa coti sui, ahe víreco oyese Tūpa oicove vahe rer mondosa. Ahe niha osapucaí pírataí evocoi irungatu tupri Tūpa rembiguai iva pendar yuvirecoi vahe upe, oipísi vahe pírataí ivi, para guasu momara âgua yuvireco, aipo ehi: ³ “¡Ndapemomara vitei chira rumo ivi, para guasu avei, ivira avei no, co ndoromondo viteiseve ava Tūpa rembiguai eta upe isiva rese Tūpa rer icuachiapri!” ehi.

⁴ Ipare asendu Tūpa rer oipísi vahe retacuer: ciento cuarenta y cuatro mil tupri, evocoi opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evocoyase doce mil tupri Benjamín suindar.

Ava rehíi iturucuar morochi vahe

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa âgua. Esepia, setá etepri yuvireco iyavei iturucuar morochí vahe pāve; pindo-pindomi víreco opove yuvireco no. ¹⁰ Ipare opacatú guasu oñehe pírata yuvireco aipo ehi:

“¡Poropísirosa yande Ru Tūpa suindar, ahe oguapí vahe oĩ güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaipri rese avei yuvinocha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Ēgüe tehi!

Sapucaisa, poromboeteisa, mbahecuasa, ‘¡Aviye ndeu’ hesa, poromboyeroyasa, mborerecuasa,

teco pírataisa avei tasecoi yande Ru Tūpa upe!

¡Ēgüe tehi apirēhi vaherá ité yepi!” ehi.

¹³ Ahese icuaipri ipāhu pendar aipo ehi cheu cute: “¿Ereicua vo co ava rehíi iturucuar morochi vahe pāve yuvirecoi, ereicua que sui pīha yugüeru?” ehi. ¹⁴ Che evocoyase, “Nde rumo ereicua” ahe chupe. Ipare ahe aipo ehi cheu: “Co acoi yuvinoche tupri vahe ité teco asisa sui yuvireco, inungar oyosei, omomorochi vahe oturucuar, Ēgüe ehi avei güecocuer imomorochi Ovesami ruví pipe yuvireco.

¹⁵ “Sese Tūpa renda rovai yuvirecoi, chupe mbahe apo âgua ari, pītu rupi avei sēta pipe.

Güendave oguapí vahe oĩ, güecocuer pipe osepira.

¹⁶ Evocoi ndiyumbiasí iri chira yuvireco,

ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

¹⁷ Esepia, evocoi Ovesa sercoi Vu renda rovai,

ahe osārora ava rehíi serco inungar ovesa rārosar.

Ipare opara viraso tecovesa resendar i ndopai vahesave imboihu âgua.

Tūpa evocoyase omombituhupara imboyasehosa sui yuvireco” ehi.

8

Imoñuvirío ovasa sello iyavei itaisi rapisa oro apopri

¹ Ipare coiyē cute co Ovesami omondorose imoñuvirío ovasa sello cuachiar mboyasa ichuí, ahese síu tupri ivave ñepeí hora yemombitesa rupive. ² Ichui asepia siete tupri Tūpa rembiguai iva pendar yuvinochai vahe Tūpa rovai, chupe opa imondosa siete tupri mímbi. ³ Ipare ou ambuae Tūpa rembiguai iva pendar oro itaisi rapisa reseve, iyavei ou ohá itaisi rapisa renda rovai; ipare imondosa tuvichá itaisi chupe oicuvāvehe vaherá oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe. ⁴ Itaisi rātachi evocoyase oso Tūpa rembiguai iva pendar po sui. Ēgüe ehi oyepota oso Tūpa recosave, oyoya tupri chupendar yeruresa rese. ⁵ Ipare evocoyase Tūpa rembiguai iva pendar opoco itaisi rapisa rese, omboapipo

mbahe reropovēhepri renda pendar tātapii pipe. Ipare opa omombo ivi hari rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbí

⁶ Evocoyase siete tupri Tūpa rembiguai iva pendar oyemoingatu voi güemimbi moñehe āgua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi hari rupi amanda iyavei tata oyeseha vahe tuvi rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihí reseve avei opa yuvirocai.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuvi. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocafusa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui i ohē vahe mombosapisa yahocuer pipe avei no. ¹¹ Yasitata rer evocoyase Iro-vahe. Ipare i mombosapisa yahocuer iró iteanga. Evocoi i pipe setá ava omano yuvireco.

¹² Imoiругatusa Tūpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pītu mombosapisa yahocuer pipe avei no.

¹³ Ipare asepia, asendu avei no vira guasu ovevese iva mbiter rupi, aipo ehi pucu oñehe oico: “¡Too, too! ¡Iparaisu catura moco ava yuvirecove vite vahe ivi pipe yuvireco acoi omoñehese ambuae mbosapi Tūpa rembiguai güemimbi yuvireco!” ehi.

9

¹ Tūpa rembiguai imbopoyandeposa omoñehese güemimbi, ahese asepia yasitata oviapi vahe iva sui ou ivive. Ipare chupe imondosa ivicuar picucu pītumimbi vahe mboisa. ² Ipare omboise ivicuar rovapisa, ichui opūha tātachi, inungar acoi horno guasu pipe sui osē vahe. Evocoyase evocoi tātachi ndosesape uca iri ari upe, niporēhi iri eté mbahe. ³ Iyavei evocoi tātachi sui opa yuvinose tucru guasu rehii oñemosai opacatu ivi rupi; chupe avei imondosa seco pīrata āgua inungar acoi mbaherumbiquiāpe. ⁴ Icuaisa rumo opacatu capihí mbahe rocri iyavei ivira momaraēhi āgua, ēgüe ehi rumo acoi ava nomboyecuai vahe osiva rese Tūpa rer, chupe nara ité. ⁵ Nimondosai rumo mborocuita chupe ava yuca āgua. Ēgüe ehi rumo ‘tomombaraisu pucu rane poyandepo yasi rupi sereco’ oyapave tēi, inungar tupri acoi mbaherumbiquiāpe rasicuer.

⁶ Evocoi ari rupi ava oipota tēira omano āgua yuvireco viña. Imanosa rumo que vitera yuvireco ichui.

⁷ Tucru guasu rehii inungar cavayu imoingaturpi vavasave nara yepi; oāca rese evocoyase vireco ndoyavii yeguaca oro apopri, iyavei sova aviye tupri ité ava repiaca. ⁸ Iha ndoyavii cuña ha, sāi evocoyase ndoyavii tupri yagua pīta rāi. ⁹ Setecuer evocoyase oyopia tupri guarepochi apopri, iyavei ipepo riapugüer aviye tupri ité acoi cāreto riapugüer cavayu vinoña vahe vavasave. ¹⁰ Vireco vuguai rese opopiar aviye mbaherumbiquiāpe popiar. Ahe niha vireco opīratasa poyandepo yasi rupi ava momara āgua tēi. ¹¹ Evocoi tucru guasu rerecuar, ahe icuaipri ivicuar ipicucu vahe mboi āgua. Ahe serer hebreo ñehe pipe Abadón; riguer ñehe pipe evocoyase Apolión ehi.

¹² Opa yipindar vahe mbahe-mbahe tēi; oime vite rumo co pare ñuvirío mbahe tasi vahe.

¹³ Imoñepeí ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaingar irungatu sāchi vahe pāhu sui. ¹⁴ Ahe aipo ehi evocoi imoñepeí ovasa Tūpa rembiguai upe: “Eyorapa evocoi irungatu Tūpa rembiguai ñapichimbri iai guasu Eufratese ivirindar” ehi. ¹⁵ Evocoyase opa yorasa ava mombosapisa yahocuer yuca āgua yuvireco. Esepia, evocoi imoingaturpi co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ēgüe ehi asepia cavayu rehii che quer nungar pipe, ihari pendar evocoyase vireco opochiha rupi tupri oyoepisa guarepochi apopri yuvireco, ahe iparagüer pīra vahe tata nungar, sovi vahe, iyu vahe avei no. Cavayu rehii āca evocoyase aviye tupri yagua pīta āca, iyuru sui evocoyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepia niha, cavayu pīratasa iyuru rese chini, suguai rese avei no; ahe suguai ndoyavii tupri ité mboi āca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, noseçuñaro eté güecocuerei yuvireco. Ndopoi potai eté caruguar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoi mbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tüpa rembiguai iva pendar vireco vahe icuachiapri cuachiarmi

¹ Ipare asepia ambuae Tüpa rembiguai iva pendar ipiratá vahe ogüeyise iva sui ou mbahe pítu páhuve; ahe ñaca rese arco iris oyere tupri. Sova sendí aviyē ari, setima evocoiyase ndoyavii tata rendigüer opüha tupri vahe. ² Cuachiarmi oyemboi vahe vireco opove. Opi oacato cotindar pipe opíro para guasu rese, ambuae opíve evocoiyase opíro ivi rese. ³ Evocoiyase sáse píratá, inungar yagua píta rāse; sāsese, evocoiyase siete tupri osunu vahe ñehe oyendu yuvireco. ⁴ Oñehēpase, ahe ñehe che aciuachiara viña; asendu rumo iva sui ñehesa aipo ehi vahe: “Eremboycuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tüpa rembiguai asepia vahēcuer, ahe acoi opíro vahe para guasu rese, ivi rese avei opo oacato cotindar omopuha iva coti. ⁶ Ichui Tüpa ndopai vahe rer pipe evocoi oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chietera; ⁷ oyepotase rumo imoñuvirío ovasa Tüpa rembiguai upe güemimbi moñehe água, ahe ñehe imboavíesara Tüpa remimbotar yipindar ndicuasai vahe, ahe acoi omombehu vahe güemibiguai oñehe mombehusar upe aracahe” ehi.

⁸ Ñehesa asendu vahe iva sui oñehe iri cheu aipo ehi: “Eso, tereipisi cuachiarmi imboipri Tüpa rembiguai vireco vahe evocoi opíro vahe para guasu rese ohā, ivi rese avei no” ehi. ⁹ Evocoiyase aso Tüpa rembiguai upe, aporandu cuachiarmi rese, ahe ñehe aipo ehi cheu: “Ndo co, eipisi, ehu. Nde yuru pipe evocoiyase sēhera eiri nungar, nde aviterve rumo irora” ehi cheu.

¹⁰ Ahe ñehe aipisi cuachiarmi cute Tüpa rembiguai sui, ipare ahu; yipindar sēhé che yuru pipe inungar eiri, amocopase rumo, che aviterve iró cheu. ¹¹ Evocoiyase aipo ehi yuvireco cheu: “Nde ereñehe irira Tüpa aipo ehi vahe rese ambuae-ae tecua pipendar rese, ivi rupindar rese, ambuae-ae ñehe vahe rese, mborerēcuar rese avei no” ehi.

11

Ñuvirío ava Tüpa recocuer mombehusar

¹ Ipare ombou vara mbahe rāhasa yuvireco cheu, ichui aipo ehi yuvireco cheu no: “Erio, teresāhapa tüparo, mbahe reropovēhepri renda avei, ipare opara ereipapa ipipendar Tüpa mboeteisar retacuer” ehi. ² “Nderesāhai chira rumo ñachimbri pipe tüparo rocar rupi. Esepia, evocoi opa imondosa ava Tüpa ndoicuai vahe upe, ahe opíroca tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu água opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hi yuvinoha vahe ivi Yar rovai. ⁵ Acoi que oimese ovireco mara pota vahe, ahe ñehe reco mombehusar yuru sui osēra tata sapípa água; ēgüe ehira ava omano que che reco mombehusar reco momara potasar. ⁶ Co ñuvirío vireco opíratasa oqui vahe mombita água, acoi ari rupi che reco mombehu viteseve yuvireco; iyavei vireco píratasa i recuñaro água tuvi pipe yuvireco, imombaraisu uca água avei ivi opacatu-catu tēi mbaherasi pipe güemimbotar rupi.

⁷ Omboavíepase rumo Tüpa reco mombehusa yuvireco, ahe ñehe ivicuar guasu ipicucu vahe sui mbahe ipi vai. Ahe ovavara sese, osecopira, ichui oyucara. ⁸ Sehögüer evocoiyase yangarecuavēhi tēi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, “Sodoma pendar nungar yuvirecoi” ehi yuvireco; “Egipto pendar nungar yuvirecoi” ehi avei yuvireco no. ⁹ Ipare mbosapi ari yemombitesa rupi, ava-ava tēi tecua rupindar, ava ambuae-ae tēi vahe, ñehe ambuae vahe iyavei ambuae-ae ivi rupindar osepiño tēra sehögüer yuvireco iyavei ahe noñoti ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ēgüe ehira sorivete, iporerēcua oyese yuvireco. Esepia, evocoi ñuvirío ava Tüpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tüpa opa ombogüerayevi, ahe ñehe opühapa yuvireco. Evocoiyase ava opacatu osepia vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipíratá vahe iva suindar aipo ehi vahe: “¡Peyeuropa ave ivate!” ehi.

Evocoyase opa oyeupi ivave yuviraso iva quiha pãhu rupi oamotarêhisareta rembiepi-ave. ¹³ Aheseve voi oime ivi ririi tuvichá vahe, ichui tecua guasu imbodiesa yahocuer opa onduru; ahese siete mil tupri ava opa omano yuvireco. Evocoyase ava rumbirer, osiquiyepave tẽi osapucaí Tũpa iva pendar upe imboeteisa pipe yuvireco.

¹⁴ Opa mbahe-mbahe tẽi moñuviriosa cute; ou poyava irira rumo imombosapisa.

Imoñuvirio ovasa Tũpa rembiguai omoñehese güemimbi

¹⁵ Imoñuvirio ovasa Tũpa rembiguai omoñehese güemimbi, ahese oyeendu ñehesa ipĩrata vahe iva suindar aipo ehi vahe:

“Yande Yar Tũpa, Sembiporavo Poropĩsirosar avei vireco co ivi pĩpendar mborerecuasa opovrive yuvireco cute.

Ahe evocoyase mborerecuar apirẽhi vaherã itera secoi” ehi.

¹⁶ Evocoyase veinticuatro tupri icuapri, evocoi uguapi vahe yuvinoi Tũpa renda rovai, ahe oyeaivi omboya itẽ osiva ivi rese imboeteisa pipe yuvireco, ¹⁷ aipo ehi:

“Aviye ndeu ore Yar, Tũpa mbahe mboavaisarẽhi, nde acoi yipisuive vahe itẽ, ereicoveño avei cũritei.

Esepia, nde pĩratasa tuvichá vahe pipe ereporocuai eico.

¹⁸ Ambuae tecua rehii pendar nde amotarẽhi itẽ yuvireco.

Nde ñemoirosa rumo cũritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehese mombehugar upe, ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tẽi rerusar” ehi yuvireco.

¹⁹ Ahese oyemboi tũparo iva pendar, iyavei oyecua tupri cuachiar porocuita resendar riru. Ipare overa-vera, siapu guasu, osunu, ivi oriri, amanda osururú avei no.

12

Cuñia iyavei mbahe ipi oporomocañi vahe

¹ Evocoyase iva rese oyecua mbahe poromondiisa tuvichá vahe ambuae mbahe mboye-cua água: oime cuña iturucuar inungar ari rendigüer, aviye opiro vahe yasi rese ohã, oãca yeguaca rese doce tupri yasitata vireco. ² Co cuña ipuruha oico, sãse tẽi omembri iha pota água oyesui. Esepia niha, oiporará itẽ tasicuer. ³ Ipare coiye oyecua iva rese ambuae mbahe mboycua tuprisa: mbahe ipi pira vahe, ahe ñaca siete tupri, sãchi evocoyase diez iyavei vireco yeguaca oãca yacatu. ⁴ Suguai evocoyase ombotiriri yasitata iva pendar imombosapisa sui ñepeí yahocuer seraso. Ipare opa omombo ivive. Ahe evocoyase opita osãro cuña imembira pota vahe rovai ohã, “Tahupaño voi imembri oha ramoseve” ehi viña. ⁵ Ipare co cuña membri oha cuimbahemi, ahe mborerecuar virecora mbococa guarepochi apopri, ipĩrata catu vahe secoira opacatu ava ivi rupindar upe. Ichui serocuaa voi serasosa Tũpa rovai. ⁶ Cuña evocoyase oñemi ivi iporupirẽhisave oso. Aheve omoingatu Tũpa iyemboerecuá água, eipeve icaru água mil doscientos sesenta ari rupi.

⁷ Oime avei vavasa ivave; ahese Tũpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. ⁸ Ndoicatuí etẽ rumo Miguel recopi água yuvireco. Sese ndipoi etẽ ivave seco água yuvireco chupe. ⁹ Eñgüe ehi imboyepepisa mbahe ipi oporomocañi vahe reco pĩratasa sembiguai eta reseve; opa imombosa ivi pipe yuvireco. Evocoi mboi vai, “Carugar” ehi vahe yuvireco chupe; “Satanás” ehi avei yuvireco chupe. Evocoi niha ava ombopa-mbopa tẽi vahe opacatu ivi pipe yuvireco.

¹⁰ Evocoyase asendu ñehesa ipĩrata vahe ivave, aipo ehi vahe:

“Cũritei oime poropĩsirosa, pĩratasa iyavei yande Tũpa mborerecuasa, Poropĩsirosar mborerecuasa avei no.

Esepia niha, imboyepepisa iva sui acoi oseca-seca vahe yande rivri Tũpa reroyasareta recocuer momarã água pĩtu, ari yacatu rupi yande Ru Tũpa rovai.

¹¹ Yande rivri osecoreroyi Ovesami ruvi piyere pipe sui yuvireco iyavei acoi secocuer mombehu tuprisa pipe sui avei no.

Esepia niha, ndosiquiyei etẽ güetecuer mocañi água yuvireco.

Ahe rumo oyemoingatu voi etẽ omano água.

¹² ¡Peyemboviha catu pe iva iguar peico vahe!

Pe rumo, ¡peparaisu catura ivi pipe, para guasu pipe avei peico vahe!

Esepia niha, Carugar ogüeyi pẽu oñemoirosa pipe, oicuaase güeco pucuẽhi água” ehi.

¹³ Ipare mbahe ipi oporomocañi vahe oicuase imombopri güecose ivi rese, ahese omoña cuña imembri cuimbahemi reseve yamotarēhisa pipe. ¹⁴ Evocoi cuña upe rumo imondosaño ñuvirío vira guasu pepo iveve āgua chupendar ivi imoingatupri ava porēhisave seco āgua, amombri mbahe ipi oporomocañi vahe sui. Aheve oyopoi mbosapi araviter yemombitesa rupive. ¹⁵ Ipare mbahe ipi oporomocañi vahe oyuru rupi ombotipimacua cuña raquicuei iai apo ‘tocañi tēi’ oyapave viña. ¹⁶ Ivi rumo oime co cuña pītiviisa, ahe oyeca. Ipare opa omoco iai evocoi mbahe ipi oporomocañi vahe rembiapo. ¹⁷ Evocoiyase, oñemoiró iteanga cuña rese, ipare oso ovava ambuae ichuindar rehii rese, ahe omboyeroya vahe ité Tūpa porocuita yuvireco iyavei yuvirecoi tupri vahe Jesucristo remimombehu rupi. ¹⁸ Ipare mbahe ipi oporomocañi vahe opita para guasu popive ohā.

13

Ñuvirío mbahe ipi vai

¹ Ipare asepia para guasu pipe sui osēse mbahe ipi vai, ahe siete tupri ñaca vahe iyavei diez tupri sāchi. Guāchi yacatu evocoiyase vireco ñepe-pei oyeguaca, iyavei oāca yacatu rese vireco terer Tūpa upe mbahe tēi vahe. ² Co mbahe ipi vai aviye tupri acoi yaguar iparaū vahe; iyavei ipi aviye tupri oso pi, iyuru evocoiyase aviye yagua pīta yuru. Mbahe ipi oporomocañi vahe evocoiyase omondo opīratasa iyavei omborerrecuasa chupe. ³ Ñepe mbahe ipi vai āca oyeapicha guasu vahe ndoyavii omano vaheṛā ité viña; ahe rumo ocuera tupri iriño evocoiyase opacatu guasu ava sepilase, ndoyembovihai. Ichui viroya catu yuvireco. ⁴ Omboetei guasu mbahe ipi oporomocañi vahe sereco yuvireco. Esepia, omondo omborerrecuasa mbahe ipi vai upe. Ipare ahe avei omboetei ai yuvireco no, aipo ehi yuvireco: “Ndipoi eté mbahe ipi vai nungar, iyavei ndipoi eté ava oicatu vahe ovava vaheṛā sese” ehi yuvireco.

⁵ Iyavei mbahe ipi vai upe ipotasa iyemboivate ai āgua oñehe pipe ava rovaque iyavei Tūpa roeroiro āgua avei no, iyavei mborerrecuar guasu seco āgua cuarenta y dos yasi rupi. ⁶ Ēgüe ehi iñehe mara-mara tēi Tūpa rese, iñehe-ñehe tēi avei serer maranehi rese, sēta rese, iva pendar rese avei no. ⁷ Imondosa avei chupe vavasa apo uca āgua Tūpa upendar ava eta upe secopi āgua. Ipare imondosa avei mborerrecuar seco āgua chupe ava ambuae-ae tēi vahe upe, secua ambuae vahe upe, ambuae-ae tēi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoēhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaheṛā, oyeoquenda ucaño itera; iyavei acoi ava omano vaheṛā guise pucu pipe, ipipeño ité omanora.”

Co pipe oyecua Tūpa rese yeroyasa iyavei ipīratasa ava chupendar rese.

¹¹ Ipare asepia ambuae mbahe ipi vai osē vahe ivivri sui. Co vireco ñuvirío guāchi ndoyavii tupri Ovesa rāchi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoi yipindar vahe mbahe ipi vai mborerrecuasa rovaque, iyavei ava ivi pipendar yuvirecoi vahe upe omboetei uca yipindar mbahe ipi vai, ahe acoi ocuera tupri vahe oyeapichasa oyuca rāgüer sui. ¹³ Iyavei oyapo setá mbahe poromondiisa mbahe mboyecua āgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tēi ava ivi pipendar yuvirecoi vahe mbahe poromondiisa pipe evocoi imondosa vahe yapo āgua chupe yipindar mbahe ipi vai rovai. Ipare oporocuai yapichapri ocuera tupri vahe rāhangapo āgua imboetisave. ¹⁵ Ipare imondosa pīratasa chupe tecovesa mondo āgua evocoi sahanga upe ‘toñehe, toyuca uca avei ava opacatu omboeteiñesar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecoprii vahe upe, mbiguai tēi upe, ahe chupe, “Toyecuachia opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mondo āgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecuasa co renducua tupri āgua. Acoi osenducua vahe toicua tupri mbahe ipi vai rer retacuer. Evocoi niha ava rer retacuer. Ahe seiscientos sesenta y seis.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evocoi oicuachia vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omofehese

arpa yuvireco, ēgüe ehi siapugüer. ³ Ipare osapucaí sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaiþri eta rovai avei no. Ñepeí yepe que iva pendar ndoicatuí eté evocoi sapucaisa rese oyembohe vaheṛã. Ēgüe ehi rumo ava ciento cuarenta y cuatro mil tupri yuvirecoi vahe, evocoi oñepisiro vahe ivi pipendar pāhu sui, ahe güeraño tupri ité oicatu osapucaí yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipendar mbahe seropovēheþri Tūpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñhe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer pīsirosa resendar ndopai vahe imombehu āgua opacatu ava co ivi pipendar upe: opacatu ivi rupindar upe, ava ambuae-ae vahe upe, iñhe ambuae-ae vahe upe, opacatu tecua rupindar upe avei no. ⁷ Ipare oñhe pīrata aipo ehi: “Pesiquiye Tūpa sui iyavei pesapucaí seco ivatesa rese chupe no. Esepia niha, cūriteí oyepota ari chupe ava recocuer rese iporandu āgua. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evocoi opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi pīratá iri oico: “Acoi que ava omboetei vahe mbahe ipi vai sereco, sahanga avei no, iyavei acoi oyembohe catu vahe oyecuachía āgua osiva rese, que ope rese no, ¹⁰ oipisi itera Tūpa ñemoirosa ipīrata vahe ité; ipare omombaraisura setecuer azufre ocai vahe pipe güembiguai iva pendareta reco maranehi rovaque, Ovesami rovaque avei no. ¹¹ Tātachi icaigüer pendar evocoiyase oyeupira ndopai vaheṛã, ahe se ndipoi chietera pituhusa pītu, ari pipe evocoi mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Ēgüe ehira Tūpa rese ité yuvirecoi vahe yeroyasa oyecua ahe acoi iporocuita mboaviye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Ēgüe ehi eté —Ehí Espíritu imombehu—, opituhura oporaviquisa sui yuvireco. Esepia, mbahe sembiapo rerācua osora ivave supi” ehi.

Ivi pipendar recoñhasa

¹⁴ Ahese asepia iva quiha morochí vahe; iharive ndoyavii ava oguapi vahe oí. Vireco niha oyeguaca oro apopri oāca rese iyavei mbahe miti asiasa saimbé vahe vireco opove. ¹⁵ Ipare osé ambuae Tūpa rembiguai tūparo sui. Ahe osapucaí pīrata evocoi iva quiha harive chini vahe upe: “¡Yyasía nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evocoi chini vahe oyasia güemiti ivive oico, ahe se opa omonuha güembiasia.

¹⁷ Ipare osé ambuae Tūpa rembiguai tūparo sui, ahe avei vireco mbahe miti asiasa saimbé vahe. ¹⁸ Ipare ambuae Tūpa rembiguai osé mbahe reropovēheþri renda sui, ahe tata rese hañecosar secoi. Iyavei oñhe pīrata evocoi vireco vahe mbahe miti asiasa upe aipo ehi: “¡Yyasía uva ha apacuar, evocoi oime vahe ivi pipe! ¡Esepia niha, opa yaviye!” ehi. ¹⁹ Evocoiyase co Tūpa rembiguai inungar oyasia vahe uva ha ēgüe ehi opa ava ipeha ivi pipendar. Ipare opa oyapocatu Tūpa ñemoirosa rāro āgua. ²⁰ Ipare inungar uva ha icambepri tecua cupeve, ēgüe ehi co ava imombaraisu; ichui osé tuvi evocoi tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

Ipa siete tupri Tūpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvinoha ati mbahe ipi vai recopisar, sahanga recopisar iyavei nomondo uca potai vahe serer cuachía āgua yuvireco oyese. Ahe vireco Tūpa upendar arpa yuvireco. ³ Ipare osapucaí Tūpa rembiguai Moisés sapucaisa yuvireco, iyavei Ovesami sapucaisa aipo ehi: “Tuvichá opacatu mbahe nde rembiapo, che Yar Tūpa opacatu mbahe mboavaisarēhi; nde recocuer supi tupri vahe ité; seco ivi vahe.

¡Too, nde mborerecuar guasu opacatu ivi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei água.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepia niha, sepiasa nde rembiapo supi tupri vahe” ehi.

⁵ Ipare asepia ivave oyemboise Tüpa rêta imaranehi vahe. Aheve acoi yapocatusa mborocuita resendar. ⁶ Evocoiyase ichui yuvinosepa evocoi siete Tüpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuaasa ipe vahe oro apopri pipe evocoiyase oyeumbicua opochiha rupi tupri yuvireco. ⁷ Ipare ñepeí evocoi irungatu íva pendar yuvirecove vahe pâhu pendar omondo siete tupri Tüpa rembiguai upe siete Tüpa ñemoirosa riru oro apopri, ahe oicove vahe ité, ndopai vahe. ⁸ Ipare Tüpa rêta omboapipo tátachi, evocoi ou vahe Tüpa reco porañetesa iyavei ipíratasa sui. Aheve ndiyai eté que ava upe seique água acoi opase voi eté omomba siete tupri mbaherasi vai vireco vahecuer siete Tüpa rembiguai.

16

Siete Tüpa ñemoirosa riru

¹ Evocoiyase asendu ñehesa ipírata vahe osé vahe Tüpa rêta pipe sui. Ahe aipo ehi siete Tüpa rembiguai yuvirecoi vahe upe: “Peso, tapeipiýerepa ivi hari rupi evocoi siete tupri mbahe riru pendar Tüpa ñemoirosa” ehi.

² Yipindar vahe Tüpa rembiguai opa oipiyere ígua riru pipendar ivi hari rupi; evocoi opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tüpa rembiguai imoñuviriosa opa oipiyere ígua riru pipendar para guasu pipe. Ahe evocoiyase oyeapo omano vahe ruvi nungar; ichui opa omano opacatu mbahe yuvirecove vahe ipipe.

⁴ Tüpa rembiguai imombosapisa opa oipiyere ígua riru pipendar íai pipe, í ohé vahe pipe avei no. Ipare opa ahe oyeapo tuvi yuvireco. ⁵ Co pare asendu Tüpa rembiguai í rese ihañeco vahe ñehesa aipo ehi:

“Nde seco tupri vahe ité ereico evocoi ava upe erembouse nde ñemoirosa, che Yar Tüpa, seco maranehi vahe.

Nde yipisuivendar ité ereico.

⁶ Esepia, ahe opa oyuca ndeundar ava iyavei nde ñehe mombehúsar yuvireco.

Cüritei rumo eremboihu uca tuvi pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropvêhesa renda sui aipo ehi vahe: “Supi eté, che Yar Tüpa, opacatu mbahe mboavaisarēhi, nde ava recocuer mombaraisusa supi tupri vahe ité iyavei nde reco ívi vahe ité no” ehi.

⁸ Tüpa rembiguai imoirungatusa, opa oipiyere mbahe riru pipendar ari rese, ipare ari upe imondosa píratasa ava rapipa água. ⁹ Ipare opacatu ité ava yuvirocaipa tupri; ndoyevii eté rumo Tüpa upe iyavei nomboeteiño ité yuvireco. Ēgüe ehi rumo íñehe mara-mara tēiño mbaherasi rerecose Tüpa upe yuvireco.

¹⁰ Tüpa rembiguai imbopoyandeposa oipiyere mbahe riru pipendar mbahe ipi vai renda rese. Ahe aviyeteramo tēi serecuar ipovri pendar avei pitumimbisave yuvireco. Ava evocoiyase oñeapecusuhu-suhu tēi yuvireco mbahe rasicuer pâhuve; ¹¹ ndopoiño ité rumo mbahe-mbahe tēi aposa sui yuvireco, ahe rumo íñehe mara-mara tēiño Tüpa ívate vahe rese oyeupe mbahe tasi vahe pâhuve yuvireco.

¹² Tüpa rembiguai imoñepeí ovasa oipiyere mbahe riru pipendar íai guasu Eufartes pipe. Ahe evocoiyase opa ípiru peri apo água añihivei coti sui mborerecuareta yu água.

¹³ Ipare asepia mbahe ipi oporomocañi vahe, mbahe ipi vai, ndahei vahe Tüpa ñehe mombehúsar supi vahe avei, ahe yuvirecoi vahe yuru rupi yuvinose mbosapi caruguar vireque nungar. ¹⁴ Co Carugar suindar yuvirecoi, ahe oyapo poromondiisa mbahe mboycuasa yuvireco. Ipare opa yuvinose opacatu ivi rupi mborerecuareta monuha água vavasave nara, acoi ari cañi pipe Tüpa mbahe mboavaisarēhi amotarēhisave.

¹⁵ “Peyapisaca tupri che ñehe rese, che aviyeteramo tēi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahe se nochi chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoiyase imbosietesa Tüpa rembiguai oipiyere íñemoirosa mbahe riru sui ívitu rupi. Ipare íva pendar Tüpa rêta pipe sui osé ñehesa ipírata vahe evocoi ou vahe senda sui: “¡Opa ité yaposa cute!” ehi. ¹⁸ Ahe se oime overa vahe, mbahe siapu guasu vahe iyavei osunu

vahe. Ipape ivi oririi ipīrata catu vahe opacatu ivi ririi sui ava yuvirecove viteseve ivi pipe. ¹⁹ Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipape Tūpa oyemomahenduha evocoi tecua guasu Babilonia pendar rembiapo ai rese, evocoiyase omondo oñemoirosa ipīrata catu vahe chupe. ²⁰ Opacatu caha pāhu, ivitri avei ocañipa ite yuvireco. ²¹ Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tēiño vite ite Tūpa upe yuvireco amanda sui tēi. Esepia niha, evocoi Tūpa poronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe riru yuvireco, ipāhu pendar ñepeu ou aipo ehi cheu: “Erio, amboyecua co cuña yaguasa serai vahe upe ñemoirosa ndeu, ahe evocoi oguapi i harive oī” ehi. ² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipape che quer nungar pipe Espiritu omboyecua vahe cheu, Tūpa rembiguai iva pendar che reraso ava porēhisave. Aheve asepia cuña mbahe ipi vai pīra vahe harive chini. Evocoi mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. ⁴ Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua riru oro apopri. Ipape omboapipo mbahe yavaeté vahe sereco oyemboaguasa-guasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. ⁶ Ipape aicua evocoi cuña osavaipo vahe oī Tūpa reroysar ruvi pipe iyavei acoi Jesús recocuer mombehusa sui tēi yuapri vahe ruvi pipe avei no.

Co asepiase che quer nungar pipe, ndache mbovihai eté. ⁷ Aheve ahe Tūpa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar; iyavei acoi mbahe ipi vai vireco vahe siete tupri oāca, diez tupri avei acoi sāchi” ehi. ⁸ “Acoi mbahe ipi vai eresepia vahe ahe yipive secoi vahe, cūritei rumo ndipo iri; osēra rumo ivicuar guasu ipicucu vahe sui omano āgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoēhiseve, ahe ndovihai chira yuvireco osepiase evocoi mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecua senducua āgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evocoi cuña oguapi oī iyavei ahe siete ñaca avei omoporēhi ‘siete tupri mborerecuar’ oyapave. ¹⁰ Cinco tupri mborerecuar evocoi ipāhu pendar ndipo iri yuvireco, ñepeño evocoiyase oporocuai cūritei oico, ambuae rumo ndou vitei. Ouse rumo ipandar, ou raimi tēira. ¹¹ Mbahe ipi vai secoi vahe yipindar, ndoicove iri cūritei, ahe imbohochosa secoira mborerecuarā, yepe siete tupri vahe mborerecuar guasu mboetasa viña, ahe rumo ocañi tēi vaherā secocuer” ehi.

¹² “Evocoi diez tupri vahe sāchi, ahe mborerecuar diez tupri ndoyuviroique vitei vahe oporocuai vaherā yuvireco. Oyoya rumo oporocuai raimi tēira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evocoi mbahe ipi vai upe omondo vaherā pīratasa iporocuai āgua yuvireco. ¹⁴ Ipape ovavara Ovesami rese yuvireco; Ovesami rumo osecoreroyira. Esepia niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar; iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuāño vahe ite supi uguata āgua yuvireco” ehi.

¹⁵ Iyavei Tūpa rembiguai aipo ehi cheu: “Evocoi para guasu eresepia vahe, iharive cuña yaguasa-guasa tēi vahe oguapi oī, ahe ‘ava rehi tecua yacatu rupindar, iñehe ambuae-ae vahe iyavei opacatu ambuae tēi vahe ivi rupindar’ oyapave. ¹⁶ Evocoi eresepia diez tupri vahe sāchi mbahe ipi vai rese, ahe ndoyambotai chira cuña yaguasa-guasa tēi vahe; iyavei osequi tupri seya; ohupara soho, ipape opara osapi. ¹⁷ Tūpa niha omondo ipiha pipe mbahe güemimbotar apo āgua ‘ahe toyemongerēhi yuvireco omborerecuasa mondo āgua mbahe ipi vai upe; tomboaviye rane ite che remimombehugüer yuvireco’ oyapave. ¹⁸ Iyavei evocoi cuña yaguasa-guasa tēi vahe eresepia vahe, evocoi niha tecua guasu ivi pipendar mborerecuareta vireco vahe opovrive yepi” ehi Tūpa rembiguai cheu.

18

¹ Ipare asepia ambuae Tūpa rembiguai ipīrata vahe ogüeyi vahe iva sui. Vireco omborerecuasa ivate vahe, ahe sendigüer osesape tupri ivi rupi. ² Iyavei oñehe pīrata oico aipo ehi:

“¡Oviapi tecua Babilonia cute!

Carugar yuviroique sese, opacatu carugar naporai vahe iyavei vīrai vai nungar yuviroique sese.

³ Esepia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoyase mborerecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoyase asendu ambuae ñehesa iva sui ou vahe, ahe aipo ehi:

“Peyepipi evocoi tecua guasu sui, pe peico vahe cheundar evocoi yangaipa rese imboyaēhi āgua.

Iyavei ñepe yepi taperupiti eme imbaherasisa.

⁵ Esepia niha, yangaipagüer oyepota ité ivave.

Tūpa evocoyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upe, ēgüe peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaisu tahoyoya iyemondo-mondo tēi agüer iyemboetei ai agüer rese avei no.

Esepia niha, ahe aipo ehi opīha pipe oico:

‘Cohave che aguapi vīte mborerecuar che reco nungar pipe.

Ndahei imer mano vahecuer che aico, iyavei ndacheparaisui chietera’ ehi viña.

⁸ Sese niha aviyeteramo tēi oura mbaheerasisa chupe:

paraisusa, tieporēhi, manosa; ipare sapisara.

Esepia niha, yande Yar Tūpa mbahe mboavaisarēhi secoi, ahe, ‘Tomano’ ehi chupe” ehi.

⁹ Evocoyase mborerecuar ivi pipendar yuvirecoi vahe co cuña resendarer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovīhai chira sese osepīase evocoi cuña rātachi yuvireco curi. ¹⁰ Opitañora amombrive osiquiyepave, iparaisusa sui aipo ehi tēira yuvireco:

“¡Ndeparaisu catu, tecua guasu Babilonia, nde reco pīrata vahe tie viña!

Esepia niha, co aviyeteramo tēi ou nde mombaraisu catusa” ehira yuvireco.

¹¹ Evocoyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovīhai chietera evocoi tecua rese yuvireco. Esepia niha, ndipo iri chietera que virocua vaheṛā imbahe yuvireco ichui, ¹² co opacatu mbahe sepi vaheṛā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei pīraumbi vahe, pīra vahe no; iyavei opacatu-catu tēi ivirape siacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe siacua vahe; uva ricuer, mbahe quira, trigo cuhi aviye vahe, trigo avei; iyavei mbahe mimba ovosii vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaisusa repīase yuvireco. Oyaseho tēira iyavei ndoyembovīhai tēi chira yuvireco no, ¹⁶ iyavei aipo ehi tēira yuvireco: “¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi, pīra vahe; oro pipe oyemboetei vahecuer,

itamī iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoyase opacatu ava carite guasu pipendar rerecuar, ava imbehī ivirindar carite guasu reroguatasar, i rupi oporaviqui vahe oyeupe nara mbahe rereco āgua, ahe opaño opita amombrive yuvireco ichui ¹⁸ iyavei co tecua rātachi repīase, ahese osapucaī pīrata tēi yuvireco: “¡Ndipoi eté niha yūpisui tecua na ehi vahe!” ehi yuvireco. ¹⁹ Ipare imboasipave omondo ivi cuhi oācave yuvireco, oyaseho iyavei ndoyembovīhai tēi, ipare osapucaī tēi yuvireco aipo ehi:

“¡Too! ¡Iparaisu catu tecua guasu pendar!

Esepia niha, evocoi tecua guasu mbahe eta pipe sui ava i rupi oporaviqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovihaño evocoi tecua rese, pe iva pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esepia niha, co tecua omocañisa pipe Tūpa oyapo mbahe tupri pēu nara.

²¹ Ahe se Tūpa rembiguai iva pendar seco pīrata vahe osupi ita inungar mbahe mbocuhisa, ipare omombo para guasu pipe aipo ehi:

“Na ehi aveira tecua guasu Babilonia mocañisa.

Imombopri secoira.

Ipate ndapesepia iri chietera apirēhi vaherā” ehi.

²² “Ndasendusā iri chietera acar rupi arpa moñehesar, mimbī moñehesar, iyavei mimbī guasu moñehesar avei no; ndererecoi chietera ava oporaviqui vaherā, ndasendusā iri chiaveira ita mbahe mbocuhisa monarasa nde suindar.

²³ Iyavei ñepe yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondosar seco pīrata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pipe” ehi

Tūpa rembiguai chupe.

²⁴ Esepia niha, evocoi tecua guasu pipe oyecua Tūpa ñehe mombehusar ruvi, Tūpa upendar ava ruvi, iyavei opacatu ava yucapri vahe ivi pipendar ruvi avei.

19

¹ Co pare, asendu ava rehī ñehe pīrata ivave aipo ehi vahe:

“¡Imboeteipri yande Yar tasecoi!

Poropisirosa, teco porañetesa iyavei ipīratasa ahe yande Ru Tūpa suindar.

² Esepia niha, ahe oyapo mbahe supi eté vahe,

“Tocañi” ehise co cuña oyemboaguasa-guasa tēi vahe nungar tecua guasu upe evocoi niha oseco momara tēi vahe ava ivi pipendar güeco rai pipe; ichui Tūpa osepi oyeupendar” ehi.

³ Ipate aipo ehi iri yuvireco no:

“¡Imboeteipri yande Yar tasecoi!

Esepia niha, evocoi tecua rātachi ndopai chietera” ehi.

⁴ Evocoiyase veinticuatro tupri iva pendar icuaiipri yuvirecoi vahe iyavei irungatu iva pendar yuvirecove vahe, ahe Tūpa mboeteisa pipe oyeaivi ivi rese yuvireco. Ipate aipo ehi yuvireco no: “¡Ēgüe tehi! ¡Imboeteipri yande Yar tasecoi!” ehi. ⁵ Evocoiyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi coti catumi vahe, que seco ivate vahe avei, pe pesiquiye vahe imboyeroa āgual” ehi.

Pieta mendasa Ovesami resendar

⁶ Asendu avei ava rehī ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esepia niha, yande Yar Tūpa opacatú mbahe mboavaisarēhi omboipi oporocuai.

⁷ Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esepia niha, cūrīte oyepota mendasa ari Ovesami upendar.

Sembireco evocoiyase opa oyemoingatu oico:

⁸ chupe ipotasa iyemonde āgua turucuar secose vahe, ndiquihai, sendi vahe pipe.

Esepia niha, co turucuar secose vahe “Tūpa rese yuvirecoi vahe recocuer ihīvi vahe” oyapave aipo ehi” ehi.

⁹ Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

¹⁰ Ipate añenopiha Tūpa rembiguai rovai imboetei āgua. Ahe rumo aipo ehiño cheu: “Ēgüe erei rene. Esepia, che Tūpa rembiguai tēi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esepia niha, evocoi Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

¹¹ Evocoiyase asepia iva oyemboi vahe. Aheve aviyeteramo tēi cavayu morochi vahe oyemboyecua, evocoiyase ava sese oyeupi vahe rer: “Ocuaita-omboaviye-tupri-vahe

iyavei Supi tupri vahe” ehi. Esepia, güeco ñvisa pipe oporocuai iyavei oyapo vavasa. ¹² Sesa evocoiyase ndayaviyei eté acoi tata rendigüer; iyavei oäca rese setá vireco oyeguaca, iyavei vireco terer icuachiapri oyese; ahe güeraño ité oicua. ¹³ Iturucuar evocoiyase imopirapri tuvi pipe; serer evocoiyase, “Tüpa Ñehe” ehi. ¹⁴ Sundao rehi iva pendar saquicuerive yuvirecoi. Iturucuar secose vahe päve morochí vahe, ndiquihai vahe avei. Ahe cavayu morochi vahe harive yuvirecoi. ¹⁵ Iyuru pipe sui osé quise pucu saimbe vahe opacatu ambuae-ae tecua rupindar momara ägua. Ahe oyocuaiira oamotarëhisar guarepochi apopri opo pendar pipe. Iyavei osecöähara inungar uva opive otiamü vahe yuvireco iyavei ombohura evocoi uva ricuer paraisu catusa resendar pipe. Ahese Tüpa mbahemboavaisarëhi oñemoiro itera chupe. ¹⁶ Oturucuar popi rese vireco icuachiapri ohivipi rese avei aipo ehi vahe: “Mborerecuareta rerecurar guasu iyavei ava Yar ivate catu vahe” ehi.

¹⁷ Ipare asepia Tüpa rembiguai opüha vahe arisave. Ahe osapucái pïrata opacatu vïrai mbahe rohoguar upe oveve vahe ìva rese: “¡Perio! ¡Peñemonuha Tüpa suindar carusa guasasave; ¹⁸ pehu co mborerecuareta roho, sundao eta rerecurar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ìvi coti catumi vahe roho, seco ivate vahe roho avei!” ehi.

¹⁹ Ahese asepia mbahe ipi vai iyavei mborerecuareta ìvi pipendar osundao reseve-seve. Ahe oñemonuha yuvireco ovava ägua evocoi cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendasa, oyoya evocoi Tüpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovaque, evocoi mbahe yavai rai vahe apo pipe ombopa-mbopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tüpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoiyase evocoi cavayu morochi vahe hari pendar yuru pipe sui osé vahe quise pucu pipe opa omano yuvireco. Evocoiyase opacatu vïrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tüpa rembiguai ogüeyi vahe ou ìva sui ivicuar guasu ipicucu vahe mboyasar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Carugar secoi, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuae-ae tecua rupindar mbopa-mbopa tēi iriñhi ägua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evocoi oipisi vahe omborecuasa yuvireco ava upe mbahe rese porandu ägua. Iyavei asepia ava hä evocoi opa vahecuer oyasia ñaca yuvireco Jesús recocuer mombehusa sui tēi iyavei Tüpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco. Ipare oporocuai Cristo rese mil araviter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil araviter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepia niha, ahe Tüpa upendar ité yuvireco! Imoñuviriosa manosa evocoiyase chupe ndipo iri eté. Ëgüe ehira rumo ahe Tüpa upe naraño ité pahí yuvirecoira, Cristo upe avei. Ipare mborerecuar yuvirecoira sese mil araviter rupi.

Carugar recopisa

⁷ Acoi osupitise rumo mil araviter cute, ahese Carugar yorasara soquendasa sui. ⁸ Ichui osëra opacatü ava ìvi pipendar mbopa-mbopa tēi oico; osëra ìvi Gog mbopa tēi ägua, ìvi Magog mbopa tēi ägua avei. Ipare omonuhara vavasave nara isundao eta. Esepia niha, ahe sehüi etepri yuvireco inungar ìvi cuhi para guasu popi rupindar.

⁹ Ëgüe ehi yugüeru ati amombri sui, oyerepa tupri Tüpa recua rese yuvireco no, evocoi tecua Jerusalén sembiaisu rese avei. Tüpa rumo ombou tata ìva sui, ahe ipipe opa tupri ité osapi. ¹⁰ Carugar evocoiyase, ava mbopa-mbopa tēisar, ahe opa imombosa ipa azufre ocai vahe pipe. Aheve acoi opa imombosa mbahe ipi vai iyavei Tüpa ñehe mombehusar angahu tēi vahe avei no. Aheve iparaisura pïtu, ari yuvireco apirëhi vahe rä.

Tüpa oguapira güendave ava recocuer rese porandu ägua ari ipa vahe pipe

¹¹ Evocoiyase asepia tenda imboeteipri, morochi vahe. Iharive oime ava oguapi vahe oĩ. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepia omano vahecuer seco ivate vahe, seco mbegüemi vahe avei no opũha yuvinoha Tũpa rovai; ahese cuachiar opa ipipirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoiyase porandusa evocoi cuachiar pipendar mbahe sembiapogüer rese. ¹³ Omano vahecuer opa yuvinose para guasu pipe sui, iyavei tehögüer recosa sui opa yuvinose; ichui opacatu mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pipe. Evocoi ipa niha imoñuviriosa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pipe.

21

Iva piasu iyavei ivi piasu

¹ Ipare asepia iva piasu iyavei ivi piasu. Esepia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evocoi ogüeyi vahe Tũpa sui ou. Opacatu imoingatusa tupri vahe, inungar acoi ña omenda ñgua oyemboetei tupri omevi upe. ³ Ipare asendu ñehesa pĩrata tenda suindar aipo ehi vahe: “Tũpa cũritei oicove ava rehii pãhu rupi oico. Ahe oicove vaherã ité sese yuvireco yepi, ahe ava evocoiyase chupe nara ité yuvirecoira. Ahe teieté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira viharẽhisa, tecoasisa avei chupe. Esepia niha, opacatu mbahe oime vahecuer yipindar, ndipo iri eté” ehi.

⁵ Ahese evocoi oguapi vahe tenda harive oĩ, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esepia niha, co ñehesa supi tupri vahe ité, evocoiyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esepia, che yipive vahe ité, ipandar avei. Acoi ava ihusei vahe amboiñuño tẽira i tecovesa resendar ndasepii vahe pipe. ⁷ Acoi ava oyemoviracua vahe ité mbahe-mbahe tēi apoẽhi ñgua, ahe oipisira co mbahe opacatu omahera yuvireco. Evocoiyase che aciora chupendar ité, ahe evocoiyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroyai vahe, ava ndiporoepia potai vahe, oporoyuca vahe, acoi ava oyemboaguasa tēi vahe, ipaye serai vahe, mbahe rahanga mboeteisar tēi iyavei opacatu ava semira-mira tēi vahe, ahe opara yuvirasa ipa nungar azufre ocai pĩrata vahe pipe. Ahe niha imoñuvirio manosa” ehi.

Tecua Jerusalén piasu

⁹ Evocoiyase ou ñepeí siete Tũpa rembiguai pãhu pendar acoi siete tupri ñgua riru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecuara ñua omenda vahevi ndeu, Ovesami rembirecovi” ehi. ¹⁰ Evocoi che quer nungar pipe Espĩritu osepia uca vahe cheu, che reraso ivitri guasu ivate vaheavesa. Aheve amboyecuara tecua guasu Jerusalén nimarai vahe cheu, ogüeyi vahe Tũpa sui. ¹¹ Ahe tecua sendí iteanga Tũpa rendigüer pipe. Sendigüer evocoiyase oyoya tupri ita iporañete vahe rese, oyoya avei ita jaspe serer vahe ipĩrerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoiyase ñepeí-peí Tũpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi oquenda añihivei coti, mbosapi norte coti, mbosapi irohi coti iyavei mbosapi caharu coti no. ¹⁴ Tecua guasu ñchisa vireco doce tupri ita imoviracuasa. Ahe sese evocoi doce tupri yuvirecoi vahe Ovesami apóstol rer icuachiasa yuvireco.

¹⁵ Evocoi Tũpa rembiguai oñehe vahe cheu vireco vara oro apopri tecua rãha ñgua, opacatu soquendipi rãha ñgua, ñachisa rãha ñgua avei no. ¹⁶ Tecua guasu pucucuer oyoya tupri ipigüer rese. Evocoiyase Tũpa rembiguai osãha tecua guasu ruvichagüer; osãhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pãve tupri ité no. ¹⁷ Ipare osãha ñchisa: osãhase ipigüer sesenta y cinco metro tupri. Evocoi Tũpa rembiguai osãha ava rembiporu pipe.

¹⁸ Tecua ñchisa ahe ita porañete vahe Jaspe serer vahe apopri; tecua evocoiyase oro pãve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita tēi iporañete vahe pãve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónice; imoñepeí ovasa, cornalina; imoñuvirio ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirio yovaivesa, amatista. ²¹ Doce tupri vahe oquenda guasu ahe doce tupri mbohír; ñepeí-peí

oquenda ñepeí mbohir sui yapopri. Calle guasu tecua aviter rupindar evocoyase oro pãve, inungar vidrio yande porêhi tupri vahe ipipe.

²² Ndasepiai eté evocoi tecua guasu pipe ñepeí yepe tũparo. Esepia niha, yande Yar Tũpa mbahe mboavaisarêhi, Ovesami reseve yuvirecoi aheve. ²³ Evocoi tecua guasu ndovireco iri eté ari, yasi güesape ãgua. Esepia niha, Tũpa ité osesape güendigüer pipe, iyavei Ovesami tataendi nungar secói aheve yuvirecoi vahe upe. ²⁴ Sendigüer ovesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru ombahe eta porañete vahe yuvireco chupe. ²⁵ Evocoyase soquendipi nimboyasai chietera ari yacatu rupi. Pĩtu ndipoi chiveira aheve. ²⁶ Ipare opara aheve ambuae tecua mbahe eta, porañete vahe omingue yuvireco; ²⁷ ava angaipa viyar rumo, Tũpa remimbotarêhi oyapo vahe, iporombopa serai vahe, ahe ndoyuviroiquei chietera aheve. Ëgüe ehi rumo acói ava vireco vahe güerer icuachiapri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Tũpa rembiguai omboyecua iai tecovesa resendar cheu, tĩpiu, oyecua tupri, osê vahe Tũpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ivira tecovesa resendar, iha vahe doce yupagüer rupi ñepeí araviter pipe. Iyavei evocoi ivira no aviye ai ava opacatu rupindar mbogüera ãgua. ³ Ndipoi chietera aheve que mbahe tẽivri pendar. Tũpa renda porañete vahe iyavei Ovesami renda avei chinira evocoi tecua guasu pipe. Aheve sembiguaí eta omboeteira yuvireco. ⁴ Osepia sova iyavei virecua serer osiva rese yuvireco. ⁵ Aheve ndipoi chietera pĩtu, iyavei ava aheve yuvirecoi vahe ndosecai chietera tataendi. Ndosecai chiveira que ari güesape ãgua yuvireco. Esepia niha, yande Yar Tũpa teieté ovesapera. Ipare ahe ava mborerecuar apirêhi vaherã ité yuvirecoira sese.

Cõimi eté Jesucristo yevi ãgua

⁶ Ipare Tũpa rembiguai aipo ehi cheu: “Co ñehesa supi tupri vahe ité, sese iya ité peyeroya. Iyavei yandé Yar Tũpa acói omboyecua tupri vahe mbahe oyesuindar oñehe mombehusar upe, ahe ombou güembiguaí iva pendar mbahe omboaviye poyava voi vaherã mboyecua ãgua viroyasareta upe” ehi.

⁷ “iAyevi poyava voira curi! ¡Sorivete catura acói ava viroya vahe ñehesa Tũpa suindar mbahe oime vaherã resendar co cuachiar pipe!” ehi.

⁸ Che, Juan, asepia iyavei asendu ité co mbahe. Sendu pare voi, añenopiha evocoi Tũpa rembiguai rovai imboetei ãgua viña. ⁹ Ahe rumo aipo ehiño cheu: “Ani ereñenopiha che rovai. Esepia niha, che Tũpa rembiguai tẽi aico, nde nungar, nde rivireta nungar avei evocoi oñehe vahe Tũpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tũpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tũpa suindar mbahe oime vaherã resendar sereco, evocoi icuachiapri cuachiar pipe. Esepia niha, ari cõimi secói imboaviye ãgua. ¹¹ Acoi ava mbahe tẽi aposar, toyapoño mbahe tẽi; iyavei acói ava seco rai vahe, taseco raño ité oico; acói ava seco tupri vahe rumo, ahe toyapoño mbahe tupri oico; iyavei acói ava Tũpa upe oyemondo tupri vahe ité, ahe taseco tupriño avei oico chupe” ehi.

¹² “Supi eté ayevi poyavara, iyavei arura mbahe porrecosa ñepeí-peí ava rembiapogüer rupi-rupi amondo vaherã chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apirêhi vaherã” ehi.

¹⁴ “Sorivete catura acói ava omoatiro vahe güecocuer. Esepia, ahe oipisira ivira ha tecovesa apirêhi vahe resendar. Ipipe sui oiquera tecua guasu pipe. ¹⁵ Ava rehii ndiporeroyai vahe rumo opitapara ocarve tẽi yuvireco, iyavei ava ipaye serai vahe, oyemboaguasa-guasa tẽi vahe, oporoyuca vahe, mbahe rahanga upe tẽi oyoerqui vahe, iyavei opacatu ava oipota rai vahe oporombopa-mbopa tẽi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico inungar yasitata guasu sendi vahe añihiveindar no” ehi cheu.

¹⁷ Espiritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acói ava osendu vahe iñehe, “¡Perio!” tehi ambuae ava upe yuvireco. Iyavei acói ava ihusei vahe, toyogüeraño; acói ava oipota vahe, toipisi i tecovesa resendar ndasepi vahe yuvireco.

¹⁸ Opacatu acói ava osendu vahe co ñehesa Tũpa suindar mbahe oime vaherã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapri iri vahe, ahe chupe Tũpa omboyeapri aveira co cuachiar pipendar mbahe-mbahe tẽi imombehupri. ¹⁹ Amove que ava virocua vahe co cuachiar

pipe sui ñehesa Tũpa suindar, Tũpa avei evocoyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ëgũe tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.